




**Hikayat
Meudeuhak**



Ramli Harun

Milik Departemen P dan K
Tidak diperdagangkan
Untuk umum



Rektorat
Kebudayaan


Departemen Pendidikan dan Kebudayaan



7977
Mik

Hikayat MEUDEUHAK

Dialihaksarakan oleh
RAMLI HARUN



TANGGAL	INDUK
18 NOV 1984	1678

Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1983

Diterbitkan oleh
Proyek Penerbitan Buku Sastra
Indonesia dan Daerah

Hak pengarang dilindungi undang-undang

KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahannya pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seiring dengan pertimbangan tersebut di atas, kami sajikan pada kesempatan ini suatu karya sastra daerah Aceh, yang berasal dari Pusat Dokumentasi dan Informasi Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1983

Proyek Penerbitan Buku Sastra
Indonesia dan Daerah

DAFTAR ISI

Pengantar	7
Ringkasan	9
Sikrak Haba nibak Peungarang	15
1. Syarat Jeuet keu Raja	19
2. Raja Wadiharah ngon Meudeuhak	23
3. Inong si Bungkok Jicok le Pancuri	34
4. Dua Droe ma Meureupah Saboh Aneuk	44
5. Haba Pancuri Peudati	49
6. Raja Wadiharah Ujoe Eleumee Meudeuhak	53
7. Meudeuhak Tinggai Sajan Raja	72
8. Ceulaka Bahgia Han Jeuet Meusapat	83
9. Raja Wadiharah Meukawen ngon Kaseumi Diwi	93
10. Meudeuhak Meunikah ngon Siti Amrak	119
11. Conto Teuladan Raja-raja	152
12. Meudeuhak Keunong Fitnah Guree peuet	161
13. Guree Peuet Keunong Taki Siti Amrak	182
14. Nasihat Diwatu keu Raja Wadiharah	198
15. Wadiharah Peujok Nanggroe Bak Meudeuhak	218
16. Prang Watu Keusa	239
17. Prang Watu Keudua	265
18. Tamse Meudeuhak deungon Raja	280
19. Proe Hai Raja Ade ngon Raja Lalem	294
20. Han Jeuet Tapateh Haba Siree	317
21. Prang Panca Larah	338
22. Raja Sumbang Hiran Meunyeurah	368

PENGANTAR

Menurut Dr. Snouck Horgrunye, hikayat Meudeuhak merupakan versi Aceh dari hikayat Melayu "Masyhudulhak" dan pernah diterbitkan oleh G.A. Kolff tahun 1882. Beberapa cerita dalam hikayat ini telah dihilangkan dan sebaliknya telah ditambah dengan beberapa cerita lain oleh penulis dalam bahasa Aceh. Hikayat ini lebih merupakan kumpulan anekdot dari pada sebuah roman.

Naskah ini kami dapati dari pusat Dokumentasi dan Informasi Aceh bulan Juni 1982. Ditulis dalam huruf Arab bahasa Aceh dengan ukuran naskah 20 x 14 CM dengan tebal 342 halaman. Di halaman terakhir tercantum nama pemilik naskah yaitu Teungku Akob Gampong Blang Panyang Meunasah Baro. Pnyalin menyatakan tidak mau menyebutkan namanya karena malu. Hal semacam ini umum terdapat dalam hikayat Aceh. Namun ia mencantumkan hari selesainya penulisan yaitu hari Sabtu tanggal 15 Zulkaidah 1333 H bertepatan dengan 25 September 1915.

Kami telah berusaha mengalih aksarakan hikayat yang cukup terkenal ini ke dalam huruf latin dengan memberikan sekedar ringkasan cerita dalam bahasa Indonesia. Mudah-mudahan ada gunanya bagi pencinta dan peneliti kesusasteraan Aceh. Untuk memudahkan pembaca mengikuti hikayat yang panjang ini kami telah mencoba membaginya ke dalam beberapa judul isi.

Kepada bapak Aboebakar dan Drs. Wamad Abdullah dari pusat Dokumentasi dan Informasi Aceh yang telah banyak membantu kami dalam memberikan informasi mengenai naskah hikayat Aceh serta meminjamkan beberapa naskah untuk di foto copy, kami ucapkan banyak terima kasih.

Jakarta Februari 1983
Ramli Harun

RINGKASAN HIKAYAT MEUDEUHAK

Hikayat ini menceritakan bagaimana kedudukan seorang raja yang cerdas sehingga negeri menjadi aman dan makmur, dan bagaimana pula jika seorang raja yang tidak berilmu yang akhirnya membawa kepada kehancuran.

Negeri Watu amat terkenal karena diperintah oleh seorang Sultan yang cerdas dan taat kepada agama bernama Wadiharah. Seorang kadi bernama Bangka Sakti datang ke negeri Watu mengunjungi seorang saudagar kaya bernama Syadar Bali. Disana kadi itu berkenalan dengan putri Rakna Kasan yang kemudian menjadi isterinya. Dari perkawinan ini Bangka Sakti memperoleh seorang putra dan diberi nama Meudeuhak.

Bagian berikutnya hikayat ini menceritakan beberapa cerita pendek antara lain cerita si Bongkok dengan pencuri, cerita dua orang ibu memperebutkan seorang anak, dan cerita setan mencuri pedati. Dalam cerita-cerita itu Meudeuhak berperan sebagai seorang hakim yang dapat memutuskan berbagai perkara dengan tepat.

Adapun raja Wadiharah bersama empat orang guru ahli ingin menguji kepintaran Meudeuhak yang baru berusia tujuh tahun. Beberapa masalah ditanyakan kepada Meudeuhak dan semua dapat dijawabnya dengan benar. Ketika raja meminta supaya Meudeuhak memindahkan sebuah gunung ke dalam kota, Meudeuhak menyanggupinya dengan syarat raja dapat menyediakan tali yang cukup kuat untuk menarik gunung itu.

Meudeuhak tinggal di istana mendampingi raja. Ke empat orang guru selalu berusaha untuk menjatuhkan Meudeuhak, namun selalu pula gagal berkat kecerdikannya.

Diceritakan pula seorang pemuda jahat yang meninggalkan isterinya yang setia bernama Kaseumi Diwi yang kemudian menjadi isteri raja Wadiharah. Putri tersebut anak dari seorang guru terkenal bernama Diwa Sakti yang masih berhubungan famili dengan raja Wadiharah.

Meudeuhak akhirnya kawin dengan seorang gadis pilihannya

bernama Amrak. Gadis ini sudah diuji kesetiannya. Usaha menjatuhkan Meudeuhak oleh empat orang guru raja selalu gagal dan karena pengaruh Meudeuhak makin besar di kalangan istana, timbullah berbagai fitnah dari mereka. Tetapi pada suatu waktu, berkat kecerdikan Amrak, ke empat guru itu dibuktikan bersalah sehingga mendapat hukuman dari raja. Mereka diarak di muka umum.

Pada suatu ketika raja Wadiharah diuji oleh Diwatu. Diwatu ialah makhluk halus yang datang menjelma dalam bentuk seorang laki-laki apabila raja bertindak keliru. Beberapa pertanyaan diajukan kepada raja Wadiharah. Dengan bantuan Meudeuhak raja dapat menjawab semua pertanyaan Diwatu. Kemudian Diwatu mengatakan bahwa seorang raja dapat bermegah-megah apabila mempunyai seorang tua yang bijaksana sebagai penasihat dan seorang hartawan sebagai teman dekat. Disamping itu seorang raja harus cinta kepada alim ulama.

Oleh karena Meudeuhak terbukti cakap dalam memutuskan perkara, maka raja Wadiharah menyerahkan urusan pemerintahan kepadanya. Dibawah pimpinannya negeri menjadi maju dalam segala lapangan.

Tersebutlah raja Sumbang Hiran dari negeri Panca Larah. Raja yang mempunyai kekuasaan besar ini sudah menaklukkan negeri Banua Sarah dan Padang serta mengalahkan raja Drama dan raja Kubat. Giliran berikutnya ia menyerang negeri Watu. Selama tujuh tahun ia menyerang namun akhirnya ia harus mengakui keunggulan Meudeuhak.

Pada bagian akhir hikayat, Meudeuhak menceritakan kepada raja Wadiharah beberapa pengalamannya dalam menyelesaikan perkara yang dapat menjadi suri teladan bagi setiap orang. Ia menasehati Wadiharah supaya dalam memerintah lebih banyak berhubungan dengan alim ulama.

Raja Sumbang Hiran yang kalah perang dengan Meudeuhak mengatur siasat baru. Raja Wadiharah dipancing dengan gadis-gadis cantik, termasuk putri raja Sumbang Hiran sendiri yang bernama Rak Keubandi. Meskipun Meudeuhak sudah menasehati agar tidak pergi ke negeri Panca Lara, namun baginda pergi juga

karena tertarik oleh Rak Keubandi. Ternyata Sumbang Hiran sudah merencanakan pembunuhan terhadap raja Wadiharah. Untunglah siasat ini dapat diketahui oleh Meudeuhak sehingga raja Wadiharah selamat dan dapat mempersunting putri Rak Keubandi. Raja Sumbang Hiran menyerah dan mendapat nasehat dari Meudehak.

Kendali pemerintahan negeri Panca Larah diserahkan kepada Meudeuhak. Sesudah semuanya diatur sebagaimana mestinya, Meudeuhak dan raja Wadiharah pulang ke negeri Watu.

Hikayat
MEUDEUHAK

HIKAYAT MEUDEUHAK

Bismillahirrahmanirrahim

SIKRAK HABA NIBAK PEUNGARANG

Bismillahi ulon pufon
Lon tueng turon ubak Allah
Beureukat mukjizat Nabi Muhammad
Panghulee umat nyang that meugah

Bismillahi nyan nama zat
Le beureukat soe tem kisah
Rahman rahim kalimah that
Limpah rahmat sangat murah

Lam donya nyoe sifeuet rahman
Rahim Tuhan akhirat sah
Neugaseh hamba nyang mukmin
Nama rahim sidroe Allah

Ateueh ureueng nyang muslimin
Beu tayakin nyoe lon peugah
Kafe 'asi dara agam
Dalam jahannam jih geukeubah

Keukai sinan baranggajan
Dalam jahannam apui mirah
Seumbahyang han puasaji tan
Ikot setan sitree Allah

Baranggasoe han tem seumbahyang
Page abang meuh at sosah
Lam nuraka jih meulanglang
Han seumbahyang seubab malah

Geuboh rante deungon kangkong
Meunan untong meureuka Allah
Lam beulangong keunan geusurung
Hana untong nibak Allah

Lheueh lon seubot nama Rabbi
Lafat puji keu Po tallah
Alhamdulillahil lazi
Milek Rabbi ilmu syahadah

Lheueh lon pujoe Po lon Rabbi
Seulaweuet keu Nabi Rasulullah
Salli wa sallam ya Rabbi
Alan Nabi habibillah

Muhammadin wa alihi
Wa sahbihi ajma'ina
Lheueh seulaweuet deungon pujoe
Tango adoe ulon kisah

Lon surat fon uroe Rabu
Pada waktu hari seugalah
Lon boh badai laen aju
Nyoe sigentu ulon kisah

Nibak lon duek lon meututo
Ulon ato ban nyang leumah
Dalam hate lon teusawo
Ulon aju boh khuteubah

Keureutah keumang daweuuet pucat
Lon seumurat hana cidah
Eleumee lon mit akai singkat
Kureueng ingat ulon sosah

Han timang bungong tanjong
Sirong ujong habeh bicah
Ulon harap Tuhan tulong
Neubri untong beu meutuah

Beu Po tallah bri seuleusoe
Hikayat nyoe lon seuleuah
Ngon mukjizat tanglong nanggroe
Beu seuleusoe surat cidah

Seubab le that soe meurindu
Hate seuu hireuen dasyah
Lon surat nyoe kon keu cangklak
Seubab galak Nyak Akob meutuah

Si Nyak Akob nyang po surat
Tulong siat soe tem peugah
Lon yue peugat hikayat nyoe
Kareuna kamoe hireuen dasyah

Seubab hana lam gampong nyoe
Keumeung meurunoe keu naseukah
Meunyo meunan wahe adoe
Lon peugot nyoe barang mudah

Kareuna ulon hana teutap
Lam meukarat hate sosah
Gampong di lon Cot Srohani
Mangat taturi nyak meutuah

Tiba-tiba teukeudi Allah
Lon meunikah ngon sidroe zeejah
Sepkeu 'oh noe haba rawi
Bek he akhi panyang kisah

Keu geulantoe babah cangklak
Tuto bijak sangat indah
Lhee ploh pasai lon boh sinoe
Keu lon adoe beu tapeugah

Beu Tuhan bri hajat sampoe
Karangan nyoe lon seuleuah
Pasai nyang fon sahbat sulotan
Keu peungajaran ulon kisah

I. SYARAT JEUET KEU RAJA

Beu na tathee wahe teelan
Beu tatuban syarat khalifah
Kuruk muluk ngon sulotan
Adoe bangsawan nyoe lon peugah

Makna muluk saboh kalim
Meunan ladem bak geupeugah
Nyang peugot saboh kalem
Bani Hasyem nyang that meugah

Miseue umpama nan baladan
Panyang han ban tajak payah
Sireutoh thon peurjalanan
Meunan teelan lon boh surah

Saboh pulo saboh sulotan
Akalem nyan ka lon peugah
Syirekpi mee keu sulotan
Laen nibak nyan jeuet khalifah

Syarat raja beu na ade
Bek ngon jahe han jeuet khalifah
Eleumee beu le lagi ngon ade
Dalam rawi meunan kisah

Bek lagee ureueng ka'ak
Nyang ejeumak tan faidah
Nyang tan akai ulon tamse
Kata rawi dalam khutbah

Hana sapeue di jih meukri
Ruda-rudi hana ifah
Han jitukri batang balek
Hana lisek meung ube drah

Hana rasyid ngon ceureudek
Gadoh cantek teuka gundah

Lagee sigo gajah pajoh
Han sapeue roh meunan surah
Pihak han meu'oh mameh han roh
Hana utoh bak seumeugah
Meunan miseue tan bicara
Ubak gata nyoe lon peugah

Na tamse rang tumpang bara
Beuthat raya han jipeugah
Brat han meuri fui han mupat
Seubab siat teuka sosah

Narit saket deungon mangat
Han jitupat 'oh tapeugah
Tapeurunoe hana meunyum
Baraggadum taseuleuah

Peue nyang takheun han jitem duek
Hana meurok nyang tapeugah
Lagee taple ie bak on eumpeuek
Barangdum tapeuek hana basah

Miseue taple ie ubak batee
Meunan lagee ka lon peugah
Teungoh taple ie meuree-ree
Ateueh batee taeu basah

'Oh taminah batee ka tho
Bak si pungo peue na leumah
Hana akai lagipi klo
Hana hiro meung ube drah

Beuthat alem hana guna
Nyan umpama ka lon peugah
Eleumee le amaiji hana
Sia-sia tan faedah

Na miseue ban nyan keuleude
Kitab jime that barollah

Dalam kitab hana jitukri
Meung jigari badan payah

Hana sapeue na meunguna
Ngek-ngok nyang na deungon reuah
Meuseue narit lam Quran
Firman Tuhan kalamullah

Kamisli himar yahmilu asfar
Kheun Tuhan dalam risalah
Ban keuleude kitab sajan
Akaiji tan meung ube drah

Nyang tan akai meunan mise
Beu tapike nyang lon peugah
Tameututo ngon si jahe
Siploh kri tan faidah

Tameututo ngon si ceureudek
Sang geupeuek bintang cidah
Saboh tamse le ho balek
Seubab lisek jeuet jipeugah

Miseue raja hana akai
Seubab beubai teuka sosah
Baranggaho geuboh misai
Akheji hai teuka teulah

Meung hana got akai raja
Sagai hana di jih meugah
Nyang na lahe cit keu hina
Gop ceureuca jeuheut leupah

Raja di Rom meugah han soe
Cit geupujoe meusyehurah
Seubab akai baek han soe
Lom ngon budoe sangat indah

Meunan nyang got barangasoe
Dalam nanggroe dum khalifah

Meuraja got jroh le nanggroe
Reseuki troe karonya Allah

Meujeuheut raja reseuki kureueng
Teuka ngon khueng tanohpi crah
Pade han jeuet udep naleueng
Habe kingkeueng dum blah bicah

Nyankeuh tanda raja suang
Han seumbahyang ngon seudeukah
Seubab akaiji meulanglang
Keudeungaran meusyehurah

Han jipike uroe dudoe
Meugriet han soe raya sosah
Meung tan amai lam donya nyoe
Page dudoe timplak Allah

Nyankeuh raja paleh bulat
Hana sapat na meutuah
Di jih akai lagee bangsat
Han ibadat keu Po tallah

Meunan nyang got pie raja
Beu takwa nyan keu Allah
Nanggroe meunang hana goga
Seubab raja that meutuah

Di baroh angen le that raja
That dorhaka keu Po tallah
Jeuep-jeuep sagoe 'a-'u dawa
Manusia le that salah

Jeuetkeuh dumnann lon calitra
Saboh leua ulon peugah
Pasai nyang fon 'oh noe reuda
Nyang keudua ulon kisah

II. RAJA WADIHARAH NGON MEUDEUHAK

Pasai keudua ulon seubot
Lon boh meukeusud keu hikayat
Sulotan ade hana karot
He adoe cut ulon peugah

Nanggroe watu teumpat keurajeuen
Meunan geukheun dalam kisah
nanggroe rame hana peue kheun
Sangat hireuen tadeungo gah

Raja ade hana padan
Geurasi nan Wadiharah
Akaipi jroh hana bagoe
Baek budoe rupa indah

Neukeurajeuen peugang nanggroe
Ceureudek han soe bijak leupah
Nanggroe rame agama kukoh
Han ek musoh keunan leupah

Lada pineueng nanggroe jeuh
Keunan dum troh han teupegah
Hukom ade hana tara
Ban sineuna dum that meugah

Nanggroe aman rame banda
Meuneukat geuba dumpeue mudah
Seubab ade that sulotan
Meuneukat sinan dumpeue murah

Nanggroe laen teuka keunan
Peurdagangan ajab indah
Meusyeuhu gah barat timu
Raja makmu kaya limpah

Peurangui jroh geumaseh that
Han tom rakyat na meusalah

Nanggroe laen me meuneukat
Timu barat keunan singgah

Nanggroe Hindi tangoe u Kleng
Hana bandeng sangat indah
Hingga meugah nanggroe aseng
Troh u Teubeng raja meugah

Sidroe kali badai sulotan
Bijak han ban areh billah
Ceureudek that hana padan
Le ambilan sinan leumah

Eleumee tumbak eleumee alat
Eleumee peurasat nyang that meugah
Laen nibak nyan alem syeedaga
Le areuta sangat limpah

Bangka Sakti geuboh nama
Lam calitra meunan leumah
Dalam duson teumpat diaman
Jarak han ban ngon Wadiharah

Di pucok krueng Utusilan
Rame sinan dumpeue mudah
Alempi na areutapi le
Hireuen tahe taeu indah

Tuha muda keunan meuhimpon
Dalam duson nan Kariah
Nanggroe aman jroh meuturon
Ban sigala don keunan dasyah

Padum lawet nyang mumeunan
Lheueh nibak nyan teukeudi Allah
Bak siuroe peurheuntian
Peurdawaan bak peuratah

Teupike lam hate kali
Lon peureugi nibak reelah

Lon ziarah Syadar Bali
Kalon neugri sinan dasyah

Beudoh le Bangka Sakti
Neupeureugi lanja ka leupah
Bak syeedaga Syadar Bali
Kawom lagi ngon Kariah

Wareh kawom ban sineuna
Dum syeedara nyan kafilah
Ban sare troh keunan safa
That mulia geupeuindah

Syeedaga kheun pumeulia
Meuhaba ngon Hazariah
Mumat jaroe dum seureuta
Kali raja Wadiharah

Geuleueng tika bak duek jamee
Meunan lagee dum peurintah
Geusie keubeue lumo lagi
Bubiri kameng ngon kibah

Sare hase ngon khanduri
Geuboh lagi bandum sudah
'Oh lheueh makeuen cok hidangan
Beuet puan ngon keukarah

Dalam ranup ka haselan
Seukalian dumpeue sudah
Tujoh uroe sinan lama
Bak syeedaga geupeuindah

Bangka Sakti lom meuhaba
Deungon syeedaga Syadariah
Bangka Sakti kheun meukawen
Rindu meusyen hate dasyah

Deungon aneuk puteh licen
Hana laen nyan keu zeejah

Aneuk syeedaga saboh putroe
Hana bagoé rupa indah

Cahya badan ban meuk uroe
Cahya gigoé ban meuh meuntah
Rakna Kasan geuboh nama
Indah rupa han jeuet peugah

Aneuk syeedaga baek rupa
Kali raja heundak peunikah
Yoh nyan syeedaga idin neubri
Deungon kali geupeunikah

Deungon putroe Rakna Kasan
Keurelaan hate dasyah
Syiah neukheun le lafa . waki
Nibak wali nyang ka sudah

Di hadapan Bangka Sakti
Bismillahi walhamdulillah
Bangka Sakti kabui sigra
Neukheun lanja lafat nikah

'Oh lheueh kabui sigra-sigra
Baca do'a uleh syiah
Teutap sinan Bangka Sakti
Bak esteuri hate dasyah

Padum lawet neubeureunti
Troh esteuri judo zeejah
Jak tueng putroe Rakna Kasan
Dumna sajan rakyat barollah

Ka neudame 'oh troh keunan
Rakna Kasan rupa indah
Ngon peurumoh nyang ka lawi
Bangka Sakti hate dasyah

Lheueh nyan geuba Rakna Kasan
Uleh tuan Siti Rukhah

Gaseh hate galak han ban
Dua sajan han tom mubantah

Sabe madu hate suka
Han tom dawa meung ube drah
Bandua boh adab jibri
Keu suami hate dasyah

Hana aneuk bandua si
Kheundak Rabbi Po lon Allah
Umu sithon ka troh keunan
Rakna Kasan hame sudah

Dua sapat ngon madu nyan
Lam seunangan hana sosah
Sikureueng buleuen hame putroe
Nyata dudoe budak indah

Neubri aneuk ureueng lakoe
Ateueh bumoe.rupa cidah
Ban keulua geupeusuci
Bangka Sakti hate dasyah

Taeu rupa budiadari
Bangka Sakti gadoh sosah
Tujoh uroe geukhanduri
Seutot faki dumna syiah

Habeh meuhimpon dumna wali
Lheueh khanduri bri seudeukah
Lheueh khanduri rakyat jiwoe
U rumoh droe maseng leupah

Tinggai aneuk ureueng lakoe
Hana bagoe rupa indah
Nan Meudeuhak le neurasi
Dan lagi ngon Siti Rukhah

Meudeuhak cut sajan ibu
Seun sigentu le ho ubah

Marit utoh mangat ngon su
Na ban laku rupa indah

Ho siuroe maken leubeh
Tamse bijeh pula sudah
Peurangui jroh hate saleh
Han tom neuweh sajan ayah

'Oh troh umu ake baleh
Maken leubeh hate dasyah
Meutamah jroh lagi saleh
Akai leubeh that meutuah

Bangka Sakti bri dendayang
Soe peutimang Meudeuhak indah
Neupeurunoe pat nyar. 3 alang
Bak dendayang Sakti peugah

Ho siuroe leubeh cantek
Akai baek le peue leumah
Meutamah akai dum nyang baek
Meudeuhak lisek bijak leupah

Jeuet mubileueng muda cantek
That ceureudek lom meutuah
Ka dua thon umu sampoe
Bak siuroe teukeudi Allah

Bangka Sakti pike sidroe
Ulonteu nyoe that meutuah
Beu Po tallah bri seuleusoe
Intat jinoo ubak syiah

Bak peundita neujak jinoo
Keunan sampoe neumeulangkah
Ubak syiah Meudeuhak neuba
Neuek lanja u meunasah

Meuteumee syiah dalam musalla
Sakti peuhaba le neupeugah

Nyoe meudeuhak teungku pubeuet
Nyang meukeusud ulon peugah

Beu le do'a aneuk lon cut
Teungku pubeuet ngon ijazah
Lheueh meuhaba Sakti neuwoe
U rumoh droe ubak zeejah

Ban sare troh ubak putroe
Neukheun meunoe Sakti peugah
Aneuk geutanyoe kuyue aja
Bak peundita nyan lon keubah

Kuyue pubeuet bak ulama
Ube kada na ijazah
Ban majih ngo haba meunan
Rakna Kasan kheun meutuah

Teutap Meudeuhak bak ulama
Beuet meungaja sinan dasyah
Neupeurunoe le ngon aleh ba
Jeuet le lanja budak indah

Hingga tamat beuet Quran
Laen nibak nyan dum risalah
Eleumee fiqih habeh neutuban
Eleumee Quran qari cidah

Eleumee nasufi eleumee laduni
Eleumee ma'ani jeuet di babah
Eleumee saraf deungon nahu
Nyanpi teungku habeh sudah

Eleumee hisab eleumee falak
Eleumee tumbak nyanpi leupah
Eleumee peurapat sangat bijak
Utoh Meudeuhak sangat indah

Umu dua thon Meudeuhak beuet
Dum habeh jeuet eleumee Allah

That ceureudek eleumee jeuet
Lheueh neupubeuet uleh syiah

Padum lawet sleueng beureunti
Bangka Sakti pangge syiah
Bri makanan neukhanduri
Bangka Sakti bri seudeukah

Padum ija meukeukudi
Dalam peuti zahab peuhah
Habeheh cukup balatandra
Ringget raya meuh nyang mirah

Laen salen ija sutra
Kasap Roma dum meutatah
Lheueh khanduri teuma neuwoe
Neupeujaroe ngon seudeukah

Peundita tren lanja sidroe
Ka troh sampoe u meunasah
Meudeuhak tinggai sajan ibu
Seun sigeutu le ho meugah

Bijaksana hana laku
Soe eu rindu hate dasyah
Bangka Sakti eu Meudeuhak
Sangat bijak hana tiwah

Sakti tahe kalon Meudeuhak
Hate galak hireuen dasyah
Jeuet neuhukom ureueng lingka
Ngon seuksama Meudeuhak peujeulah

Hana sagai suai dawa
Siat leungka hukom Allah
Teuma meusyeuhu le u lua
Utoh han sa Meudeuhak cidah

Reusam kanun dum neutukri
Diseuto neugri nyan neupeugah

Uruf adat Meudeuhak sudi
Sep seukali hana sosah

Meudeuhak hukom rakyat lam duson
Keunan jitren dum barollah
Habe bandum keunan jitren
Meudeuhak hukom dum neupeujeulah

Meuthee Meudeuhak nanggroe aseng
Troh nanggroe laen geuthee meugah
Rupa baik badan leunteng
Hana bandeng sapat leumah

Jimat dawa peurhukoman
'Oh troh keunan cit ka sudah
Di gop laen han jeuet meunan
Tan ambilan hana leumah

Hana akai ngon seunuban
Keusukaran bak jipeugah
Bak Meudeuhak han sukaran
Le ambilan rot neupeujeulah

Jeup-jeup gampong geuthee Meudeuhak
Sangat bijak that geupeugah
Hukom ade nyang mustahak
Utoh Meudeuhak areh billah

Meudeh meunoe gop calitra
Troh bak raja Wadiharah
Meusyeuhu Meudeuhak bijaksana
Ubak raja Wadiharah

Raja mupakat deungon guree
Neukheun lagee meunoe titah
Hoka teungku lon nyang guree
Narit nyang mee saboh patah

Lon ngo Meudeuhak sangat lisek
Akai baik dum peurintah

Bijaksana lom ceureudek
Sasat sidek hukom Allah

Marit utoh hana bagoe
Lon yue keunoe tapeudasyah
Meunan haba lon ngo bunyoe
Bijak han soe bak geupeugah

Ulon yue tueng keunoe dilee
Taeu lagee pakri ulah
Bah tacuba ujoe eleumee
Jeuet keu guree hamba Allah

Ceureudek that hana lagee
Utoh teurajee hana salah
Bijaksana le eleumee
Jeuet keu guree na soe peugah

'Oh troh Meudeuhak keunoe tapuwoe
Jeuet keu meuntroe wadi peugah
Guree peuet droe seuot meunoe
Tango kamoe nyan mupeugah

Hana ceureudek Meudeuhak nyoe
Tan jitupeue dum kaidah
Akai bicara hana pindoe
Suson pudoe le that salah

Hana budi bak meuseuke
Meudeuhak bineh gle uteuen luah
Tan jitupeue dum sigala be
Hana hase gadoh ilah

Bicara paneuk akai singkat
Hana horeumat nyang meutuah
Ban raja deungo haba meunan
Teuiem yoh nyan Wadahirah

Teuma meututo di Aja San
Aja Diwan nyang seumeugah

Aja Peurkasa ban peuet sajan
Geukheun yoh nyan narit nyang sah

Aja Diwan peugah haba
Duek dum sajan mita ilah
Beukit geuba Meudeuhak keunoe
Teuboh geutanyoe tan faidah

Raja han le geutueng geutanyoe
Akhe dudoe jeuet keu teulah
Ureuing tuha dalam nanggroe
Meudeuhak sidroe jipeuindah

Ngon Meudeuhak akaiji jroh
Tuto leumoh ladat indah
Jipeutaklok seun-seun sidroe
Geutanyoe dudoe jeuet keu leulah

Raja Wadiharahpi ka tuwo
Lheueh neudengo guree peugah
Meudeuhak han le neuhiro
Kakeuh tuwo guree peugah

Teutap neuiem poteu raja
Neudeungo haba guree peugah
Keunong kampak ka seungkala
Poteu raja han le sosah

Pasai nyang dua 'oh noe habeh
Laen ureh jinoe lon peugah
Pasai nyang lhee lon bri maklum
Wahe kawom deungo lon peugah

III. INONG SI BUNGKOK JICOK LE PANCURI

Dalam nanggroe Meudeuhak hukom
Ban nyang muphom masaalah
Kata syekh eumpunya rawi
Sidroe pancuri that beursalah

Suletpi that si baduwi
Akai jahe that bit salah
Akai jahe pancuri lom
Meudeuhak hukom laknat Allah

Dawa 'a-'u hana mufom
Dudoe hukom Meudeuhak peujeulah
Bak siuroe teukeudi Tuhan
Si Bungkok beurjalan deungon zeejah

Ngon isteuri jiba sajan
That analan rupa indah
Agam tuha inong muda
Jak meusafa geucok langkah

Meuikot-ikot cit bandua
Bak tuan tha geujak ziarah
Hingga troh u bineh sungoe
Bandua droe hireuen dasyah

Ie krueng tajam hana bagoe
Jikheun meunoe ubak zeejah
Bah tapioh siat sinoe
Ie lam krueng nyoe lon eu curah

Ngon lhok that tajam han soe
Mate geutanyoe sinoe reubah
Teuma leumah ureueng sidroe
Meurandeh sungoe jak that bagah

Si Bungkok hei tatueng kamoe
Bandua droe tapeuleupah

Hana dapat meubloh sungoe
Tarek ie nyoe curam leupah

Si Panyang deungo meunan bunyoe
Tren le lam sungoe pantah-pantah
Jeumeurang di dalam sungoe
Ureueng binoe jieu indah

Peurumoh si Bungkok that sambinoe
Ban meuk uroe cahya limpah
Teusyawe lam hate seundiri
Bah kutaki datok ayah

Ureueng tuha kucok esteuri
Jih kutaki kuboh salah
Baduwi tren dalam sungoe
Sira ji'eue badan reundah

Jijeumeurang sira ji'eue
Ie 'oh takue taeu leumah
Si Bungkok eu meunan lahe
dalam hate teusyawe leumah

Adat kubloh jadeh mate
Didalam ie sinoe reubah
Ureueng panyang troh bak lihe
Lhok that aye tajam curah

Troh si Panyang keunan hampe
Jipeugah le meunan ulah
Wahe polem gaseh sayang
Lon jeumeurang tapeuleupah

Meurandeh krueng lon jeumeurang
Heundak pulang rumoh ayah
Tapeuleupah uleh gata
Ban sikada lon bri upah

Kheun si Panyang ulonteu ba
Bek bandua pueh lon ilah

Kareuna ie tajam that raya
Meung bandua ulon sosah

Seun-seun sidroe ulonteu ba
Beudoh sigra lon peuleupah
Lon usaha bek meularat
Hana hajat lon tueng upah

Kareuna lon saboh alamat
Ube teupat kareuna Allah
Si Bungkok kheun bak esteuri
Jak hai po ti gata pantah

Bak teupat nyoe makam sunyi
Seubrang lagi keudeh leupah
Teuma jitren ureueng binoe
Dalam sungoe jijak pantah

Ngon baduwi bandua droe
Mat bak jaroe jipeuleupah
Jijeumeurang ie 'oh takue
Sira ji'eue laknat Allah

Si Bungkok tan jitupeue
Pancuri hue ubak zeejah
Troh dalam krueng si baduwi
Jisudi bak inong cidah

Meunoe jikheun le pancuri
Jeuheut bagi kutok Allah
Wahe peureumpuan muda baek
Sang polemték judo di kah

Badan bungkok hana cantek
Buet mubalek meunan surah
Kon tunangan gata putroe
Si Bungkok nyoe akai latah

Nyang got adoe tatueng kamoe
Si Bungkok nyoe bah takeubah

Han got rupa tuha kutok
Muda kamoe lagi indah

Nyo siwadan lon ngon gata
Bak ri rupa sare cidah
Keulakuan lahe nyata
Bak ri rupa sabe indah

Ureueng binoe kheun jianggok
Lakoe bungkok jitem keubah
Dalam hateji ka meurok
Keu si Bungkok han le dasyah

Teuma jikheun inong mante
Gata judo di lon cidah
Hana lon tueng bungkok piru
Kon sikufu bak lon leumah

Meunan jikheun inong laknat
Paleh bulat tan meutuah
Keu lakoe droe han le ingat
Galakji that nyan keu mukah

Troh u darat bandua droe
Aneuk bisoe laknat Allah
Di bineh krueng nyan jimanoe
Bandua droe hate dasyah

Lheueh jimanoe jipajoh bu
Si Bungkok eu hate sosah
Nyo han jitueng bak ri laku
Lheueh pajoh bu jijak leupah
Si Bungkok eu meunan lagee
Ka paleh kee tan meutuah
Ka roh bangke kujok bak asee
Bukon malee ulon teulah

Lheueh jipike meudeh meunoe
Tren lam sungoe bak ie curah

Bak jisangka ie lhok han soe
Deue han bagoe tanoh leumah

Si Bungkok teungoh u darat
Peucrok leugat jiseuleuah
Ban jikalon han le mupat
Troh bak teumpat saboh rumah

Si Bungkok plueng lom jikarat
Troh bak teumpat han le leumah
Jimeuhei ngon suara that
Tapreh siat bek jak pantah

Wahe judo ureueng binoe
Tapreh kamoe wahe zeejah
Teuma jiseuot ureueng binoe
Bukon kamoe peurumoh kah

Gata ngon lon kon tunangan
Peue ambilan nyan tapeugah
Badan bungkok akai meunan
Keulakuan that beurakah

Kheun si Panyang bek le haba
That ceulaka bak seumeugah
-Kheun si Bungkok bek meudawa
Kuteumee tanpa kuplah babah

Kheun esteuri lom beurkata
Kuat meudawa gata beurakah
Uroe nyoe fon lon eu gata
Takheun haba keu lon zeejah

Meunan narit inong ceulaka
Paleh raya jeuheut leupah
Si pancuri maba meuhukom
Jikheun jitren bak khalifah

Bak Meudeuhak jimaba tren
Si Bungkok kheun insya Allah

Fon si Bungkok peugah haba
Ngadu dawa bak seumeugah

Teungku ampon ka meudawa
Kamoe dua nyan mubantah
Esteuri lon nyan jimaba
Bukon jeumba di jih jipeugah

Buet si Panyang that ceulaka
Jeuheut raya kuat meurampah
Yoh nyan Meudeuhak duek beureunti
He baduwi keunoe meulangkah

Teuma beudoh si baduwi
Jipeugah kri meunoe ulah
Ureueng binoe nyoe esteuri di lon
Teungku ampon ka lon peugah

Du peukawen dilee ngon lon
Meunan bangon baduwi peugah
Ureueng deungo dong meususon
Dum meuhimpon rakyat barollah

Habeh narit baduwi pufon
Meudeuhak hireuen kalon leumah
Lom Meudeuhak tanyong meunoe
Bak ureueng binoe nyan neupeugah

Toh s'iami gata lakoe
Lam dua droe cuba peugah
Teuma seuot ureueng binoe
Si Panyang nyoe judo lon sah

Du peukawen lon saboh roe
Troh 'an jinoe hana ubah
Ureueng deungo dong meususon
Dum meuhimpon rakyat barollah

Lom Meudeuhak tanyong meunoe
Bak ureueng binoe nyan neupeugah

Toh suami ureueng binoe
Si Panyang nyoe judo lon sah
Nyo si Panyang judo kamoe
Nyankeuh lakoe ka lon peugah
Di nap rakyat meukeukatoe
Dum sinaroe deungo sudah

Meudeuhak cut panyang pike
Lom neusyawe akai leumah
Na bicara dalam hate
Neupeulahe lom neupeugah

Yoh nyan Meudeuhak lom meuhaba
Nyan neutanya bak baduwiah
Beukit sabet judo gata
Soe tuan tha nyan tapeugah

Soe nan ibu deungon bapa
Uleh gata nyan takisah
Peue nan nanggroe peue nan gampong
Peue nan ujong cuba peugah

Soe po teumpat deungon gampong
Soe po ujong taduek dasyah
Ban jideungo le baduwi
Iem beurdiri tan jipeugah

Hana sapeue jaweueb jibri
Meudeuhak sudi lom neupeugah
Lheueh nyan Meudeuhak hei si Bungkok
Beudoh datok keunoe langkah

Teuma beudoh dalem bungkok
Ka neuangkok leugat pantah
Supo esteuri ureueng binoe
Ubak kamoe nyan tapeugah

Kheun si Bungkok judo kamoe
Ka lheueh bunoe ulon peugah

Beukit sabet judo gata
Soe nan po ma deungon ayah

Soe po teumpat soe peutua
Tacalitra jinoe beu sah
Si Bungkok kheun le jiato
Rakyat tahe dum barollah

Meusoe bapak meusoe ibu
Keunong laku dum jipeugah
Meudeuhak khem leumah gigoe
Ban meuk uroe rupa indah

Meudeuhak tanyong bak ureueng binoe
Nyang toh lakoe takheun beu sah
Teuma seuot po sambinoe
Si Panyang nyoe judo lon sah

Beukit sabet judo gata
Soe nan po ma cuba peugah
Ban jideungo meunan haba
Teuiem lanja han jipeugah

Meudeuhak thee si Panyang baduwi
Jeuheut lagi that kreueh babah
Utohkeuh that peugah haba
Kameudawa hana payah

Dalem Bungkok ngadu haba
Riah raya bak seumeugah
Meudeuhak dra si baduwi
Limong reutoh kali ka keuh sudah

Ureueng binoe meunan lom lagi
Limong reutoh kali dara cidah
Yoh nyan Meudeuhak hei si Bungkok
Beudoh datok keunoe bagah

Hukom Meudeuhak ade han soe
Dalam nanggroe meusyehu gah

Meugah Meudeuhak that hana soe
Jeuep-jeuep nanggroe geuthee meugah

Nanggroe raya troh u Kansu
Nanggroe Watu Meudeuhak meugah
Bijaksana amat tahu
Meunan teungku dum geupeugah

Lom saboh treuk lheueh baduwi
Meudeuhak sudi lom mubantah
Jinoe lon boh kata rawi
Buet baduwi taisyarah

Beu taingat dum geutanyoe
Bak haba nyoe ulon r uguh
Sigala rakyat dum sinaroe
Lon peurunoe deungo beu sah

Bek bak mie tajok tikoh
Bek bak musoh rahsia keubah
Hana reumbang meunan taboh
Akhe bek roh jeuet keu salah

Bek bak si deuk tajok makanan
Bek taiman ureueng beurakah
Baranggadum le taiman
Keu gata nyan cit amarah

Meuh ngon pirak ureueng binoe
Lam alam nyoe le soe gagah
Puntong gaki patah jaroe
Han jitem troe nyan tateugah

Haba si Bungkok 'oh noe siat
Muwoe riwayat Meudeuhak inda
Lagi ade ceureudek that
Hana sapat nyang na salah

Meusyehu gah nanggroe aseng
Troh nanggroe Kleng geudeungo gah

Lagi baik rupa leunteng
Hana bandeng ban meuh meuntah

Yoh nyan Meudeuhak areh bijak
Kanak-kanak goh muminah
Meutroh umu ake baleh
Maken leubeh that lom meugah

Peurangui jroh hate saleh
Maken leubeh that meutamah
Kata syekh eumpunya rawi
Tadeungo kri lom kupeugah

IV. DUA DROE MA MEUREUPAH SABOH ANEUK

Bak siuroe Tuhan teukeudi
Rabbon 'Ali nyang peurintah
Sidroe inong muda seudang
Teubiet u blang ngon waladah

Jime aneuk dua ngon nang
U teungoh blang jimeulangkah
Tingkue aneuk meunoe macam
Ubak kulam rupa indah

Peuduek aneuk bineh kulam
Ie di dalam peunoh limpah
Jiheundak cok ie jiba^{wa}
Setan teuka keunan lantah

Rupaji ban aneuk dara
Ka jihila budak indah
Jicok aneuk jijak lanja
Iblich ceulaka laknat Allah

Ban maji eu budak jiba
Ka meudawa jeuet mubantah
Ka jipeucrok rijang-rijang
Di dalam blang jeuet ka gundah

Hoka gata dara bujang
Tame pulang aneuk lon sah
Seuot setan sigra-sigra
Aneuk hamba bukon di kah

Aneuk ulon kon di gata
Panyang haba that beurakah
Meuhila-hila reubot budak
Bak Meudeuhak jipeuseumbah

Jiyue hukom bak Meudeuhak
Keunan jijak jimeulangkah
Ban sare troh keunan hade
Jingadap le nyan jipeugah

Maseng-maseng kheun aneukda
Maji duka jimubantah
Yoh nyan Meudeuhak neuteumanyong
Ubak inong dua cidah

Supo aneuk kheun beu keunong
Ulon tanyong nyan tapeugah
Setan jaweueb rijang-rijang
Aneuk abang teungku meutuah

Neutanyong bak muda seudang
Kheun beu rijang soe tapeugah
Teuma seuot ureueng binoe
Aneuk kamoe budak indah

Rakyat deungo dum sinaroe
Hireuen keudroe sangat dasyah
Dua ibu aneuk sidroe
Dum sinaroe teuhah babah

Maseng-maseng kheun aneuk droe
Pakri bagoe bak peurintah
Meudeuhak pike ngon akai droe
Bahle meunoe kuseuleuah

Deungon akai areh pindoe
Meung aneuk droe jimupayah
Meukon aneuk han seuleusoe
Han peue bagoe le that ilah

Kupeuduek aneuk saboh teumpat
Timu barat maji siblah
Sireutoh deupa bek jarak that
Meunan adat ulon ilah

'Oh meusu gong jimeuplueng-plueng
Soe dilee tueng jeumbaji sah
Kheun Meudeuhak po nyan bulueng
Jijim neutueng dua sudah

Ureueng binoe jikabui le
Hukom gede areh billah
'Oh meusu gong jinoe lagi
Bandua si jiseuleuah

Pantah setan kuat lari
Ka jicok le budak indah
Majihpi troh mat bak jaroe
Bacut lape han ek ilah

Meuhila-hila reubot budak
Lom Meudeuhak beurkatalah
Bek meureubot budak indah
Me noe lon plah bagi dua

Siblah sapo nyan tatueng hak
Meunan layak ulon peugah
Setan kabui kheun Meudeuhak
Ma si manyak kheun bek neuplah

Tajok keujih nyan ban saboh
Bek gata poh aneuk lon sah
Lon jok bak Allah aneuk lon jroh
Mat beu teugoh na bek sosah

Hukom Allah Rabbon Qidam
Khalikon alam nyang that meugah
Nyang ek hukom dalam alam
Nyang mee geunggam dum peurintah

Meudeuhak deungo haba meunan
Neukheun yoh nyan beurkatalah
Bukon aneuk di dapo nyan
Hana meunan ban peurintah

Hana gaseh keu aneukda
Tan seutia meung ube drah
Adat aneuk gaseh hana
Tapeulara nyang tayue plah

Bukon aneuk bak ulon eu
Meunan laku rupa ulah
Hana gaseh meung sigeutu
Tayue palu bahle bicah

Teuma setan nyan jimeusu
Jikheun laju lom jibantah
Pakri takheun lon kon ibu
Peue bu laku bunoe tapeugah

Soe dilee troh cok aneuk nyan
Maji saban nyan takisah
Kheun Meudeuhak teuma nyoe ban
Ri kah setan peue han bagah

Babahpi kreueh han seumateh
Meunoe meudeh nyan ka bantah
Le that lagee kaboh reunteh
Kah paleh hana meutuah

Reuohpi han payah han that
Nyan alamat iblih keu kah
Pantah lari budak katueng
Watee kaplueng hana payah

Gop jeh reuoh sare kingkeueng
Ngon teugageueng apoh-apah
Ban jideungo haba meunan
Ri jih setan le jipeugah

Lom Meudeuhak beurkatakan
Neukheun nyoe ban meunoe ulah
Kah hai setan jinoe teebat
Bek khianat keu hamba Allah

Neumeujanji neuboh bi'at
Setan laknat neupeusumpah
Lheueh meusumpah jiweh leugat
Meunan adat ureueng salah

Hukom ade sidek sasat
Hana sapat neupeubah
Hingga meuthee nanggroe laen
Troh nanggroe jen Meudeuhak meugah

Hukom ade han meulaen
Lagi canden rupa indah
Kata sahib eumpunya calitra
Saboh haba deungo lon peugah

V. HABA PANCURI PEUDATI

Aneuk raja jen Faraila
Hana tara sangat meugah
Nan Farail nyang mustahak
Jikheundak jak hajat langkah
Jimeung ujoe eleumee Meudeuhak
Jingo bijak nyan gop peugah
Meugah Meudeuhak le hekeumat
Alem firasat that bit indah
Yoh nyan Farail jibeurangkat
Deungon alat bungka pantah
Jipeujeuet droe miseue insan
Jak beurjalan jicok langkah
Nanggroe Watu ka troh keunan
Ngon pakaian boh meusabah
Jicue peudati areuta ensan
Jihue sajan jakpi bagah
Teuma ureueng po seutot sajan
Keulakuan jeuet mubantah
Bek meudawa hana mufom
Meunan geukheun rakyat barollah
Tatem palem jak meuhukom
Kamoe peutren bak khalifah
Bek meudawa hana layak
Bak Meudeuhak kujak peugah
Meukabui le han jitulak
Keunan layak tajak peugah
Lheueh nibak nyan jipeureugi
Ngon peudati jiba pantah
Ban sare troh ubak kali
Yoh nyan peudati ngadu siblah
Tadeungo he teungku ampon
Peudati lon ka mubantah

Ka meulanggeh milek ulon
Teungku ampon nyoe lon peugah
Meudeuhak tanyong lom neusidek
Nyo bit milek jeumbateu sah

Ulon deungo bek mubalek
Meunyo milek cit tapeugah
Farail kheun areuta ulon
Teungku ampon jeumba lon sah

Meudeuhak areh lom neupeutren
Neupeumaklum ubak siblah
Kata sahib po peudati
Ya habibi milek lon sah

Yoh nyan Meudeuhak lom neusudi
Bak ureueng me nyan neupeugah
Jikalee nyo areuta tuan
Padum sipatan cuba peugah

Peue nan kayee nyan keu papeuen
Padum buleuen trep ka sudah
Padum panyang deungon seulinteueng
Cuba bileueng le bubagah

Farail iem jaweueb kureueng
Hana jikheun nyan di babah
Meudeuhak eu jaweueb hana
Bak manusia lom neupeugah

Adat nyo bit milek gata
Padumna lama ltheueh katarah
Peue nan kayee tacalitra
Hat padumna cuba peugah

Buju linteueng sipat 'oh na
tapeunyata jinoo beu sah
Ban jideungo Meudeuhak kheun
Nama papeuen le jipeugah

Nama kayee habeh jikheun
Panyang papeuen habeh sudah
Meudeuhak yue ubak rakyat
Cuba sipat nyo bit beu sah

Geucok kayee teuma geusipat
Nyo bit meuhat ban jipeugah
Meudeuhak cok peudati keunan
Neukheun yoh nyan hai bedeu'ah

Hai Farail deungo laman
Peurtikaian gata ulah
Bangsapi jen bukon ensan
Le seunuban that beurakah

Farail deungo haba meunan
Jikheun nyoe ban lom jipeugah
Pat nyo tathee ulonteu jen
Toh peungeunai cuba kisah

Meudeuhak kheun nyan asai jen
Bak saboh hai nyata leumah
Na alamat kamoe turi
Tahue peudati hana payah

Di gop jeh that reuoh lagi
Hana sakri areuta sosah
Farail seuto kheun Meudeuhak
Jipujoe bak di nap jama'ah

Sunggoh tuan sabet bijak
Leubeh rancak bak geupeugah
Meusyuehu gata troh nanggroe jen
Nyankeuh lon tren keunoe langkah

Lheueh jikheun nyan Farail gaeb
Siklap siklep han le leumah
Nyan dum meugah that Meudeuhak
Areh bijak that meutuah

Seubab le that eleumee hekeumat
Neuhukom rakyat hana salah
Rasyut han neutueng bulueng han hajat
Hukom teupat jalan Allah

Wallahul hadi sabilir rasyat
Tuhan peuteupat jalan Allah
Pasai nyang keu peuet tuntutan setan
Peukeurjaan ateueh Meudeuhak

Bak Wadiharah datang sosahan
Wadi sajan meuntroe nyang bijak
Ateueh jalan beursalahan
Tanyong setan nyang mustahak

Trep ka neuiem hana hiro
Raja tuwo keu Meudeuhak
Meugah Meudeuhak that ceureudek
Lagi lisek babah cangklak

Hukom Allah hana balek
Bukon tarek that Meudeuhak
Meudeuhak hukom jen ngon ensan
Keudeungaran meunan layak

Raja Wadiharah nyang budiman
Troh le keunan haba Meudeuhak
Sangat bijak areh billah
Deungo kupeugah buet Meudeuhak

Le that eleumee mutabakah
Akai ngon ilah leubeh rancak
Kata sahib punya riwayat
Raja mupakat deungon ulama

VI. RAJA WADIHARAH UJOE ELEUMEE MEUDEUHAK

Deungon sahbat peuet ustazi
Deungo akhi lon kheun nama
Guree nyang fon nama Aja San
Peungeutahuan nibak nyang na

Nyang keudua Aja Diwan
Nyang lhee teelan Aja Peurkasa
Kepeuet guree Aja Dandak
Leubeh rancak hana tara

Ban peuet guree hana jarak
Raja heundak peugah haba
Hoka teungku guree kamoe
Tadeungo jinoe lon calitra

Meung tameuhei Meudeuhak keunoe
Teelan geutanyoe panyang bicara
Umu Meudeuhak ka tujuh thon
Got tayue tren keunoe sigra

Akai areh panyang seunuban
Jeuet keu teelan geutanyoe dumna
'Oh lheueh sabda raja sulotan
Seuot Aja San meunoe kata

Deelat tuanku juhan beurdeelat
Pioh siat po meukuta
Ulon cuba ujoe ibarat
Syah beurdeelat deungo hamba

Ulon cuba ujoe eleumee
Sikrak kayee lon yue bawa
Sinan lahe leumah teurajee
Jeuet eleumee deungon hana

Kayee ka troh panyang dua hah
Teuma geuamplah sare rata
Rupapi jroh taeu indah
Lheueh geutarah larek bunga

Geuboh rika dum di dalam
Macam-macam le wareuna
Lheueh geuuke ngon geutanggungam
Ujong uram meuri hana

Lheueh geuuke kayee jroh that
Geuyue intat sigra-sigra
Meunan kalam syah beurdeelat
Doli halarat neuyue bawa

Wahe bujang deungo kamoe
Me kayee nyoe uleh gata
Bak Meudeuhak tajok jinoe
Sabda kamoe tacalitra

Ujong uram tayue peuri
Meuhan jituri siribee dina
Bujang deungo sabda doli
Beudoh peureugi jinoe sigra

Ban sare troh bak Sakti
Jipeugah kri sabda raja
Nyoe na sikrak kayee neubri
Uleh doli poteu raja

Neuyue tanyong bak Meudeuhak
Toh uram bak toh ujongnya
Meuhan jeuet neupeugah le Meudeuhak
Raja sawak keunong deunda

Ban Sakti deungo mumeunan
Gundah han ban dalam dada
Dalam hate teumakot that
Beudoh leugat sigra-sigra

Bak Meudeuhak Sakti tanyong
Kheun beu keunong he aneukda
Toh nyang uram tapeukeunong
Ujong neutanyong uleh raja

Yoh nyan neukheun Sakti neumoe
Meuteutaloe ro ie mata
Meudeuhak kalon Sakti neumoe
Neukheun meunoe muda beulia

Bicara lon du bek neugundah
Poteu Allah nyang peunyata
Lam ie hai du kayee takeubah
Na meung leumah meukeusud raja

Sakti deungo meunan kalam
Kayee lam kulam nyan neuhanta
Nyang fui ujong nyang slam uram
Meudeuhak fam nyankeu tanda

Nyankeuh uram du kayee nyoe
Puwoe jinoe bak raja raya
Ban sare troh jibet jaroe
Ampon kamoe po meukuta

Bak Meudeuhak ulon ka woe
Nyang kayee nyoe ka na tanda
Nyoe nyang ujong nyoe nyang uram
Bujang meukalam deungon raja

Neudeungo le syahi alam
Rindu deundam hate suka
Raja deungo bujang peugah
Hireuen dasyah ngon bicara

Na sikeujap hireuen dasyah
Wadiharah lom meusabda
Raja kheun bak guree nyang peuet
Meudeuhak jeuet keu ulama

Ceureudek that lagi sifeuet
Dumpeuepi jeuet le bicara
Sidek sasat le seunuban
Lagee meunan lon eu rupa

Bijaksana hana padan
Hana lawan ateuh donya
Seuot guree peuet muwafakat
Kheun bak deelat poteu raja

Ampon tuanku syah beurdeelat
Meudeuhak han that bijaksana
Kareuna Meudeuhak toe bineh gle
Kayee jituri kareuna beasa

Kayem jieu geupeuli
Uram meuri ujong nyata
Ban raja deungo haba meunan
Neuiem yoh nyan han le haba

Padum uroe lheueng nibak nyan
Lom jonjongan neumeusabda
Wahe bujang jinooe tajak
Bak Meudeuhak muda beulia

Tajak tanyong nyang mustahak
Nyoe tangkurak tame dua
'Oh troh keudeh beu tasudi
Tayue peuri agam dara

Meung hana jeuet jipumeuri
Ringget jibri siribee dina
Bujang beudoh leugat jijak
Bruek tangkurak jime dua

'Oh sare troh bak Meudeuhak
Ka jisawak haba raja
Miseue sabda raja doli
Jipeugah kri meunan haba

Nyoe tangkurak poteu yue me
Neuyue peuri agam dara
Meung han taturi dua ulee
Dina siribee ateuh gata

Meudeuhak deungo meunan lagee
Neucok ulee neueu rupa
Meudeuhak tilek keulakuan
Neueu teuladan bak keupala

Saboh ulee bak teuladan
Keulakuan teubai jungka
Saboh bungkok han got ragam
Meudeuhak meukalam neukheun haba

Ulee teupat neukheun agam
Bungkok neufam neukheun dara
'Oh lheueh neukheun le Meudeuhak
Bujang woe bak poteu raja

Bujang peugah haba Meudeuhak
Jikkeun ubak doli sripada
Nyoe nyang dara nyoe nyang agam
Meudeuhak yue fam ubak raja

Bungkok dara teupat agam
Tuanku fam nyankeu tanda
'Oh sare lheueh bujang peugah
Tanda nyoe sah sabet beuna

Meunan kata nyang ka leumah
Wadiharah hana haba
Raja pujoe muda bangsawan
Bijak han ban babon ula

Padum uroe lheueng nibak nyan
Lom jonjongan neumeusabda
Wahe bujang jinoo tajak
Bak Meudeuhak muda beulia

Dua uleue nyoe tabawak
Bak Meudeuhak nyan tatanya
'Oh troh uleui nyan dua boh
Tatanyong toh agam dara

Sabdapi lheueh bujang beudoh
Bandua boh uleue jiba
Ban sare troh cit meuteumee
Jipeuteuntee sabda raja

Dua uleue lon kheun lagee
Tapeuteuntee agam dara
Meudeuhak deungo haba bujang
Neujak pandang uleue dua

Meuhan tapeugah hana reumbang
Kon buet wayang suroh raja
Neueu ulee deungon iku
Neueu buju deungon raya

Bandua ka Meudeuhak eu
Ban nyang laku neupeuhaba
Uleue raya hebat macam
Meudeuhak fam leubeh bisa

Uleue rayek iku tajam
Kreueh han macam sisek raya
Nyan uleue nyan neukheun agam
Meudeuhak fam nyankeu tanda

Uleue ubit sisek cut-cut
Iku tirut han that raya
Uleue raya nyang meukeusud
Meudeuhak cut peugah tanda

Lheueh neupeugah le Meudeuhak
Bujang woe bak poteu raja
Bujang peugah kheun Meudeuhak
Hate galak raja raya

Meuri dara dengon agam
Syahi alam hate suka
Ban raja ngo meunan kalam
Meudeuhak ajam le bicara

Lheueh nibak nyan na padum uroe
Lom teugoe-goe hate raja
Lom neucuba eleumee droe
Guree sinaroe beurbicara

Uroe malam guree pike
Neubri syawe balek pula
Raja pateh peurunoe guree
Le eleumee ngon jicuba-

Sare hase masaalah
Wadiharah meunan sabda
Wahe bujang jinoe kajak
Bak Meudeuhak sigra-sigra

Talakee bakjih lumo meureugoh
Nyang timoh goh bak keupala
Nyang meulungke nibak gaki
Nyang meunari le kutika

Nyang na meusu peuet seun simalam
Raja deundam kalon rupa
Meung han jibri ban lon peugah
Jih jinoe salah siribee dina

Ban bujang deungo meunan lagee
Jak le dilee pantah sigra
Bujangpi troh Meudeuhak hase
Teuma jikheun le sabda raja

Lumo meureugoh jilakee le
Nyang meunari le kutika
Bulee lumo jroh han sakri
Taloe bak gaki jantungji na

Meung neupeutan nyang raja lakee
Dina siribee gata deunda
Kata Meudeuhak pakri lagee
Tadrop dilee manok raya

Bujang puwoe pantah tajam
Troh u dalam bak meukuta
Nyoe tuanku lumo agam
Nyang neudeundam Meudeuhak yue ba

Ban raja deungo haba meunan
Hireuen sulotan akai bicara
Raja peugah bak Aja San
Meudeuhak analan hana tara

Lahe areh cit utoh fam
Akai tajam hana tara
Haba nyareng narit takwi
Dum jitukri peucalitra

Ban Aja San deungo haba meunan
Neukheun yoh nyan ubak raja
Bukon tuanku Meudeuhak analan
Hana budiman lom bicara

Meuri jiduek dalam uteuen
Le reuen mareuen jieu rupa
Toe bineh gle hana peue kheun
Manok uteuen le lagoina

Keubeue lumo dum sinaroe
Le that bagoe laen dumna
Lheueh nibak nyan padum uroe
Hate teugoe-goe poteu raja

Ubak bujang neuyue dudoe
Neukheun meunoe uleh raja
Bak Meudeuhak kajak jinoo
Beutroh sampoe kacalitra

Kalakee bak jih ureueng lakoe
Ulah bagoe hameji na
Nyang ka leupah keulua budak
Bak Meudeuhak nyan kayue ba

Bujang beudoh leugat jijak
Hingga meurumpak muda beulia
Bujang peugah haba sulotan
Ban lakuan sabda raja

Yoh nyan Meudeuhak pike nyoe ban
Neubri surohan ubak raja
Kheun Meudeuhak tajak siat
Ubak deelat poteu raja

Talakee seuleusoh nibak deelat
Ngon bagah that hana tara
Troh bak raja ka jideelat
Jaroe jiangkat buju dua

Seureuta jibet jaroe siploh
Hana teudoh di jeumala
Lon tuanku Meudeuhak suroh
Neuyue lakee seuleusoh bak meukuta

Keu ureueng lakoe meukeumat budak
Suroh Meudeuhak ubak hamba
Meunan jikheun nyang mustahak
Jaweueb nibak poteu raja

Raja peugah bak ureueng lakoe
Hana meunoe dilee nyang ka
Hana seuleusoh bak lon sidroe
Keu ureueng lakoe nyang kheun gata

Ureueng nyan jaweueb jikheun meunoe
Deungo kamoe po meukuta
Meutan seuleusoh ureueng lakoe
Hana keunoe Meudeuhak teuka

Yoh nyan raja ka neuem droe
Hana sapeue jaweueb dawa
Padum lawet teuma dudoe
Poteu jinoe neumeusabda

Bak Meudeuhak neuyue ba kalam
Neuyue hue kulam nyang di lua
Di lua kuta saboh kulam
Neuyue u dalam Meudeuhak hila

Meung han jihue ingat keudroe
Tayue pasoe siribee dina
Meunan neukheun raja nanggroe
Bujang jiwoe beudoh lanja

Ban sare troh jipeuseumbah
Jipeugah le sabda raja
Miseue narit Wadiharah
Hana ubah jicalitra

Teungku deungo bak lon kalam
Syahi alam suroh gata
Di lua kuta saboh kulam
Neuyue u dalam le meukuta

Kheun Meudeuhak di pat kulam
Syahi alam ho neuyue ba
Bujang peugah teupat makan
Uroe malam Meudeuhak seuranta

Neuhei rakan aneuk nanggroe
Dum sinaroe nyang syeedara
Nyang ladom kueh nyang ladom doe
Meunan bagoe neubri jeumba

Neuboh tanoh tuka balek
Meudeuhak lisek hana tara
Pihak areh ngon ceureudek
Akai tarek bijaksana

Kulam di lua geudoe ka lheueh
Laen geukueh dalam kuta
Tanoh meunaleueng geuboh di ateueh
Sang ka trep lheueh taeu rupa

Kulam di lua ka geuseubee
Ulah lagee tanoh lama
Naleueng udep taeu lagee
Wahe sampee nyan bicara

Kulam cukop sare hase
Rakyat sare dum ka teuka
Kulam di lua geueu han le
Hireuen pike dalam dada

Tanoh santeut taeu ragam
Salah waham bak bicara
Kulam di lua ka u dalam
Sabe langgam hana beda

Ban peuet sagoe hana ubah
Sang-sang ulah trep ka lama
Sare hase kulam sudah
Wadiharah hireuen bicara

Lheueh nibak nyan padum uroe
Lom teugoe-goe hate raja
Bujang neubri lom dua droe
Neulakee taloe peunuta

Neukeumeung tarek saboh gunung
Keumeung peutamong dalam kuta
Bak Meudeuhak bujang tanyong
Jaweneb keunong ban neukata

Insya Allah suroh sulotan
Tulong Tuhan lon usaha
Teutapi tame saboh teulandan
Keulakuan taloe nyang na

Bujang peugah bak sulotan
Miseue lakuan Meudeuhak pinta
Raja jaweueb hana teulandan
Teutap 'oh nan han le haba

Lheueh nibak nyan teuma dudoe
Neutanyong proe uleh raja
Neumupakat guree peuet droe
Bandum sapeue peurunoe raja

Fon dilee kon guree ilah
Raya fitnah silagoina
Dumban lagee han ek ilah
Raya tuah muda beulia

Deungki khianat peurangoe jeuheut
Han got sifeuet akai hina
Jiduek ban peuet sinan sapat
Raja deelat ngadap sigra

Ampon tuanku syahi alam
Lon meukalam nyang sibeuna
Ulon peugah di bawah kidam
Saboh manikam trep ka lama

Hana sidroe jeuet boh taloe
Pande sinaroe gadoh bicara
Meung jeuet Meudeuhak jiboh taloe
Nyo bit raghoe bijaksana

Deelat tuanku syahi alam
Nyan manikam indah rupa
Trep ka lama nyan manikam
Jameun teufam dilee ka na

Seulayeue keurajeuen paduka Meureuhom
Lon pumaklum bak meukuta
Manikam jroh nyan that meuyum
Han soe tudum boh hareuga

Taloe putoh soe boh han le
Meudeuhak ade tuanku cuba
Manikam jroh hana sabe
Utoh pande nyan jiteumpa

Rupa indah tujuh lingkok
Taloe han trok deuh u lua
Bak silingkok dua lingkok
Taloe han trok bak tahila

Meung Meudeuhak jeuet boh taloe
Nyo bit raghoe bijaksana
Wajib tatueng teuma keunoe
Ikot geutanyoe muda beulia

Teuma taboh jih keu meuntroe
Seubab raghoe bijaksana
Manikam nyan le faidah
Pote Allah nyang karonya

Ampon tuanku laman peugah
Manikam indah le that laba
Jikalee geugantung nibak lihe
Raja sare hebat rupa

Sigala sitree han ek lawan
Peulara Tuhan Rabbon 'Ala
Baranggadum teuka lawan
Jen ngon setan gadoh bisa

Laen nibak nyan lom le kasiat
That beureukat hana tara
Gadoh peunyaket nibak jasad
Meutamah deelat po meukuta

Ban raja deungo haba guree
That meuteuntee geucalitra
Faidah le hana lagee
Kata guree nyang peuhaba

Yoh nyan raja pangge bujang
Troh le rijang suroh raja
Ban sare troh keunan datang
Ubak bujang neupeuhaba

Wahe bujang jinoe kajak
Bak Meudeuhak dua gata
Taba haba keu Meudeuhak
Areh bijak hana tara

Manikam nyoe jiboh taloe
Teuma tapuwoe uleh gata
Meung han jiboh ingat keudroe
Tayue pasoe siribee dina

Lheueh sabda syah beurdeelat
Bujang leugat beudoh lanja
Bak Meudeuhak troh beurangkat
Suroh deelat jipeuhaba

Bujang peugah ban nyang kasad
Ban nyang hajat poteu raja
Meudeuhak deungo meunan kalam
Suroh sulotan raja raya

Bangka Sakti sinan hade
Gundah hate hana tara
Dalam hate teumakot han soe
Raja yue pasoe siribee dina

Meung han jeuet manikam jiboh taloe
Dum geutanyoe geuenaya
Dalam hate teuka bokbang
Moe sibirang tuha muda

Meudeuhak cut mantong seudang
Bukon sayang taeu rupa
Beungeh raja takot neupoh
Rupa that jroh hana tara

Han peue tanyong gureeneu jroh
Buleuen peunoh cahya muka
Ka tujoh thon umu sampoe
Jroh hana soe indah rupa

Rakna Kasan hate wawoe
Bandua droe deungon bapa
Meudeuhak eu bapakneu moe
Neukheun meunoe muda beulia

Wahe ayah neudeungo kamoe
Bak uroe nyoe lon calitra
Wahe kawom dum sinaroe
Bek that neumoe dumna gata

Manikam nyoe le faidah
Poteu Allah nyang karonya
Limong peukara na faidah
Deungo lon peugah ubak gata

Kasit nyang fon soe nyang lhat
Mulia that hana tara
Faidah dua hareuga le that
Hana dapat taboh hingga

Lhee ploh geudong asoe sarat
Hana meuhat geutueng hareuga
Faidah lhee saboh pangkat
Hana sapat na umpama

Barangri nanggroe hana sapat
Nyang talihat meunoe rupa
Rayapi that hana bagoe
Yumpi tanggoe sireutoh bara

Faidah nyang peuet wahe sahbat
Soe nyang lihat raya laba
Faidah limong lon kheun kalam
Soe nyang reugam that mulia

Leubeh pangkat dalam alam
Hana macam ngon tapeusa
Limong faidah tinggai sinoe
Nibak kamoe le that laba

Peurtama fon akai saleh
Pangkat leubeh hana tara
Ulon aneuk ureueng saleh
Du lon leubeh that mulia

Faidah dua lon bri maklum
Sibarang hukom ban nyang kada
Han ek dawa ngon jibantah
Han soe ilah ngon bicara

Faidah lhee wahe sahbat
Hukom adat han soe langka
Nyoe lon peugah faidah peuet
Han sidroe jeuet suroh hamba

Meukon raja nyang leubeh jeuet
Nyankeuh sifeuet suron hamba
Faidah limong nyoe lon peugah
Peue nyang seumbah lon bak raja

Han soe linteueng han soe bantah
Barang seumbah lon meukuta
Nyan faidah habeh lon boh
Beu tatu'oh uleh gata

Manikam nyoe trep ka geutroh
Hana saboh ngui keu laba
Soe ngui han soe theepi tan
Lam tarohan raja raja

Seulayeue keurajeuen Meureuhom sa
Sulotan dumnan tuan trep ka
Bal. jameun nyoe ulon dapat
Pandang rakyat ne ngui raja

Ulon lakee bak halarat
Beu troh hajat poteu raja
Ngon mukjizat Nabi Muhammad
Beu ek leungkap lon usaha

Manikam nyoe lon boh taloe
Beu neupakoe uleh raja
Mangat jieu uleh rakyat
Wadiharah boh bak dada

Meunan narit Meudeuhak peugah
Hireuen dasyah rakyat dumna
Haba sudah han le kalam
Hana macam bijaksana

Bak umpung sidom Meudeuhak keubah
Geutop pantah ban siseun lingka
Ngon tanoh kliet meudeuhak doe
Dum sinaroe lingka meutia

Reuhung meutia hana geudoe
Rot nan jiwoe sidom dumna
Meudeuhak cucok beuneung siurat
Neuboh bak teupat reuhung meutia

Ngon ie madu nyang maneh that
Beuneung siurat geulhap sigra
Sidom kalon beuneung ngon madu
Jihei bantu pantah sigra

Sidompi le teuka laju
Pajoh madu beuneung jihila
Leupah beuladeh beuneung siurat
Meudeuhak mat cok le sigra

Teuma neusuet dua urat
Neutarek leugat sigra-sigra
Taloe hase Meudeuhak sambot
Taloe urot beuneung jihila

Gaseh Allah Rabbon 'Ibat
Meudeuhak that bijaksana
Tulong Allah dum sibarang
Meudeuhak pulang keu rumahnya

Taloe hase ka meukarang
Jok bak bujang sigra-sigra
Wahe bujang manikam tapuwoe
Jok bak jaroe poteu raja

Seumbah saleuem lon tapeugah
Lon daerah po meukuta
Akan deelat raya meuah
Pat nyang salah neuboh tanda

Kareuna lon beubai khilaf
Beu le meuah bak meukuta
bujang sambot le manikam
Lheueh jireugam jiwoe lanja

'Oh ban sare nyan u dalam
Seumbah kidam po meukuta
Deelat tuanku syahi alam
Nyoe manikam nyang neuyue ba

Raja sambot le manikam
Rindu deundam po meukuta
Rupa indah hana macam
Taloe di dalam sutra peunuta

Meupeunuta ngon urat lhee
Le eleumee muda beulia
Padum pande nyang ka dilee
Han troh eleumee jikeurija

Rakyat jitren kalon lagee
Bandum jamee ban sineuna
Huleebalang wadi meugah
That barollah dalam kuta

Peunoḥ mideuen rakyat titah
Teuhah babah ban sineuna
Raja peujok ubak guree
Kalon lagee peue bicara

Guree peuet droe tundok ulee
Sangat malee hana tara
Hana akai jitem leumah
Gadoh fitnah hana haba

Lom meusabda raja nanggroe
Neukheun meunoe bak gureenya
Meujeuet manikam jiboh taloe
Tatueng keunoe sigra-sigra

Meunan janji masa bunoe
Ubak kamoe tacalitra
Jeuet keu guree dum geutanyoe
Areh han soe bijaksana

Umu tujuh thonpi ka sampoe
Gotkeu jinoe tatueng sigra
Akai areh hana bagoe
Dumpeue sampoe jibicara

Lheueh meusabda raja sulotan
Guree yoh nyan jawueub sigra
Deelat tuanku po jonjongan
Meudeuhak budiman pangge sigra

Pasai nyang limong tango kheun kri
Meudeuhak geupangge uleh raja
Seureuta hadih deungon firman
Keulaheran lam Quran na

Seureuta lon balek ayat
Bek lagee sot wahe rakan
Nyoe lon peugah keu Meudeuhak
Sabe rancak hana tara

VII. MEUDEUHAK TINGGAI SAJAN RAJA

Suroh raja Wadiharah
Bujang neukrah dua sajan
Wahe bujang deungo lon kheun kri
Ubak Sakti tabeurjalan

Lheueh meusabda juhan doli
Neupeugah kri le sulotan
Neukheun sabda nibak kamoe
Meudeuhak keunoe beu troh jalan

Beu troh kaba bak uroe nyoe
Rindu kamoe hana padan
Sabdapi lheueh nibak doli
Bujang peureugi pantah rijang

Bujangpi troh jipeureugi
Bangka sakti meuteumeung yoh nyan
Bujang peugah ubak sakti
ulon waki nibak sulotan

Ubak ulon suroh raja
Meudeuhak neuyue ba jinoe sajan
Keudeh ubak po meukuta
Jinoe sigra bek lambatan

Insya Allah seut Sakti
Jak keumbali droekeu kaman
Di likot gata lheueh keumbali
Lon peureugi teuma sajan

Bujang beudoh le peureugi
Bangka Sakti neukheun nyoe ban
Hoka gata dumteu sare
Tapeuhase dum beukalan

Ulon heundak ngadap doli
Beukai tame peurseumbahan
Tapeuhase ban nyang babat
Nyang indah that hana lawan

Bangka Sakti cit kaya that
Gaseh rakyat seukalian
Meudeuhak peuhase dumna beukai
Dumnan sagai dua kandran

Aneuk guda saboh keu pangkai
Hase beukai Sakti beurjalan
Meugah bak raja Sakti peureugi
Neusuroh wadi le sulotan

Neuyue peudong dua bale
Jroh meudeune that analan
Saboh reundah saboh tinggi
Suroh doli meunan padan

Bale manyang Bangka Sakti
Reundah bagi Meudeuhak budiman
Uroepi got buleuen haji
Bangka Sakti neubeurjalan

Rakyat ireng hana sakri
Ngadap doli raja sulotan
Dumna rakyat meukeukatoe
Hingga sampoe bak sulotan

Padum alat ureueng kaya
Le that geuba peurseumbahan
Teuma geutamong dalam kuta
Ngadap raja seukalian

Lheueh geudeelat poteu raja
Duek bak tahta yue sulotan
Maseng-maseng duek bak teumpat
Meutuka adat dua gop nyan

Bale manyang rupa got that
Meudeuhak leugat neujak keunan
Roh Meudeuhak bale tinggi
Bangka Sakti miyup han ban

Guree kalon mubalek adat
Meutuka teumpat dua gop nyan
Aja San kheun ampon deelat
Cuba lihat keulakuan

Aja San kheun ngon isyarat
Ampon deelat beursalahan
Seureuta ngon haba timplak
Keu Meudeuhak isyarat nyan

Ulonteu kheun hana bijak
Meudeuhak hana budiman
Bicara kureueng akai goh troh
Takalon deuh di hadapan

Hana ceureudek akai kurang
Lon kheun beu trang nak nyataan
Teumpat ayah jiduek le jih
Pane meujeulih Meudeuhak nyan

Raja tupeue tuto habeh
Hana meujeulih di gop meunan
Peurseumbahanpi troh geuba
Dua gada ban atoran

Nyang Sakti guda raya
Lagi beusa hana padan
Di Meudeuhak aneuk guda
Ban nyang kada ubit badan

Peurseumbahan lheueh teu imong
Raja tanyong ubak Aja San
Wahe teungku kheun **beukeunong**
Ulon tanyong saboh padan

Padum saboh yum guda nyoe
Takheun jinoe nyang analan
Cut ngon rayek meunan bagoe
Bandua peue beu nyataan

Soe le hareuga rayek ngon cut
Nyang meukeusud beu laheran
Aja San kheun nyang meukeusud
Seumbah sujud bak sulotan

Guda meureugoh mit hareuga
Meunan nyata kheun Aja San
Guda ubit le hareuga
Baek rupa that analan

Peue seubab nyan cuba kata
Tanyong raja bak Aja San
Kheun Aja San guda jatoe
Hana sapeue jampu sinan

Guda bulee jroh mayoh leupah
Rupa cidah nyang laen han
Ban raja ngo meunan lagee
That meuteuntee kheun AjaSan

Yoh nyan Aja San teukui ulee
Bacut malee bak sulotan
Seubab neudapat haba dilee
Le eleumee Meudeuhak tuban

Ngon utoh that hana lagee
Lagi teuntee that budiman
Bak Meudeuhak habeh sipat
Neueu peurasat guree sulotan

Meutuka kada nibak adat
Bak meurtabat nyang laen tan
Bale reundah Bangka Sakti
Bubong tinggi di ateuh nyan

Bak meudeuhak trok bicara
Nyan neucuba guree sulotan
Guree hana trok bicara
Malee mata bak jonjongan

Raja neukheun narit habeh
Nyan neupeugleh le sulotan
Takheun Meudeuhak hana meujeulih
Hana sidek bunoe kaman

Meunan sabda syahi alam
Beu na tafam seukalian
Habeh haba seumporna fam
Guree diam yoh masa nyan

Haba guree teuduek siat
Syah buerdeelat beurkataan
Wahe Sakti lon na hajat
Meudeuhak that lon cintaan

Harap keu Allah deungon Nabi
Meudeuhak tabri keu lon tuan
Kareuna ulon ureueng male
Aneuk tan le bak lakuan

Sabdapi lheueh nibak deelat
Sakti angkat dua tangan
Ampon tuanku syah beurdeelat
Doli halarat sabet meunan

Bek meung aneuk tuanku lakee
Ulonpi mee hukom jonjongan
Baranggasoe meunan lagee
Ureung dilee nyang ka meunan

Siri sagoe neubri jeumba
Lon seureuta Meudeuhak sajan
Ban raja deungo meunan haba
Hate suka po jonjongan

Karonya raja keu Bangka Sakti
Rumoh neubri raya han ban
Saboh sagoe teumpat neubri
Bangka Sakti got diaman

Teuma neuwoe Bangka Sakti
Cok esteuri Rakna Kasan
Ubak raja woe keumbali
Ngon esteuri neuba sajan

Laen rata habeh neuba
Asoe tangga seukalian
Guree peuet droe basa basi
Jipeugah kri bak sulotan

Tuanku hana layak Meudeuhak
Hana rancak keulakuan
Bak lon kalon han mustahak
Meudeuhak hana budiman

Jikheun leubeh droe nibak ayah
Meunan leumah keulakuan
Nibak Sakti Meudeuhak peugah
Meunan leumah keunyataan

Deungon kamoepi leubehjih
Kamoe jaeh hana padan
Peue nyang han jeuet kamoe taleh
Di jih leubeh leumah burhan

Nyang hana ek kamoe ilah
Di jih mudah han sukaran
Le that ilah nibak guree
Hana lagee bak ambilan

Kamoe han ek habeh padee
Mit eleumee sosah han ban
Meudeh meunoe nyan jitulak
Bit Meudeuhak jeuet keurakan

Peuleumah pie droegeuh bijak
Leubeh rancak bak kiraan
Han ek cit ek puweh Meudeuhak
Jih geutulak seukalian

Kala kada bak halarat
Han ek tulak tan ambilan
Wallahul hadi sabilir rasyad
Ureueng teupat tulong Tuhan

Han ek jibri dum meularat
Kareuna that gaseh Tuhan
Teudeuek 'oh noe dilee siat
Lon riwayat laen ragam

Lon boh ayat lagee laen
Meuek meutren ban atoran
Lon kisah nyoe keu Meudeuhak
Suroh nibak raja sulotan

Amma Bakdu teungku po cut
Meudeuhak cut cok manikam
Ulon peugah nyang meukeusud
He teungku cut bek le kalam

Soe hana got dalam pueued
Bak guree peuet jitroh deundam
Kheundak Allah Rabbon Ma'bud
Lon boh bacut keu ureueng troh dam

Kheun guree peuet lom jipeugah
Turon titah syahi alam
Jikalee nyo Meudeuhak cidah
Tayue ilah saboh macam

Bandum kamoe habeh sosah
Gadoh ilah hana troh fam
Meunyo areh takheun Meudeuhak
Sabet bijak hana macam

Nyo ceureudek akai rancak
Lon peugah bak syahi alam
Ulon peugah bak meukuta
Saboh mutiara dalam kulam

Trep ka lama hu meucahya
Jameun masa sulotan Meureuhom
Leumah cahya hu meukilat
Deuh u darat bineh kulam

Kamoe mita han meutupat
Habeuh sisat gadoh waham
Cahyaji na meutupat tan
Trep ka jameun dalam kulam

JInoe tayue bak Meudeuhak
Kheun droe bijak hana macam
Meung jiteumee le Meudeuhak
Sabet bijak nyo jih agam

Nyo leubeh jih deungon kamoe
Jeuet keu meuntroe syahi alam
Meunan kata guree peuet droe
Raja nanggroe deungo kalam

Neudeungo manikam geucalitra
Poteu raja rindu deundam
Poteu pangge muda beulia
Neupeuhaba cok manikam

Sabda raja nyang mustahak
Bak Meudeuhak neukheun kalam
Wahe aneuk lon Meudeuhak
Jinoe tajak u bineh kulam

Tajak kalon saboh mutiara
He aneukda dalam kulam
Hu meucahya hana bagoe
Malam uroe lon sukaan

Dalam kulam saboh mutiara
Trep ka lama gadoh peujam
Padum guree ureueng tuha
Han troh bicara gadoh ngon fam

Jinoe aneuk hukom gata
Tajak lanja cok manikam
Ulon heundak kalon rupa
Eu mutiara dalam kulam

Lheueh sabda doli halarat
Meudeuhak deelat syahi alam
Ampon tuanku syah beurdeelat
Lon jak siat kalon kulam

Lheueh neukalon neuwoe leugat
Ubak deelat syahi alam
Ban sare troh neubet jaroe
Ampon kamoe meukuta alam

Lon meutanggoh dua uroe
Asoe nanggroe beu jitren curam
Seugala rakyat dum beu teuka
Tuha muda dara agam

Ban neudeungo uleh raja
Bujang dua neusurohan
Teuku bujang mudek lanja
Jak seuranta bentara blang

Nanggroe Watu rakyat neukrah
Jitren jojah dara agam
Padum meuntroe wadi meugah
That barollah jitren tajam

Huleebalang imum rakyat
Meusapat bak syahi alam
Habeh bandum jitren rakyat
Meusapat u bineh kulam

Teukeudi Allah Rabbon kudrat
Limpah iradat Khalikon alam
Akai Meudeuhak sangat lisek
Ka neubalek dalam kuta

Jeuet neukira batang balek
That ceureudek hana macam
Meudeuhak fam ngon bicara
Kon mutiara dalam kulam

Keunong uroe cahya timpa
Leumah nyata deuh lam kulam
Manikam nyoe jih di manyang
Meudeuhak pandang kalon macam

Di bineh kulam sibak keutapang
Reului nawang hana macam
Ateueh kulam jijundrong bak
Yoh nyan Meudeuhak yue ek rijang

Meudeuhak pangge sidroe sahya
Geuek lanja u cong keutapang
Kaeu mutiara jeuep seurampak
Kheun Meudeuhak meunan kalam

Neuyuepi lheueh jiek lanja
Cok mutiara ka jireugam
Lheueh jicok jitren sigra
Bak muda beulia jijak rijang

Meudeuhak peuleumah ubak rakyat
Lheueh neudeclat syahi alam
Meudeuhak jok ubak raja
Neueu rupa hana macam

Neusambot le sigra-sigra
Jaroe dua neubet rijang
Yoh nyan Meudeuhak raja pujoe
Hana bagoe leubeh lam alam

Bukon areh po samlakoe
Bijak han soe dalam alam
Jiusaha hana payah
Deungon mudah jicok manikam

Di gop meuthon geuseuleuah
Di jih mudah bicara fam
Le eleumee akai isyarah
Bijak leupah hana macam

Rakyat habeh jieu mutiara
Dum seugala donya alam
Han meuteumee nyoe mutiara
Muda beulia sangat ajam

Raja salen po samlakoe
Bajee di asoe indah han ban
Dokma mutiara intan pudoe
Hana bagoe dalam alam

Maken leubeh raja gaseh
Raja pateh Meudeuhak ajam
Buet barangpeue hana peudeh
Raja pateh Meudeuhak troh fam

'Oh habeh nyang jinoo laen
Maken masen nibak beuklam
Leubeh that lom hai syeedara
Nibak nyang ka ltheueh lon karang

Teuduek haba muda samlakoe
Jinoo muwoe bak syahi alam
Lon boh gantoe nyang ka ramah
Mangat mudah lon atoran

Laen lagee ulon hareutoe
Raja nanggroee tanyong padan
Neuteumanyong bak Meudeuhak
Muda bijak nyang analan

VIII. CEULAKA BAHGIA HAN JEUET MEUSAPAT

Amma Bakdu Ma teungku e
Rakyat tahe dum seukalian
Raja tanyong bak Meudeuhak
Nyang that bijak hana padan

Bak Meudeuhak nyang that indah
Lom neupeugah peuet guree nyan
Wahe aneuk po samlakoe
Raja nanggroe tanyong padan

Masalah ulon hareutoe
Bak samlakoe peuet guree nyan
Ulon tanyong masaalah
Nyan tapeugah bumeuntee

Si ceulaka ngon si meutuah
Jeu et sapat sah duek meuntee
Jeu et keu rakan jih nyan dua
Got atawa jeuet keu sitree

Jiduek sapat saboh rumoh
Hana meh moh pakri lagee
Saboh gampong jeuet sitanoh
Han lon tu'oh nyang meuntee

Meunan neusueue le sulotan
Seuot Aja San ban peuet guree
Si ceulaka jeuet sirakan
Jiduek sajan meunan lagee

Jaweueb Meudeuhak doli halarat
Han jeuet sapat duek meuntee
Baranggajan lam meuadat
Han mupakat jeuet keu sitree

Saboh u lhok saboh u cot
Pat jitem got meunan lagee
Beukit sapatpi sang jarak
Hate pipak jeuep-jeuep watee

Cit nan keunong gadoh sigak
Hana layak meunan lagee
Saboh rahmat saboh laknat
Hana mangat jeuet keu sitree

Si ceulaka paleh bulat
Tamupakatpi hana cit mee
Si bahgia gaseh Allah
Ngon meutuah hana lagee

Suntok kayem nekmat Allah
Ulon peugah nyoe beu tathee
Si ceulaka ngon bahgiaan
Baranggajan jeuet keu sitree

Raja deungo kheun Meudeuhak
Bukon galak hana lagee
Dalam hate dum geupantak
Kheun Meudeuhak keunong lagee

Raja neuem han marit le
Dalam hate meunan nyang mee
Padum lawet dudoe akhe
Teuma lahe nyang meuteuntee

Kheun Meudeuhak cit leumah le
Nyata lahe wa le sampee
Buet Meudeuhak Tuhan peuleumah
Bak wadiharah mangat neuthee

Kheun Meudeuhak sibeunalah
Hana ubah ube gutee
Kata syekh eumpunya rawi
Lahe dali cit meuteutee

Ureueng peuet droe ulon rawi
Jak meungaji tuntutan eleumee
Aneuk meuntroe aneuk raja
Aneuk syeedaga teuma keulhee

Teuma nyang keupeuet aneuk ceulaka
Tan bahgia ube gutee
Meutamah paleh gasienpi that
Lom halarat jeuet keu sitree

Ngon bahgia han jeuet sapat
Lam meuadat jeuep-jeuep watee
Meuhimpon peuet yoh nyan sapat
Jibeurangkat jak meuguree

Sigo ban peuet geujak leugat
Troh.bak teumpat tuntutan eleumee
Dalam nanggroe nan Nakasu
Meunan teungku ulon teumee

U meunasah tamong laju
Ubak teungku jak meuteumee
Arehpi that lom ngon ahli
Diwa Sakti nama guree

Karonya Allah Poku Rabbi
Hana sakri le eleumee
Eleumee hekeumatpi mahe that
Eleumee firasat meunan lagee

Bangsa leubeh meusyehu that
Lom keuramat wahe sampee
ureueng peuet droe ka troh safa
Ngon peundita jak meuteumee

Com di teuot teuma sigra
Peuet seureuta nyan beu tathee
Teuma jijok peurseumbahan
Sajan-sajan sigra ban lhee

Siribee dina sidroe rakan
Peurseumbahan jok keu guree
Gasien miseukin that ceulaka
Tan beulanja meung sigukee

Hana sapeueu di jih jiba
Di gop areuta muploh ribee
Ban peuet jibeuet bak peundita
Habeu nyata dum eleumee

Umu lhee thon teungku pubeuet
Habeu dum jeuet le eleumee
Eleumee hekeumat ngon firasat
Ahlon hisab saboh lagee

Eleumee falak jeuet le siat
Cit utoh that fam teurajee
Eleumee silatpi that gunjak
Eleumee tumbak han keunong bajee

Laen nibak nyan eleumee nujum
Habeu maklum hana dungee
Watee meuri sangat meudum
Habeu mufom wahe sampee

Lhee thon jibeuet di Nakasu
Kheun bak teungku jak woe dilee
Idinpi lheueh nibak teungku
Jiwoe laju di jih ban lhee

Si ceulakapi jilakee woe
Jimohon droe nibak guree
Teungku neukheun si paleh nyoe
Kah bek kawoe hana malee

Eleumee tan areutakeu han
Sapeuepi tan di kah dilee
Masa kajak tan sapeue na
'Oh ka gisa peue meuteumee

Si ceulaka yoh nyan teutap
Jikhedmat ngadap guree
Lagi jeumot ngon bagah that
Hana sapat meunan lagee

Han sapeue lheueh jipeulaku
Gaseh teungku meunan lagee
'Oh neupubeuet uleh teungku
Meung sigentu hana mubee

Neukheunpi lheueh tuwo rijang
Hate ceukang hana lagee
Padumna trep jimeudagang
Mohon pulang lom jilakee

Idin teungku keu lon seukarang
Heundak riwang ubak sampee
Ngon jiseumbah rijang-rijang
Gaseh sayang that keu guree

Diwa Sakti ka teupike
Dalam hate meunoe lagee
Toh rot jalan kutham lagi
Jikeumbali aneuk asee

Lagi sunggoh kupubeuet that
Han meularat kubri eleumee
Nibak Allah han teukeuse
Buta hate aneuk asee

Jinoepi bek nyan jiwoe le
Jikeumbali woe bak sampee
Muwoe ceulakaji nyan lom that
Hana ubat gadoh lagee

Diwa Sakti meunan neukheun
Bahle lon tueng keu meulintee
Balah horeumat nyankeu buleueng
Meuhan lon tueng pakri lagee

Aneuk teungkupi na sidroe
Ureueng binoe jroh that rupa
Kasmi Diwi nama putroe
That sambinoe hana sakri

Neukheun bak aneuk haba sipatah
Kupeukawen kah ngon aneuk sitree
Aneuk ceulaka lakoe di kah
Nyan nyang mudah ulon teumee

Kasmi Diwi jaweueb hana
Iem droe saja meunan lagee
Sigeutu han jimeudawa
That bahgia bungong keumbee

Ban nyang kheundak teungku ayah
Insya Allah dawa han mee
Hana sagai sueue titah
Hana mubantah ube gutee

Lheueh nibak nyan neupeunikah
Hukom Allah meunan teuntee
Si paleh jaweueb lafat nikah
'Oh nan sudah tamam dilee

Si ceulaka teutap sinan
Ngon judo nyan jroh meuteuntee
Rupa jidah hana lawan
Rupa na ban bungong keumbee

Kulet licen hana padan
Putroe intan judo sitree
Jigaseh that keu suami
Adab jibri jeuep-jeuep watee

Si ceulaka that jibeunci
Nibak hate na dum sitree
Dalam hate that meunyeusai
Sagai-sagai jieu han mee

Bak si paleh hana akai
Cit gai-bugai hana malee
Han jipajoh bu lam dalong
Keudeh u anjong lam pingan batee

Asam lam bruek ie lam mangkong
Meunan untong di jih lagee
Kasmi Diwi indah rupa
Sang mutiara meunan lagee

Bak si paleh jeuheut raya
Nyan sa rupa jieu han mee
'Oh jikalon rupa esteuri
Maken beunci hana lagee

Dalam hateji han meukri
Na dum tahi wahe sampee
Jiduek han jeuet jidong alang
Mohon pulang nyan jilakee

Idin teungku keu lon seukarang
Heundak pulang ubak sampee
Diwa Sakti neubri idin
Deungon salen neubri dilee

Peugot makanan keu beukalan
Indah han ban jroh meuteuntee
Hingga hase sileungkapan
Lheueh nibak nyan jak meuteumee

Si ceulaka beudoh beurjalan
Beursafaran keunong watee
Ngon esteuri seutot sajan
Si ceulaka han rela lagee

Suara meudhot cit hana ban
Siulahan lagee asee
Peurumoh jidhot ngon jibeunci
Jeuheut lagi hana lagee

Si ceulaka that jibeunci
Keu esteuri bungong keumbee
Di peurumoh galak that hate
Keu suami meunan lagee

Bitpi dumnan bak esteuri
Bak suami jieu han mee
'Oh troh keunan jipeutulak
Jipeusak jiyue woe dilee

Bak sipaleh peue meuseukutu
Bek meututo jih bak ulee
Na ban tamse ie ngon minyeuk
Han jeuet jiduek lagee asee

Keudeh keunoe nyan jiyue seuk
Keudeh kaduek bek rab ngon kee
Meunan jikheun aneuk culaka
Tan bahgia ube gutee

Jiduek di likot aneuk dara
Jroh that rupa hana lagee
Jiplueng leugat le jih lanja
Han jikira keu bungong keumbee

U nanggroe Watu jiwoe lanja
Nyan bicara aneuk asee
Peurumoh tinggai han jikira
Rot lam rimba nyan jikajee

Bipti jeuoh jarak nanggroe
Sikhan uroe jak meuteuntee
Ngon meutuah si nyak putroe
Bungong uroe aneuk guree

Cot uroe troh nanggroe Wa u
Keuramat teungku do'a guree
Sajan aneuk bungong meulu
Bintang timu jroh han lagee

Aneuk teungku jroh peurangoe
Pie budoe jroh meuteuntee
Ngon takwa saleh han soe
Geunap uroe pubuet watee

Mesalang cut na ibadat
Pubuet ta 'at keu panghulee
Beukit rayek siploh lipat
Leubeh deurajat hana lagee

Nanggroe Watu troh uroe nyan
Makanan han wahe sampee
Bak esteuri na makanan
Jipajoh han aneuk asee

'Oh rab putroe ka toe keunan
Beungeh yoh nyan aneuk asee
Si ceulaka deuk han tara
Ucong ara jiek dilee

Di lua nanggroe sibak ara
Rab ngon kuta meunan lagee
Si ceulaka ek ara rampak
Pot boh masak pajoh dilee

Di yup ara jroh meusigak
Taeu galak hana lagee
Teupat raja meuen meutandang
Sang geulanggang bak ri lagee

Boh ara le muda masak
Cabeueng rampak that meuree-ree
Jipileh nyang masak-masak
Meusu po nyak di yup kayee

Wahe teungku ulon arat
Neutiek leugat keunoe dilee
Pruet lon deuk that meukruk-kruk
Putikpi jeuet neutiek dilee

Si ceulaka seuot esteuri
Sangat beunci hana malee
Keupeue kutiek hana gaki
Han jeuet katiti u cong kayee

Ban jideungo meunan kata
Jiek lanja bungong keumbee
Ban jikalon meunan rupa
Si ceulaka jitren dilee

Jikoh duroe jikareuem bak
Tinggai budak di cong kayee
Nyan bicara aneuk bisoe
Jiboh putroe aneuk asee

Teutap sinan di cong ara
Lon calitra laen lagee
Peurintah buet bak Rabbana
Neupeunyata mangat tathee

IX. RAJA WADIHARAH MEUKAWEN NGON KASEUMI DIWI

Uroe asa lahe sudah
Wadiharah beurangkat dilee
U lua kuta raja ziarah
Neucok langkah sajan guree
Ngon Meudeuhak huleebalang.
Seukalian dum meuteuntee
Ubak duson raja meutandang
Bak geulanggang raja meujamee
Ateueh gajah poteu raja
Neueu rupa saboh lagee
Siulahan manusia
Di cong ara neupeuteuntee
Bak gunangan sabda raja
Neupeunyata u cong kayee
Gunangan deungo sabda raja
Neupeunyata le meuteuntee
Leumah jieu ureueng binoe
That sambinoe hana lagee
Na ban buleuen peuet blah uroe
Gunangan woe ka meuteuntee
Ban sare troh beuet jaroe
Ampon kamoe he panghulee
Deelat tuanku keumala nanggroe
Jroh that putroe di cong kayee
Ban raja deungo meunan titah
Neuba gajah u peureudee
Leumah neueu putroe indah
Hebat leupah hana lagee
Lang geumilang bukon bubarang
Ban buleuen trang meunan lagee
Tiwah buleuen deungon bintang
Cahyaji trang bungong keumbee

Raja tanyong bak Meudeuhak
Pane budak di cong kayee
Manusia saleh budak
Jroh meusigak hana lagee

Hana meunan nyang ka ku eu
Saleh diu meunan lagee
Wareuna badan jroh meukilat
Badan bulat hana lagee

Miseue buleuen peuet blah meuhat
Bak lon lihat bungong keumbee
Ok di ulee patah mayam
Seulanggoi timang ateuh ulee

Rupa indah meujeureulang
Ulun pandang meunan lagee
Hana sapat na teuladan
Jeup-jeup kawan lon eu dilee

Jaweueb Meudeuhak tanyong sulotan
Neukheun nyoe ban le meuteuntee
Bukon aneuk mambang diwi
Bukon pari meunan lagee

Bukon hewan pari diu
Deelat tuanku jroh that lagee
Aneuk ensan karonya Tuhan
Keunoe beurjalan u cong kayee

Karonya Tuhan Malikon Manan
Aneuk ensan hai panghulee
Raja deungo kata Meudeuhak
Hate galak hana lagee

Neupujoe Po Ilahon Haq
Duroe sikrak neuboh dilee
Duroe habeh geupeusiblah
Peurab gajah u peureudee

Teuma marit raja Wadiharah
Hai cut indah bungong keumbee
Tatren keunoe bungong kundo
Dara baro bungong keumbee

Ban jideungo meunan tuto
Budak lalo di cong kayee
Raja sambot neucok keudroe
Deungon jaroe cok neupangkee

Ateueh gajah neupeuduek putroe
Lheueh nyan neupuwoe le u juree
Sajan rakyat meukeukatoe
Meudeuhak sidroe lom peuet guree

Troh ban pinta ayah putroe
Yoh di nanggroe neukheun dilee
Kupeukawen ngon si ceulaka
Akhe bahgia Tuhan peuteumee

Diwa Sakti meunan kata
Nyan ulama eelia teunttee
Nyanpi ka troh ban kheun ayah
Eelia Allah le eleumee

Raja yue boh keuleumbu gajah
Neuwoe pantah le u juree
Ban sare troh keunan sampoe
Geuseumanoe putroe dilee

Lam tayeuen meuh ie geupasoe
Geuseumanoe bungong keumbee
Ladom tayeuen suasa pirak
Jroh meuhayak hana lagee

Dumna rakyat pandang galak
Dong meusak-sak hana lagee
Peurumoh raja huleebalang
Dum sibirang keunan dilee

Meugah putroe tamse bintang
Beureuteh ngon pisang le meuteumee
Lheueh setmanoe geubri salen
Bukon canden nibak dilee

Ija meukasap sutra licen
Padum laen ngon boh bajee
Geupeusok subang meuh nyang hijo
Ateueh baho cahya meuree-ree

Di ulee ceumara dum geuseudoe
Jroh meuloe-loe hana lagee
Ceukam sanggoi zamrut hijo
Wareuna biru ngon keulabee

Ngon patam dhoe ban manikam
Lheueh geuandam indah lagee
Bak geutiek uneun ikat silan
Mata intan yum siribee

Ceumara meuh indah han ban
Dokma sajan deungon bajee
Euncien gitek rakna kilu
Nibak putu deureuma lhee

Rupa indah cahyaji hu
Mata ngilu soe eu lagee
Soe nyang kalon hate mangat
Rasa nikmat ka meuteumee

Sijuek mata pandang ladat
Dumna rakyat wareh sampee
Lheueh geupeungui dara baro
Hireuen tahe dumna jamee

Bak tika meuh ateueh kaso
Dendayang le hana lagee
Teuduek lingka dum meureuntang
Nyang meusubang na lhee ribee

Peurumoh raja ngon huleebalang
Bentara blang meunan lagee
Cantek maneh Meudiwangge
Beureuhi hate soe eu lagee

Teuma geubet ngon bu leugat
Reusam adat ureueng dilee
Ateuh keurikai meuh nyang indah
Hate dasyah wareh sampee

U nap putroe nyang baik that
Geutueng syarat habeh lagee
Peurumoh raja huleebalang
Buka hidang bri keu jamee

Boh timon aceh ngon timon phang
Dalam hidang dum le lagee
Meunan reusam adat Aceh
Bak nanggroejeh meunan lagee

Teuma geuseupreuek ateuh putroe
Bu fui asoe bungong keumbee
Bu fet kulet mangat asoe
Beu roh dudoe dalam juree

Beu seulamat nyawong badan
Ngon sulotan bek meusitree
Mukjizat Nabi akhe zaman
Beu seunangan dalam juree

Teuma geujok dum bu leukat
Ban nyang adat reusam dilee
Kheun bismillah keu beureukat
Wahe sahbat yue panghulee

Beu leumoh hate beu seulamat
Bu meukeumat nyang mangat bee
Ateuh keurajeuen nyan beu teutap
Beu jarak laknat beu jeuoh sitree

Miseue tumpoe ngon bu leukat
Beu mupakat dalam juree
Beu jarak bahaya donya akhirat
Dua teupat Tuhan puteuntee

Beu lanjot umu di dalam don
Meuah ampon bak panghulee
Beu Allah bri deesya ampon
Nibak ulon nyang meulakee

Raja sulotan Wadiharah
That meutuah hana lagee
Lheueh nyan geupeutroh hukom Allah
Syukor keu Allah jeuep-jeuep watee

Rakyat le that han teupeugah
Hireuen dasyah meulaksin ribee
Dalam sarat mideuen limpah
Subhanallah that meuree-ree

Geusie keubeue leubeh meulaksa
Geusie unta meuploh ribee
Laen kameng han teukira
Rakyat dumna geupeujamee

Maseng-maseng mupeurasan
Seukalian le that lagee
Geupale gong geupéh geundrang
Han tom meunan nyang ka dilee

Meung sikeujap hana reunggang
Huleebalang meuploh ribee
Jikasyuk dap rakyat galak
Ngon jisurak su meu'ee-'ee

Lua dalam rakyat meusak-sak
Keunan jijak meuploh ribee
Meusu bangsi jiyup suleng
Hana bandeng le that lagee

Jipeunari ngon aneuk Kleng
Ka meupuseng lagee batee
Ngon di muri mudai sikeuti
Jroh han sakri geumeulakee

Giseng hareubab ngon keucapi
Canang lagi lom meuteuntee
Sangkai kala ngon seurune
Rakyat rame meuploh ribee

Taeu teuka sidroe sane
Ka rame hana jan tathee
Geutet meuriam geunta ngon bumoe
Dalam nanggroe su meu'ee-'ee

Hana teudoh malam uroe
Bala bagoé le that lagee
Beude nubat saboh sagoe
Dum sinaroe maseng sukee

Jilhiet meuriam kuceng tido
Ka'a-ka'u bandum jithee
Uroé meuhayak malam meuhubo
Geundrang tambo le peureulee

Meusu canang ngon keudangdi
Hana sakri jroh that lagee
Buet di raja cit ka maklum
Bak teungku dum cit ka neuthee

Uroe malam beude gam-gum
Han tatudum le meuree-ree
Geutet meuriam tujuh seuen tujuh
Rakyat kiroh hana lagee

Geutet beude geumpa alam
Hana macam le that lagee
Hana teudoh uroe malam
Su meuriam leupa-leupee

Na ban bagoe teuka guroh
Beude jicoh seuen siribee
Nanggroe Watu sang ka runtoh
Rakyat kiroh le that jamee

Bungong apui han teukimat
Mata ladat taeu lagee
Malam peungeuh lagee kilat
Timu barat dum meuree-ree

Jiek buleuen jitren sang bintang
Tujoh sikarang meunan lagee
Meureutoh ploh rakyat pandang
Ban buleuen trang jroh meuteuntee

Bungong peutek jiek sabe
Bagoe suwe meugisa ulee
Rakyat hireuen gadoh pike
Dum seugala be jroh meuree-ree

Geupoh geundrang deungon tambo
Ka'a-ka'u hana lagee
Yup seurune lagee syum sye
Tarek keundo jiboh lagee

Rakyat girang hate seuu
Nyang pajoh bu han ek teuntee
Uroe malam meusu 'a-'u
Barat timu bandum jithee

Uroe tujoh lheueh peurasan
Seungap 'oh nan saboh lagee
Geupeunikah syahi alam
Ban hukoman ureueng dilee

Ban nyang adat hukom reu sam
Ban aturan meunan lagee
'Oh lheueh nikah raja deelat
Hate mangat hana lagee

Ureueng laen bandum suka
Rakyat raja dum peujamee
Peurasan lheueh ngon keurija
Woe jak gisa dumna jamee

Dalam hate galak han soe
Aneuk nangroe wareh sampee
Nyang han mangat guree peuet droe
Malam uroe muka layee

Seulayee raja meuteumee putroe
Guree peuet droe hana lagee
Han geujeuet fam malee keudroe
Peuturot dudoe peugot lagee

Di guree peuet geukheun meunoe
Raja geutanyoe han got lagee
Neutueng putroe ureueng han meune
Dara meutemee di cong kayee

Bangsa han meukri kawom han mupat
Teubeulasat keunoe dilee
Neupateh haba bak Meudeuhak
Bukon jeuheut hana lagee

Meudeuhak deungo ka geuseuot
Hana patot meunan lagee
Ureueng binoe rupa juhari
Budi dari bangsa lagee

Hana sidroe nyang sa rupa
Pakri ceulaka takheun teuntee
Kheun tatuban asailiah
Dudoe meugah saboh watee

Kadang aneuk ureueng meugah
Buet di Allah soe tube thee
Keu ceulaka bek tapeugah
Meulaenkan Allah sidroe nyang thee

Jikalee bit ceulakaan
Han roh sulotan neumeukawen
Kareuna dua han mupakat
Salah adat jeuet keu sitree

Lagee musoh han meulawok
Sabe lam syok hana lagee
Beukit nyang ka roh keu esteuri
Teuka beunci hana lagee

Siulahan kon esteuri
Jeuheut bagi hana lagee
Na tamse ie nibak eumpeuek
Barangho tapeuek han meusilee

Meunan tamse bak taadat
Baranggapat jeuet keu sitree
Baranggajan lam meudawa
Suntok masa lagee asee

Takheun meunoe meudeh jikata
'A-'u subra jeuep-jeuep watee
Ceulaka bahgia han jeuet sapat
Meunan adat cit meuteuntee

Saboh rahmat saboh laknat
Pane mangat meunan lagee
Keu hai Meudeuhak lom beurkata
Ceulaka'bahgia ka lheueh dilee

Masa azai awai hingga
Lahe nyata taeu lagee
Miseue teurseubot dalam Quran
Firman Tuhan bak panghulee

Wa hazana ahmataka fi Rabbihim
Wahe po lem tafam beu teuntee
Ureueng dua meusosah kayem
Meunan ladem jinoe dilee

Eseulam kafe ceulaka bahgia
Cit meudawa geunap watee
Han jipateh bak agama
Buet sibeuna jipeusilee

Miseue Musa deungon Fir'un
Lagee dinun ngon meuteumee
Miseue Ibrahim deungon Namrut
Muhammad ngon abu sitree

Meunan narit kheun Meudeuhak
Neupeugah bak peuet droe guree
Ban guree deungo kheun Meudeuhak
Yoh nyan seungkak ka keu malee

Teuiem ban peuet han le haba
Muda beulia le eleumee
Ngon ceureudek hana tara
Bijaksana le eleumee

Ban peuet guree hate pipak
Sang ka rusak sangat malee
Gaduh ilah keu Meudeuhak
Sabe bijak hara lagee

Raja deungo kheun Meudeuhak
Hate galak meunan teuntee
Leub²l gaseh lagi galak
Keu Meudeuhak bungong keumbee

Lom Meudeuhak kheun bak deelat
Doli halarat lon kheun dilee
Ceulaka bahagia han jeuet sapat
Dalam surat meunan meuteumee

Miseue syae Abu Hasan
Lon peugah ban nyoe beu tathee
Bahwa sunggoh nyang bahagia
Ngon ceulaka jeuet keu sitree

Tan mufeu'at sapat dua
'A-'u dawa geunap uroe
Beu teuingat dumna gata
He syeedara beu na tathee

Wareh sahbat ban seulingka
Agam dara wareh sampee
Teutap 'oh noe saboh leua
Lon calitra laen lagee

Wadiharah jak u lua
Dum seureuta ban peuet guree
Ngon Meudeuhak muda beulia
Laen tandra wareh sampee

Wadi meuntroe ngon bentara
Dua laksa teulhee ribee
Kata rawi po calitra
Lon peuhaba jinoo teuntee

Meuteumee lom putroe muda
Ngon si ceulaka lakoe dilee
Mangat meukri asailiah
Ulon peugah meung na tathee

Akhe dudoe teuma meugah
Buet Po tallah nyang meuteuntee
Raja raya neubeurangkat
Deungon rakyat na lhee ribee

Limong reutoh nyang mat tungkat
Beusoe seureulat beude mubatee
Limong reutoh bajee mirah
Hebat leupah hana lagee

Limong reutoh payong mirah
Geuboh tatah meuh di ulee
Raja teuduek ateuh gajah
Ngon cut indah bungong keumbee

Sajan rakyat that barollah
Wadiharah jak meuteuntee
Padum raja ireng sajan
Ateuh geuritan indah lagee

Maha raja wadi sulotan
Meuntroe sajan na peuet ribee
Nyang jak di keue yue sampoh broh
'Oh nyang na troh jak meusilee

Tambak jalan dum geuboh broh
Bujang suroh dum meuree-ree
Rakyat galak beursukaan
Ngon bunyian le that lagee

Palee geundrang tambo sajan
Gong analan jroh meuteuntee
Rupa indah hana lawan
Jroh pakaian ateuh ulee

Troh bak gampong si ceulaka
Leumah rupa aneuk asee
Dong sampoh broh di rot raya
Putroe muda kalon lagee

Si ceulaka yoh saboh roe
Nyang boh duroe di cong kayee
Ka teusinyom tuan putroe
Cahya gigoe got that lagee

Raja tanyong ubak putroe
Takalon soe khem meuhee-hee
Pakon takhem leumah gigoe
Seuot putroe bungong keumbee

Ulon teukhem hana seubab
Hana ajab hai panghulee
Ban raja deungo meunan jawab
Bukon cakap le that lagee

Hana soe khem meutan seubab
Han ngon ajab that meuteuntee
Meung tapeugah nyang jeuet seubab
Gata bit rab nyawong padee

Meuhan tapeugah bak uroe nyoe
Kukoh takue puntong ulee
Ban neudeungo uleh putroe
Bungong uroe peugah teuntee

Putroe peugah awai akhe
Baten lahe dum meuteuntee
Habeuh bandum leumah lahe
Raja pike jroh that lagee

Bak asai fon ureueng jak beuet
Jak meununtut jimeuguree
Bak Beurahman nyan jijak beuet
Jih nyan peuet nyang na jeuet lhee

Sidroe gasien ngon ceulaka
Tan bahgia ube gutee
Beurahman nyan na tatukri
Diwa Sakti nama dilee

Nyankeuh ayah lon hai doli
Dalam neugri nan Nakasu
Si ceulaka dilee suami
Jipeugah kri meunan lagee

Meuri ayah deungon umi
Tuan siti peugah teuntee
Raja deungo putroe peugah
Bunda ayah ka meuteuntee

Nan Beurahman areh billah
Meusyehuh gah hana lagee
Nanggroe Nakasu tempat makam
Singkat kalam 'oh nan dilee

Meunan peuneugah putroe ajam
Pirak hupam indah lagee
Habehe mufom dumgeu sare
Raja pangge ceulaka dilee

Ban jideungo raja pangge
Jibeudoh le jak peuteuntee
Troh bak raja ka jideelat
Teudong ngadap wa ngon singkee

Ban nyang meujeulih reusam adat
Ban nyang bakat resam dilee
Bak si ceulaka raja sudi
Na katuri putroe dilee

Si ceulaka han jituri
Tuan siti meusu dilee
Lheueh nyan teuma ka jituri
Nyo esteuri jikheun dilee

Syah beurdeelat lom neusudi
Tanyong pakri asai dilee
Miseue haba putroe peugah
Hana ubah ube gutee

Yoh nyan raja galak dasyah
Putroe indah that meuteuntee
Bangsa leubeh aneuk Beurahman
Po jonjongan baro neuthee

Diwa Sakti nan urohan
Syeedara sulotan ulon dilee
Leubeh bangsa meusyehuhu that
Timu barat dum ureueng thee

Hana bangsa barangapat
Ngon keuramat hana lagee
Patot judo Wadiharah
Putroe meugah hana lagee

Yoh nyan raja Wadiharah
Hireuen dasyah han meusilee
Galak suka dalam hate
Neupujoe le Meudeuhak dilee

Sabet beuna ban kheun gata
Ceulaka bahgia jeuet keu sitree
Han mupakat jih nyan dua
Barang masa jeuep-jeuep watee

Maseng-maseng jroh aneuk bangsawan
Han roh teelan jeuet keu sitree
Lheueh nyan Meudeuhak raja pujoe
Neupeujaroe ringget siribee

Seubab beutoi hana paloe
Tuan putroe pike dilee
Nibak Meudeuhak muliaan
Nyang laheran baten teuntee

'Oh lheueh nyan putroe teuma pike
Dalam hate leumah lagee
Ubak raja neupeugah le
Tuan siti neukheun teuntee

Ampon tuanku syahi alam
Raya hajatan lon panghulee
Idin keu lon doli halarat
Saboh hajat ulon peuthee

Lon tueng Meudeuhak nyan keu adoe
Syedara droe lon niet teuntee
Kareuna lon ureueng sidroe
Hana adoe wareh sampee

Saboh ibu lon ngon ayah
Lon seubot sah adek panghulee
Karonya Tuhan lahe kudrat
Jeuet seulamat lon bak sitree

Teutapi han ek lon balah that
Na halarat soe peuteuntee
Ban raja deungo haba siti
Idin neubri ban jilakee

Jiseubot Meudeuhak nyan keu adoe
Baek budoe hana lagee
Raja idin keu Meudeuhak
Neuwoe neujak dalam juree

Na ngon putroe neuwoe neujak
Hate galak hana lagee
Teutap raja dalam meuligoe
Teutap putroe dalam juree

Dalam tahta bandua droe
Raja ngon putroe lagee dilee
Amma bakdu teungku badan
Nyoe karangan laen lagee

Ureueng seumurat kureueng lisek
Kureueng cantek hana lagee
Miseue aneuk miet jak pot kulat
Jijak siat jula jiwoe

Meunan cit ureueng seumurat
Kureueng ingat wahe adoe
Lon peugisa raja meugah
Rakyat neukrah dalam nanggroe

Heundak yue jak u Nakasu
Ubak teungku Beurahman Diwa
Ubak ayah tuan putroe
Raja nanggroe jak saweue tha

Neukrah rakyat seukalian
jak bak tuan wareh sampee
U nanggroe Nakasu yue sulotan
Bak Beurahman ayah putroe

Neuyue intat peurseumbahan
Rakyat sajan wadi meuntroe
Padum ureueng nyang mulia
Panglima ngon imum nanggroe

Di nanggroe Watu rakyat neukrah
Raja yue ba bungong jaroe
Putroe peuek areuta keu nang mbah
Peurmata indah hana bagoe

Laen nibak nyan han peue peugah
Ngon meutuah si nyak putroe
Di dalam nyan na saboh surat
Tanda adat keu ayah droe

Hai lakuan dalam surat
Bri halarat ateueh putroe
Areuta le dumpeue makmu
Beureukat teungku wareh sampee

Putroe peuek ban nyang laku
Idin teungku ka neulakee
Sare hase sileungkapan
Sulotan neusuroh dilee

Siribee rakyat nyang meubeuban
Laen nibak nyan dum meuree-ree
Wadi meuntroe panglima prang
Huleebalang dum meuribee

Nyang meugah ateueh guda plang
Jak meureuntang dum meuree-ree
Padum lawet peurjalanan
Bak Beurahman ka troh sampoe

U blang Nakasu ka troh keunan
Bak Beurahman meuthee jinoo
Neuyue ampeueng yoh masa nyan
Ngon angkatan dum sinaroe

Rotnoepi le rotdeh saban
Le angkatan Nakasu nanggroe
Lheueh geampeueng jamee teuka
Ban laku kada reusam nanggroe

Geupeutamong laju u rumoh
Rakyat damoh dum sinaroe
Ban sare troh ka meuteumee
Ban nyang lagee 'uruf donya

Mumat jaroe dumgeu rata
Peurseumbahan geuba geujok dilee
Beurahman peuduek seukalian
Bak hamparan jroh meuteuntee

Maseng-maseng ban atoran
Dumna rakan wadi meuntroe
Teuka narit huleebalang
Ureueng datang Watu nanggroe

Beuet jaroe le meulayang
Panglima prang imum nanggroe
Nyoe peuneuek na sigeutu
Nanggroe Watu teuka keunoe

Ulon peugah nibak teungku
Suroh tuanku raja kamoe
Nyoe peuneuek keunoe lon ba
Judo raja tuan putroe

Ubak kamoe nyan neuyue ba
Nyankeu tanda bungong jaroe
Seureuta ngon surat deelat
Doli halarat yue me keunoe

Beurahman seot jazakallah
Alhamdulillah neukheun dudoe
Nyankeu balah uleh Allah
Nyang that murah han sibago

Beunda indah that meusaket
Pakon tapeuek sidum-dumnoe
Kareuna ulon faki gareb
That meusaket dalam nanggroe

Ulon hina that miseukin
Lagi gasien hana bagoe
Meulaenkan tulong Rabbon 'alamin
Meunan yakin bak lon sidroe

Lon lakee bak Rabbon 'ibad
Meutamah deelat raja nanggroe
Bu meutuah meusyeuhu that
Beu le rakyat jii kot dudoe

Beu seulamat iman ngon amai
Beu na keukai uroe dudoe
Beu le keurajeuen keumuliaan
Nibak Tuhan Po alam nyoe

Beurahman peujamee dumna rakyat
Maseng adat reusam nanggroe
Geusie keubeue dum mupakat
Wareh sahbat dalam nanggroe

Padum lawet sinan teutap
Dumna rakyat geulakee woe
Idin teungku trep ka lambat
Jinoe siat kamoe meuwoe

Insya Allah seuot Beurahman
Idin bak lon jakkeu tawoe
Saleuem ulon nibak doli
Tapeugah kri keu si nyak putroe

Beurahman peuek euncien saboh
Rupa that jroh hana bagoe
Nama firoh nan geuuroh
Han soe tu'oh yum meukatoe

Geutamah meuh keurawang intan
Jroh lakuan han sibagoe
Le faidah that euncien nyan
Kheun Beurahman peugah meunoe

Kasiet leubeh that beureukat
Jeuet keu ubat nyang euncien nyan
Hareuga meuhai yumpi le that
Bak geukimat na silaksa

Beurahman kheun bak utosan
Nyoe seumbahan bak lon sidroe
Akan deelat raja sulotan
Do'a yoh nyan jeuep-jeuep uroe

Ulon hina hana padan
Keulakuan dalam nanggroe
Lon harap ampon nibak Tuhan
Beureukat sulotan raja kamoe

Lon ba harap ngon beurani
Euncien lon bri keu raja nanggroe
Tamse lon peuek aneuk keusawi
Tanda kami bungong jaroe

Gantoe lon duek deungon khalifah
Nyoe hadiah nibak kamoe
Gantoe ulon mujakarah
Lon heundak ziarah jeuoh nanggroe

Beurahman bri surat sipucok
Neuyue jok keu si nyak putroe
Kasmi Diwi rupa ilok
Rakyat mabok dum sinaroe

Haba lam surat peungajaran
Peuringatan bak po samlakoe
Meunoe haba geuacuan
Kheun Beurahman keu aneuk droe

Wahe aneuk jantung hate
Beu tapike he aneuk droe
Deungon lakoe bek mupake
Baranggari asoe nanggroe

Tadeungo aneuk lon kheun sipatah
Narit ayah lam nanggroe nyoe
Pubuet bakti aneuk keu Allah
Bu meutuah hai sambinoe

Puasa jakeuet seumbahyang fitrah
Tabri seudeukah he aneuk droe
Seulaweuet keu Nabi dike keu Allah
Beu tameudrah Quran nyoe

Bek talupa keu Po tallah
Ulon peugah he aneuk droe
Pubuet bakti keu doli halarat
Beu dasyah that geunap uroe

Beu tagaseh aneuk beu that
Nyang tasebot keu adoe droe
Kareuna Meudeuhak cit areh that -
Hana sapat na sibagoe

Bek meututo nyang han patot
Habeu karot jeuet mupaloe
Bek paleng aneuk keu nang mbah
Raya salah uroe dudoe

Lam nuraka Tuhan keubah
Paleng keu nang mbah ngon lakoe droe
Akan deelat bek mubantah
Cut meutuah ingat keudroe

Deesya beusa ubak Allah
Ulon peugah he aneuk droe
Saleu:em ulon keu Meudeuhak
Nyang that bijak areh han soe

Kujok gata bak Meudeuhak
Dalam donya deungon bak lakoe
Nyang peuneujeuet cit di Tuhan
Seukalian dum alam nyoe

Deungon tulong Ilahon Haq
Bek tatulak narit lon nyoe
Ulon peugah ban puleh hak
Meudeuhak bijak han soe

Meunan haba dalam surat
Neujok meuhat nyan keu putroe
Habapi lheueh geuwoe leugat
Beudoh rakyat dum sinaroe

Geuteubiet blang tamong uteuen
Na sibuleuen troh u nanggroe
Rakyat ka troh toe ngon mideuen
Pioh siseun Wadi meuntroe

Lheueh geupioh na ka siat
Tamong leugat kuta nanggroe
Raja Wadiharah geujak deelat
Dumna rakyat nyang baro woe

Sare lheueh ka raja geudeelat
Teudong ngadap wa ngon jaroe
Teureutib meujeulih reusam adat
Ban nyang babat ukoran bak droe

Lheueh nyan geukheun saleuem Beurahman
Keu sulotan raja nanggroe
Sajan rakyat di hadapan
Guree sajan sinan peuet droe

Di nap Meudeuhak muda bangsawan
Peurseumbahan geupeujaroe
Akan deelat raja sulotan
Bak Beurahman nyan geupuwoe

Laen nibak nyan euncien saboh
Rupa that jroh hana bagoe
Euncien firoh nan geuroh
Hana saboh lam alam nyoe

Hu seumeuloh cahya bandrang
Ceumeureulang han sibagoe
Dumna rakyat keunan pandang
Nyum bek leukang jarak sinoe

Raja sambot peurseumbahan
Seukalian dum sinaroe
Lheueh nyan neujok surat kireman
Ubak tangan tuan putroe

Putroe neucok surat kireman
Neujok keunan bak samlakoe
Meudeuhak kheun teuma lheueh nyan
Di hadapan tuan putroe

Meudeuhak beuet surat kireman
Bacut neufam po samlakoe
Geukheun saleuem nyan keu karim
Meudeuhak alem hana bagoe

Lheueh Meudeuhak kheun kireman
Po jonjongan tanyong hareutoe
Neusueue bak muda beulia
Uleh raja neukheun meunoe

Peue na Beurahman neuthee gata
Nyo syeedara deungon putroe
Nanggroe jeuh hana tara
Tapeuhaba ubak kamoe

Meudeuhak jawueeb sabda raja
Tacalitra di nap putroe
Ampon tuanku po meukuta
Cit troh mata keuramat han soe

Peue nyang tasom lahe nyata
Cuba pareksa ubak putroe
Teuma teusinyom nyak putroe muda
Neupeunyata teuma jinoe

Bit nyo meunan tuan putroe
Ban kheun samlakoe adek gata
Tuan putroe teuma peugah
Bak khalifah neuhareutoe

Sabet tuanku ayah hamba
Cit troh mata ajab han soe
Narit Meudeuhak bek syok sangka
Bek neukira meudeh meunoe

Wadiharah lom meusabda
Euncien meulia neukheun meunoe
Yumpi meuhai hana tara
Le hareuga that euncien nyoe

Meudeuhak bet jaroe dua
Ampon raja tuanku kamoe
Hareuga euncien han ek hingga
Yum hareuga lhee boh nanggroe

Watee sunyoe ureueng hana
Neupareksa ubak putroe
Ban raja deungo kheun Meudeuhak
Hate galak hana bagoe

Neubri areuta keu Meudeuhak
Ban nyang layak kada jinoe
Bajee saboh dokma sajan
Tatah intan deungon pudoe

Laen nibak nyan seukalian
Ban atoran kada bak droc
Dina siribee neubri sajan
Keusukaan hana bagoe

Leungkap alat dum di badan
Neubri sulotan keu samlakoe
Neusok euncien uleh sulotan
Nibak tangan uneun jaroe

Rupa indah hana padan
Syah sulotan raja nanggroe
Habeu narit seumporna kalam
Ubak makam rakyat jiwoe

Teutap raja nyan di dalam
Tahta seumayam peugang nanggroe
Yoh nyan guree peuet neumupike
Hana sabe Meudeuhak nyoe

Di pasi kon sampoe u gle
Hana sabe deungon si jih nyoe
Mit teuladan hana sabe
That meusampe aneukgeu nyoe

Timu barat hana bangsa
Jeup-jeup donya barangpat nanggroe
Teuduek 'oh noe dilee siat
Nyang hajat that lon hareutoe

Ulon peuduek haba raja
Lon peugisa Meudeuhak sidroe
Nyoe ajaeb lheueh nyan sajan
Keunarang intan deungon pudoe

Tamse meutia ngon malakat
Nyang baek that dalam nanggroe
Amma bakdu teungku badan
Nyoe karangan keu samlakoe

* * *

X. MEUDEUHAK MEUNIKAH NGON SITI AMRAK

Deungo lon kisah keu Meudeuhak
Sangat bijak hana bagoe
Beu got tadeungo nyang meusigak
Na meung galak bak hate droe

Na soe nyang jeuet keu ibarat
Wahe sahbat aduen adoe
Na jeuet tafam lam hikayat
Ulon surat ngon bahasa droe

Meudeuhak rayek seun sigeutu
Sajan tuanku raja nanggroe
Marit utoh mangat ngon su
Muka taeu ban meuk uroe

Ngadap raja baranggajan
Seureuta sajan tuan putroe
Meudeuhak rayek lom analan
Sinan sajan meukuta nanggroe

Bak siuroe teukeudi Tuhan
Putroe bangsawan lam meuligoe
Neumeututo ngon sulotan
Neukheun nyoe ban uleh putroe

Deelat tuanku lon meuheundak
Patot layak bak lon sidroe
Adek hamba tuanku Meudeuhak
Ka trep ubak meukuta nanggroe

Umu tujoh thon teuka keunoe
Peuet blah jinoe thon ka sampoe
Got tuanku neubri esteuri
Bangka Sakti pakai jinoe

Aneuk raja nyang juhari
Patot neubri keu samlakoe
Nyang meubudoe baik rupa
Tajak mita jeuep-jeuep nanggroe

Lagi cantek ngon mulia
Sipatah haba tanyong bak droe
Meuka jitem le Meudeuhak
Pakri layak tuanku droe

Teuma neutanyong bak puteh lisen
Hana laen bak lon sidroe
Aneuk raja rupa canden
Hana laen bak lon sidroe

Ho nyang hajat aneuk tapeugah
Kuyue ilah jeuep-jeuep nanggroe
Meudeuhak deungo raja peugah
Jaweueb pantah po samlakoe

Ampon tuanku syah beurdeelat
Ban nyang hajat meukuta nanggroe
Ulon seuon sabda deelat
Doli halarat ulon pakoe

Ulon pateh haba doli
Esteuri lon mita keudroe
Bak tuanku idin neubri
Ulon cari bawak keunoe

Ubak kawom po meukuta
Idin raja lon jak jinoe
Nyang nyo judo ulon mita
Keunoe lon ba ulon puwoe

Beu le do'a po meukuta
Ban nyang pinta beu troh sampoe
Ulonteu jak dilee mita
Keunoe lon ba ureueng binoe

Mudah-mudahan bak Allah bri
Meukuta neugri meudo'a jinoe
Beu Tuhan bri rijang sampoe
Beu troh lon puwoe ureueng binoe

Ulon mita jeuep-jeuep teumpat
Meusaket that ureueng binoe
Ulon cari di mana dapat
Nyang muslihat dalam nanggroe

Ureueng binoe ulon mita
Nyang seutia lam alam nyoe
Nyang na akai ngon bicara
Nyang sibangsa deungon kamoe

Nyang le mudah mubalekkan
Di nap saban di likot meunoe
Jigaseh that di hadapan.
Di likot nyan laen bagoe

Ureueng inong iman kureueng
Akai bubueng hana bagoe
Nyang ceureudek ulonteu tueng
Hana kureueng akai sampoe

Nyang ceureudek seutia teugoh
Hana jiboh gaseh sampoe
Akai baik iman teugoh
Meunan nyang jroh ureueng binoe

Raja deungo meunan hajat
Idin deelat raja kamoe
Jakkeuh aneuk beu seulamat
Beu taingat keu lon sidroe

Idinpi ltheueh nyan di babah
Meudeuhak seumbah raja nanggroe
Ltheueh meuteumee ngon deelat syah
Teuma neuseumbah tuan putroe

Habeh narit nyan di babah
Ubak ayah Meudeuhak woe
Rakna Kasan seureuta ayah
Meudeuhak peugah neukheun meunoe

Idin keu lon wahe abi
Lon peureugi bak uroe nyoe
'Oh lheueh idin ibu bapa
Mita beulanja po samlakoe

Peugot baluem ruja ija
Taeu rupa na ban gandoe
Gunteng saboh jarom saboh
Keunan neuboh nyan keu asoe

Neungui pakaian balek tukeh
Ija puteh dum sinaroe
Neuboh gandoe nibak baho
Meudeuhak lalo tren u nanggroe

Seutot taloe blang neujak laju
Nap u timu hadap uroe
Hana saboh rakan neuba
Meudeuhak bungka neujak sidroe

Saboh tungkat nyang na neuba
Leugat lanja jak samlakoe
Neuteubiet blang tamong rimba
Pat na raja neungo bunyoe

Jeuep-jeuep nanggroe neumeusafa
Meudeuhak ba saboh gandoe
Neutueng upah neucop ija
Keunan teuka meunasah sagoe

Neumeudagang siat sapat
Neuhareukat neuseumujoe
Cop kupiah nyan hareukat
Laen mudah lom buet jaroe

Mita ureueng nyang juhari
Nyang na budi jeuep-jeuep nanggroe
Aneuk raja aneuk wadi
Aneuk waki aneuk meuntroe

Aneuk tandi huleebalang
Meudeuhak pandang dalam nanggroe
Hana sapat nyang na reumbang
Aneuk bujang imum nanggroe

Hana saboh budi seutia
Aneuk bentara geusyik sagoe
Aneuk rakyat ngon peutua
Han seutia deungon budoe

Padum lawet mita esteuri
Han Allah bri lom samlakoe
Hana sidroe nyang na ragi
Nyang jiruji baek budoe

Jeuep-jeuep nanggroe Meudeuhak jak
Hana meurumpok ureueng binoe
Hana sidroe na mustahak
Hana bijak pie budoe

Seutot taloe krueng Meudeuhak jalan
Teukeudi Tuhan Po lon sidroe
Teuma meurumpok sidroe ensan
Keulakuan baek budoe

Meudeuhak turi ngon firasat
Na alamat tanda sampoe
Keubaikan Meudeuhak lihat
Nyo alamat ureueng binoe

Ilok pareh ban buleuen trang
Meudeuhak pandang mata laloe
Umu baro na peuet blah thon
Meudeuhak tren peuteumee droe

Ban sare rab ka meuhimpon
Meudeuhak fon tanyong meunoe
He adekda muda juhari
Tapeugah kri namateu soe

Ureueng binoe jiseuot le
Tidak mate nama kamoe
Meudeuhak cut panyang syawe
Neutupeue le makna hareutoe

Meudeuhak yoh nyan lheueh neupike
Di dalam hateneu meurawoe
Kheun Meudeuhak haba mubalek
Eunceck udep ho jak jinoo

Ureueng binoe seuot pantah
Me bu kulah keu ayah droe
Eunceck udep nyan tapeugah
Mana rumah awak jinoo

Eunceck udep teuma peugah
Rumoh daerah baroh nanggroe
Meudeuhak tanyong lom neusawat
Peue alamat kheun bak kamoe

Eunceck udep peugah alamat
Takheun teupat meunan bagoe
Ulon peugah he teungku jroh
Di leuen rumoh sibak kiroe

Lom Meudeuhak neutanyong sah
Hai adek jroh pajan tawoe
Eunceck udep peugah teupat
Ngon muslihat lambat lon woe

Geunireng rumoh tayeuen juga
Dua-dua di sinan toe
Nyankeu dali lahe nyata
Lon peuhaba nyata jinoo

Amarak kheun meunoe haba
Peue neupinta ubak kamoe
Beuneung raja dalam paya
Jipo cahya dalam bumoe

Pakon cut lem panyang haba
Peue neupinta ubak kamoe
Guda jiplueng geupoh lawa
Teuka unta peurumpok droe

Kamoe han tom taeu nyang ka
Pakri tasangka nyan keu kamoe
Guda plang guda peulanggi
Guda jinari ateueh buket

Pakon tuanku lon neusudi
Peue na janji nyang meusaket
Buleuen peungeuh ceumeureulang
Cicem subang po meugisa

Pakon teungku lon neusugang
Di dalam blang bak rot raya
Teuma seuot muda seudang
Kon cut bintang lon tham gata

Bintang kutob tanda kiblat
Bintang barat tanda nanggroe
Uroe leuho lon heundak teebat
Han lon tupat meunasah sagoe

Gamong mante lam lungkiek gle
Ureueng cok awe lilen uroe
Gamong jeuoh lon teubade
Barangpat le lon peugah droe

Habeh sueue han jawueb le
Lheueh nyan meucré bandua droe
Di Meudeuhak neujak pantah
Rot daerah baroh nanggroe

Ureueng binoe me bu kulah
Jok keu ayah po sambinoe
Meudeuhak eu nyan u baroh
Neueu peunoh ie krueng meuasoe

Meudeuhak pike akai jatoh
Bukon utoh ureueng binoe
Nyoekeu makna jikheun sahbat
Nyo areh that ureueng binoe

Meudeuhak tamong lanja leugat
Troh bak teumpat di nyak putroe
Lom neukalon nyan neusawat
Keu alamat tanyong bunoe

Troh u rumoh deuh neulihat
Na alamat haba bunoe
Meudeuhak dong di yup kayee
Neumeusilee padok uroe

Geunireng rumoh bak me dua
Meudeuhak thee na makna bunoe
'Oh lheueh neuu bandum tanda
Meudeuhak teuma tamong sidroe

Di leuen rumoh dong Meudeuhak
Ibu Amarak di seuramoe
Umi Amarak tanyong Meudeuhak
Pane tajak po samlakoe

Meudeuhak seuot meunoe neupeugah
'Oh noe langkah he ma kamoe
Lon meuhajat 'oh noe langkah
Ulon peugah deungo jinoe

Aneuk gata meuteumee di blang
Ulon pandang jroh sambinoe
Ilok pareh lang geumilang
Sang buleuen trang peuet blah uroe

Lagi ragoeng ngon jiruji
Nyo sibagi deungon kamoe
Lagi lisek hana sakri
Amarak siti baek budoe

Nyankeuh seubab ulon datang
Neupeusayang ulon sinoe
Hamba faki aneuk dagang
Lon meulang-lang jeuep-jeuep nanggroe

Ma Amarak ka teupike
Dalam hate ingat meunoe
Ulon ureueng miseukin faki
Hana sakri papa han soe

Kamoe ureueng hana areuta
Buetpi hana dalam jaroe
Ureueng binoe dum seumula
Agam dara dum jimeugoe

Ladom u gle jimeuladang
Ladom u blang jimeueumpoe
Buet hareukat dum jipeugang
Huleebalang aneuk nanggroe

Bahle kutueng nyang leubeh bangsa
Jicop ija jiseumujoe
Hana payah seunang raya
Meuteumee laba dum sinaroe

Bahle kaman ureueng meuladang
Kupeusayang soe me gandoe
Lagi hate seunang han sa
Bijaksana bandua droe

Kheun Meudeuhak teuma meunoe
Ulon nyoe deuk ma teungku droe
Breuh na nyopat ma teungku e
Tataguen laju jula uroe

Ma Amarak sambot leugat
Neucok meuhat deungon jaroe
Geutaguen le ma Amarak
Trep that masak jula uroe

Puteh sang breueh raya saban
Taeu lakuan soe nyang ragoe
Boh lam kanot peudeuk yoh nyan
Pantah han ban hana laloe

Neupreh masak lumpokpi han
Teupike yoh nyan lam hate droe
Habeh ie ju bu han masak
Woe Amarak di blang sidroe

Jieu Meudeuhak duek di rumoh
Majih mehmoh cula caloe
Amarak eu breueh han keumong
Deuh jipandang gadeng sinaroe

Pileh laen putroe seudang
Breueh rupa sang ngon gadeng nyoe
Dum uram breueh Amarak pileh
Puteh-puteh jroh seureuloe

Boh lam kanot taguen keudeh
Amarak areh hana bagoe
Meudeuhak cok limo lhee boh
Yue taguen jroh keu tuan nyoe

Amarak cut jitaguen jroh
Limo lhee boh rasa lhee peue
Peurtama masam keudua peudah
Amarak pantah fam that ragoe

Kulet uroe prat ngon peudah
Masam indah teuma asoe
Bupi masak boh lam hidang
Beuet rijang keu samlakoe

Laen nibak nyan dum sibarang
Eungkot panggang dum geupasoe
Meudeuhak makeuen rasa mangat
Bukon ladat makanan nyoe

'Oh lheueh makeuen pinah hidang
Peuek rijang le sambinoe
Siti Amarak jibet kanji
Teuma jibri keu samlakoe

Lheueh nyan neupajoh le Meudeuhak
Yoh nyan Amarak neucukeh dhoe
Yoh nyan Amarak leugat jijak
Ubak teutatak teupin sungoe

Jisrah muka tangan sajan
Jiek yoh nyan u seuramoe
Sajan Meudeuhak duek teusumpam
Po bangsawan baek budoe

Meudeuhak cukeh lom bak ulee
Neueu lagee saboh ujoe
Adat beungeh Amarak keu kee
Kukajee han kudong sinoe

Neucukeh lom le Meudeuhak
Tren Amarak lom u sungoe
Lheueh jimanoe Siti Amarak
Meuharu bak po sambinoe

Jingui minyeuk kruet keulumbak
Jiek lom bak po samlakoe
Lom neucukeh Amarak di ulee
Mangat teuntee lhee go ujoe

Lheueh nyan Meudeuhak mangat hate
Ka meusampe ureueng binoe
Seutia jroh hana sabe
Fon di pasi troh lam nanggroe

Lom meututo cut Meudeuhak
Neupeugah bak ma si nyak nyoe
Wahe po ma lon meusigak
Siti Amarak bri keu kamoe

Tapeuhaleue keu esteuri
Dina lon bri siploh katoe
Keu jeunamee Amarak Siti
Ka Tuhan bri hajat sampoe

Ma Amarak teuma kheun kri
Jeunamee pakri jok bak kamoe
Du Amarak mantong di blang
Gohlom pulang u meuligoe

Lon mupakat dum sibarang
Bek meusugang akhe dudoe
Dang-dang meutulak deungki
Woe yah Siti u meuligoe

Ma Amarak peugah lagi
Bak suami neukheun meunoe
Pakri lagee toh bicara
Muda beulia ngon aneuk nyoe

Nibak ulon geubri peuha
Toh bicara takheun jinoe
Du Amarak kabui sigra
Jeuneh peuha meuh sinaroe

Kheun Meudeuhak neutueng hai ma
Jeunameenya si nyak putroe
Habeu bandum neupeuhaba
Ubak bapa po sambinoe

Laen dudoe dang lon mita
Neutueng cut ma dilee dumnoe
Bak lon pike jeunamee lon ba
Bak lon hingga limong katoe

Po Dang Lila hate mangat
Ka troh hajat po samlakoe
Masya Allah mata ladat
Geumupakat bandua droe

Cut Meudeuhak lom meuhaba
Bak Dang Lila neuhareutoe
Wahe po ma deungon bapa
Lon peuhaba bak uroe nyoe

Siti Amarak jinoe lon ba
Lon peugisa woe u nanggroe
Keudeh u gampong lon meunikah
Di nap ayah lon di nanggroe

Di hadapan Wadiharah
Raja meugah hana bagoe
Watee ulon meukeurija
Lon yue teuka ureueng keunoe

Lon yue jak tueng droeneu dua
Meukeurija nyan di nanggroe
Idinpi ltheuh bak tuan tha
Meudeuhak gisa woe u nanggroe

Ngon tunangan leugat dua
Sigo bungka bandua droe
Ban sare troh nyan u padang
Neujeumeurang dalam sungoe

Kawoh payong buka keumang
Meudeuhak jeumeurang dalam sungoe
Neujok gandoe bak Amarak
Neuyue sawak jiba keudroe

Di likot Amarak di keue Meudeuhak
Hingga troh bak saboh sungoe
Meudeuhak tanyong bak tunangan
'Oh na lhok nyan ie lam sungoe

Jaweueb Amarak neukheun nyoe ban
Ubak tuan po samlakoe
Bak ureueng jak di hadapan
Sinan tuan neuhareutoe

Meudeuhak tupeue isyarat nyan
Tungkat sajan nibak jaroe
Sare leupah meurandeh krueng
Tamong jurong bandua droe

Yoh nyan Amarak buka payong
Meunan untong pike keudroe
Yoh lam uroe hana payong
Masa tutong di blang bunoe

Neubloh lam ie neusok kawoh
Bek jeuet teumboh gaki duroe
Eungkot lam ie keutuka agam
Kareueng tajam keunong asoe

Amarak turi Meudeuhak ajam
Utoh neufam ngon hate droe
Lahe tanda keunyataan
Bak beurjalan bandua droe

Siti Amarak that analan
Meudeuhak tuban dum sinaroe
'Oh lheueh nyan Meudeuhak pike
Dalam hate neukheun meunoe

Seutia that hana sabe
Nyo meusampe ureueng binoe
'Oh lheueh pike cut bangsawan
neubeurjalan bandua droe

Habeh nanggroe lhok ngon uteuen
Padum buleuen jak han padoe
Hingga troh bak jambee sibak
Bohpi masak damoh han soe

Meudeuhak tanyong bak Amarak
Pakri layak takheun jinoe
Boh jambee ie putik masak
Pakri lon pot jambeeteu nyoe

Jambee sijuek atawa hangat
Siri mangat lon bri jinoo
Amarak kheun suara mangat
Jambee hangat bri keu kamoo

Meudeuhak pot jambee hangat
Neutiek leugat dalam anoo
Amarak cok le jipajoh
'Oh lheueh jipruh han le anoo

Lheueh jipajoh jambee hangat
Bungka leugat bandua droe
Lakoe binoo dua sapat
Hana lambat tujoh uroe

Uroe malam hana teudoh
Hingga troh bak Watu nanggroe
Di lua kuta Meudeuhak pioh
Bak bale jroh hana bagoo

Ek u bale bak seunia
Duek bandua sinan laloo
'Oh tho reuoh ka seumpurna
Meudeuhak kata bak ureueng binoo

Pioh siat sinan gata
Ulon gisa u rumoh droe
Ubak wareh lon yue tueng gata
Bek sang hina ureueng nanggroe

'Oh lheueh neukheun ban Amarak
Beudoh Meudeuhak laju neuwoe
Troh u rumoh woe Meudeuhak
Neupeugah bak namiet sidroe

U lua kuta keudeh kajak
Sinan meurumpak ureueng binoo
Nibak bale asan rampak
Di binoh bak kuta nanggroe

Ilok pareh rupa canden
Hana laen cit nyan sidroe
'Oh meuteumee lakee meukawen
Bek peue laen kahareutoe

Kaboh daya akai ilah
Kaseuleuah hai ulon droe
Ban namiet ngo haba meunan
Teubiet yoh nyan jijak sidroe

Ngon pakaian bak angeeta
Sang bentara imum nanggroe
Siulahan lagee linto
Dum ka tahe hana bagoe

Jiteubiet le u blang jijak
Ka meurumpak ureueng binoe
Jitanyong le bak Amarak
Ho bu tajak he sambinoe

Di pat gampong keumana jalan
Po bangsawan peugah bak kamoe
Amarak seuot jikheun nyoe ban
Ngon tunangan lon jak keunoe

Ho tunangan cuba peugah
Takheun beu sah ubak kamoe
Seuot Amarak teuma pantah
Keunan leupah gop nyan geuwoe

Lon geu yue tueng nibak wareh
Bek jaeh bak ureueng nanggroe
Geukeubah lon geuwoe jeh keudeh
Bak kuta jeh leugat geuwoe

Ureueng lakoe teuma kheun kri
Kadang baduwi aneuk bisoe
Cit geunap thon gop jitaki
Keunoe jime dum jipubloe

Aneuk dara dum jitipee
Jeuep-jeuep watee hana sunyoe
Meunan bicara han got lagee
Ulou peuthee aneuk bisoe

Jinoe nyak ti tameukawen
Tatueng laen ulou sidroe
Kareuna lon ureueng kaya
Aneuk syeedaga dalam nanggroe

Dumpeue mudah le areuta
Seubab kaya hana bagoe
Beudoh jinoe gata lon ba
Yoh goh teuka aneuk bisoe

Gata jipubloe jok keu raja
Sayang gata e po sambinoe
Meung roh gata ubak raja
Jeuet keu hamba akhe dudoe

Jeuet keu gundek rakan raja
Akhe gata teulah dudoe
Meung roh lon meukawen ngon gata
Akhe masa jroh han bagoe

Le mulia bak ureueng donya
Meunyo gata judo kamoe
Jaweueb Amarak teuma sigra
Bek le haba gata sinoe

Han lon ikot peue tasangka
Bak takira keu lon sidroe
Han lon ubah janji nyang ka
Beuthat geuba keudeh keunoe

Han di ulou paleng muka
Darohaka nyan keu lakoe
Han lon pateh tuto gata
Tapeuhaba ubak kamoe

Ibu bapa keunan geubri
Ka lheueh janji yoh saboh roe
Han sagai lon ubah janji
Walee meuseuki lon geupubloe

Hana hajat keu soe laen
Lahe baten gop nyan sidroe
Deungon gop nyan lon meukawen
Nyang laen han rela kamoe

Ban jideungo haba Meudeuhak
Hate galak hana bagoe
Laju jiwoe keudeh jijak
Bak Meudeuhak jihareutoe

Meudeuhak deungo haba meunan
That sukaan hana bagoe
Dalam hate keuinginan
Meudeuhak yoh nyan kheun lom meunoe

Tujoh droe ureueng Meudeuhak pangge
Lheueh neupike lam hate droe
Neuyue tipee tuan Siti
Meudeuhak jibri ureueng binoe

Ureueng tujoh teubiet u blang
Amarak pandang keunan ka toe
Ban sare rab deuh jipandang
Jikheun rijang teuma meunoe

Hai peureumpuan muda seudang
Mana datang gata keunoe
Di pat gampong keunoe datang
Peugah rijang ubak kamoe

Beudoh rijang hai nyak putroe
Mangat tajak woe nibak kamoe
Neupareksa uleh doli
Tapeureugi sajan kamoe

Kheun Amarak ubak sahbat
Hana hajat nyan di kamoe
Meunyo neusidek uleh deelat
'Oh meusapat dua kamoe

Hana lon jak ubak raja
Meunggoh teuka droegeu keunoe
Beuthat tahue lon tahila
Uleh gata dua sinaroe

Hana lon jak peue tasangka
Bek le haba jak leh tawoe
Meung tunangan lon keunoe teuka
Lon jak lanja bandua droe

Ureueng nyan woe sigra-sigra
Bak muda beulia jihareutoe
Meudeuhak deungo meunan haba
Hate suka hana bagoe

Siti Amarak that seutia
Neudeungo haba jihareutoe
Habeuh haba tamat kalam
Amarak ajam di blang sidroe

Teutap Amarak sinan simalam
Ngon padam klam seupot tuloe
Ngonpi hana lagi sunyi
Iem si nyak ti sinan sidroe

Ie han soe jok bu han soe bri
Sayang si nyak ti sinan sidroe
Sare beungoh pagi hari
Meudeuhak bri lom siploh droe

Ureueng lakoe that juhari
Utoh taki that han bagoe
Ban sare troh jipeureugi
Jipeugah kri bak ureueng binoe

Wahe peureumpuan nyang juhari
Mana peureugi gata keunoe
Bangon gata ureueng lari
Hana meukri troh ka baroe

Kheun Amarak teuma lagi
Tunangan kami bawak keunoe
Di fon baroe gata peugah
Tan na leumah lakoe keunoe

Beudoh jinoe gata kuba
Ubak raja peugang nanggroe
Seuot Amarak teuma sigra
Bandum gata jak leh tawoe

Ban jideungo meunan haba
Yoh nyan jiba po sambinoe
Deungon saket nyan jimaba
Sama-sama nyan jipuwoe

Bak Meudeuhak laju jiba
Troh le sigra keunan sampoe
Teuka laen muda beulia
Bak angeeta alat neupakoe

Ngon pakaian indah rupa
Hu meucahya nibak asoe
Kreh meudulang kulah kama
Rakyat lingka dong mupadoe

Siti Amarak rot nan geuba
Leumah rupa jisangka soe
Ureueng siploh ngadu haba
Jicalitra teuma meunoe

Tuanku ampon ka keunoe lon ba
Aneuk dara meuteumee sidroe
Di lua kuta nibak bale
Bungong seuke cut sambinoe

Cit nyan sidroe laen hana
Ka ulon ba nyoeho sidroe
Euntah ureueng plueng bak raja
Euntah ia mana nanggroe

Bak Tuanku keunoe lon ba
Neupeunyata neutanyong soe
Yoh nyan Meudeuhak yue pareksa
Neupeunyata bak ureueng binoe

Pat bu gampong pane nanggroe
Pajan sambinoe datang keunoe
Kheun Meudeuhak jawueub kata
Peugah lanja ubak kamoe

Ulon di duson kon di banda
Lon jak dua deungon lakoe
Geukeubah lon sideh di lua
Lambat teuka lon eu keunoe

Euntah peue-peue saleh bahya
Meunan rupa bak nyum kamoe
Teuma jikheun nyang pareksa
Tunangan gata na di sinoe

Cuba lihat dalam tandra
Tapeunyata lam kawan nyoe
Yoh nyan Amarak kalon sigra
Habe rata neuue keudroe

Wie ngon uneun neupeunyata
Neukheun hana lam kawan nyoe
Kareuna Meudeuhak laen rupa
Miseue raja neuue bagoe

Nyum-nyum sang nyoe nyum-nyum sang kon
Meunan meunyum bak hate droe
Lon eu rupa raja sang mee
Meunan lagee nibak kamoe

Bagoe raja rupa sang ri
Meunan bak hi neueu keudroe
Neumeukheun nyo hana meukri
Dalam hateneu meurawoe

Amarak kheun tan tunangan
Lam kawan nyan dum sinaroe
Teutapi raja sirupa nyan
Keulakuan lon eu bagoe

Ureueng laen jikheun nyoe ban
Na tunangan gata sinoe
Beurdoseuta gata tuan
Hana muban-ban tahareutoe

Lheueh nibak nyan Meudeuhak suroh
Neuyue taroh Amarak sidroe
Ngon makanan lom neuyue boh
Dum peungasoh ureueng binoe

Boh lam hidang neuyue bawa
Laenpi na dum sinaroe
Dalam pingan meuh suasa
Indah rupa hana bagoe

Ngon pakaian Meudeuhak yue me
Saboh sange nyan geupuwoe
Laen nibak nyanpi le bagi
Le that meuri dum sinaroe

Ija han neungui bu han neupajoh
Amarak kiroh hate wa-woe
Teuma dudoe lom jibawak
Bak Amarak jikheun meunoe

Ngui pakaian ri nyang galak
Ban nyang layak nibak meuntroe
Kareuna gop nyan meuntroe muda
Geukheun keu gata sayang han soe

Ureueng laen hana rela
Hana suka barangasoe
Keu gata that jimeuhawa
Hate suka hana bagoe

Nyoe pakaian jiyue bawa
Ngui le gata po sambinoe
Ban Amarak deungo meunan
Jimoe yoh nyan jikilo droe

Ie mata ro basah badan
Putoh meukhan hate seungkoe
Amarak kheun hai po da ti
Di lon droeji nyankeuh lakoe

Bunda ayah keunan geubri
Laen barangri bukon lakoe
Sikali-kali hana ulon tem
Nyang laen han rela kamoe

Hana hajat ureueng laen
Bahle beu len nyawong lon nyoe
Ngon nyan di lon kumeukawen
Ngon laen han lon tem sidroe

Keunan di lon hate nyang brat
Bahle beuthat gasien han soe
Deurajat manyang han lon hawa
Walee raja peugang nanggroe

Cit droeji di lon suka
Laen hana rela kamoe
Kala kala nibak Rabbi
Ulon pakri ubah jinoe

Beuthat supak geunteng gaki
Cit droeji di lon lakoe
Tuto gata dum kubantah
Peue tapeugah meudeh meunoe

Kala kada nibak Allah
Hana ubah nibak kamoe
Dengon droeji lon meukawen
Hana laen nyankeuh lakoe

Nyan peutumuen Tuhan salen
Hankeu lon tem ubah jinoe
Keudroeji ulonteu syen
Keu laen han rela kamoe

Beuthat bungkok deungon supak
Nyang di jih glak di lon lakoe
Karonya Po Ilhahon Haq
Bah that tajak baranggasoe

Nyang ka patot jimeulayak
Ban kada hak di lon lakoe
Ie han lon jep bu han lon pajoh
Meung hana troh gop nyan keunoe

Siti Amarak moe that riah
Allah hai beh nyan ka wa-woe
Hingga sampoe uroe tujoh
Hana teudoh dawok jimoe

Ureueng tuha peugah sunggoh
Hana le troh gop nyan keunoe
Jinoe hai nyak tameukawen
Bek le tasyen judo bunoe

Lon bri laen puteh licen
Na nyang canden leubeh sinoe
Kheun Amarak wahe da ti
Di lon droeji nyankeuh lakoe

Hareuem laen baranggari
dan lagi han rela kamoe
Tujoh uroe Amarak Siti
Sinan lawi dawok wa-woe

Sare beungoh pagi hari
Pakaian droeji Meudeuhak pakoe
Rot leuen rumoh Meudeuhak lalo
Boh di baho saboh gandoe

Ban Amarak kalon judo
Beudoh laju tren u bumoe
Ubak gaki ka jisujud
Ie mata sret meuteentaloe

Pakon lambat teungku datang
Peue na lintang buet di nanggroe
Meudeuhak kheun teuma rijang
Ube seunang neuhareutoe

Nyang lambat troh keunoe teuka
Peurumoh na hai sambinoe
Ban jithee ka na peureumpuan
Teuma jitahan padum uroe

Ban Amarak deungo meunan
Seukalian jihareutoe
Bak Amarak Meudeuhak ato
Haba nyang le awai dudoe

Padum bahya nyang ka lalo
Meudeuhak tahe neudeungo proe
Neudeungo haba le Meudeuhak
Utoh rancak hana bagoe

Meudeuhak deungo Siti Amarak
Hingga troh bak jitipee droe
Troh u rumoh jiwoe Meudeuhak
Ngon Amarak ureueng binoe

Ngon ayah Meudeuhak le meuteumeung
Mameung-mameung ngon si nyak putroe
Geupeuindah hana laku
Hate seuu mangat bunyoe

Lheueh nibak nyan Rakna Kasan
Peumuliaan hana bagoe
Mangat hate dalam dada
Akan aneukda nyang baro woe

Padum uroe sinan lawi
Bak raja neugri Meudeuhak woe
Ban sare troh ubak doli
Neutanyong kri haba meunoe

Na tateumee aneuk esteuri
Po tallah bri hajat sampoe
Kheun Meudeuhak ampon deelat
Sampoe hajat ulon sidroe

Ngon beureukat syah beurdeelat
Tuhan halarat nyang peusampoe
Di hadapan doli halarat
Meunan hajat bak lon sidroe

Ulon meunikah di keue halarat
Ampon deelat raja kamoe
Keunoe lon ba Siti Amarak
Hadapan bak meukuta nanggroe

Nyan leupeue pat aneuk dara
Bak meukuta lon jok jinoe
Ban nyang hajat po meukuta
Lon jak mita jeuep-jeuep nanggroe

Ban hukom po jonjongan
Sigeutu han ubah jinoe
Bek tamita nyan esteuri
Hana meukri baranggasoe

Ngon si nyak nyan lon meukawen
Nyang laen han lon tem sidroe
Beuthat aneuk huleebalang
Hana reumbang bak hate droe

Keunan di lon hate nyang brat
Hai deelat meukuta nanggroe
Hukom tuanku ban keulon bak
Pajan layak keumah jinoo

Teuma seuot Wadiharah
Ulon peugah he aneuk droe
Pangge bapa deungon bunda
Beu troh teuka he samjakoe

Mangat ulon meukeurija
He aneukda tadeungo lon nyoe
Ibu Amarak deungon bapa
Pangge sigra he aneuk droe

Teuma geupeugot saboh surat
Geuyue intat laju jinoo
Meunoe haba dalam surat
Raja beurdeelat suroh kamoe

Neuyue teuka ubak raja
Beu troh lusa at uroe nyoe
Teuma geubuka surat kireman
Hajat lon tuan beu troh sampoe

Teupeukawen Siti Amarak
Deungon si nyak nyang jak keunoe
'Oh ban neudeungo haba surat
Galakneu that hana bagoe

Po Dang Lila hate mangat
Meutuah that po sambinoe
Meuteumeung lakoe ureueng meugah
That meutuah aneuk lon nyoe

Lheueh nyan teuma geubeurangkat
Neujak leugat bandua droe
Padum uroe peurjalanan
Troh le yoh nyan nibak nanggroe

Ban sare troh dalam kuta
Peumulia hana bagoe
Kareuna seubab tuan Meudeuhak
Hate galak dum sinaroe

Gadoh takot ibu Amarak
Hate galak hana bagoe
Haba aneuk Siti Amarak
Ngon Meudeuhak bandua droe

Ma Amarak meunoe pike
Dalam hate meunoe bagoe
Mubahgia that si nyak ti
Nyo droeji peukong nanggroe

Raya meurtabat hana sakri
Bit droeji that samlakoe
Teuma seuot Jindra Kasmi
Neupeureugi bandua droe

Jak meukawan hana aseng
Tumbak leumbeng dum sinaroe
Dalam kuta laju keunan
Bak sulotan raja nanggroe

Po Dang Lila raja neudeelat
Neudong ngadap lheueh bet jaroe
Turon sabda nibak deelat
Ubak teumpat geuba jinoe

Dua rumoh cit ka leungka
Suroh raja baik han soe
Meuculek jroh uke lingka
Limpeuen kala puta taloe

Geuboh labo hijo mirah
Jroh that indah hana bagoe
Rumoh geubri keu tha Meudeuhak
Di Amarak laen bagoe

Geucat ie meuh that meusigak
Buet Meudeuhak dum sinaroe
Geubri makanan keu Dang Lila
Nyan bandua ngon judo droe

Lheueh makanan nyan bandua
Sabda raja teuma meunoe
Wadiharah peugah ngon haba
Bak Dang Lila neukheun meunoe

Hajat ulon meukeurija
Bandua aneuk geutanyoe
Lheueh meututo ngon Dang Lila
Poteu raja neukrah meuntroe

Padum wadi ngon bentara
Dum sigala aneuk nanggroe
Tandi bujang ngon haria
Padum panglima kali meuntroe

Wadiharah neumeukeurija
Neupeuhaba ubak putroe
Siti Amarak geuboh gaca
Bandua deungon samlakoe

Ubat beude geubuleung rata
Maseng jeumba sabe keudroe
Jeuep-jeuep peutua ngon bentara
Laen teuma dum jeuep sagoe

Sare hase sileungkapan
Suroh sulotan raja nanggroe
Neukrah rakyat seukalian
Ngon angkatan dum sinaroe

Habeh jitren dumna rakyat
Meusapat wadi meuntroe
Mideuen peunoh dalam sarat
Le that rakyat meuploh katoe

Siuroe buleuen geuboh gaca
Buet keurija hana bagoe
Geutet beude that meutaga
Meuriam lila dum geupasoe

Jara hitam lila teumaga
Beude raya dum sibagoe
Ta deungo kram-krum ban seun lingka
Dalam lua beude meuasoe

Geupalee gong geupeh geundrang
Meusu canang kiam bunyoe
Jiyup bangsi tarek gambang
Meuguncang ban saboh nanggroe

Sangkai kala ka meute -te
Rakyat rame hana bagoe
Ureueng teuka saboh sane
Ka rame jidong mupadoe

Ngon biula ka jigiseng
Jiyup suleng saboh sagoe
Jibet langkah jilhom gaki
Biek Habeusyi hitam tuloe

Peulheueh tikoh bungong apui
Ka meurui-rui ateueh bumoe
Dalam awan ka meusui-sui
Bungong apui dum sinaroe

Bubiri mupok lumo meukong
Meusong-abong hebat han soe
Rakyat jitren dalam gampong
Jilhiet tanglong peungeuh bumoe

Jiyup bangsi meualon-alon
Rakyat jitren dalam nanggroe
Jimeunari giseng hareubab
Ajab-ajab han sibagoe

Buet keurija han ek soe peugah
Rakyat dasyah dum sinaroe
Beungoh seupot bu meukuah
That barollah aneuk nanggroe

Jitet meuriam kuceng tido
Meuhambo ban saboh nanggroe
Uroe meuhayak malam meuhubo
Ka'a-ka'u hana bagoe

Meusu lila ngon meuriam
Uroe malam hana padoe
Jinoe geupeungui dara baro
Rakyat tahe mabok keudroe

Geubri ija kaen sando
Hireuen tahe barangasoe
Sileuweue sutra kasap pirak
Meusigak takalon putroe

Ureueng inong hate galak
Siti Amarak indah han soe
Bajee dokma mata intan
Ikat silan nibak jaroe

Jaroe siploh peunoh euncien
Han jeuet kuwien aneuk jaroe
Kaen emas jroh that licen
Putroe canden hana bagoe

Teuma geuintat linto baro
Rakyat dum le meuploh katoe
Ateueh geuritan geuba linto
Pakaian dum le nibak asoe

'Oh troh linto rakyat hase
Geupeuduek le di seuramoe
Lam seurahi ie ka hase
Geusrah gaki po samlakoe

Teuma geupeuduek linto baro
Ateueh kaso nyang meusujoe
Wie ngon uneun bantai dum le
Rakyat tahe dum sinaroe

Suklat hijo kasap pirak
Duek Meudeuhak sinan keudroe
Rupa indah that meusigak
Ngon Amarak nyo sibagoe

Lheueh nibak nyan geupeunikah
Du wakilah bapak putroe
Po Dang Lila nyang wakilah
Ubak syiah neuhareutoe

Syiah neukheun ngon bismillah
Alhamdulillah teuma dudoe
Akan teungku lon peunikah
Amarak sah ka judo droe

Ulon teurimong nikah Amarak
Seureuta hak di ateueh lon nyoe
Meunan neukheun le Meudeuhak
Hukom nibak raja nanggroe

Lheueh nyan geupeuek rumoh inong
Ka teurceungong dum sinaroe
Habehe tahe agam inong
Cut bungong rupa samlakoe

Teuma geubet ngon makanan
Peurjamuan raja nanggroe
Lheueh makanan pinah hidang
Teutap 'oh nan ka seuleusoe

Teutap Meudeuhak ngon esteuri
Nyang juhari hana bagoe
Teureutib meujeulih keu suami
Han tom beunci keu judo droe

Buet keurija 'oh noe sudah
Ulon peugah laen bagoé
Beu le nekmát bri Po tallah
Alhamdulillah syukor pujoe

Ka keuh habéh buet Meudeuhak
Laen layak lon hareutoe
Teutap Meudeuhak dalam seunang
Neupeutimang raja nanggroe

Padumna trep teuma akhé
Sijuek hate ureueng nanggroe
Lon peugisa ubak raja
Tanyong haba bak samlakoe

XI. CONTO TEULADAN RAJA RAJA

Amma Bakdu komdian dudoe
Kisah lon nyoe laen pula
Tuha muda asoe nanggroe
Beu jipakoe nyang seujahtra
Beu jitem pateh ban lon peugah
Nyo meutuah ngon mubahgia
Beu jituri reusam adat
Nasihat bak ureueng tuha
Beu got tadeungo nak meusigak
Jroh that sanjak uroe dudoe
Lon boh tamse raja raja
Keu umpama wahe adoe
Kheun Meudeuhak geucalitra
He syeedara beu taturi
Wadiharah tanyong haba
Toh umpama raja neugri
Toh teuladan taboh rupa
Tapeunyata nyan bu meuri
Kheun Meudeuhak ampon deelat
Miseue halarat deungon kami
Tamse sulotan rimueng hebat
Lagi kuat ngon beurani
Dalam uteuen di jih teumpang
Meunan adat baranggari
Mate rimueng gadoh keurajeuen
Tinggai uteuen jih hana le
Reubah kayee dum reuen-mareuen
Gadoh uteuen seumak han le
Uteuen seumak habeh jicah
Gadoh tuah rimueng han le
Kayee raya habeh reubah
Rimueng bicah dum seugala be

Syarat sulotan beu na eleumee
Beuthat dungee dalam hate
Supaya seulamat nibak sitree
Han ek sampee keunong taki

Beu na akai ngon ambilan
Buet peurlahan nyang meuseuke
Bek meudawa deungon rakan
Nyan ambilan raja jahe

Paleh raja gadoh buah
Rakyat bicah dum seugala be
Dalam nanggroe teuka sosah
Nyan peurintah raja jahe

Beukit na salah ube lada
Jipeuraya na ube gle
Nanggroe seungue ban sineuna
Teuka bala dum seugala be

Jicok wase jikheun keu raja
Jih nyang raya peukrong pade
Hana lheueh lom jiseumula
Jiyue teuka lakee pade

Peue jibri di ureueng donya
Sagai hana jitroh pade
Jeuep-jeuep rumoh jak me umpang
Troh u ladang bak ureueng gle

Meunan adat hana reumbang
Nanggroe suang han jipike
Saboh syarat ateueh sulotan
Le ambilan lagi ade

Raja ade gaseh Tuhan
Po bangsawan beu tapike
Miseue narit firman Tuhan
Lam Quran nyata lahe

Innallaha ya'murukum bil'adli wal ihsan
Suroh Tuhan beu tapike
Meunyo hana ade raja
Neubri bala uleh Rabbi

Pade han jeuet dum seugala
Seubab raja han got pie
Dalam nanggroe dum meureuka
Neubri bala uleh Rabbi

Saboh inong dua lakoe
Saboh meusoe saboh seumbunyi
Han jitakot le peutua
Jiseureuta lom seukali

Na cit salah watee nyata
Ubak raja le geupangge
Teuma jiba le peutua
Geutueng atra ban dua si

Nyankeu dum buet raja raja
Dum peutua dalam neugri
Hana teudoh teuka bala
Allah Ta'ala sidroe nyang bri

Syarat raja beu na hebat
Teumakot rakyat dum seugala be
Lom beurani deungon kuat
Dumna rakyat meuntroe wadi

Syarat wadi beu le akai
Dumnan sagai lon peulahe
Beu nasasat bek na beubai
Sagai-sagai bek teukeuse

Lagi geumasah ngon seutia
Aneuk bangsa barangari
Naritpi jroh ngon bicara
Meuntroe raja deungon wadi

Tapileh nyang jroh bicara
Nyang seutia lom beurani
Bek jeuet musoh tipee daya
Akan raja nyan jitaki

Syarat wadi beu na syaukah
Bek jeuet bantah ngon barangri
Beu na akai daya ilah
Insya Allah tulong Rabbi

Ureueng jeuheut bek meurakan
Raja sulotan dum barangri
Nyang jeuheut bek tameurakan
Si jeuheut nyan han got bagi

Jeuet keu aeb raja raja
Nyan bicara han got pie
Meung hana got akai raja
Gop ceureuca dum barangri

Hukom ade agama kukoh
Han ek musoh nyan jitaki
Lagi meugah troh u jeuoh
Allah hai beh baik budi

Geupujoe le raja laen
Pihak canden hana sakri
Aneuk nanggroe hate ngeuren
Raja laen jipeukeuji

Padepi jeuet dumpeue mudah
Makanan murah raja ade
Boh kayee le hana sosah
Allah tambah dum raseuki

Gaseh rakyat dalam nanggroe
Barangasoe beusa keuce
Nanggroe laen kaem sosah
Dalam babah lam deuek sabe

Timu barat kaem deuek troe
Jeuep-jeuep nanggroe hana pade
Cit geunap thon teuka bala
Seubab raja han got pie

Saket hate ureung lingka
Akan raja jiboh taki
Mita ilah ngon bicara
Dum peutua ulee ili

Jipeutamong ureueng lua
Keunan jiba ubak doli
Jiyue jak cue areuta raja
Mangat fana aeb keuji

Meunankeu buet dum seumua
Ban sineuna beusa keuce
Sijeuheut-jeuheut akai raja
Pakat hana ngon barangri

Han musyeewarat ngon peutua
Nyan bicara hana meukri
Alamat talo nanggroe raja
Peuet peukara jipeulahe

Peurtama lalim akai jeungkat
Rioh rakyat beusa keuce
Keudua teuboh ureueng tuha
Nyan bicara rab keu reule

Keulhee eleumee hana mulia
Dum ulama baranggari
Keupeuet namiet iipeuraya
Tueng bicara bak 'abdi

Ban kheun namiet jipeucahya
Nyanpi raja alamat reule
Alamat meunang asoe nanggroe
Baranggasoe mangat hate

Peuet peukara lon boh sinoe
Fon peurangoe jroh han sabe
Keudua hukom ade han soe
Dalam nanggroe dum barangri

Keulhee geumaseh raja nanggroe
Barangasoe han sret isi
Keupeuet eleumee seureuta akai
Nyankeu beukai udep mate

Ban peuet peue nyan hana tinggai
Hana sagai talo neugri
Nanggroe aman ramepi that
Le meuneukat dum seugala be

Makanan le han meularat
Wahe deelat ulon kheun kri
Nyang that jeuheut akai raja
Jipeuraya buet nyang keuce

Meuna salah ube lada
Jipeuraya na ube gle
Nanggroe seungue ureueng hana
Leupah bungka dum sago be

Peukan seumak timoh dang jawa
Seubab raja meunan pie
Gop jireubot hana reuda
'A-'u subra dum barangri

Habeh jiseuep ureueng tuha
Di nap mata dum jiruhe
Habeh leupah dum jibungka
Sidroe hana tem mupake

Habeh gampong jeuet keu rimba
Po ceulaka meunan pie
Pat takeurajeuen gata raja
Pakri daya ureueng tan le

Jiprang le gop nanggroe talo
le mata ro hana bagi
Panteng-panteueng tahe gante
Meung sisuep bu hana soe bri

Keu areuta le dalam peutoe
Dum milek droe barangakri
Meutan wareh aneuk nanggroe
Han jan siuroe habeh reule

Keupeue dina le dalam jaroe
Aneuk nanggroe sidroe han le
Keupeue guna meuh meukatoe
Hana sidroe tem mupake

Meudeuhak kheun lom bak raja
Deungo meukuta ulon rawe
Meutamah meugah raja raja
Peuet peukara beu tapike

Peutama gaseh aneuk nanggroe
Barangasoe beuna keuce
Keudua jroh nibak budoe
Keulhee meuntroe nyang beurani

Nyang keupeuet pubuet leubaekan
Amar Tuhan suroh Rabbi
Barangapat baranggajan
Seubot Tuhan seureuta dike

Meuna dumnan buet mustahak
Han soe tulak baranggari
Ban neudeungo haba Meudeuhak
Suka galak dalam hate

Neubri salen po samlakoe
Bajee meupudoe jroh han sakri
Meutatah meuh intan pudoe
Baek han soe muda juhari

Seupot uroe woe Meudeuhak
Bak Amarak neupeureugi
Di leuen rumoh dong Meudeuhak
Siti Amarak lam meuligi

Amarak eu ka woe judo
Linto baro nyang juhari
Hate mangat bungong kundo
Puteh hijo meutoto bibi

Jitren u leuen leugat lalo
Ubak judo jak srah gaki
Bu ka hase dalam hidang
Jibet rijang keu suami

'Oh lheueh makeuen pinah hidang
Ranup karang cit ka hase
Han sapat na ureueng bijak
Dum Amarak areh han sakri

Rupapi jroh that meusigok
Rakyat galak dum barangri
Bibi mirah kulet puteh
Rupa meuceh ilok pari

Ban takalon meukeumat gaseh
Galak habeh hana sakri
Phaji dua meujeundrang pade
Han lamse baranggari

Sapai dua turon sabe
Gaduh pike meuntroe wadi
Bitpi meugah Syam Faridan
Diwa Hasan baek budi

Ngon Amarak tan teuladan
Hana saban baranggari
Bitpi meugah putroe Haloh
Faridoh di Cina neugri

Siti Amarak cit ka makruh
Akai utoh hana sakri
Nyang meugah that Ruhon Aflah
Judo Beuransah di Arami

Ngon Amarak han sa cidah
Leubeh indah tuan Siti
Meunan kata sahib kisah
Teutapi Allah nyang keutahui

Wallahul hadi ila sabilah
Tuhan peuleumah dum barangri
Jinoe lon boh laen kisah
Wadiharah raja neugri

XII. MEUDEUHAK KEUNONG FITNAH GUREE PEUET

Bak siuroe teukeudi Allah
Wadiharah neutanyong kri
Bak Meudeuhak tanyong sulotan
Seureuta sajan peuet droe syekhi

Di nap rakyat dumna sajan
Seukalian meuntroe wadi
Huleebalang peuet tuha lapan
Di hadapan meuntroe kali

Ureueng tuha that analan
Di hadapan raja neugri
Wahe guree lon nyang peuet droe
He aneuk droe muda juhari

Wahe wadi imum sagoe
Peurdana meuntroe bujang tandi
Haba rahsia mee tapeugah
Walee tasa'h ubak hate

Nyoe lon tanyong teungku peugah
Masaalah lon tanyong kri
Jaweueb Meudeuhak raja tanyong
Kheun beu keunong narit sunyi

Han peue peugah rahsia neutanyong
Beuthat keunong peue nyan ahli
Bak asoe rumoh han peue peugah
Bak Ureueng tagaseh han peue peuri

Walee anek leubeh tagaseh
Laen habeh dum barangri
Han mee peugah haba ralisia
Han mee kata bak barangri

Beu got ingat beu that tasom
Dapat tatanom dalam bumi
Meunan adat beu tatanom
Beu got tasom wahe doli

Jaroe uneun jok wie bek jithee
Meunan lagee bak tabuni
Som rahsia meunan lagee
Bek sidroe thee jikeutahui

Seumbah Aja San tuanku deelat
Rahsia barangpat jeuet talahe
Mee tapeugah barangpat
Bak kon teumpat jeuet tabuni

Meunan kata guree peuet droe
Raja nanggroe duek beurdiri
Meudeuhak beudoh ieugat neuwoe
Bak judo droe tuan Siti

Meudeuhak woe bak Amarak
Hate galak hana sakri
Troh bak larah dong Meudeuhak
Neuriwang bak bale sunyi

U bale keumang Meudeuhak woe
Guree peuet droe sinan hade
Di yup bale Meudeuhak sidroe
Seupot tuloe klam han sakri

Na sikeujap Meudeuhak datang
Troh le bujang nibak doli
Raja suroh bak Aja San
Aja Diwan meunan lagi

Peudeueng saboh surat sajai.
Lam kireman haba sunyi
Seubab fitnah bak guree peuet
Meudeuhak jeuet marah doli

Meunan bagoe jiboh sifeuet
Buetpi han jeuet sama seukali
Meureuka Meudeuhak bak sulotan
Nyang boh padan peuet droe meuntri

Seumbah saleuem raja budiman
Keu Aja San meuntroe doli
Singoh beungoh tapoh Meudeuhak
Bahle rusakjih bu mate

'Oh lheueh tapoh keunoe tajak
Ulon sawak gata ke wadi
Meudeuhak deungo haba meunan
Ka teusinyom muda juhari

'Oh lheueh teukhem **teuduek sinan**
Bak teumpat nyan bale sunyi
Di yup bale duek Meudeuhak
Bak seupot that hana sakri

Yoh nyan guree peuet geumupakat
Lheueh beuet surat raja doli
Ban peuet sigo musyeewarat
That khianat han got bagi

Peuet geutanyoe han soe tulak
Lheueh Meudeuhak tapoh mate
Ban peuet guree hate galak
Mate Meudeuhak bak jipike

Geutanyoe peuet sapeue haba
Jinoe rahsia tapeulahe
Bek le tasom tapeunyata
Tanda beuna dalam hate

Meunan bandum peugah saba
Fon Aja San rahsia lahe
Neupeugah le bak watee nyan
Bak Aja Diwan nyang deungari

Di lon na kutroh saboh manikam
Jroh han macam hana sakri
Milek raja syahi alam
Trep ka lon som padum lawi

Watee ulon ngadap raja
Lon eu rupa leumah lahe
Lheueh nyan lon jak bak meukuta
Han neudawa baranggari

Meunan rahsia di Aja San
Lheueh nyan Aja Diwan bri bukti
Di lon na sidroe inong lon tuan
Inong setan biek 'abdi

Asai di lon bak meuraka
Lheueh nibak nyan lon poh mate
Lon cok areuta seukalian
Han soe tuban ulon buni

Esteuri lon nyang na jituban
Laen cit tan baranggari
Aja Peurkasa marit lheueh nyan
Bak Aja San neupeugah kri

Bak pha uneun di lon na puree
Trep ka dilee lama lawi
Watee lon jak u nap jamee
Lon asap dilee ngon keutanggi

Ngadap raja laen lagee
Bek malee bak hadap doli
Nyoe rahsia ka lon bri thee
Ka ban lhee geutanyoe lahe

Aja Dandak beurkataan
Di lon tuan gila babi
Seulama ka awai buleuen
Ulon hireuen hana meukri

Aneuk ulon nyang na tuban
Nyang laen tan jikeutahui
Lheueh nyan marit Aja Diwan
Soe na tuban narit ini

Untong Meudeuhak na di sinoe
Yub bale nyoe dong beurdiri
Teuma jaweueb le Aja San
Meudeuhak tan datang keumari

Hana patot nyang mumeunan
Ka ban jih nyan kita ini
Teutapi bacut nyang na seungkak
Ubak Meudeuhak jikeutahui

Bijaksana that Meudeuhak
Han soe tulak baranggari
Teutapi hana jiduek di sinoe
Keu geutanyoe nyan jibeunci

Lheueh meututo guree peuet droe
Beudoh geuwoe dum keumbali
Tinggai Meudeuhak sinan sidroe
Dudoe geuwoe bak esteuri

Meudeuhak pike bak hate droe
Ulonteu nyoe raja beunci
Lon neuyue poh bak Aja San
Surat kireman ka lheueh neubri

Peue kareuna saleh kaman
Keu lon tuan teuka beunci
Meudeuhak woe laju neujak
Bak Amarak nyan esteuri

Teusinyom-sinyom sira neujak
Troh Meudeuhak neukeumbali
Bak malam nyan Wadahirah
Teuka sosah dalam hate

Hana teutap keuloh keusah
Sangat gundah dalam hate
Putroe kalon raja sosah
Sangat gundah hana sakri

Putroe tanyong bak khalifah
Pakon gundah wahe doli
Seuot raja tanyong putroe
Ulon sidroe sosah hate

Seubab lon gaseh keu samlakoe
Singoh uroe jadeh mate
Bak Aja San ulon yue poh
Singoh beungoh leumah lahe

Kubri surat peudeueng saboh
Takue kuyue koh muda juhari
Putroe tanyong bak jonjongan
Pakon meunan wahe doli

Peue na salah toh ambilan
Muda bangsawan neupoh mate
Raja peugah ubak putroe
Neukheun meunoe uleh doli

Darohaka jih nyan sidroe
Akan kamoe jimeuungki
Ampon tuanku laman peugah
Meuka salah neupoh mate

Meuseuki ulon meuka salah
Bek neukeubah aeb keuji
Ban raja deungo haba putroe
Neuch kedroe beureunti

Raja teutap lam meuligoe
Beudoh putroe Kasin Diwi
Raja teungeut neuh sidroe
Deungokeu nyoe lon peugah kri

Yoh nyan putroe peugot makanan
Surat kireman saboh neubri
Kisah raja di dalam nyan
Dum habaran neupeulahe

Putroe yue bak malam nyan
Troh keunan bak muda juhari
Meudeuhak kalon surat kireman
Haba dalam nyan ka neutukri

Meudeuhak pike lam hate droe
Buet pakri proe ulon mate
Bahle mate ulon sidroe
Singoh uroe umu han le

Meusyehuh gah uroe dudoe
Nama kamoe walee mate
Beungoh uroe troh Aja San
Aja Diwan Rakna meuntri

Ban peuet droe ngadap sulotan
Peurseumbahan ubak doli
Preh Meudeuhak duek bak pinto
Goh lom lalo jula hari

Troh Meudeuhak teuma lalo
Rot bak pinto laen lagi
Rot guree preh hana neujak
Utoh Meudeuhak hana sakri

Deungon rakyat dum meusak-sak
Dong Meudeuhak ngadap doli
Bitpi meunan dalam ingat
Neutakot that dalam hate

Lheueh neungadap doli halarat
Meusapat ngon tuan putri
Ubak Meudeuhak raja tanyong
Ho rot tatamong muda juhari

Deelat tuanku laman peugah
Ulon sosah hana sakri
Ulon tamong laen ilah
Ulon seumbah meukuta neugri

Meung rot pinto ulon tamong
Hana keunong dalam hate
Ulon mate habeh nyawong
Soe teumanyong ubak doli

Meuka mate ulon dilee
Han meuteumee ngadap doli
Umu habeh nyawong padee
Soe peuteuntee buet nyang lawi

Ban raja deungo kheun Meudeuhak
Neungieng ubak tuan siti
Soe bri haba keu Meudeuhak
Ka meurumpak jipeugah kri

Meuhan pakri jithee Meudeuhak
Sang ka jijak'uleh siti
Jitupeue kieh le Meudeuhak
Neusujud bak raja neugri

Neupeulheueh putroe bek meuligan
Le ambilam muda juhari
Ampon tuanku po jonjongan
Seumbah laman hamba faki

Ulon peugah haba dilee
Nyang meuseubee trep ka lawi
Masa meuduek peuet droe guree
Neupeuteuntee uleh doli

Haba rahsia tuanku tanyong
Bak kamoe limong nyan neusudi
Bak guree peuet suroh keunong
Ulon bingong hana meukri

Lon eu ubah tuanku droe
Beudoh lon woe lon keumbali
Bak bale keumang ulon peutoe
Sira lon woe bak esteuri

Peuet droe guree ulon dapat
Musyeewarat buet nyang lawi
Ulon deungo meunan pakat
Pioh siat di yup bale

Na sikeujap ulon pioh
Surat ka troh bujang nyang me
Peudeueng sajan sinan saboh
Lon neuyue poh uleh doli

Di guree peuet hate galak
Geumeurantak duek di bale
Ulon deungo that meusigak
Hana layak lon rab mate

Teuma lon duek sinan laloe
Guree peuet droe meututo le
Maseng-maseng peugah buet droe
Dum sinaroe rahsia lahe

Di Aja San neutroh manikam
Jroh that hila tatah pudi
Milek raja syahi alam
Meureuhom Siradam nyang po ini

Aja Diwan neupoh ensan
Neumeurakan dilee lawi
Neucok areuta dum seukalian
Puwoe sajan bak esteuri

Aja Peurkasa puree meulak-lak
Aja Dandak gila babi
'Oh muda buleuen cit meurumpak
'Oh tee neujak gila ba'bi

Ban raja deungo kheun Meudeuhak
Hate galak hana sakri
Raja pujoe le Meudeuhak
Neukheun bijak muda juhari

Neuyue bujang uleh sulotan
Bak ma Aja San neupeureugi
Cok meutia puwoe sajan
Troh le keunan bujang ili

Jilakee bak ma Aja San
Bak sulotan woe keumbali
Ngon meutia puwoe sajan
Bak sulotan jipeujari

Bak Aja San raja tanyong
Takheun beu keunong di nap wadi
Pajan tacok meutia nyoe
Lam meuligoe trep hana le

Nyo pancuri gata sidroe
Milek kamoe tapeuli
Yoh nyan Aja San sangat malee
Tundok ulee di nap wadi

Ie mata ro dum meuree-ree
Di nap jamee meunroe wadi
Na sikeujap lheueh nibak nyan
Lom jonjongan neupeugali kri

Wahe bujang tango laman
Bak Aja Diwan tapeureugi
Talakee areuta ensan jipoh
Bak peurumoh bawa sini

Bek le lambat jak tabeudoh
Beu rijang troh nibak kami
Bujang jak le teuma leugat
Ka meurumpak ngon esteuri

Jilakee areuta suroh deelat
Jiwoe leugat ubak doli
Jeuneh alat meuh sinaroe
Intan pudoe cawareudi

Ubak raja bujang jiwoe
Sambot keu droe uleh doli
Raja hireuen hana bagoe
Guree peuet droe jeuheut bagi

Seureuta ngon neukheun meunoe
Ubak meuntroe deungon wadi
Hai Aja Diwan bit paleh kah
Han got di kah jeuheut keuji

Ngon baduwi laknat Allah
Kameumukah han got bagi
Raja tanyong di nap jamee
Neupeuteuntee uleh doli

Aja Diwan bit han malee
Na ban asee humeue bangke
Pakri asai kameumukah
Cuba peugah lon deungo kri

Teungku paleh kutok Allah
Jinoe kusula kah bu mate
Eleumee teuboh teungku ka jalang
Kreueh ngon ceukang buta hate

Ureueng laen habeh malang
Seubab suang teungku kafe
Teudong syaksi di nap khalifah
Buet meumukah jipeulahe

Peugah di nap rakyat barollah
Di nap jamaah peue tapike
Meukri asai mupat teumpat
Ubak deelat jipeugah kri

Ban raja deungo haba rakyat
Beungehneu that hana sakri
Aja Diwan malee sangat
Di nap rakyat moe meu'i-i

Raja kalon meunan bagoe
Yue tren sinoe bek meu'i-i
Meung han jitren jiwéh sinoe
Meuhat kuseudoe deungon gaki

Aja Diwan hate rusak
Han neujak meung sipade
Rakyat teudong dum meusak-sak
Neulakee tak uleh doli

Lheueh nibak nyan teuma siat
Syah beurdeelat lom neusudi
Hai Aja Peurkasa lon na pakat
Jinoe siat lon tanyong kri

Cuba buka phateu puree
Kueue le kee pane ube
Aja Peurkasa teukui ulee
Di nap jamee moe meu'i-i

Raja neukheun hana malee
Phateu puree moe meu'i-i
Dumna rakyat sujud ulee
Ubak asee pajoh bangke

Lheueh nibak nyan lom na siat
Syah beurdeelat lom tanyong kri
Wahe bujang kajal: leugat
Jinoe siat bek trep lawi

Ubak aneuk Aja Dandak
'Oh meurumpak bawak keumari
Ban bujang deungo leugat jijak
Ban meurumpak jimaba le

Ban sare troh bak sulotan
Di hadapan neutanyong kri
Wahe aneuk Aja Dandak
Bit nyo bapak gila babi

Watee leumah aneuk buleuen
Aneuk jikheun bit seukali
Ban rakyat deungo Haba meunan
Beungeh han ban raja neugri

Raja neukheun haba saket
Nyan neumarit uleh doli
Ban peuet gata tasom peunyaket
Bukon sulet hana sakri

Untong hanà kupoh Meudeuhak
Hate rusak that han meukri
Beukit jadeh mate Meudeuhak
Nanggroe rusak deungon keuji

Lom meututo raja nanggroe
Neukheun meunoe uleh doli
Wahe Meudeuhak muda samlakoe
Guree peuet droe tapoh mate

Areuta katueng namiet ka rampah
Katueng keukah sama seukali
Guru paleh laknat Allah
Jimeumukah ngon jipancuri

Kheun Meudeuhak insya Allah
Beu le meuah peuet droe meuntri
Bek tuanku neupeusalah
Ampon meuah dum bak kami

Di guree peuet hate han mangat
Geuthee ka rab droegeu mate
Meudeuhak ba nyan guree peuet
Ubak deelat raja neugri

Wadiharah kheun bek keunoe
Gureeku nyoe kupoh mate
Bukon salah hana bagoe
Kukoh takue jaroe gaki

Lom Meudeuhak meuhei ampon
Neuseuon bandua jari
Tuan putroepei hei ampon
Seureuta ngon neupeugah kri

Ngon Meudeuhak neupeugah kri
Raja neugri pumeuah le
Meudeuhak ba guree peuet droe
Neupuwoe bak teumpat diri

Mulia that han sibagoe
Meudeuhak ragoe that sakti
Di guree peuet hate seungkoe
Meudeuhak sidroe that jibeunci

Lheueh neupuwoe guree u rumoh
Meudeuhak uroh karong wali
Neuyue teuka dum neuuroh
Peunoh rumoh peuet droe syekhi

Teubee meuon u meulason
Geupeutren keunan geuyue bri
Habeu rakyat dum meuhimpon
Meudeuhak yue tren tandi waki

Raja kalon meunan bagoe
Jroh hareutoe muda juhari
Neugaseh Meudeuhak deungo putroe
Raja nanggroe sangat ahli

Buet meudeuhak ngon guree peuet
Raja kheun jeuet baranggakri
Jroh that lidah deungo pueuet
Akaipi got hana sakri

Keu guree peuet hana deundam
Jipateh ban firman Rabbi
Guree peuet droe muka masam
Uroe malam mita budi

Mita ilah puweh Meudeuhak
Seubab bijak akai zaki
Sajan raja meuna Meudeuhak
Seungkoe seungkak dalam hate

Lheueh nyan meututo guree peuet droe
Bak siuroe Tuhan teukeudi
Meuna Meudeuhak mantong sinoe
Teuboh geutanyoe meung jih wadi

Han jeuet keu meuntroe keumala syah
Meudeuhak bantah geutanyoe ini
Baranggapeue han jeuet tapeugah
Tapeuseumbah ubak doli

Toh bicara ngon ambilan
Pakri padan cuba kheun kri
Teuma jawueub meuntroe Aja San
Ulon nyoe ban leumah pike

Mita ureueng nyang jeuet padan
Le ambilan leubeh taki
Tayue cok areuta sulotan
Seukalian lam mandiri

'Oh keumah pakat ka seuleusoe
Guree peuet droe mita pancuri
Nyang utoh that hana bagoe
Ateueh taloe jeuet jititi

Di Aja San yue cok manikam
Meunan macam neupeugah kri
Di Aja Diwan meunoe kalam
Nibak makan teumpat doli

Neuyue curi ayeuem gumbak
i feunan layak neupeugah kri
Lom meututo Aja Dandak
Neupeugah bak lem pancuri

Di gata tacok kawoh sulotan
Maseng lakuan jiyue buni
Aja Peurkasa peudeueng analan
Milek sulotan areuta nini

Sare hase dum seuleusoe
Bak siuroe ngadap doli
Seureuta ngon geubet jaroe
Guree peuet droe peuleumah budi

Deelat tuanku keumala nanggroe
Seumbah kamoe nyankeu doli
Peue na gadoh lam meuligoe
Seulawet kamoe duek di sini

Bak tilek eleumee nujum
Lon pumaklum dalam hate
Bak firasat ulon mufom
Bak panghulee dum cuba sudi

Peuet peue gadoh lam meuligoe
Tuanku droe ulon pike
Tuanku tanyong bak asoe meuligoe
Nyang peuet peue r.yoe bak keurani

Ban raja deungo haba guree
That meuteuntee hana sakri
Yoh nyan raja neupeuteuntee
Bak asoe juree neutanyong kri

Bak panghulee rumoh raja tanyong
Neukheun keunong raja sudi
Peue na gadoh ulon tanyong
Kheun beu keunong hai keurani

Lheueh neutanyong ka seuleusoe
Areuta peuet peue ka hana le
Pita jroh hana bagoe
Peudeueng seureuloe alat nini

Ayeuem gumbak kawoh sulotan
Keuhilangan lam meuligi
Raja pike dalam pueued
Bak guree peuet raja sudi

Soe pancuri tapeusifeuet
Kheun guree peuet ubak doli
Tuanku pancuri cit Meudeuhak
Meunan layak bak lon pike

Ateueh patot nyang mustahak
Meudeuhak bijak panyang cawe
Haba rahsia han jibri peugah
Nak bek leumah baten lahe

Meukeusud Meudeuhak keu khalifah
Meunan titah awai akhe
Jikeumeung keurajeuen nanggroe Watu
Deelat tuanku bahle mate

Ulon tupeue nyan dahulu
Bak tuanku lon peulahe
Meudeuhak le kawom wareh
Rakyat habeñ dum jimeusi

Kawom rakyat dum jigaseh
Tan jikheun ceh baranggari
Nyan rahsia han jibri peugah
Meunan leumah bak lon pike

Deelat tuanku laman peugah
Bukon salah lon tapeuse
Nyo Meudeuhak jeuet keu raja
Akhe masa dudoe lahe

Teuma lheueh nyan po meukuta
Sia-sia gadoh pike
Ban raja deungo guree peugah
Dum geukeubah dalam hate

Dalam hate Wadiharah
Neumarah keu muda juhari
Beungehpi that hana layak
Neukheun Meudeuhak neupoh mate

Putroe deungo narit layak
Neutanyong bak raja doli
Pakon tuanku neupoh Meudeuhak
Buet han layak awai a^lhe

Raja seuot nyang mustahak
Neupeugah bak tuⁿ putri
Meukri bangon mupat daerah
Mupeue salah jeuet keu mate

Deelat tuanku laman peugah
Meuka salah patot mate
Yoh nyan putroe peugot kireman
Lam makanan neuyue boh le

Neuyue intat yoh masa nyan
That analan Kasmi Diwi
Keu Meudeuhak neuyue intat
Dalam surat ka lheueh tapeuse

Yoh nyan Meudeuhak neuploh surat
Dalam lipat neubaca le
Narit putroe nyang mustahak
Bak Meudeuhak neupeugah kri

Wahe adek lon Meudeuhak
Taweh nibak meukuta neugri
Bek le taduek gata sinoe
Hate seungkoe raja doli

Nyang fitnah guree peuet droe
Wahe adoe lon peugah kri
Dalam hate raja sidroe
Taweh sinoe muda juhari

Watee puleh hate seungko
Keunoe tawoe ubak doli
'Oh lheueh neubeuet le Meudeuhak
Bak Amarak neupeugah kri

Wahe judo lon Amarak
Jinoe lon jak tinggai neugri
Bak tuanku meureuka that
Lon jak siat hana lawi

Gata teutap ateueh teumpat
Lon beurangkat wahe po ti
Yoh nyan Amarak di hadapan
Meudeuhak peusan bak esteuri

Wahe judo tamita jalan
Ulon tuan tinggai neugri
Amarak moe yoh masa nyan
Beurtangisan hana sakri

Ie mata ro di hadapan
Meudeuhak beurjalan tren peureugi
Blah utara Meudeuhak jak
Tinggai Amarak nyan di neugri

Neumat tungkat leugat neujak
Hingga troh bak saboh neugri
Bak teumpat duson tanoh data
Pioh sigra muda juhari

Meuteumee sinan ureueng tuha
Geuteumeupa malam hari
Ateueh nanggroe nan Sangkara
Tuha muda baranggari

Peugot kanot ngon beulangong
Peue nyang keunong nibak hate
Meudeuhak kalon rupa keunong
Kanut beulangong ciriek keundi

Meudeuhak bri saleuem rijang
Keu ureueng nyang tuha lagi
'Oh lheueh saleuem neuduek seunang
Deungon ureueng nyang seumadi

Ureueng tuha eu Meudeuhak
Sangat galak dalam hate
Wahe aneuk pane tajak
'Oh na jarak tapeureugi

Seuot Meudeuhak muda canden
Lon jak meuen wahe abi
Ureueng tuha seubot jinoe
Keu aneuk droe muda juhari

Wahe aneuk po samlakoe
Tadong sinoe sajan kami
Ulon male aneuk han sidroe
Samlakoe gata boh hate

Dumna areuta lon hareukat
Meusapat keu gata lon bri
Meunan aneuk lon meuhajat
Meunan kasad dalam hate

Meudeuhak deungo haba meunan
Kabui yoh nyan an dawa le
Kara rawi lheueh nibak nyan
Teutap sinan muda juhari

Ureueng tuha gaseh Meudeuhak
Leubeh nibak aneuk diri
Taeu akaipi meusigak
Utoh Meudeuhak bit that sakti

Meudeuhak niet sajan sulotan
Neuduek sinan lama lagi
Di Sangkara teutap sinan
Muwoe karangan nibak doli

XIII. GUREE PEUET KEUNONG TAKI SITI AMRAK

Lon hikayat nanggroe Watu
Peuet droe guru that beureuhi
Ban peuet droe han soe tulak
Kareuna Meudeuhak ka hana le

Seubab tinggai Siti Amarak
Hate galak that beureuhi
Di Aja San cue meutia
Di Aja Peurkasa peudeueng doli

Aja Dandak kawoh sulotan
Di Aja Diwan gumbak putri
Geumupakat guree peuet droe
Tajak publoe areuta ini

Ubak Amarak tabri jinoe
Meuthee dudoe nyoe pancuri
Habehe pike ka seuleusoe
Teuma jipubloe keu si nyak ti

Keujih tapubloe taboh lagee
Rot tatipee Meudeuhak ahli
Areuta nyoe tacue taboh lagee
Rijang geuthee uleh doli

Nak geurampah areuta Meudeuhak
Geupuwoe bak meukuta neugri
Areuta peuet peue sinan sapat
Rumoh Meudeuhak nyoe pancuri

Habehe pike ka seuleusoe
Teuma jipubloe le keu Siti
Keu Amarak dum jipubloe
Guree peuet droe jeuheuet bagi

Padum lawet lheueh nibak nyan
Fon Aja San neupeugah kri
Geujok saboh surat kireman
Di dalam nyan haba takwi

Lon meugalak keu Amarak
Lon meuheundak lon tueng janji
Areuta meuh deungon pirak
Karonya bak Aja San meuntri

Geujok saboh bajee nyang mulia
Aja San yue ba nyan keu Siti
Dokma bajee pudoe intan
Tan teuladan beuranggari

Ban troh surat bak Aja San
That meualasan hana sakri
Yoh nyan Amarakpi meusigak
Neuploh surat bak ureueng me

Di Aja Perukasa lom peugot surat
Neuyue intat ubak Siti
Amarak sambot surat kireman
Dua tangan neutheun lagi

Lheueh Amarak beuet kireman
Balah yoh nyan uleh Siti
Surat geuboh ngon makanan
Peurjamuan peuet droe meuntri

Leumak maneh hana padan
Guree sulotan suka hate
Dalan surat narit nyoe ban
Lon cintaan malam hari

Maseng-maseng dum habaran
That analan Amarak Siti
Hana sidroe nyang na tuban
Dumna ensan baranggari

Ban peuet guree nyanpi meunan
Tan geutuban peuet droe meuntri
Amarak meutanggoh dalam kireman
Intat yoh nyan peuet droe wadi

Yoh nyan Amarak peuhase droe
Dum sinaroe bala baki
Neupeugot mon jroh hana soe
Papeuen sinaroe dum meuuke

Turab papeuen bak duek manoe
Jeuet cuco droe sang ie ile
'Oh sare cukop dum seuleusoe
Ban sinaroe sudah hase

Amarak peugot surat kireman
Keu Aja San meuntroe wadi
Kheun Amarak beu troh malam
Lon sukaan that beureuhi

Keu Aja Diwan saboh surat
Jiyue intat uleh Siti
Keu Aja Peurkasa lom yue intat
Saboh surat Amarak bri

Aja Dandak saboh kireman
Di dalam nyan narit sunyi
Euntreuk malam lon cinta
Beu troh Aja San datang sini

Peuet jeuem sapo troh simalam
Amarak ajam hana sakri
Yoh nyan Aja San rindu deundam
Hana macam that beureuhi

Hate gundah sang ka lupot
Saket meukret-kret jula hari
Pakon uroe trep that seupot
Jula jilop matahari

Leupah meugreb sijeuem malam
Ija hitam sang habeusyi
Aja San ngui ija hitam
Jak lam malam ubak Siti

Ban sare troh bak Amarak
Hate galak hana sakri
Rupa indah Siti Amarak
Aja San galak that beureuhi

Pakon lambat kheun Amarak
Nyang jeuet trep that datang sini
Aja San kheun nyang jeuet lambat
Lon preh larab matahari

Lon preh seupot matauroe
Teuka keunoe datang keumari
Kadang taeh ngon ureueng binoe
Datang keunoe teuma lawi

Wahe teungku manoe dilee
Taeh teuntee ngon kee nanti
Yoh nyan Aja San neusuet bajee
Keubah dilee jok bak Siti

Aja San tren le jak manoe
Neuek laju ateueh titi
Beuet tayeuen brat hana soe
Sret teupipoe papeuen sundi

U dalam mon Aja San sret
Saket meukret-kret moe meu'i-i
Di dalam mon ie ka peunoh
Mon meututop sang geugunci

Leupah sijeuem lheueh nibak nyan
Aja Diwan keunan hade
Amarak tanyong peue lambatan
Trep beurjalan datang sini

Kadang taeh ngon ureueng binoe
Tajak manoe wahe wadi
Aja Diwan geusuet bajee
Keubah meuteuntee jok bak Siti

Aja Diwan neutren leugat
Hate kasar neujak manoe
Neubet tayeuen papeuen meujungkat
Sret le leugat dalam tuwi

Keunong ulee saket meukret-kret
Ngon bruek teuot sang hana le
Aja San tanyong soe nyan ka sret
Dalam seupot moe meu'i-i

Lheueh meututo bandua droe
Sira geumoe dalam tuwi
Pakri laku pakri padan
Wahe teelan toh bicara

Ri han patot buetteu meunan
Beunci Tuhan geutanyoe ini
Jinoe tinggai gop nyan dua
Toh bicara geutanyoe sini

Geutanyoe paleh kana lagee
Jinoe malee singoh hari
Lheueh meututo gop nyan dua droe
Ingat keudroe iem lam tuwi

Na sikeujap sinan teutap
Aja Dandak troh bak Siti
Ban sare troh bak Amarak
Hate galak that beureuhi

Jieu Amarak that sambinoe
Jiyue manoe uleh Siti
Nyanpi meunan miseue bunoe
Sret le sampoe dalam tuwi

Saket ulee muka keumong
Aja San tanyong siapa ini
Peue buet keunoe bit paleh that
Ka meusapat lhee keumari

Aja Dandak lon nyoe nama
Peue tatanya timplak Rabbi
Ban lhee gop nyan geumeumoe-moe
Meucapoe-capoe di dalam ie

Na sikeujab lheueh nyan teuma
Aja Peurkasa keunan hade
Amarak tanyong pakon lambat
Gata ka rab ngon esteuri

Tajak manoe jinoe leugat
Bek lambat jak tapeureugi
Aja Peurkasa tren le leugat
Hate kasad keu si nyak ti

Neubet tayeuen papeuen meujungkat
Sret le leugat moe meu'i-i
Lom geutanyong soe nyang ka sret
Saket meukret-kret moe meu'i-i

Aja Peurkasa teuma seuot
Ulon ka sret ka teukeudi
Bak ulon jak tan lon saja
Mita tima sret lam tuwi

Peue buet tajak malam-malam
Wahe teelan tapeugah kri
Bek tatanyong teungku badan
Ka grak Tuhan roh teukeudi

Seuot Aja San teuma meunoe
Peuet geutanyoe sret lam tuwi
Teungku pakon nyang jeuet meunoe
Peugah jinoe lon deungo kri

Pakon jeuet sret teungku keunoe
Ubak lon nyoe tapeugah meuri
U dalam mon ka meusapat
Peue na hajat tapeureugi

Han jeuet lon peugah wahe rakan
Lagee tuan hajat kami
Buet Amarak peuet geutanyoe
Pakri jinoe tapeugah kri

Lheueh nibak nyan teuma dudoe
Geuiem jinoe tan haba le
Ban peuet guree ka sret lam mon
Got that bangon buet si nyak ti

U dalam ie ka meutamon
Miseue bangon tikoh turi
Alem kutok laknat Allah
Bak meumukah jeuheut bagi

Tinggai syeureuban di meunasah
Kitab barollah han jeuet pike
Keupeue alem tan faidah
Hana ubah ban keuleude

Jahe murakab nan geupeugah
Murka Allah hana bagi
Tatem teungku tameumeukah
Na'uzu billah bak buet keuji

Na.uzu billah min syaraha
Buet ceulaka that han bagi
Nibak Tuhan keunong seurapa
Hana syeureuga uroe page

Hana tadeungo firman Tuhan
Lam Quran lon peulahe
Wa la taqwabuz zina innahu kana fahisyah
Firman Allah beutapike

Sijeuheut-jeuheut kutok Allah
Buet meumukah han got pie
Deesya beusa kalam Allah
Ulon peugah baten lahe

Peurbuatan zina beunci Allah
Rasulullah nyang kheun ini
Miseue guree peuet Wadiharah
Seubab langkah aeb keuji

Seugala donya gop peugah-peugah
Kutok Allah jeuheut bagi
Jinoe lon peugah guree sulotan
Amarak tawan sret lam tuwi

Ban peuet gop nyan moe dum sajan
Allah Tuhan saleh pakri
Tuboh paleh hana tuah
Gadoh ilah hana meukri

Geutanyoe peuet mate sudah
Seubab salah buetteu jahe
Siti Amarak tan meuteumee
Keunong tipee hana meukri

Saleh pakri singoh uroe
Peuet geutanyoe meuhateu mate
Ubak raja geuba geutanyoe
Nyan neuseudoe uleh doli

Adat meuna Meudeuhak sinoe
Peuet geutanyoe hana mate
Meudeuhak hana bak nanggroe nyoe
Sosah geutanyoe awai akhe

Wahé tuboh badan malang
Beunci urang hana sabe
Tuboh paleh badan malang
Jinoe meulang-lang sampoe mate

Peungeuh uroe nyan ka beungoh
Amarak peuteungoh peuet droe wadi
Geulabo cat nyan ka peunoh
Nyan jisampoh uleh Siti

Nibak muka geucat hijo
Adang geulabo hitam nahi
Geuboh bak dhoe arang hitam
Rupa macam nyo pancuri

Amarak peudong nibak pinto
Soe nyang lalo ja jisudi
Inong agam habeh tahe
Peue rab pinto dong beurdiri

Yoh nyan Amarak jimeututo
Patong teungku nanggroe Bari
Di nanggroe Syam sideh neuba
Bagoé rupa sang pancuri

Sang si mureh lagee rupa
Adang bak muka hitam nahi
Ureueng tahe seukalian
Siulahan sang gogasi

Badan puteh keulakuan
Muka nan ban sang Habeusyi
Bak malam nyan di seuramoe
Guree peuet droe moe meu'i'i

Yoh nyan Amarak peukeumah droe
Beungoh uroe jak bak doli
Bak malam nyan di seuramoe
Guree peuet droe bu han jibri

Geupeusawak ban peuet bagoé
Areuta jicue uleh meuntri
Bak Aja San Amarak keubah
Ka jipeugah le pancuri

Di lon kucue meutia indah
Pakon takeubah dum bak kami
Amarak pinah lom neusawak
Bak Aja Dandak geuboh lagi

Teuma marit Aja Dandak
Neupeugah bak Amarak Siti
Di lon nyang na kucue kawoh
Pakon taboh dum bak kami

Teuma geupinah bak Aja Diwan
Jikheun nyoe ban ubak Siti
Nyang na lon cue peudeueng analan
Nyang laen tan nyan di kami

Bak Aja Peurkasa lom neusawak
Utoh Amarak sangat ahli
Nyang na lon cue ayeuem gumbak
Keupeue tasawak dum bak kami

Amarak boh maseng bak droe
Teuma dudoe ba bak doli
Amarak krah rakyat lam nanggroe
Wadi meuntroe bujang tandi

Jitren rakyat meuploh katoe
Dum sinaroe ngon sipai
Rata alat dum di jaroe
Leumbeng beusoe ulee ili

Beude seunapang tumbak di babah
Dum kafilah meuntroe wadi
Rakyat le that subhanallah
Bak Wadiharah geuba pancuri

Ban sare troh nyan u dalam
Rakyat curam ulee ili
Jitet beude sare kiam
Payong alam dum meuriti

Ngon jisurak that meutaga
Tanyong raja ubak meuntri
Peue saleh su that meutaga
Cuba peunyata jak tasudi

Beudoh wadi leugat u blang
Jipeuseunang ubak Siti
Ban sare troh keunan datang
Leumah jipandang Amarak Siti

Wadi tanyong bak Amarak
'Oh na tajak tuan Siti
Teuma seuot Siti Amarak
Babah cangklak hana sakri

Lheueh jipeugah uleh meuntroe
Rakyat ka toe keunan hade
Poteu raja di meuligoe
Neutren jinoe nyan u bale

Yoh nyan Amarak ngadap sulotan
Di hadapan meuntroe wadi
Ampon tuanku po jonjongan
Seumbah laman ubak doli

Bak tuanku lon peuseumbah
Si jih nyan sah nyo pancuri
Raja kalon nyan peurintah
Lom neupeugah uleh doli

Pane ureueng taba keunoe
Pat bu nanggroe raja sudi
Areuta jicue nyo di kamoe
Pat si jih nyoe gampong neugri

Raja kalon han neutusoe
Guree peuet droe han neuturi
Neueu badan puteh meulo-lo
Geucat ka le gapu lagi

Nibak muka adang geulabo
Raja neueu lom neusudi
Poteu tilek ngon ambilan
Keulakuan neueu lahe

Nyang pruet raya nyo Aja San
Nyang raya badan Aja Peurkasa
Aja Diwan nyang raya tapak
Aja Dandak nyang teubai bibi

Raja keunai dum neutuban
Neukheun yoh nyan uleh doli
Bit ceulaka paleh han ban
Si jih nyan tuan jeuheut pie

Dileepi jih boh ambilan
Le ho tuban eleumee sihe
Meudeuhak nyo ureueng beuna
Jikheun ceulaka guree jahe

Seubab kudeungo narit fitnah
Meudeuhak sah ka hana le
Beukit jadeh mate Meudeuhak
Nanggroe rusak dum seugala be

Raja neukheun narit timplak
Neupeugah bak guree jahe
Takheun Meudeuhak darohaka
Salah gata buet pancuri

Guree paleh that ceulaka
Tan bahgia buet han meukri
Laen dilee le bicara
Bak kusangka saleh pakri

Harap beuna gaseh meutuka
Buet beulaga meunan bagi
Wahe Amarak peugah bak kamoe
Pakri si jih nyoe keunong taki

Ban peuet meusapat si paleh nyoe
Ubak kamoe tapeugah kri
Amarak kheun le neuato
Raja tahe neudeungo kri

Guree peuet nyoe that teukabo
Hana syukor akan Rabbi
Deungon ulon lakee meurakan
Surat kireman saboh jibri

Ulon tupeue dum ambilan
Keucurian milek doli
Nyankeuh guree laknat Allah
Galak meumukah hana sakri

Alem ceulaka hana tuah
Kutok Allah jeuheut bagi
Amarak kheun lom bak raja
Sabet ceulaka guree jahe

Eleumee na amai hana
Peue bicara lagee kafe
Miseue narit ureueng Meulayu
Deungo teungku lon peugah kri

Jawi Aceh ulon jampu
Soe nyang rindu baca ini
Talam ini talam teumbaga
Cawan ada isi tiada

Alem ini alem ceulaka
Eleumee ada pakainya tidak
Napsu paleh guree suang
Boh peudeundang rupanya ini

Alem di Padang Meureuwan Diwa
Payong sutra beurtatahkan emas
Alem ini eleumee jalang
Laksana binatang di atas bumi

Meunan kata Siti Amarak
Hadapan bak raja neugri
Lom meusabda sulotan deelat
Bak Amarak neutanyong kri

Wahe Amarak putroe sambinoe
Guree peuet droe kri jeuet tataki
Tuanku ampon syah beurdeelat
Ban peuet sapat jak peureugi

Saboh malam cre bak teumpat
Lakee meusahbat bak lon sunyi
Teungku ngon lon lakee meurakan
Le ambilan lon boh taki

Lheueh kutipee ngon ambilan
Peurjualan kawoh d'oli
Areuta tuanku jicue habeh
Teungku paleh jipancuri

Nyankeuh peurbuatan ka lon peugah
He deelat syah meukuta neugri
Poteu raja yoh nyan amarah
Nibak Allah neupeudali

Raja yue ba ureueng salah
Hukom Allah raja yue draji
Geuyue cok bruek inong balee
Ateueh guree peugot babi

Meunan laku geupeulagee
Ateueh ulee ija ruji
Euntuekpi bruek nibak reukueng
Geubri bulueng peuet droe meuntri

Maseng rata geubah bak droe
Ban peuet meuntroe bujang tandi
Areuta raja dum sinaroe
Jeuep-jeuep sagoie dum jijuri

Teuma geuba jeuep-jeuep ujong
Jeuep-jeuep gampong dum sagoie be
Geuseuranta jeuep-jeuep jurong
Meunan untong peurbuatan keuji

Nyankeuh nyang cue areuta raja
Jih geudawa keunong taki
Meunan lagee geuseuranta
Tuha muda ulee ili

Jicie lejih jikheun Meudeuhak
Raja tulak guree 'asi
Meunankeu buet jeuep-jeuep gampong
Geupalee gong geuyup bangsi

'Oh troh ubak saboh ujong
Meunan untong geupeukeuji
Geupeugiduek keubeue puteh
Mangat meuceh sipancuri

Geupeuseuon on 'ue puteh
Mangat meuceh teuku meuntri
Meunan bangon buet cut puteh
Rupa habeh peuet droe meuntri

Lheueh aeb guree peuet droe
Teuma geuwoe dum keumbali
Maseng-maseng woe u nanggroe
Dum sinaroe pakeh kali

Bukon utoh Siti Amarak
Judo Meudeuhak sangat ahli
Nyoepe areh jehpi rancak
Sabe bijak bandua si

Miseue ureueng kawé ikan
Meunan teuladan ulon tamse
Bandua utoh hana padan
Nyo sirakan that meusampe

Guree peuet droe woe u teupat
Meunan adat nyang ka lawi
Nibak raja meusyehurat
Han le pakat deungon peuet meuntri

Haba guree teuduek siat
Laen riwayat lon peugah kri
Lagee laen lon hikayat
Cit mangat that hana sakri

Meunan lagee lon boh sanjak
Muwoe meujak ulon rawi
Trep ka gadoh cut Meudeuhak
Judo Amarak ulon sudi

XIV. NASEHAT DIWATU KEU RAJA WADIHARAH

Jinoe lon peugah saboh hikayat
Keu alamat Meudeuhak meuri
Haba Diwatu nyang indah that
Wahe sahbat lon peugah kri

Makna Diwatu seumangat nanggroe
Peuleumah droe nibak doli
Rupa na ban ureueng lakoe
Dalam nanggroe hana sabe

Ban manikam mutiara pudoe
Ban meuk uroe cahya bibi
Meunan leumah dum sinaroe
Dalam nanggroe Tuhan peulahe

Diwatu ngadap bak sulotan
Di hadapan dong beurdiri
Jimeututo mangat han ban
Bak sulotañ nyan jisudi

Deelat tuanku keumala nanggroe
Lon tanyong proe ubak doli
Masaalah peuet lon hareutoe
Peugah jinoe makna ahli

Meung tajaweueb keurajeuen keukai
Di fon awai sampoe akhe
Meunyo han jeuet tapeugah hai
Gata beubai kupoh mate

Kukoh takueteu bu mate
Keurajeuen bek le gata sinoe
Ek kupuwoe nyang ka gadoh
Ingat beu jroh jinoe mate

Nanggroe gata ek kureuloh
Habeh kuboh dum seugala be

Tanoh nyang kreueh jeuet keu abee
Raja padee kupoh bu mate

Meunyo han jeuet nyan tapeugah
Gata kupinah jinoo sare
Seuot raja Wadiharah
Cuba peugah lon deungo kri

Meunyo nyang jeuet ulon peugah
Meung han salah putoh lihe
Ulon paban kheundak Allah
'Oh noe langkah habeh raseuki

Kala kada nibak Allah
Ho taminah meuhate mate
Kheun Diwatu teuma peugah
Masaalah nyang fon lahe

Dua ureueng jimubantah
Hana sosah ngon teupike
Jipoh sabe hana padoo
Ngon jikiloe hana khali

Maken meutamah gaseh han soe
Nyang sidroe han jeuet keu pake
Tapeugah soe nyang dua nyan
Wahe sulotan raja neugri

Nyang seumupoh tapeugah nan
Geupoh sinan tapeulahe
Nyang keudua ureueng geumaseh
Seutia habeh that seukali

Teuma beungeh gadoh gaseh
Jiwah di jih ka hana le
'Oh lheueh jiwah hate luka
Lam jicinta sabe-sabe

Uroe malam ro ie mata
Hana reuda jimoo sabe
Nyoe nyang keu lhee ulon peugah

Beu takisah lheuuh tapike
Dua ureueng geumaseh that
Beukit lam jeuratpi hana cre
Han tom saket na meularat
Sabe ladat bandua si

Watee beunci salah sidroe
Saket han soe dalam hate
Han meusapat bandua droe
Jeuheut han soe that seukali

Lagee musoh meupusaka
Bandua ka jimubeunci
Tapeugah soe uleh gata
Ureueng dua tapeulahe

Nyang keupeuet teuma saboh kulam
Lhok di dalam hana sakri
Bungong meuato nyan di dalam
Meunan macam lon tanyong kri

Teuka cicem saboh kawan
Jijak keunan bungong jiseuri
Habeuh bandum leugat keunan
Bak bungong nyan jipeureugi

Beukit jidong saboh sapat
Bungong meuhat leubeh lagi
Beukit jidong dua sapat
Cicem meuhat leubeh ini

Padum cicem padum bungong
Kheun beu keunong wahe doli
Ban raja deungo Diwatu tanyong
Ka teuceungong raja neugri

Muka pucat hate meutat-tat
Teumakot that hana sakri
Bak ie muka ubah meuhat
Doli halarat rab ka seui

Diwatu kheun lom bak raja
Hai meukuta lon peugah kri
Tabri tanggoh uleh gata
Habeh lama tujoh hari

Watee hana tujoh uroe
Meung hana soe jaweueb tabri
Kupoh mate gata sidroe
Nyang nanggroe nyoe ho laen teubri

Lon preh tanggoh gata sidroe
Lon hareutoe beu taturi
Kareuna ureueng na peuet bagoe
Dalam nanggroe baranggari

Peurtama beubai keudua dungee
Ceureudek keulhee beu taturi
Keupeuet bijak ka meuteuntee
Meunan lagee wahe doli

Ureueng beubai deungo lon seubot
Bangon sifeuet ulon lahe
Proe jideungo tuto jeuheut
Cit hana jeuet le jipike

Baranggapeue han le seunang
Ka bimbang di dalam hate
Ateueh nyang got hana le reumbang
Seubab datang kalot pike

Hana akai nyang na sehat
Jeuet meularat hana sakri
Ureueng dungee nyan alamat
Syah beurdeelat beu na pike

Meuka jideungo tuto jeuheut
Cit saket that dalam hate
Muka mirah beungehpi that
Yo meutat-tat han jeuet duek le

Hana akai nyang na sehat
Nyan alamat gadoh pike
Ureueng ceureudek nyoe alamat
Wahe deelat lon peugah kri

Meuka jideungo haba jeuheut
Ngon ibarat jeuet jipike
Leumah akai nyang na sehat
Sabapi that dalam hate

Beukit meugriet keusukaran
Beurtangohan datang pike
Leumah ateueh keubaekan
Keujahatan hana roh le

Meunan bangon ureueng ceureudek
Le ho balek akai pike
Barangpeue buet sasat sidek
Jeuet jibalek leumah pike

Buet musyeewarat suroh Allah
Dum peurintah baten lahe
Wa syawirhum firman Allah
Akhe sudah fil amri

Ureueng bijak jinoe lon peugah
He Wadiharah beu got tapike
Tadeungo beu got ulon peugah
Bak Po tallah bek teukeuse

Proe hai jideungo keujahatan
Keubaekan nyang jimita
Ngon sikeujap leumah seunuban
Han le meunan leumah pike

Seureuta ngon jibri jaweueu
Barangpeue jeuet rijang hase
Tuto jroh nyan jijaweueb
Keunong sifeuet baten lahe

Hana tanggohipi meung siat
Ban alamat bijak budi
Haba saket narit mangat
Sang mameh that leumah lahe

Meunan bagoe ureueng bijak
Nyang mustahak beu tapike
Le that jinoe gadoh sigak
Jikheun bijak nibak bibi

Meung hana gop droeteupi tan
Keupeue angkatan tumbak beude
Hana sidroe jeuet keu rakan
Jeuep-jeuep kawan hana meukri

Hana soe bri akai bicara
Ureueng tuha ka hana le
Padum narit wayang seunda
Akhe masa jeuet keu pake

Meunan nyang le taeu rupa
Agam dara jeuet keu jahe
Beungoh seupot meuseurapa
That ceulaka meunan pie

Sidroe gadoh ureueng tuha
Mangat meulaksa laen ile
Lah ka di nap jikheun raja
Jipeuseunda saket hate

Meung meulikot han bicara
Peue geuraja hana meukri
Tadeungo lon po meukuta
Gata raja Watu neugri

Kuta beu got akai beu jroh
'Oh gop teuoh hana keuji
Peurbuetan raja meung hana jroh
Nanggroe teuboh han jeuet pade

Keupeue guna meunanggroe deuk
Jeuep-jeuep lhok mita raseuki
Dalam nanggroe han jeuet le duek
Ureueng meuseupreuek dum sagoe be

Pat na nanggroe keudiaman
Mudah makanan raja ade
Dumna rakyat habeh keunan
Le makanan hana meuseuke

Jeuep meusijid seumbahyang Jum'at
Nyan alamat raja ade
Na ureueng beuet seugala teumpat
Meunan adat raja ade

Raseuki mudah nanggroe aman
Dumpeue sinan han meuseuke
Meuneukat le gop me keunan
Seubab aman raja ade

Nanggroe rame agama kukoh
Han ek musoh keunan taki
Han jijeuet prang ureueng jeuh
Han jitem roh ureueng taki

Raja ngon rakyat han tom mubantah
Seubab meutuah raja ade
Nyankeuh tanda nibak Allah
Nekmat limpah dalam neugri

Aneuk nanggroe han mubantah
Ban amanah hana meuse
Galak hareukat aneuk nanggroe
Baranggasoe beusa keuce

Meuna dumnan suson pudoe
Aneuk nanggroe hana ile
Deungo he raja nyang meubudoe
Baranggasoe peukong neugri

Syari'at Muhammad beu tapakoe
Ibarat nyoe beu tapike
Meunan Diwatu kheun bak raja
Dum peukara baten lahe

Gaduh sosah po meukuta
Akai teuka dalam hate
Diwatu gaduh han meuho ka
Siklep mata han meuho le

Yoh nyan teuingat poteu raja
Muda beulia ka trep han le
Raja Wadiharah ingat Meudeuhak
Neukheun ubak meuntroe wadi

Wahe peutua imum nanggroe
Meudeuhak jinoe tajak cari
Jeh 'oh lawet ka trep gaduh
Tan soe teuoh muda juhari

Hana akaipi meung saboh
Aneukku jroh ka hana le
Neukrah rakyat dum bentara
Meudeuhak kamita jeuep sagoe be

Beudoh rakyat dum geubungka
Blah utara sinan geucari
Troh bak duson nan Sangkara
Raky at bungka suroh doli

Meuteumee sinan muda beulia
Neuteumeumpa deungon pande
Peugot kanto ciriek beulangong
Peue nyang keunong dalam hate

Ureueng tuha keunan tamong
Geuteumanyong sabe pande
Neueu Meudeuhak duek bak tanoh
Teungoh mehmoh neuseumande

Nibak badan meulabo tanoh
Droe teungoh neupeh pande
Ija peuet hah nyang na di badan
Meunan lakuan geueu lahe

Lagee teuduek di nap raja
Kanut lingka dum ube-be
Lagee neungadap putroe ngon raja
Ureueng tuha nyang seumande

Meuntroe tamong keunan sigra
Geupeumulia hana sakri
Teuma neukheun sabda raja
Neuyue gisa uleh doli

Teuma teusinyom muda beulia
Seubab raja yue keumbali
Neukheun Meudeuhak lakee gisa
Bak ayahda utoh pande

Laju neuwoe ubak raja
Troh le sigra ubak doli
Ija peuet hah nyang na neuba
Laen hana ube ruji

Nibak tuboh tanoh meuligan
Nibak badan dumna abee
Neungadap le doli juhan
Bak sulotan di yup gaki

Poteu raja yoh nyan neumoe
Neueu bagoe muda juhari
Ie mata ro meuteutaloe
Raja neumoe hana sakri

Seureuta neukheun uleh raja
Lon meureuka nibak Rabbi
Seubab jarak deungon gata
Trep ka lama hana meukri

Habeh cre bre lon ngon gata
Hai aneukda lon ka reudi
Meuah ampon nibak gata
Raya deesya lon bak Rabbi

Seubab kudeungo fitnah guree
Lagee asee jeuheut pie
Buet guree peuet hana malee
Lagee asee humeue bangke

Aneukku gadoh trep ka lama
Wareh syeedara hana meukri
Meudeuhak jaweueb tuto raja
Neukheun haba nibak doli

Got ngon jeuheut bak lon saban
Keulakuan leumah lahe
Miseue ureueng duek di yup asan
Ulon tuan meunan tamse

Cabeueng nyang brok sret u baroh
Teungoh duroh tanggai lagi
Ulonteu nyoe milekneu sah
Ban nyang titah wahe doli

Neupoh mate neupeucrok jarak
Cit mustahak khadam doli
Neugantung ube nyang kheundak
Lon hana glak nyan keu doli

Wadiharah lom meusabda
Bak muda beulia neupeugah kri
Lon hai aneuk kureueng bicara
Hana pareksa geulunyueng tuli

Jan cre lon deungon gata
Guree ceulaka jeuheut pie
Lonpi hana peunoh bicara
Kupeumeureka gata ahli

Kheun Meudeuhak lom neupeugah
Bak Wadiharah neupeugah kri
Ampon tuanku laman peugah
Buet di Allah baten lahe

Buet tuanku nibak majat
Nyang hakikat buet di Rabbi
Bak soe laen hana kudrat
Nyang iradat Tuhanku Rabbi

Miseue kata manfirajat sufi
Ahlullahi nyang jeuet pike
Dalam nalam bak na kasad
Manfarajat nalam syae

Wa nuzuluhum wa tulu'uhum
Fa'ala darakin wa 'ala wawajin
Meuek neutren dum meurtabat
Bri halarat keu ensani

Miyup manyang ban nyang hajat
Buet iradat Po lon Rabbi
Meunan bagoe keulakuan
He sulotan raja neugri

Ban raja deungo kheun Meudeuhak
Sang geulantak dalam hate
Narit indah dum meusigak
Bak Meudeuhak muda juhari

Lom meusabda Wadiharah
Lom neupeugah uleh doli
Tanyong Diwatu aneuk tapeugah
Ulon sosah hana sakri

Meung tan gata aneuk kamoe
Reuloh nanggroe hanco reule
Gaseh beu le ateueh kamoe
Gata sidroe jawueub tabri

Jaweueb Meudeuhak insya Allah
Ulun peugah wahe doli
Habeh haba han le kisah
Bandua blah beudoh lagi

Raja neuwoe u meuligoe
Ubak putroe Kasmi Diwi
Di Meudeuhak bak Amarak
Hate galak hana sakri

Ban jikalon le Amarak
Jisujud bak tapak gaki
Amarak moe ka jibae
Leumah judo woe keumbali

Yoh nyan Meudeuhak tahe gante
Rakyat ka le datang sini
Teuka wareh dumna jamee
Jak meuteumee jaroe gaki

Duek bak teumpat jroh meuteuntee
Meunan lagee dum mufeuti
Lheueh meuteumee duek meubanja
Peugah haba meuntroe wadi

Keu hai guree geucalitra
Dari mula sampoe akhe
Ban neudeungo le Meudeuhak
Hate galak pujoe Rabbi

Ucap syukor neupujoe hak
Ilahon Haq Poku Rabbi
Lheueh nyan wareh habeh jiwoe
Dum sinaroe beusa keuce

Padum lawet teuma dudoe
Hingga sampoe troh bak janji
Poteu raja neukrah meuntroe
Dum sinaroe pakeh kali

Habeh jitren jeuep-jeuep sagoe
Imum nanggroe meuntroe wadi
Habeh meuhimpon dum sinaroe
Blang luah nyoe sampoe u gle

Yoh nyan Meudeuhak geuseumanoe
Geupleu asoe jroh han sakri
Geubri salen teuma dudoe
Raja nanggroe mangat hate

Dalam sarat mideuen peunoh
That barollah dum sipai
Tumbak leumbeng hana peue peugah
Rakyat jajah ulee ili

Sare habeh dum meusapat
Raja deelat jak u bale
Meuntroe wadi dum meusapat
Sajan deelat raja neugri

Cut Meudeuhak ateueh geuta
That mulia hana sakri
Yoh nyan Diwatupi ka teuka
Di nap raja duek blah kiri

Duek Meudeuhak uneun raja
Laen tandra dum sipai
Rupa indah hana tara
Muda beulia that juhari

Laen nibak nyan dum bentara
Tuha muda meuntroe wadi
Duek meureuntang dumna peutua
Tuan haria deungon tandi

Yoh nyan Diwatu peuk seumbah
Nibak khalifah raja neugri
Ulon tanyong masaalah
He Wadiharah jaweueb tabri

Teuiem rakyat meuheulayak
Seuot Meudeuhak neupeugah kri
He Diwatu bit meusigak
Patot layak jaweueb lon bri

Diwatu peugah di nap bentara
Awai mula sampoe akhe
Jaweueb Meudeuhak peugah lanja
Bijaksana hana sakri

He Diwatu tanyong kata
Awai mula hingga akhe
Aneuk manyak maji bawa
Jitampa ubak umi

Maken jipoh le aneukda
Maji suka khem han sakri
Maken leubeh gaseh sayang
Aneuk bak nang maji dodu

Ka lon peugah ban nyang seunang
Nyoe seukarang lom lon lahe
Nyang keudua tanyong gata
Aneuk ka raya saket hate

Ban jicarot le ibu bapa
Jiwah lanja han jidong le
Watee han le aneuk hana
Maji cinta malam hari

Teuka sayang keu aneukda
Gaseh raya hana sakri
Teuma nyang keulhee ureueng lakoe
Ngon ureueng binoe gaseh hate

Meugaseh that hana bagoe
Rotdeh rotnoe bandua si
Watee saket teuma dudoe
Ureueng lakoe nyan ka mate

Maken leubeh gaseh han soe
Kadang budoe got that pie
Teuma nyang keupeuet tanyong gata
Cicem ngon bunga nyan tasudi

Bungong lhee boh cicem peuet boh
Fam beu teugoh nak taturi
Kheun Diwatu he aneuk jroh
Ban tapeugah nyo seukali

Han meulaen tan meutuka
Beuna gata he boh hate
Bukon bijak akai gata
Jaweueb haba nyang meuseuke

Lom Diwatu tanyong haba
Beu takata nyang teusudi
Dumna wareh muda beulia
Nibak gata karong wali

Jaweueb Meudeuhak teuma sigra
Sama-sama karong wali
Diwatu kheun sabet beuna
Bijaksana Meudeuhak keuce

Sabet Meudeuhak nyan troh mata
Nyan eelia sifeuet meuri
Diwatu kheun lom bak raja
Hai meukuta deungo lon kheun kri

Ureueng meukai bijaksana
Nyan utama beu takaji
Nibak musoh tapeulahe
Sitree gata han jeuet ungki

Alamat meugah raja raja
Peuet peukara na mufeuti
Peurtama gaseh keu ulama
Ban sineuna beusa keuce

Keudua ureueng bijaksana
Nyanpi beu na sajan doli
Teuma nyang keulhee ureueng kaya
Tapeulara dalam neugri

Teuma nyang keupeuet ureueng tuha
Meugah raya hana sakri
Meutamah keurajeuen raja raja
Peuet peukara beu tasudi

Peurtama jaroe murah raya
Nyang keudua gaseh hate
Keulhee wadi nyang seutia
Keupeuet teuma nyang beurani

Alamat talo raja raja
Peuet peukara beu tapike
Nyang peurtama hana seutia
Nyang keudua raja kike

Keulhee adat jipeuraya
Hukom hana ube pade
Keupeuet jeungkat raja raja
Han jitaba baranggari

Hana jithee tuha muda
Nyanpi raja keumeung reule
Habe nasehat Diwatu peugah
Bak Wadiharah neupeulahe

Jinoe Diwatu bri hadiah
Seudeukah mudah jeuep-jeuep hari
Nyan manikam meuh ngon pirak
Hu meuhalak hana sakri

Intan meutia hu mubhak-bhak
Keu Meudeuhak Diwatu bri
Neupeuleumah ubak sulotan
Adi juhan baranggari

Di nap rakyat seukalian
Di hadapan meuntroe wadi
Yoh nyan Diwatupi ka gaeb
Siklap-siklep han meuhu le

Euntah u syreb euntah u mugreb
Ka gaeb hana meuri
Lheueh nibak nyan rakyat jiwoe
Dum sinaroe pakeh kali

Maseng-maseng u teumpat droe
Raja neuwoe bak esteuri
Meudeuhak woe bak Amarak
Hate galak hana sakri

Gaseh hate han le seungkak
Keu Meudeuhak sangat ahli
Rupapi jroh seutia teugoh
Hana saboh dalam neugri

Hana meunan barangsoe jroh
Sangat teugoh bandua si
'Oh watee woe cut Meudeuhak
Siti Amarak jibeudoh le

Jisrah gaki le Amarak
Akan Meudeuhak nyang suami
Ngadap lakoe baranggajan
Han siwadan ngon barangri

Han meunan dum seugala don
Banda duson nyan tacari
Kon miseue nyan ban inong jen
Puteh licen that juhari

Ngon suara galakteu that
Puteh lumat sangat ahli
Ureueng laen hana meunan
Ban sikawan sang abdi

Mate geucang geukoh ulee
Kon salah kee rimueng pate
Dilee galak di kah keu kee
Lagee asee kalon bangke

Boh seuneulheueh mangat kujak
Bek that cangklak rimueng pate
Di kee han le keu kah galak
Bu peudeueng tak beude rabe

Meunan-meunan jeuep-jeuep nanggroe
Lakoe binoe jimupake
Habeuh laen jeuep-jeuep sagoe
Hingga sampoe nanggroe Idi

Ulon kalon ureueng binoe
Jeuep-jeuep sagoe beusa keuce
Meung takheun cut galak han soe
Takheun adoe gigoe tan le

Lon eu teuma meunan rupa
Inong tuha baja di bibi
Sunteng bungong ngon ceumara
Inong tuha gleueng di gaki

Jimupanton wayang seunda
Tuha muda malee tan le
Na tadeungo hai teungku jroh
Lheueh meuteuoh nanggroe Idi

Agam inong han tatu'oh
Jeuep-jeuep rumoh hana sakri
Lakoepi lheueh jipajoh bu
Peurumoh jidu lagee bangke

Pruet ka tarek badan sulu
Jieh laju tan beudoh le
Siuroe suntok sabe jieh
Inong paleh malee tan le

Hana sapeue buet jipeulheueh
Nyang na jieh di jih sabe
'Oh woe lakoe jitaguen bu
Peurumoh jidu han beudoh le

Lakoe maguen ka masak bu
Beuet laju keu esteuri
Agam mehmoh duek di dapu
Peurumoh taeu teueh sabe

Jicroh eungkot sulu-sulu
Jibeuet bu keu inong bangke
Lakoe beuet peurumoh pajoh
Hai teungku beh reusam Idi

Ulun kheun nyoe cit bit sunggoh
Lon jak ka troh u Seumali
Nanggroe Bayu angen timpa
Gampong Meuraksa toe ngon Lancok

Gampang Kandang deungon Cunda
Seureuta dengon gampong Lhok
Bahkeu dumnan hai syeedara
Leupah haba lon teubarok

La ilaha illallah
Ka leupah ulon meuajok
Angen raya ujeuen jojah
Hingga leumah matauroe

Seubab hate lon that sosah
Ulun peugah haba rawoe
Keudeh keunoe jimeurawoh
Roh meuteuoh keu nanggroe Idi

Sang aneuk miet jak pot kulat
Jijak siat trep keumbali
Teuduek 'oh noe dilee siat
Laen riwayat ulon rawi

Lagee laen lon boh sanjak
Mangat galak hate seunang
Ban nyang lemah ulon seubot
Leumah leumbot gaseh sayang

Seureuta lon balek ayat
Ulon surat peue nyang rembang
Pueh lon ingat bak lon surat
Wahe sahbat hate bokbang

Nibak siploh lon boh saboh
Meung bek gadoh punca lambang
Lon deungo siblet gop meuteuoh
Peue han gadoh hate bimbang

Amma bakdu kata rawi
Tadeungo kri wahe abang
Ulon peugah raja doli
Meukuta neugri luah makam

Hukom ade agama kukoh
Han ek musoh keunan datang
Meusyeuhu gah nanggroe jeuoh
Han ek teumboh keunan jiprang

Padum wadi ngon bentara
Haria ngon huleebalang
Laen nibak nyan dum peutua
Keujruen muda panglima prang

XV. WADIHARAH PEUJOK NANGGROE BAK MEUDEUHAK

Wadiharah nama raja
Nan nyang dua huleebalang
Nanggroe Watu ade raya
Le lasyeuka dum ngon bujang

Yoh nyan neujok teuma nanggroe
Dalam jaroe muda seudang
Cut Meudeuhak that samlakoe
Peutimang nanggroe luah makam

Hukom ade hana peue kheun
Intan buleuen huleebalang
Ureueng jeuheut Meudeuhak pinah
Neukeubah u lua dalam

Nyang mupake jih neupinah
Ureueng salah Meudeuhak larang
Mangat hate dum sinaroe
Asoe nanggroe beusa seudang

Lawet keurajeuen muda samlakoe
Aman nanggroe hukom seunang
Aneuk yatim jeuep-jeuep teumpat
Meudeuhak sasat seukalian

Neubri areuta neuyue ibadat
Suroh halarat neuyue peukong
Amar suroh nahi teugah
Neuyue pinah jih neubuang

Meuseujid rame ngon meunasah
Jakeuet pitrah dum sibirang
Na ureueng beuet jeuep-jeuep sagoe
Ade han soe huleebalang

Beukit han jeuet neupeurunoe
Aneuk nanggroe yue seumbahyang

Puasa sunat troh bak gantoe
Jeuep-jeuep sagoe neupeureumbang

Amar makruh nahi mungka
Sangat that kha neupeutimang
Meudeuhak peugot dum peukakah
Nyang peurintah huleebalarg

Beude beusoe bieuk peukakah
Bajee kupiah ngon ija plang
Tumbak leumbeng neupeusapat
Ubak rakyat dum sibarang

Peugot beude dum meusapat
Seureuta alat ngon seunapang
Meudeuhak peugot kuta nanggroe
Dum sinaroe alat peukong

Habeh cukop neuhareutoe
Ban peuet sagoe kuta reuntang
Tujoh lapeh kuta nanggroe
Dum sinaroe rakyat datang

Geukueh parek ngon lhok han soe
Peugot nanggroe muda seudang
Meung got nanggroe raja makmu
Deelat tuanku neuduek seunang

Deungon putroe hate rindu
Nanggroe makmu huleebalang
Kuta cukop peunoh alat
Asoe sarat dum sibarang

Laen nibak nyan bandum cakap
Soe nyang lihat ka teuceungang
Kuta luah hana sabe
Ubat beude le that datang

Limong reutoh nyang krong pade
Sabe-sabe dum geutuang

Tumbak mubak bulat-bulat
 Le that alat peukakah prang
 Laen nibak nyan han teukimat
 Peunoh arat dum sibarang
 Saboh sagoe lila geuboh
 Lhee peuet reutoh lheueh geutuung
 Watee meugriet teuka musoh
 Sigo jicoh peungeuh lam blang
 Buket manyang jeuet keu data
 Uteuen rimba jeuet keu padang
 Limong reutoh beude teumaga
 Meuriam lila han teubilang
 Limong reutoh geumpa alam
 Ubat di dalam siploh gantang
 Lila tumbak ngon meuriam
 Macam-macam undang-undang
 Parek tujuh kuta tujuh
 Jeuh-jeuh jalan datang
 Parek nyang fon buloh rancong
 Soe nyang jamprong nyawong hilang
 Parek nyang dua suda puntong
 Tincu ujong tamse labang
 Parek nyang peuet lhok han macam
 Luah didalam that jeumeurang
 Geuglong didalam suda beusoe
 Buet samlakoe muda seudang
 Parek nyang limong uleue bisa
 Raya-raya sang bak mancang
 Parek nyang nam dumna kala
 Sikai bisa dum di dalam
 Parek nyang tujuh uleue raya
 Dum seugala seudong biram
 Kuta tujuh ka lheueh gunjak
 That meusigak wahe abang

Pageue kukoh rapat geusak
Meusigak takalon reumbang
Baranggasoe han jeuet jijak
Putoh tapak habeh leukang

Dumnán kuta buet Meudeuhak
Sangat bijak muda seudang
Diseuto nanggroe Meudeuhak tupat
Reusam adat dum sibarang

Pike syawe kieh ngon sipat
Meu'oh sukat dum sibarang
Akai utoh bijaksana
Han saboh sa muda seudang

Saboh bayeuen Meudeuhak peulara
Jeuep-jeuep donya jiteureubang
Jideungo pat nyang na haba
Dum bicara nyang han reumbang

Lheueh jideungo dum rahsia
Jipo lanja le jiriwang
Jipeugah bak muda beulia
Dalam rimba hingga padang

Nanggroe jeuoh musafara
Barang haba dum jibilang
Meunankeu buet po samlakoe
Bayeuen puwoe dum sibarang

Nyang meuseuke jarak nanggroe
Troh jipuwoe rijang-rijang
Cintra bayeuen rupa indah
Meuh meutatah pudoe intan

Teempat minom peurmata mirah
Meunan geupeugah wahe abang
Geunap uroe bayeuen bungka
Peureugi safa jeuoh datang

Sabe jijak seugala nanggroe
Haba jipuwoe keu muda seudang
Jarak jijak lama jiwoe
Dum jitupeue peurintah prang

Keu mata-mata nanggroe jeuoh
Untong musoh sideh datang
Dumnan areh Meudeuhak utoh
Nanggroe jeuoh neutupeue ban

Ceureumen apui tamse Meudeuhak
Keunan jijak dum sibirang
Bayeuen budiman Meudeuhak suroh
U nanggroe jeuoh neuyue teureubang

Neuyue deungo peue nyang na troh
Meudeuhak utoh that analan
Haba Meudeuhak teuduek siat
Laen riwayat ulon karang

Ulon boh laen hikayat
Ulon surat uroe malam
Sunggohpi that hana bagoe
Geunap uroe pagi peutang

Le that galak asoe nanggroe
Suroh kamoe huleebalang
Huleebalang nibak Allah
Nyang peurintah hukom seunang

Neuyue jak eu sidroe syiah
Neuyue langkah bak lon tuan
Neuyue me lo ngon keureutah
Neuisyarah neukalon tan

Bukon keudroe nyan neupeugah
Neuyue langkah sidroe tuan
Lon meudawa hana dapat
Karena surat keubaekan

Gotkeuh bahle ulon surat
Lon hikayat barang-barang
Ulon harap keu Po tallah
Rasulullah teuma sajan

Di likot nyan insya Allah
Deungon afuwah saidina Hasan
Bah lon surat kaman pantah
Bagah-bagah ulon karang

Keureutah keumang daweuét pucat
Lon seumurat wahe abang
Lon surat nyoe hate keudeh
U meurandeh lon jeumeurang

Malam keunoe uroe keudeh
Di meurandeh lon bloe publoe
Nyankeu seubab lon jak keudeh
Malam lon eh u Lagang lon woe

Beungoh uroe lheuëh pajoh bu
Lon jak laju teuma sidroe
Padumna trep nyang mumeunan
Teukeudi Tuhan bak siuroe

Lon lakee saboh surat hikayat
Galak lon that wahe adoe
Si Nyak akob nyang po surat
Geuyue surat ubak kamoe

Padumna trep bak lon tuan
Hikayat nyan padum uroe
Kadang soe-soe nyang tem baca
Manfaat na uroe dudoe

Bah lon salen hai adekda
Manfaat na baranggasoe
Soe nyang deungo na manfaat
Soe nyang ingat fahla dudoe

Keureutah keumang daweuët pucat
Nyankeu seubab jeuet keu bimbang
Kheuet mubalot kalam beureuteh
Han ek habeh undang-undang

Kheuet hana got wahe adoe
Aneuk jaroe ulon ceukang
Pueh lon pakhok suson pudoe
Bungong geutoe hate bimbang

Kareuna lon hate wa-woe
Ingat keudroe beulanja tan
Nyankeu seubab trep surat nyoe
Wahe adoe ulon karang

Kareuna buet ulon meh-moh
Lon peugot rumoh ube rangkang
Nyoe saboh treuk wahe akhi
Deungon rudi hana reunggang

Bahkeu dumnan wahe teungku
Amma bakdu laen datang
Ajaeb subhanallah
Tango lon kisah Sumbang Hiran

Nama nanggroë Panca Larah
That barollah huleebalang
Sireutoh raja taklok keunan
Bak tuan nyan geupeudatang

Laen wadi seukalian
Han tatuban banyak bilang
Padum meuntroe ngon bentara
Peutua ngon huleebalang

Bujang tandi keujruen muda
Dum sigala panglima prang
Sumbang Hiran nama raja
Lengkap rata wadi juhan

Tumbak leumbeng alat rata
Jeuep-jeuep bentara huleebalang
Bajee Ingreh ban sineuna
Meunan aja panglima prang

Laen leungkap dum seumua
Seunjata peudeueng geudubang
Ngon peukakah han teukira
Rakyat raja huleebalang

Dalam nanggroe ureueng kaya
Peue takira peukakah prang
Rukon beude deungon lila
Dum bentara nyan jipeugang

Nyang mat sagoe dum peutua
Bajee raya peudeueng panyang
Laen nibak nyan leumbeng tumbak
That meusigak panglima prang

Limong reutoh nyang meusigak
Jroh that gunjak macam-macam
Limong reutoh bajee mirah
Geutatah kasap keurawang

Meuh meutumpok bajee hijo
Di baho beude seunapang
Laen rata hijo biro
Bak meulalo jak meulinggang

Limong reutoh bajee puteh
Nyan peunileh huleebalang
Bajee kuneng lom jipileh
Mangat meuceh kawan muprang

Bajee hitam limong reutoh
Bandum sunggoh hate girang
Nyang jitheun teuka musoh
Di jeuoh jiampeueng prang

Rakan peurunoe alat meuriam
Le that macam bak tapandang
Laen nibak nyan payong alam
Rupa macam meuh meukeurawang

Jeuetkeu dumnun ulon kira
Alat seunjata huleebalang
Raja Hiran meugah raya
Wadi bentara panglima prang

Sidroe Brahman guree raja
Nyan jikira undang-undang
Eleumee le alempi raya
Dum kutika putih jifam

Eleumee gaeb falak kutika
Jeuet neukira pupoh bintang
Eleumee nujumpi mahe that
Eleumee firasatpi leumah trang

Eleumee tumbak eleumee silat
Cit utoh that undang-undang
Eleumee peuet blah habeh maklum
Bandum mufom jeuet tabilang

Subhanallah meulaenkan maklum
Habeh bandum lua dalam
Haba nanggroe Panca Larah
Ulon kisah laen datang

Akan Meudeuhak ulon kisah
Ngon Wadiharah ulon ulang
Bayeuen budiman Meudeuhak suroh
Jipo jeuh that jeumeurang

Troh u nanggroe Panca Larah
Akhe suboh ka jiteureubang
Jidong bak **tampok meuligoe raja**
Diam di sana cicem subang

Brahman Kayuti guree raja
Dalam kuta keunan ka datang
Brahman mupakat deungon raja
Haba rahsia huleebalang

Di leuen meuligoe di yup buraksa
Deungon meukuta syahi alam
Brahman peugah tuanku deelat
Saboh pakat bak lon undang

Nanggroe meutamah akan deelat
Doli halarat sabe reumbang
Sireutoh sa raja aseng
Han meuireng dum meusugang

Seun-seun sidroe nyan tapaleng
Maseng-maseng talo taprang
Sireutoh sa raja ka talo
Meugah meusyehuh han soe sagang

Jeuep-jeuep nanggroe leupah lalo
Nanggroe Watu lheueh nyan taprang
Bayeuen deungo jikheun meunan
Bak Brahman jikheun rijang

Tadeungo lon wahe Brahman
Pakon meunan gop tasagang
Han ek hase ban kheun gata
Nyan bicara hana reumbang

Akhe dudoe 'a-'u dawa
Lom di gata bicara prang
Ulon tupeue akai gata
Dum bicara hana reumbang

Alamat deungki ku'eh raya
Peue cit tuha sang binatang
Tajak let gop han kareuna
Ube seuma han ek taprang

Nyang takheun nyan hana guna
Beuthat ulama jeuet keu musang
Ka jitoh ek dalam babah
Brahman sah beungeh han ban

Bit nyo paleh binatang asee
Lam babah kee ek jibuang
Raja seuot le meusigak
Peue ri lagak gata Brahman

Bek antara gop tatipee
Tiong batee jeuet keu lawan
Ek jitoh dalam babah
Peue tapeugah nanggroe taprang

Lheueh jitoh ek dalam babah
Jipo pantah teuma rijang
Jiwoe leugat nanggroe Watu
Troh le laju jiteureubang

Bak Meudeuhak bayeu en lalo
Dong bak baho muda seudang
Bayeu en peugah buatan raja
Brahman seureuta huleebalang

Di awai kon bayeu en calitra
Hingga masa habeh datang
Yoh nyan Meudeuhak meunoe syawe
Ka teupike muda seudang

Pakri akai toh rot pike
Hingga akhe nanggroe jiprang
Le that ilah leumah rupa
Kreueh bicara muda seudang

Yoh nyan Meudeuhak mubicara
Peugot kuta dum sibarang
Meudeuhak marit deungon raja
Seureuta ngon huleebalang

Habeh bandum jimeusafa
Sireutoh sa huleebalang
Neubri pangkai ngon beulanja
Habeh rata dumna tok pang

Sireutoh sa tangkulok meuglong
Saboh teureupong nyan neupulang
Habeh rata Meudeuhak bulueng
Raja tulong keu rakan prang

Kata rawi po calitra
Maseng rata huleebalang
Habeh bandum neubri areuta
Le bicara muda seudang

Maseng-maseng woe u teumpat
Dumna rakyat habeh girang
Yoh nyan Meudeuhak neuyue intat
Kireman surat huleebalang

Ngon hadiah Meudeuhak yue ba
Wadi bentara meuntroe bujang
Alat pakaian han teukira
Sireutoh sa huleebalang

Jeuep sulotan Meudeuhak yue ba
Salen raja meuntroe bujang
Padum ringget puteh safa
Padum guda geuboh keukang

Neubloe gaseh ureueng lua
Le bicara muda seudang
Rukon bajee deungon ija
Leungkap rata huleebalang

Leumbeng peudeueng alat seunjata
Bandum rata nyan neupulang
Bayeuen neuem jeuep-jeuep donya
Jime haba dum sibarang

Peue nyang teusom habeh nyata
Jeuoh jiba keunan datang
Kata rawi eumpunya kisah
Ulon peugah raja muprang

Jeuep-jeuep nanggroe jibri surat
Pangge rakyat dum sibarang
Habeh jitren jeuep-jeuep teumpat
Mideuen sarat lua dalam

Raja Hiran nibak teumpat
Meuntroe deelat dum sibarang
Deelat tuanku syah beurdeelat
Sujud beureukat kamoe datang

Nyang neupangge dumna rakyat
Ho beurangkat neukheun rijang
Kamoe bandum cukop alat
Doli halarat seuot rijang

Nyang lon pangge keunoe gata
Sireutoh sa raja lon prang
Pakri na pakat nibak gata
Kheun beu sigra bek wayang-wayang

Insya Allah po meukuta
Sireutoh sa raja taprang
Sireutoh sa hana wase
Didalam gle jeuep-jeuep ladang

Beudoh jinoe tapeureugi
Hoka wadi bentara blang
Hoka meuntroe deungon wadi
Hoka waki tajak tajam

Raja Hiran lheueh meusabda
Gajah guda dum sibarang
Maseng-maseng alat seunjata
Bentara ngon huleeбалang

Poteu raja rakyat ireng
Tumbak leumbeng alat muprang
Le that rakyat ngon sipai
Meuntroe wadi dengon bujang

Ngon alat prang sajan jime
Peurise tembaga loyang
Bajee Inggreh dum jipakoe
Laen meuntroe panglima prang

Beude raya mat di jaroe
Beude beusoe ngon seunapang
Taeu jijak dum mubanja
Rakyat peutua huleebalang

Payong mala bandum rata
Nyang bentara meuntroe bujang
Ban sare troh raja beurangkat
Geubri surat yue tren bujang

Fon dilee kon hana wase
Tanggoe u gle dumna ladang
Gata sinoe hana taturi
Wase tabri keunoe rijang

Lheueh nyan geume surat kireman
Bak sulotan nyang geumeung prang
Banu Asarah nan nanggroe nyan
Troh le keunan surat datang

Jaweueb sulotan Banu Asarah
Rakyat kafilah huleebalang
Hana kubri wase keu raja
Tajak sigra keunoe taprang

Di lon nanggroe peunulang bak ja
Keupeue raja keunoe datang
Di lon keudroe kutueng wase
Fon bak nini sampoe seukarang

Keu raja Hiran hana kubri
Bek le cakri seunda wayang
Beudoh jak woe bek kutadi
Han kuturi Hiran Sumbang

Jipriek surat di nap waki
Woe keumbali ureueng datang
Ubak Brahman jipeugah kri
Dinap wadi huleebalang

Raja Hiran yoh nyan marah
Muka juah na ban biram
Beudoh rakyat dum barollah
Banu Asarah raja yue prang

Raja kali rakyat teupileh
Uroe mureh fon geumuprang
Meusu nubat ngon meuriam
Dum di dalam peulheueh u blang

Su meutaga geumpa alam
Le that macam su meu'ang-'ang
Rakyat jiek jroh mupadoe
Dum sinaroe di dalam blang

Meukrum rotdeh tango bunyoe
Meukrum rotnoe lawan muprang
Rakyat mate meugeugule
Darah ile ban ie kubang

Ureueng dalam le that mate
Jiek sabe ureueng landang
Nanggroe talo rakyat bungka
Dum seugala huleebalang

Geucok rampasan ureueng teuka
Le that areuta huleebalang
Teuma lheueh nyan taklok raja
Geupeuteuka jak meureuntang

Mumat jaroe lakee ampon
Ka salah lon teungku abang
Ban nyang adat reusam duson
Meuah ampon keu lon tuan

Geubri wase ngon kheurajat
Geujak intat ubak Sumbang
Raja Hiran hate mangat
Deungon rakyat dum sibarang

Lheueh talo nyan wahe adoe
Laen nanggroe lom neuyue prang
Meuhan jiintat wase nanggroe
Jih kueumpoe mate kucing

Teuma seuot ureueng nanggroe
Bahle adoe lon peutimang
Sideh meugah di nanggroe droe
Meutroh keunoe kukoh reupang

Raja Hiran meugah beuhe
Jinoe hanco tinggai sarang
Meunyo keunoe jipeulalo
Ka cuba eu nyawong hilang

Meunan narit raja Darama
Beungeh raya na ban biram
Raja Hiran ka troh teuka
Raja Darama jinoe muprang

Kuta cukop sare hase
Peulheueh beude leugat u blang
Rotnoe mawot rotdeh mate
Jiek sabe ureueng landang

Meugeureupoh na dum ujeuen
Na ban tufeuen teungoh datang
Na ban bade troh meuran-ran
Meugrum-grum sang bunyoe geundrang

Beude kram-krum prang meutaga
Lagee waba di geulanggang
Habeu mate dum meutimpa
Tarek raya ureueng landang

Jidoe parek reuloh kuta
Rakyat fana habeu ceukang
Nanggroe talo ka seureufa
Gaduh bisa huleebalang

Raja Darama ka keuh talo
Yoh nyan undo han le muprang
Jibri wase ka jiundo
Han le beuhe gaduh girang

Raja Hiran that meusyehu
Nanggroe ka talo dum jipeugang
Ureueng geusuen ka jeuet beuhe
Ka'a-ka'u dum jipeugang

Raja Hiran mangat hate
Jicok wase dum jiguncang
Wase nanggroe muplah hate
Wase di gle dum beurandang

Buetpi sudah pinta hase
Woe keumbali dum kawan prang
Raja Hiran deungon Brahman
Dua sajan hana reunggang

Jakpi saho sapeue padan
Ngon sulotan Hiran Sumbang
Jinoe taprang raja Kubat
Nyang meugah that huleebalang

Lheueh nyan taprang nanggroe Watu
Deelat tuanku meunan reumbang
Ban raja deungo Brahman peugah
Dum geukeubah hana leukang

Raja Hiran krah lom rakyat
Nanggroe Kubat jiyue guncang
Tujoh uroe geuprang Kubat
Talo leugat habeh geuprang

Wase jibri jih titaklok
Ka geutundok huleebalang
Lheueh nyan geuprang raja Indra
Keurajeuen raya nanggroe Padang

Peuek surat geubri haba
Nyankeu tanda undang-undang
Kata syekh eumpunya rawi
Tadeungo kri raja Padang

Troh surat bak raja doli
Cit beungeh le miseue biram
Tren sabda nibak deelat
Neuyue krah rakyat ubak bujang

Bujang mudek pantah leugat
Suroh deelat raja Padang
Dua blah krueng jikrah rakyat
Jitren leugat hana reunggang

Mideuen peunoh dalam sarat
Le that rakyat huleebalang
Syah beurdeelat neumeusabda
Bak bentara panglima prang

Nyang lon pangge keunoe gata
Peugot kuta lawan muprang
Kuta cukup ban sineuna
Leungkap rata dum sibarang

Ka keueh hase siblah rakyat
Lon riwayat Sumbang datang
Tren di nanggroe jibeurangkat
Deungon rakyat huleebalang

Jijak leugat bagah-bagah
Troh le leupah nanggroe Padang
Ban sare troh geujak keunan
Jiprang yoh nyan han soe sagang

Raja Indra jimeulawan
Seukalian dum jimuprang
Tujoh uroe geuprang meuh
Talo leugat raja Padang

Jih ka talo wase jibri
Keunong taki raja Sumbang
Raja Hiran woe keumbali
Beudoh peureugi jak meureuntang

Talo Padang jiprang laen
Maken masen that guransang
Nanggroe reuloh raja ka laen
Prang ho laen ka jigadang

Hingga habeh nanggroe raya
Sireutoh sa nanggroe jiprang
Raja Hiran meugah raya
Ka jigisa dum jiriwang

Rakyat sajan le meu'u-'u
Nanggroe Watu jikeumeung prang
Peuk surat jibri tahu
Keunan laju jipeudatang

Rakyatji le han teupeugah
That barollah pahlawan prang
Meuntroe wadi meugah-meugah
Dum kafilah huleebalang

Lheueh bri surat padum uroe
Tren di nanggroe panglima prang
Raja Hiran bungka jinoe
Ubak nanggroe muda seudang

Na lhee buleuen jicre nanggroe
Ka troh sampoe u padang prang
Imum wadi dum sinaroe
Peurdana meuntroe huleebalang

Ban sare troh nanggroe Watu
Meugah meusyehu rakyat datang
Di Panca Larah rakyat karu
Ka toe laju lam padang prang

Meudeuhak yue mata-mata
Jak peunyata kalon beu rijang
Pane ureueng nyoho teuka
Di lua kuta keunoe datang

Ban sare rab keunan teuka
Jieu rupa deuh jipandang
Jieu keudroe dum mubanja
Kon maniaga ureueng datang

Kon meuneukat le keunoe jiba
Leumah nyata keunan datang
Teuma jiwoe le jigisa
Ubak raja nyan jiriwang

Meudeuhak peugah ubak raja
Sabet beuna ureueng datang
Teuma jaweueb poteu raja
Hai aneukda talawan prang

Beu le alat ban sineuna
Leungkap rata huleebalang
Yoh nyan Meudeuhak krah bentara
Peutua ngon huleebalang

Padum-padum gajah guda
Balatandra ka peunoh blang
Peulana meuh alat seunjata
Bandum guda huleebalang

Jitren rakyat nanggroe Watu
Ka meu'u-'u siblah reutang
Rakyatpi le hana laku
Jitren laju hana reunggang

Jeuep-jeuep nanggroe rakyat teuka
Peutua ngon huleebalang
Rakyat le that han teukira
Ngon seunjata peudeueng panyang

Leumbeng tumbak bandum rata
Banta-banta meuntroe bujang
Padum beude muploh laksa
Jeuep bentara huleebalang

Padum meuriam ngon peudati
Bak sipak jak meureuntang
Rakyat Watu hana sakri
Pumeuriti ngon seunapang

Le that alat dum barollah
Han peue peugah seukalian
Pumeuriti beude cidah
Bak kafilah dum geusandang

Nyang siribee irot babah
Geutatah teumbaga loyang
Beude meuklep nyang biek meugah
Dibabah aneuk meukarang

Tumbak beude dum di babah
Beusoe meuklah dum jituang
Laen rata that barollah
Guda gajah jipeujuhang

XVI. PRANG WATU KEUSA

Bak tujoh blah uroe Ahad
Suroh deelat pubeudoh prang
Pahlawan nyang hebat-hebat
Beusoe tungkat ube go lham

Beude kram-krum rotdeh rotnoe
Maken geutoe that guransang
Gajah guda dum sinaroe
Ka meugumoe di dalam blang

Panca Larah nanggroe Watu
Ka meu 'u-'u di dalam blang
Surak deumpek sare 'a-'u
Hana kuyu huleebalang

Rotdeh peusak rakyat meutak
That meusigak hana macam
Hana teudoh mate rusak
Prang meuhayak that meuguncang

Kuta Watu ka jilingka
Uleh raja Hiran sumbang
Payong alam muploh laksa
Gajah guda jipeujhang

Nyang meugah-meugah beurani kha
Han jeuet kira that guransang
Jigrop tinjak ulee ili
Jipeunari di dalam blang

Jilhom peudeueng jibet gaki
Jititi pantah jimeucang
Meugrup jigrop meukrum jitek
Le that rusak ureueng muprang

Le that mate dum meusak-sak
Guda sipak gajah kubang

Rakan Meudeuhak seb beurani
Cit geuturi huleebalang
Jitet beude pumeuriti
Keumurah bali ngon seunapang
Dum sipai beuhe-beuhe
Peurise le lheueh geutuang
Padum mate bak jitajo
Ka meuhambo didalam blang
Jikasyuk dhap deungon suleng
Giseng-giseng kawan muprang
Ateuh rakyat dum meupuseng
Keunong leumbeng ka meutihang
Rakyat 'a-'u hana bandeng
Keutang-keuting meukoh reupang
Lom rakyat jipeh tambo
Jitajo bagoe seulayang
Jimat di wie peurise le
Di baho gulam seunapang
Ngon jideumpek that meulaku
Di baho geutak geuliwang
Jiteureupa lam kawan le
Ka'a-ka'u leugat jicang
Raja Hiran le that bantu
Han jeuet taeu meugeulumbang
Di likot nyan taeu meu'u-'u
Ureueng Watu that guransang
Jibet beude ngon jisurak
That meuhayak rakyat muprang
Rakyat Watu hate galak
Ka jimeutak ngon geudubang
Peurise raya jimeutudong
Jipeukangkong u dalam blang
Watee jitak jigrop lambong

Keunong di lhong ngon geudubang

Hana teudohpi meung siat
Sang kiamat pagi peutang
Jitet beude meugeureupoh
Sang ka runtoh buket padang

Nyang ka mate meureutoh ploh
Laksin reutoh nyawong hilang
Teuma teuka Jalawali
Nyang beurani that guransang

Ureueng Panca Larah dum jitadi
Le that mate di dalam blang
Pahlawan that hana sakri
Rakyat mate di geulanggang

Jiek lanja jikap bibi
Jipeunari peudeueng panyang
Ureueng Panca Larah habeh lari
Brahman Kayuti tanyong rijang

Pane ureueng nyang beurani
Tapeugah kri ubak abang
Han ek lawan Jalawali
That beurani didalam blang

Mate rakyat hana sakri
Gadoh beurani Hiran Sumbang
Tujoh uroe prang meuhubo
Tarek keundo muwoe ulang

Ureueng Panca Larah plueng meu'u-'u
Rakyat Watu that guransang
Jipalee gong ngon napiri
Na ban bangsi ngon su gambang

Alam raja jipeunari
Hana sakri rakyat girang
Jiek laju pasukan Meudeuhak
Ka jisurak hana lapang

Teuma beudoh adi juhan
Meuntroe Hiran ka guransang
Tujoh reutoh guda kandran
Bak bilangan panglima prang

Jiek leugat jipeuguda
Jroh mubanja jak meureuntang
Ka jipeusak ateueh guda
Gajah guda jipeujuhng

Jipubeude na dum tufeuen
Tamse ujeuen beude teuka
Keutam keutum keunong reuen-reuen
Dalam uteuen su meutaga

Jiteubiet lam kuta Watu
Ka meu'u-'u leugat u blang
Rotdeh kapak rotnoe busu
Jipo pra-pru hana reunggang

Rakyat mate dum teudu-du
Ka'a-ka'u di dalam blang
Hana saboh talo kuyu
Jimeueundru ngon geudubang

Raja Hiran tarek han soe
Jiyue meuntroe huleebalang
Kaek laju keudeh beu toe
Ban peuet sagoe kuta reuntang

'Oh lbeueh meunan geumupakat
Jiek leugat silang pulang
Taeu jijak jroh that rapat
Peudeueng jimat nibak tangan

Ban sare rab keunan ka toe
Beudoh jinoe lawan muprang
Sidehpi rab sinoepi toe
Dum sinaroe beudoh rijang

Keutam-keutum jeuep-jeuep sagoe
Peurise beusoe dum jisandang
Rakyat mate meukeukatoe
Rotdeh rotnoe han teurbilang

Ban sare troh Jalawali
Hana sakri that guransang
Peudeueng cokma jipeunari
Ka jitadi miyup manyang

Dalam kawan nyan jiseudoe
Barangasoe hate guyang
Tandra hiran ka jiboh droe
Hana sidroe jitem teuntang

Han jan jieu keunong ulee
Keuta keutee su seunapang
Adi juhan saket hate
Le that mate rakan muprang

Yoh nyan beungeh dumji sare
Seubab mate ureueng landang
Jisurak ngon jihei sare
Jipubeude hana reunggang

Jeuep-jeuep sagoe tango ca'-ci'
Aneuk beude su meurang-rang
Adi juhan that beurani
Hana sakri bak jimeucang

Jigrop tinjak ulee ili
Jipeunari peudeueng panyang
Ngon alam prang sajan jime
Peurise teumbaga loyang

Deumpek surak miseue bade
Sang-sang geuple ujeuen datang
Leumbeng tumbak hana lale
Ngon peurise taeu macam

Ngon pahlawan hebat-hebat
Ngon jilumpat miyup manyang
Nibak dilee tujuh lipat
Adi Kubat beudoh muprang

Kuta Watu ka jilingka
Bentara ngon huleebalang
Tujuh uroe prang meutaga
Hana reuda siat reunggang

Rakyat Hiran hat guranta
Peurise raya dum jisandang
Tumbak bandum jime rata
Ngon lasyeuka huleebalang

Meujan meukram meujan meukrum
Leupam-leupum su geudubang
Mate rusak han tatudum
Leugam-leugum su seunapang

Lheueh meuriam boh ban raga
Ureueng lua that guransang
Jiba meuriam ngon peudati
Dumji sare jisrom meureuntang

Kuta Watu jikeumeung taki
That beurani ureueng landang
Kheun Meudeuhak yue pubeude
Musoh sare keunan datang

Ban peulingka jiprang sabe
Jiheu sare ureueng landang
Subhanallah rakyat ile
Han tatukri ka peunoh blang

Di fon di gle sampoe u pasi
Hana sakri hate girang
Le that rakyat raja Hiran
Dum seukalian panglima prang

Wadi meuntroe that analan
Bandum rakan that guransang
Padum-padum beude bareh
Rakyat habeh bandum datang

Le angkatan dum kafilah
Kawom wareh ureueng landang
Lheueh meuriam ateueh peudati
Rakyat mate di dalam blang

Tujoh uroe muprang sabe
Hana ek le ureueng landang
Beude di dalam that meutaga
Ureueng lua gadoh girang

Kheun Meudeuhak ubak wadi
Yue pubeude bek na reunggang
Teuma meututo raja Hiran
Deungon Brahman undang-undang

Kuta Watu that analan
Keumeunangan huleebalang
Rakan Meudeuhak lop lam kuta
Gop di lua ureueng landang

Meudeuhak top pinto kuta
Gop di lua ka peunoh blang
Kareuna sosah bak bicara
Dum sigala meuntroe bujang

Han le jidong dum di lua
Le that tandra ureueng landang
Kuta nanggroe sangat kukoh
Han ek musoh keunan datang

Raja Hiran yue prang sunggoh
Bu bek teudoh uroe malam
Ka jikeupong lingka kuta
Dum seugala huleebalang

Jisurak ngon jihei sare
That beurani ureung landang
Tuan Meudeuhak yue pubeude
Cit ka hase ampeueng rijang

Fon-fon neutet lada sicupak
Su meuhayak geumpa alam
Keunong ulee habeh puntong
Ladom di rueng nyan mubangkang

Meudeuhak tet kuce tido
Su meu' u- 'u rasa mubang-bang
Uroe meuhayak malam meuhubo
Ka'a-ka' u nyum meuguncang

Teuma gelhiet lila gaboh
Lhee peuet reutoh sigo pasang
Seubab meugriet teuka musoh
Han jeuet pioh lam tamuprang

Lila gaboh su meu' ee- 'ee
Keunong jamee ureueng landang
Leu' am-leu' um dum di ulee
Ladom singkee putoh meukhan

Nyum-nyum hanco buket batee
Meunan lagee ureueng muprang
Ureueng di luapi hana teudoh
Rakyat kiroh di dalam blang

Rakyat Watu dalam kuta
Ureueng lua meugriet muprang
Le that mate ureueng lua
Meukeuba-keuba ureueng landang

Raja Hiran yue ek lanja
Peutua ngon huleebalang
Alat sajan peudeueng cokma
Dum bentara meuntroe bujang

Lheueh nyan raja yue ek leugat
Jipeuteupat peukeue rijang
Meutum beude hu di pusat
Keunong leugat kuta reuntang

Nyang di dalampi han teudoh
Beude jicoh that meuguncang
Keunong sapai habeh putoh
Rakyat kiroh hana reunggang

Boh beude po lagee unoe
Meuru-ru takalon lam blang
Ban seulingka rakyat katoe
Dum sinaroe ureueng landang

Siploh laksa ribee katoe
Troh di nanggroe hana lapang
Siploh mate siploh meugantoe
Ureueng nanggroe tahe mandang

Meudeuhak kalon le that bantu
Barat timu keunan datang
Jipubeude ka'a-ka'u
Keunong laju ureueng landang

Ateueh kuta duek Meudeuhak
Neuyue timbak ureueng datang
Beude nubat ka neulantak
Utoh meudeuhak bak jimuprang

Meudeuhak eu rakyat ka toe
Di jaroe neumat seunapang
Rotdeh rotnoe ka meuampeueng
Ka meuruweueng ureueng landang

Meuriam lila dum meuasoe
Duek bak sagoe kuta lintang
Rakyat Hiran kaem wa-woe
Meusoe gumoe di dalam blang

Padum reubah keunong beude
Rusak mate lam pupalang
Hana ek theun heundak lari
Calakak Diwi teuma datang

Rakyat le that hana sakri
Payong ceuradi bak kuta blang
Siploh laksa dua keuti
Laen meuntri huleebalang

Raja Hiran nyankeu adoe
Nyang mat sagoe that guransang
Pahlawan le han teukira
Leubeh laksa bak teubilang

Nyankeu ureueng keupong kuta
Sajan raja Hiran Sumbang
Laen nibak nyan dum peutua
Sama rata keunan datang

Han Allah bri na ceulaka
Kukoh kuta muda seudang
Rakyat di dalam muploh laksa
Bentara ngon huleebalang

Rata alat kandran guda
Gajah rangka jipeujuhangan
Na peuet thon trep prang lama
Geuprang kuta muda seudang

Hana biro ube lada
Le bicara muda seudang
Brahman kheun ubak raja
Po meukuta jinoo taprang

Meung sithon treuk taduek lingka
Talo kuta bak rupa sang
Pade habeh breueh bu hana
Ureueng lingka ho rot datang

Rakan Meudeuhak nyang di lua
Sajan raja Hiran Sumbang
Jitiek surat dalam kuta
Jigeulawa rijang-rijang

Meudeuhak eu le bicara
Dumna haba ureueng landang
Meudeuhak yue peugot makanan
Seukalian beusa seudang

Habeh masak seukalian
Deungon ikan nyang teupanggang
Laen gule leumak raya
Meudeuhak yue ba keu ureueng landang

Nyang bu bungkoh siploh laksa
Seureuta ngon eungkot panggang
Meudeuhak hei hoka jamee
Makeuen dilee pioh muprang

Tajak ka trep wahe sampee
Pioh dilee lon bri hidang
Tinggai nanggroe rumoh tangga
Trep ka lama tajak muprang

Brahman kheun kadang tuba
Pane bicara hana reumbang
Teuma seuot dumna lasyeuka
Kamoe lapa me noe rijang

Jipajoh bu jamee teuka
Dum seugala ureueng muprang
Habeh bungkoh nyan jiseuba
Ubak raja haba datang

Ubak Brahman sabda raja
Kheun bak gata ureueng muprang
Tan makanan dalam kuta
U lua dum jiyue hidang

Ubak Brahman sabda raja
Got tagisa dilee riwang
Brahman kheun ubak raja
Po meukuta bek tariwang

Nibak ulon na calitra
Jeuet kutika undang-undang
Tapinah krueng dumteu rata
Nyan u lua tapeusimpang

Meuka tho ie meugriet raya
Dalam kuta dum sibarang
Rakan Meudeuhak na di lua
Sajan raja Hiran Sumbang

Jitiek surat dalam kuta
Jigeulawa rijang-rijang
Meudeuhak kalon nyan bicara
Neuyue mita buloh panyang

Taboh tanoh ie seureuta
Meudeuhak pula rijang-rijang
Bak ujong nyan pula teulipok
Meunan teuduek sireutoh batang

Meudeuhak cok bak teulipok
Neuyue jak jok keu ureueng landang
Ureueng lua kalon sunggoh
Santeut buloh teulipok panyang

Meudeuhak kheun meunoe kata
Cuba mita teulipok panyang
Tasangka tho ie lam kuta
Padum lama khueng ka datang

Rakyat peuleumah ubak raja
Teulipok nyata leumah panyang
Raja yue hah ubak meuntroe
Siploh deupa droe nakeu panyang

Nanggroe Watu peue tasangka
Pueh lagoina jinoo taprang
Iepi le that pade mudah
Geutanyoe sosah lagi alang

Bandum meugriet sangat sosah
Bukon payah nibak taprang
Leupah langkah tajak dilee
Pakri lagee wahe abang

Meung hana talo geutanyoe malee
Pakri lagee peugah rijang
Brahman seuto sabda raja
Peue bicara hana reumbang

Pane kulam nyang lhok raya
Siploh deupa ie na panyang
Akai Meudeuhak bijaksana
Po meukuta ulon pandang

Teulipok nyoe jipeurupa
Pat ie raya dumnan panyang
Beutroh tujuh thon nyan tangaza
Nyan bicara bak lon reumbang

Pakri tawoe e meukuta
Bak bicara gadoh linggang
Dilee sideh kamoe taba
Taseuranta tajak muprang

'Oh han talo tameung gisa
Buet beulaga nyan binatang
Meunyo tawoe po meukuta
Beu reuloh muka lon teubangkang

Hana adat raja raja
Talo hana geutem riwang
Nyang na jeuheut busok nama
Rugoe raya gop kheun musang

Di keue gata jikheun raja
Di likot gata asee musang
Han jiseuot raja raja
Di keue mata huleebalang

Dumnán neuseuep meudinap mata
Ban beulaga lagee binatang
'Oh ka tanle rakyat meulaksa
Pat taraja nibak muprang

Sidroe gadoh ureueng tuha
Got silaksa laen hilang
Jinoe nyang got po meukuta
Bek tagisa got tamuprang

Meung tujuh thon taduek sinoe
Bak kuta nyoe laju taprang
Pane breuh bu pade hana
Ho rot teuka hana lapang

Brahman Kayuti meunan bicara
Surat sigra jisrom rijang
Rakan Meudeuhak le di lua
Sireutoh sa beukit tabilang

Meudeuhak tupeue **buatan raja**
Beu trep lama jikeumeung prang
Meudeuhak yue ubak tandra
Kuet u lua pade rijang

Neuyue reundam siploh gunca
Teuma neupula seutot seumatang
Pade timoh ateuh kuta
Deueh u lua dum jipandang

Lom jipeugah ubak raja
Ateuh kuta pade meureuntang
Pade nyang brok tiek u lua
Siploh gunca sukat di blang

Sep tapajoh siploh laksa
Sithon tamita hareukat di blang
Jipeuseumbah ubak raja
Peue bicara hana reumbang

Nanggroe Watu ureueng gisa
Han ek ngaza got tariwang
Meunan deelat neumeusabda
Brahman kata jawueeb rijang

Pakon tuanku neumeung gisa
Bak teusangka han neumuprang
Teugo taeu pade meulaksa
Peue tasangka han meunang prang

Kata rawi po calitra
Brahman kata jikheun meunang
Raja hiran rakyat meuhimpon
Troh tujoh thon ka geumuprang

Han tom meunang akhe ngon fon
Bak pike lon got tariwang
Dumna rakyat muploh laksa
Sireutoh sa rakyat muprang

Kamoe muplueng 'oh meusua
Toh bicara han tariwang
Kubri nanggroe keu bentara
Ngon areuta dum kupulang

Dum wase krueng ban sineuna
Dumpat nyang na ka kupulang
Kubri salen meuleulaksa
Bentara ngon huleebalang

Rukon bajee deungon ija
Kubicara deungon seunang
Rakyat bandum dalam kira
Habeh rata dum sibirang

Troh bak watee uroe raya
Kubicara sie makmeugang
Habehe umong dalam gala
Kubri lanja bek na lapang

Habehe jitueng dum seumua
Di kee hana meung sigupang
Dumnan di kee kubalah guna
Leumah hana dum bak mie plang

Brahman Kayuti jawueub rijang
Ngon suara trang that meulumbang
Pakon meunan po meukuta
Sagai hana gop neusayang

Habehe taseuep dum peutua
Di nap mata tarubeng nang
Seugala na dumteu rata
Peutua ngon huleebalang

Gop tacarot di nap mata
Ureueng tuha han tasayang
Nyang na di gop geupeulara
Soe bri aja hukom seunang

Meunan nyang got buet di gata
Ban beulaga hana reumbang
Lah ka di nap jikheun raja
Di likot gata asee musang

Nyang malee gop taseuranta
Gata raja huleebalang
Gop tareubot hana reuda
Tatueng areuta han tapulang

Pakri jitren meuseutia
Kriet lagoina gata ceukang
Bahle sinan mate gata
Meutan seutia huleebalang

Nyang that paleh raja raja
Jipeuraya buet sigupang
Jicok wase jikheun keu raja
Jih nyang raya peugot beurandang

Hana jan lheueh jiseumula
Jiyue teuka jak me umpang
Han peue jibri di ureueng nyang na
Pade hana meung sigantang

'Oh tan pade jipeugisa
Dum taseuep ma han tasayang
Meunankeu buet pie raja
Sang beulaga hana reumbang

Jinoe nyang got po meukuta
Bek takira le tariwang
Kareuna Meudeuhak gop calitra
Bijaksana su meulumbang

Umu baro mantong muda
Lon ka tuha keunoe datang
Sifeuet cuco lon Meudeuhak
Tuanku bak ulon pandang

Jiseumbah lon 'oh meurumpak
Nyang mustahak patot reumbang
Lon jisujud le Meudeuhak
Bak ulon jak sabet reumbang

Ban raja deungo kheun le Brahman
Nyokeu meunan pakat reumbang
Raja peuek surat kireman
Di dalam nyan haba nyang trang

Dalam surat haba meunoe
Lon peugah nyoe sigra rijang
Bek le muprang dum geutanyoe
Hana bagoe sosah datang

Bahle jinoe mumat jaroe
Dalam nanggroe taduek seunang
Meudeuhak sideh Brahman sinoe
Nibak kamoe Hiran Sumbang

Tapumeuah bandum kamoe
Lheueh nyan muwoe kamoe landang
Meudeuhak bijak Brahman pindoe
Bandua droe sabe timang

Tameudeungo rotdeh rotnoe
Bandum geutanyoe kalon mandang
Meunan hajat nibak kamoe
Dua jaroe jibet manyang

Lheueh geulipat geuyue intat
Ubak deelat laju rijang
Ban sare troh nibak deelat
Tamong leugat tuan bujang

Dalam kuta lanja leugat
Jijok surat uleh bujang
Teuma neusambot uleh deelat
Peuduek leugat teumpat manyang

Raja yue beuet bak Meudeuhak
Sangat bijak muda seudang
Raja deungo that meusigak
Bak Meudeuhak tanyong rijang

Meudeuhak bijak panyang syawe
Le that pike akai panyang
Meudeuhak peugah awai akhe
Cit mufom le muda seudang

Leupah bujang woe keumbali
Raja kheun kri haba nyang trang
Kheun Meudeuhak bah taturot
Bah taikot Hiran Sumbang

Tulong Allah mukjizat Nabi
Jikheundak taki ulon tuan
Bah lon teubiet jinoe u lua
Di meukuta kalon nyang trang

Padum rakyat muploh laksa
Jak u lua dum meureuntang
Wadiharah teubiet u lua
Rakyat that bha ireng sajan

Ngon peurasan han teukira
Le that tandra huleebalang
Gong ngon geundrang tambo napiri
Keucapi deungon su gambang

Ladom rakyat yup seurune
Nyang that rame palee geundrang
Dangdimuri ngon meudali
Keucapi dengon su geundrang

Giseng hareubab yup napiri
Jipeunari ngon alam prang
Rotdeh rotnoe ka meuParameueng
Meureuleueng rakyatmeureuntang

Lagee jurong rakyat teudong
'Oh takalon sang pupalang
Raja sulotan Wadiharah
Ateuh gajah rungsa manyang

Teudong rakyat dum kafilah
Wadiharah Hiran Sumbang
Wadiharah di yup payong
Meukeulubong huleebalang

Teudoh beude tan le ampeueng
Teuduek ureueng le meureuntang
Rotdeh rotnoe teudong ureueng
Meureuleueng lagee pupalang

Peuet blah uroe buleuen Rajab
Meudeuhak ngadap bale keumbang
Watee poh sa uroe Ahad
Deungon rakyat dum meureuntang

Raja Wadiharah sajan tandra
Dum seugala panglima prang
Gajah puteh kandran raja
Dua mata hu sang bintang

Di ateuh rueng meuh nyang mirah
Hireuen dasyah rakyat pandang
Jroh that rupa alat gajah
Wadiharah raja seudang

Mumat jaroe dua raja
Beude raya su meuguncang
Teudoh beude lheueh meuampeueng
Teudong ureueng sang pupalang

Tameung tamong hana ruweueng
Le that ureueng di dalam blang
Neutren Brahman ateuh guda
Bandua ka rab meuteuntang

Meudeuhak muda Brahman tuha
Ureueng dua sabe wadan
Mubri saleuem po bangsawan
Keu Brahman ureueng landang

Saboh manikam ube meutia
Meudeuhak muda dalam reugam
Brahman eu manikam jroh
Hana saboh sa lam alam

Yoh nyan Brahman hate s..ka
Hu meunyalah jroh meulumbang
Geubri hadiah Braman suka
Peurab lanja keunan rijang

Khem Meudeuhak cok keugata
Nyoe meutia meukeurawang
Rupa indah hana tara
Hu meunyal takalon trang

Bak ujong jaroe Meudeuhak keubah
Brahman pantah cok le rijang
Bak neuundo Brahman syial
Sret le pantah rijang-rijang

Brahman teukui cok meutia
Meudeuhak sigra nyan neupeugang
Bak ulee Brahman Meudeuhak hila
Ngonu suara meugurantang

Neuteugompi that kuat han soe
Neukheun meunoe po bangsawan
He Brahman bek seumbah lon
Meuah ampon gata rijang

Hana deesya gata bak lon
Kupeuampon nyoe seukarang
Lon peuidin keu gata eleumee
Bek seumbah kee beudoh rijang

Seubab utoh that Meudeuhak
Brahman tulak muda seudang
Bumoe leungo nyum meuhayak
Bak jitinjak miyup manyang

Rakyat sare dum meusak-sak
Ladom likak ngon seunapang
Rakyat kalon Brahman talo
Ka jundo ureueng landang

Raja Hiran surot laju
Ka meu'u-'u plueng le rijang
Hate lia that teumakot
Woe u likot hate guyang

Kareuna Brahman ka teukeujot
Pleung neusurot Hiran Sumbang
Wadi meuntroe ngon bentara
Ateueh guda ek le rijang

Dumna rakyat meunan kata
That ceulaka Brahman suang
Brahman tan jipadoli
Leugat lari plueng le rijang

Poteu raja neubeureunti
Rakyat lari keunan datang
Brahman troh le ubak raja
Tanyong haba beungeh han ban

Pakon rakyat plueng meutaga
Peugah sigra bak lon tuan
Seuot Brahman po meukuta
Lon jidaya peutaki nyan

Hana patot lon jitipee
Hana lon thee buet ji meunan
Malakat jimat nibak jaroe
Kira lon nyoe nyan haluan

Lon heundak cok ubak jaroe
Sret u bumoe malakat nyan
Ulonteu cok nibak tanoh
Jiteugon meh-moh ulon tuan

Nyankeu seubab e po meukuta
Keunong daya ulon tuan
Meung han puleh hate luka
Han lon gisa bungka sajan

Jinoe taprang po meukuta
Bu meutaga that sibarang
Meung hana pueh malee hamba
Peue bicara meunan padan

Lonpi sunggoh hana tara
That ceulaka bukon wayang
Jikheun jibri keu lon meutia
Po meukuta lom tamuprang

'Oh lon ingat ro ie mata
Jiboh daya lon ka malang
Raja Hiran jaweueb sigra
Peue le haba datok seudang

Ka lheueh ka seumbah Meudeuhak muda
Datok ceulaka hana reumbang
Kamoe kalon jeuep-jeuep keupala
Nibak muka meukeumat adang

Peue ka peugah nyang kon haba
Nyang got gisa dum tariwang
Raja Hiran nyan ka talo
Meugah meusyuehu seugala alam

Uroe malam ie mata ro
Malee sipu lom tamuprang
Nyang jeuet han talo nanggroe Watu
Deungo teungku e huleebalang

Nanggroe rame agama kukoh
Hana talo nanggroe geuprang
Seubab meunang poteu raja
Limong peukara Meudeuhak larang

Peurtama tajoe hana neubri
Ureueng meujudi Meudeuhak sagang
Keudua candu Meudeuhak sudi
Neupoh mate soe nyang peugang

Pusaka papa Meudeuhak teugah
Buet nyang salah Meudeuhak larang
Nyang keulhee tango lon peugah
Ureueng meumukah dum neuyue cang

Keupeuet pancuri Meudeuhak puntong
Geuboh pasong geupeh labang
Neuyue seutot dalam gampong
Ube ujong droeneu peugang

Nyang keulimong hai adek cut
Buet nyang jeuheut Meudeuhak larang
Limong peukara Meudeuhak hareutoe
Aman nanggroe huleebalang

Deungo he teungku dum sinaroe
Nyang mat nanggroe panglima prang
Imum geusyik tuha sagoe
Wadi meuntroe huleebalang

Aneuk nyang na dalam nanggroe
Baranggasoe beusa seudang
Beutaturot akai Meudeuhak
Tameung galak dum sibarang

Watee na buet jih ka jarak
Seubab tatulak wahe abang
Beukit takheun leumah leumbot
Bek tacarot tarubeng nang

Tapeureunoe bek meudhot-dhot
Beu leumah leumbot bek kreueh ceukang
Meuna salah ube lada
Bek tapeuraya na ube blang

Hana adat raja raja
Meunan jeumba hana reumbang
Buet nyang karot bek seureuta
Liwat zina nyan tasagang

Peurangui jeuheut gop ceureuca
Bek he raja huleebalang
Ulon kalon dalam nanggroe
Hana sidroe nyang na urang

Peugot hana reuloh le soe
Suntok uroe lam meusugang
Tutong keudeh angoh keunoe
Sabe geutanyoe hana reumbang

Dalam nanggroe han ek takira
Ban ie raya ka peunoh blang
Han jeuet meung aneuk tapeulara
Dumnan ceulaka huleebalang

Nyang that paleh cit peutua
Jisureuta buet siurang
Pakon seumak timoh drang jawa
Habejibungka aneuk landang

Han le na sidroe ureueng tuha
Seubab bicara hana reumbang
Beukit watee kapai teuka
Ateueh kuala jidong tongkang

Meudilee-dilee ek peutua
Jak cok laba dua gupang
'Oh meuteumee deungon Cina
Geumeuhaba bahasa ceng coang

Yum goh putoh ngon hareuga
Geucok ija lhee peuet pinggang
Habejipeungeut ureueng Cina
Buet beulaga hana reumbang

Singoh-singoh han le teuka
Teuboh kuala jeuet keu suang
Nyankeuh bagoe akai raja
Gop ceureuca hana reunggang

Akai jeuheut hana tara
Buet beulaga nyan binatang
Adat raja beuna geumaseh
Deungon meujeulih bek na wayang

Baranggasoe beuna gaseh
Lom meutamah bek na ceukang
Miseue Meudeuhak that peureuseh
Teuseungeh-seungeh 'oh tapandang

Han tom ceuken sabe rumeh
Han tom beungeh muda seudang
Aneuk rakyat han teumeureuka
Lahe tanda bak tapandang

Teuduek 'oh noe saboh leua
Ulon mula lom lon riwang
Lom teuseubot Brahman tuha
Deungon raja Hiran Sumbang

XVII. PRANG WATU KEUDUA

'Oh lheueh nyan teuma poteu raja
Brahman seureuta dua datang
Jigisa lom jak prang kuta
Beungeh raya na ban biram

Deungon rakyat muploh laksa
Wadi bentara meuntroe bujang
Limong ribee nyang beurani
Jikap bibi mat geudubang

Jiek laju hana sakri
That beurani huleebalang
Jiyup napiri meusu suleng
Maseng-maseng lawan muprang

Rotdeh rotnoepi geusurak
Ka meuanjak pahlawan prang
Bumoe leungo nyum meuhayak
Hate galak Hiran Sumbang

Ka jiteubiet jimeutak-tak
Jipeulikak sikin panyang
Peudeueng cokma jime sajan
Nyum lakuan kiamat datang

Jalawali keunan sampoe
Pantah han soe na ban biram
Dalam tandra leugat jilalu
Hana jitupeue ulee mumang

Rakan Brahman le that rusak
Habeh jitak dum jibangkang
Rakyat le that mate rusak
Jimeuhayak sikin panyang

Ugah hate surot laju
Plueng meu'u-'u ban ie pasang

Jalawali peucrok laju
Barat timu habeh jicang
Rakyat mate dum teudu-du
Ka'a-ka'u di dalam blang
Deungon peudeueng mat di jaroe
Baraggasoe han jisagang
Lagi leubeh that sakeuti
Nukaha meuntri huleebalang
Meurumpok ngon Jalawali
Jitadi ngon peudeueng panyang
Keunong ulee sret u baho
Sang kulet tho hana leukang
Geutiek peudeueng k' meung tajo
Ngon mata hu ban uleue biram
Geumeureupah bar dua droe
Leungo bumoe buket padang
Mon ka reuloh parek ka doe
'A-'u nanggroe meugeureuntang
Geudam-geudum nyan di laot
Ban leuek meulot di geulanggang
Ban geulanteue lop lam laot
Lagee ribot teungoh datang
Nukaha meuntroe saket hate
Nyum bu mate nyawong hilang
Keudeh keunoe meugeugule
Tanggoe u gle su meuang-ang
Jimeureupah hana sabe
Teudoh lam gle teubiet u blang
Rakyat laen ulee ili
Jimeunari di dalam blang
Teuma beungeh Jalawali
Peulheueh sakti nyan u manyang
Ujeuen apui jipeurupa

Sret lam tandra Hiran Sumbang
Nukaha meuntroe nyang that caca
Angen raya jipeudatang
Ujeuen ka sret dalam hawa
Ka angen ba habeh hilang
Jimeugrop-grop meuhue hila
Cokma raya nyan jitatang
Mate rakyat han teukira
Teukeujot raya nyawong hilang
Tujoh ploh peue jipeurupa
Dum binasa habeh hilang
Hana ek le jipeudaya
Naga raya habeh jicang
Nukaha meuntroe yoh nyan talo
Gadoh beuhe ngon guransang
Habeh rakyat tahe gante
Han ek talo pageue landang
Pakri laku he teungku jroh
Han ek gadoh biek edeurang
Brahman peugah lom bak deelat
Dumna rakyat han jitem prang
Meuna sunggoth hate mangat
Dumna rakyat huleebalang
Jinoe taek bu meuree-ree
Nak meuteumee pageue landang
Lagee laen bek ban dilee
Seun siribee jinoe taprang
Meunan Brahman peuduek pakat
Ubak rakyat huleebalang
Lheueh nyan teuma jibeudoh leugat
Dumna rakyat panglima prang
Meudeuhak eu meunan lagee
Ureueng jamee padan muprang

Neupeugah bak rakan dilee
Sabet meuree-ree dum u padang
Yoh nyan Meudeuhak mita ilah
Neuseuleuah bicara prang

Meudeuhak mita akai ilah
Teuma leumah sang buleuen trang
Seubab ade gaseh Allah
Neupeurintah hukom seunang

Meuteumee sidroe hamba Allah
Bijak leupah bukon bubarang
Kata rawi po riwayat
Yoh nyan mupakat dum sibarang

Tuha muda dum meusapat
Musyeewarat beusa seudang
Wahe syeedara pakri lagee
Meukon tatipee han meunang prang

Mita ilah beu le eleumee
Nyang jeuet tipee kuat reumbang
Neuyue sidroe muda beulia
Le bicara akai panyang

Meudeuhak yue ubak tandra
Ubak raja Hiran Sumbang
Beu tameuen sideh gata
Seulamanya meunang muprang

Ka na pakat nyan di gata
Lon bicara akai panyang
Ban jideungo haba meunan
Beudoh yoh nyan rijang-rijang

Insya Allah lon usaha
Lon peunyata jinoe seukarang
Jok makanan dum seumua
Keudeh lon ba u kuta landang

Ulonteu bri seumuanya
Akan tandra raja Sumbang
Teuma jibeudoh sigra-sigra
Nyan jibawa dum sibarang

Makanan le dum jibawa
Leubeh laksa makeuen rijang
Brahman hei wahe lasyeuka
Peurab gata keunoe rijang

Tajak pajoh makanan lon ba
Hai syeedara mangat tamuprang
Lasyka Hiran peurab lanja
Dum seugala huleebalang

Pajoh makanan Brahman ba
Bineh kuta pageue Landang
'Oh lheueh makeuen dum lasyka
Seureuta ngon meuntroe bujang

Brahman peugah ubak tandra
Lon ka papa tinggai sarang
Habeu sampoe dum areuta
Dum pusaka bapak pulang

Nyankeu ban buet Meudeuhak muda
Areuta hamba han jipulang
Lon meudawa geunap seunja
Baro beuna lon tasayang

Beu ek talo nanggroe Watu
Beureukat guru Datu Beulimbang
Ureuing di dalam nanggroe Watu
Ka'a-ka'u sosah datang

Seubab Meudeuhak hate ragu
Gop jieundru pagi peutang
Beungoh seupot dum jibalu
Lakee bantu jiyue muprang

Nyankeu akai Meudeuhak sidroe
Dalam nanggroe han ek larang
Sibuleuen treuk taduek sinoe
Aneuk nanggroe habeh malang

Tan rot jalan jiwoe jijak
Seubab Meudeuhak dum jilarang
Hate saket sang ka pipak
Buet Meudeuhak dum sibarang

Lon jak keunoe ubak gata
Lon peuhaba ube seunang
Watee talo nanggroe raja
Lon bek tadra akhe datang

Lon meuramah deungon gata
Na seuntosa nyum lon pandang
Ulon ureueng hina dina
Gop enaya pagi peutang

Ulon peugah ubak gata
Cut ngon raya beusa seudang
Watee talo dum seumua
Lon rot gata teuma muprang

Ulon heundak poh Meudeuhak
Hate rusak malam siang
Areuta jitueng lon jitulak
Buet Meudeuhak hana seunang

Lheueh meucakap tuan Brahman
Troh le keunan rakyat datang
Ureueng tuha rakan Meudeuhak
Jidrop nibak nyan dalam prang

Seubab Brahman ka jitangkap
Uleh rakyat di beulakang
Jaroe gaki jiboh taloe
Teuma jiwoe rijang-rijang

Sira jiba nyan jikiloe
Baranggasoe han jisayang
Nibak muka jilumu darah
Hate sosah bukon bubarang

Rakyat Hiran jimeusa'h-sa'h
Jikalon ubah rupa abang
Seubab jiduek ngon geutanyoe
Seksa si nyoe bukon sayang

Yoh nyan jipoh reumon asoe
Hana bagoe keulakuan
Raja Hiran peukeumah droe
Dum sinaroe beudoh muprang

Hana reuda geunap uroe
Saboh sagoe han ek lapang
Rakyat bandum tuha muda
Le binasa ureueng landang

Jalawali wadi raja
Nyan panglima that guransang
Han ek lawan baranggasoe
Dalam nanggroe Watu jiprang

Le ban lagee tarek han soe
Sakti gop nyoe le ban macam
Watee jan jipeurupa
Bukt raya ek jileukang

Jisrom leugat dalam tandra
Beungeh raya na ban biram
Jeuet keu cicem sayeap dua
Jeuet keupalaji keu bangbang

Raja Hiran hana kuasa
Le binasa ureueng landang
Padum lawet trep ka lama
Tan jilingka nanggroe jiprang

Seubab Meudeuhak utoh raya
Bijaksana huleebalang
Leubeh akai le bicara
Leubeh tandra deurajat manyang

Tujoh thon prang talo hana
Leungo hana buket manyang
Meutamah malee bak ri rupa
Pakat gisa got tariwang

Di Meudeuhak ek jilawan
Le ambilan muda seudang
Raja Hiran neubeurkata
Bak peutua dum sibarang

Raja tanyong ubak Brahman
Pakri padan takheun nyang trang
Brahman peugah ubak raja
Awai hingga akhe datang

Nanggroe Watu rab binasa
Sosah raya dum sibarang
Ureueng nanggroe hate pipak
Seubab Meudeuhak buet han reumbang

Ateueh ulon hana layak
Hate seungkak huleebalang
Jilakee do'a ureueng nyang le
Meungucap syuko dum sibarang

Nanggroe Watu nyan beu talo
Habehe pungo dumna bujang
Saket hate rakyat barollah
Nyang that sosah ampon bintang

Makanan tan meung ube drah
Guda gajah alat muprang
Makanan rakyat nyang le mudah
Pade murah dum sibarang

Keupeue makanan pade murah
Rakyat sosah han jeuet muprang
Budak keuce ureueng binoe
Dalam nanggroe dum sibarang

Jimeudo'a jileueng jaroe
Beu talo nanggroe muda seudang
Seubab sosah asoe nanggroe
Dum sinaroe ngon binatang

Raja Hiran tanyong meunoe
Bak samlakoe muda seudang
Siri sagoe na brok kuta
Jeuet tabawa ureueng datang

Tanyong jalan jeuet talingka
Nyang mit suda deungon pacang
Raja Hiran meunan tuto
Brahman deungo dum sibarang

Yoh nyan teelan muda beulia
Jigeulawa surat rijang
Keu Meudeuhak dalam kuta
Peugah haba ureueng muprang

Ureueng di lua meunoe bicara
Dum seugala huleebalang
Jikeumeung tipee nanggroe Watu
Dumna teungku pakat keu prang

Meudeuhak tukri haba sigeutu
Buet tuanku Hiran Sumbang
Meudeuhak yue tamah pageue kuta
Ubak tandra huleebalang

'Oh lheueh jitamah pageue kuta
Hiran raja pubeudoh prang
Padum alat peudeueng cokma
Sireutoh sa raja muprang

Jitimbak le meuriam lila
Ateuh kuta muda seudang
Geumpa alam ngon teumbaga
Beude raya dum sibarang

Suara beude han le meutum
Tadeungo krum that meuguncang
Rakyat mate han tatudum
Keutam keutum su seunapang

Rotdeh rotnoe utoh han soe
Meusoe gumoe di dalam blang
Jalawali teuga han soe
Utoh pindoe sakti murang

Baranggasoe han ek padra
That kuasa ngon guransang
Dalam kawan jiteureupa
Meuntroe beuntara habeh jicang

Soe nyang mate rakyat jipoh
Habeh gadoh huleebalang
Nyang pahlawan kukoh-kukoh
Ho nyang jipoh rakyat lapang

Kram krum beude hana teudoh
Ban angen pot ujeuen datang
Bak guda plueng nyum meukalot
Abee jibapot nyan u manyang

Cot uroe trang teuka seupot
Keulam kabot lagee sang malam
Dumna tandra plueng teukeujot
Seubab teumakot hate guyang

Brahman eu rakyat kalot
Ka u likot dum jiriwang
Brahman tanyong pakon ka plueng
Pane ureueng that guransang

Rakyat seuot sira jiplueng
Aneuk bajeueng peue ka pandang
Rakyat habeh dum jibungka
Sireutoh sa rakyat riwang

Brahman kalon deungon mata
Wadi bentara huleebalang
Hana sunggoh jimeusaba
Bak jikira undang-undang

Cut Meudeuhak bandum rata
Bak keupala huleebalang
Bak tangkulok meunan rupa
Ubak raja jikheun rijang

Deelat tuanku lon peuhaba
Sireutoh sa huleebalang
Hana sunggoh jiglet kuta
Bentara ngon huleebalang

Raja kalon leumah nyata
Dum bentara panglima prang
Hai Brahman toh bicara
Nibak gata takheun rijang

Seuot Brahman sabda raja
Po meukuta bak lon reumbang
Singoh beungoh tabri tuba
Dum bentara huleebalang

Bahle mate ban sineuna
Sireutoh sa raja hilang
Keumah pakat ngon bicara
Poteu raja pakri reumbang

Rakan Meudeuhak nyang di lua
Sajan raja Hiran Sumbang
Jibri surat dalam kuta
Jigeulawa rijang-rijang

Yoh nyan Meudeuhak kalon rupa
Meuthee haba dum sibarang
Meudeuhak balah surat u lua
Neuboh haba jawueub rijang

Hoka dumna raja raja
Sireutoh sa huleebalang
Watee jibeuet peunuman raya
Ukeue raja dum sibarang

Tamita kayee meung sideupa
Sireutoh gata huleebalang
Tamupoh-poh sare raja
Pura-pura tameuayang

Mangat beukah peunuman raja
Jipoh gata huleebalang
Meunan narit muda beulia
Neutiek u lua surat rijang

Rakan Meudeuhak kalon rupa
Cok le sigra buka rijang
Teuma jipeugah ubak raja
Sireutoh sa huleebalang

Habeh jitukri dum bicara
Dalam peukara undang-undang
Sare beungoh uroe keulua
U nap raja jibet hidang

Habeh gandum u nap rata
Beudoh raja huleebalang
Jimat kayee sideupa-deupa
Beudoh lanja peugot wayang

Jigrop beudoh lila-lila
Hana reuda dum sibarang
Geumeupoh-poh sabe keudroe
Dum sinaroe huleebalang

Keunong peunuman dum sinaroe
Hanco keudroe di dalam hidang
Habeh reuloh racon tuba
Buet meuseunda deungon wayang

Siulahan pungo gila
Sireutoh sa raja linggang
Beukah peunuman jeuet keu sira
Areuta raja Hiran Sumbang

Raja tahe hana haba
Peue bicara hana reumbang
Brahman Kayuti gadoh bicara
Dum seugala huleebalang

Brahman malee jak bak raja
Dhoe ka luka buet han reumbang
Han ek lawan muda beulia
Le bicara akai datang

Meudeh meunoe Brahman daya
Dum bicara hana reumbang
Raja Hiran peugah haba
Ubak tandra huleebalang

Nyang got bek e nyan tangaza
Beudoh gisa jak tariwang
La ilaha illallah
Sulotan syah jinoo riwang

Teungoh malam watee seunja
Ateueh guda nyan neupasang
Raja Hiran leupah bungka
Deungon tandra huleebalang

Jitakot geudrop keunong daya
Bak jikira undang-undang
Teelan Meudeuhak dalam kuta
Tuha muda dum sibarang

Jipeuseumbah ubak raja
Hiran bungka ka jiriwang
Raja deungo hate suka
Habehe gisa musuh datang

Brahman Watu Meudeuhak salen
Neubri sikin nyang meudulang
Padum Neubri areuta laen
Geubri salen huleebalang

Ka habehe jiwoe rakyat laen
Meudeuhak canden that bubarang
Ureueng nanggroe manyoh meusyen
Ureueng laen hate bimbang

Teutap Meudeuhak dalam kuta
Wadi bentara seureuta bujang
Teutap putroe duek ngon raja
Duek bak tahta ka meunang prang

Han ek musoh keunan lawa
Muda beulia hukom seunang
Peurangui jroh ade raya
Ureueng gisa dum sibirang

Meung got raja aman nanggroe
Raseuki troe Tuhan pulang
Banda rame jeuep-jeuep sago
Dum sinaroe na seumbahyang

Dalam nanggroe hana ibadat
Nyoe alamat nanggroe suang
Raja nanggroe lalem sangat
Nyan alamat talo geuprang

Hana payah meuriam lila
Deungon bicara mantong geuprang
Peuet peukara raja raja
Seureuta ngon huleebalang

Peurtama ade keudua murah
Le seudeukah pagi peutang
Keulhee saba hukom Allah
Peuet bek marah ngon kreueh ceukang

Meuna meunan tapeulara
Nanggroe gata han ek jiprang
Hana dapat musoh teuka
Han jilawa keunan datang

La ilaha illalah
Habeu kisah hikayat prang
'Oh noe habeu ulon keubah
Lon seuleuah laen karang

XIII. TAMSE MEUDEUHAK DEUNGON RAJA

Amma Bakdu jinoe lon seubot
He adoe cut beu tapateh
Pueh lon rakam le that karot
Bek tacarot lon takheun seh

Lagee laen balek ayat
Ulon surat seun silapeh
Bek lagee sot hana mangat
Lon boh ayat meunoe meudeh

Supaya jeuet keu ibarat
Rakan sahbat deungon wareh
Syarat wadi meuntroe sulotan
Lon boh sajan sinoe habeh

Beu got tango nak meusigak
Haba Meudeuhak beu tapateh
Huleebalang raja raja
Dum peutua sinoe sideh

Maseng-maseng tapeulara
Adat raja reusam meujeulih
Syarat imum lon peunyata
Dum syeedara sampee wareh

Soe nyang pateh jeuet bahgia
Dum peutua hate geumaseh
Wadi raja nanggroe Watu
Meudeuhak teungku hukom that gleh

Nanggroe aman lagi makmu
Hana karu raja seumateh
Meusyeuhu gah barat timu
Soe deungo rindu hate geumaseh

Beukit geuprang han ek talo
Gadoh beuhe ureueng sideh
Akai Meudeuhak neupeulaku
Lam nanggroe Watu rakyat neugaseh

Alang neutulon langsung bantu
Deelat tuanku that geumaseh
Hana meureubot ngon khianat
Hana jeungkat ube pureh

Lahe baten jroh ngon teupat
Aneuk rakyat dum neugaseh
Ranup sicriet han tom neulakee
Peulara malee neubloe gaseh

Hana adat bak meulakee
Jeuet keu malee tan gop gaseh
Meudeuhak bicara ngon aneuk nanggroe
Dum sinaroe tuto meujeulih

Hana ujob ngon teumeu'a
Hana ria ube pureh
Dalam nanggroe Meudeuhak aja
Keuce beusa dum jipateh

Hana sidroe na ceureuca
Dum syeedara sampee wareh
Rukon seumbahyang neubri aja
Rakyat dumna kawom wareh

Peuduek ulama jeuep-jeuep teupat
Neuyue ibadat nibak wareh
Aneuk miet beuet rame han soe
Aman nanggroe hana khaleh

Hukom rakyat le Meudeuhak
Sangat bijak deungon areh
Ban atoran nyang meudawa
Keunong haba beutoi di jih

Rukon syarat neupeunyata
Neudeungo dawa sinoe sideh
Deungon syarat rukon dawa
Muda beulia sangat meujeulih

Watee teuka peungaduan
Neueu lakuan nyan neupeugleh
Neueu nyang toh beursalahan
Bak teuladan meudawa di jih

Wadi Meudeuhak nyang analan
Nak Brahman akai areh
Badai gantoe muda bangsawan
That budiman deungon khaleh

Miseue Meudeuhak kan raja
Brahman Jaliga nyang neugaseh
Meudeuhak tukri syarat dawa
Atawa haba meunoe meudeh

Keulhee idin nyan neupeugah
Di nap jamaah nyan nyang khaleh
Miseue ija hitam deungon mirah
Kunengpi sah lom nyang puteh

Keupeuet bilangan neupumaklum
Sukat meudum keunoe keudeh
Keulimong hareuga nyan bu meudum
Tapeugah yum nyan bu meuceh

Keunam ladem beu tatupeue
Miseue tabayeue utang sideh
Keutujoh lafai beu tatupeue
Bek meugeue salah pileh

Keulapan teuntee ngon soe dawa
Ka seumporna wahe wareh
Rukon dawa limong peukara
Lon peunyata mangat meuceh

Dalam nalam ato haba
Sinan nyata beu tagasesh
Meung taturi bijaksana
Meudeuhak nama leubeh areh

Peurtama da'wa keudua da'wi
Keulhee taturi muda'i 'aleh
Keupeuet rakan nama kali
Keulimong taturi muda'i di jih

Dawapi na nam peukara
Geutupeue hana ube pureh
Dalam nalam lahe nyata
Meudeuhak umpama ureueng areh

Tapeutang uleh gata
Jibayeue ka ltheuh jikasesh
Seureuta jithee dum seumua
Ban sineuna ureueng sideh

Peue tapeugah meunan haba
Tapeurupa meunoe meudeh
Lagee tadawa sireutoh deureuham
Meunan macam lon boh meuceh

Dudoe takheun limong deureuham
Tameukalam meunoe meudeh
Dawa zaidah tapeuleubeh
Hana sareh tan geupateh

Miseue tadawa siploh tahe
Pane hase lom geupateh
Hana teusyawe nibak akai
Sagai-sagai han geupateh

Miseue tadawa deureuham di rumoh
Hana meu'oh hana geupateh
Pakri meunan jeuet keu meh-moh
'Oh gop teuoh geukheun paleh

Pat na kali beulawanan
Dawateu nyan he geupateh
Lagee zaidah saban meunan
Geulawanan rupa meuceh
Limong kureueng peurkhabaran
Nyan jimeunan dawa nakiseh
Lagee takheun homteu kaman
Tan bilangan sifeuet habeh

Teuma meujampu peurkataan
Dawateu nyan han geupateh
Areuta lon bak si pulan
Mupeuepi tan nan han meuceh

Hana takheun meuh ceureuham
Nyankeu kalam han teupateh
Nyang meujampu meunan macam
Tamat kalam 'oh noe habeh

Wahe raja peukong nanggroe
Wahe meuntroe beu tapateh
Tueng ibarat hikayat nyoe
Di sinoe nyata nyang habeh

Syarat meuntroe sajan raja
Nam peukara wahe wareh
Peurtama eleumee keudua bicara
Keulhee seutia keupeuet geumaseh

Keulimong beu jeuet kira-kira
Meutamah areuta sinoe sideh
Gapiet peukakah raja raja
Geubicara meunoe meudeh

Keunam leumah lahe baten
Dalam dihen nyan jipileh
Jieu akai ureueng laen
Dalam baten dumpeue habeh

Ureueng nyang beunci keu raja-raja
Jibicara keunoe keudeh
Bek troh musoh keunoe teuka
Peukong kuta pat nyang lipeh

Nyankeu syarat meuntroe wadi
Baranggari hana jieh
Uroe malam ulee ili
Soe nyang beunci soe nyang gaseh

Meuna dumnan jihareutoe
Jeuet keu meuntroe dum jigaseh
Jipeutimang raja nanggroe
Han tom paloe meunoe meudeh

Tamse Meudeuhak deungon raja
Hana reuda nyan neugaseh
Seubab budi ngon bicara
Peutimang raja bak nanggroe jeh

Hukom Meudeuhak sangat ade
Hana jahe ube pureh
Akai panyang eleumee sabe
Meudeuhak turi haloh puteh

Syarat hukom Meudeuhak tukri
Utoh syaksi nyang neupileh
Neuhukom rakyat deungon syaksi
That sakti meugah areh

Syarat syaksi siblah peukara
Beu takira ngon beu tapateh
Nyang fon Islam lon peuhaba
Kafe hana jeuet tapateh

Keudua mukalaf syarat syaksi
Majnun ngon 'asi han jeuet pateh
Keulhee meurdeka beu taturi
Abdi syaksi hana khaleh

Teuma nyang keupeuet jeuet meututo
Ureueng nyang klo bek tapateh
Keulimong ade wahe teungku
Lalem hai po bek tapateh

Teuma nyang keunam bek meutamah
Narit meujeuneh keunoe keudeh
Ureueng nyang jeuheuet ba fitnah
Ujob teumeu'a bek tapateh

Nyang keutujoh wahe adoe
Beu got peurangoe akai khaleh
Han jeuet keu syaksi jeuheuet peurangoe
Aduen adoe tan geumaseh

Nyang keulapan beu na bijak
Ureueng ngek-ngok bek tapateh
Nyang keusikureueng narit mustahak
Han jeuet tulak seubab khaleh

Di guree peuet han ek tulak
Utoh Meudeuhak sakti habeh
Nyang keusiploh syarat syaksi
Beu na ahli akai areh

Hukom talo beu taturi
Bek meuungki ureueng keudeh
Nyang keusiblah beu na malee
Di nap jamee bak seumateh

Han jeuet keu syaksi ureueng han malee
Wahe sampee deungon wareh
Si seumajoh di leuen peukan
Peue ambilan akai paleh

Nibak Meudeuhak han jeuet meunan
Pinah po nyan bek tapateh
Utoh Meudeuhak le eleumee
Jeuet teurajee keunong areh

Lahe baten habeh neuthee
Seubab eleumee firasat habeh
Hukom baten Meudeuhak turi
Miseue lahe leumah keudeh

Kata syekh eumpunya rawi
Deungo akhi sampee wareh
Ulon peugah saboh leua
Bacut haba beu tapateh

Sidroe Buzagan nan syeedaga
Aneuk tiga sagai di jih
Ban lhee aneuk ureueng lakoe
Kaya han soe lam nanggroe jih

Le areuta dalam jaroe
Ureueng nanggroe dum jigaseh
Kayem seudeukah geunap uroe
Baranggasoe teuka bak jih

Padum lawet akhe dudoe
Lakoe binoe that geumaseh
Teuma saket bak siuroe
Bak aneuk droe jikheun meuceh

Ulon leumoh saket asoe
He aneuk droe beu tapateh
Lon weuek areuta lhee bagian
Gata intan ulon gaseh

Bek meudawa peuninggalan
Bahle meunan ulon buleh
Gata ban lhee bek meudawa
Keu syeedara beu tagaseh

Hana do'a lon keu gata
Meung meudawa han seumateh
Limong ploh ribee nyoe sidroe-droe
Keu aneuk droe jipeuruleh

Rata ban lhee geubri keudroe
Meunan bagoe jiyue pateh
Limong ploh ribee tinggai keu ma
Tueng pusaka areuta jih

Limong ploh ribee nyan keu bapa
Keu beulanja mate gob jih
Lheueh jikira dum areuta
Po syeedaga mate jadeh

Jiboh gafan tanom lanja
Seumanoe ka lheueh peureuseh
Lheueh teumanom jikhanduri
Alem faki do'a habeh

Malam keulhee limong hari
Tujoh jadi ka keuh habeh
Hingga sampoe uroe peuet ploh
Hate sunggoh yakin di jih

Jisie keubeue meureutoh ploh
Jiyue pajoh dum beu habeh
Bri seudeukah jimeujamee
Meunan lagee dumpeue habeh

Padum lawet meunan geuthee
Di jih ban lhee that geumaseh
Lheueh meujamee reutoh sampoe
Dum habeh woe kawom wareh

Bahle kucue nyan areuta
Keu beulanja kume keudeh
Meung kon meunan ulon daya
Buet nyoe suka lon peuruleh

Teuma jikheun bak dalem droe
Tabri keunoe gunci sideh
Lon meung kalon dalam peutoe
Ija kamoe na di sideh

Teuma jijok aneuk gunci
Ubak akhi jiba keudeh
Jicok ringget dum sinaroe
Ubak hak droe jime keudeh

Jijak tanom di bineh sungoe
Lheueh nyan jiwoe laju keudeh
Jijok gunci bak dalem droe
Jipeujaroe peugah meuceh

Lheueh nibak nyan padum uroe
Meututo adoe tulet puteh
Pakri lagee hai dalem droe
Tabri keunoe areuta jeh

Nyang pusaka jeumba kamoe
Tame keunoe lon ba keudeh
Teuma aduen buka peutoe
Tan le asoe ube pureh

Han le areuta wahe adoe
Pakri jinoe kheun bu meuceh
Amanah du bek meudawa
Geutanyoe tiga bu meugaseh

Han lon ubah amanah bapa
Adoe raja lon geumaseh
Adoe peugah teuma dikeue
Jinoe tabayue areuta lon jeh

Meuna hukom ulon bayeue
Lon jok ukeue taba habeh
Meung kheun alem ngon peundita
Dum ulama beu tapateh

Jak meuhukom ubak raja
Dum ulama le di sideh
Teuma jitren ubak raja
Di nap ulama kali sideh

Mupakat dum ban sineuna
Ngadu haba peugah le jih
Tuanku ampon lon meudawa
Gadoh areuta lon di sideh

'Oh mate du tinggai pusaka
Kamoe tiga nyoe siwareh
Ulon troh bak aduen tuha
Hingga teuma kakeuh habeh

Aneuk gunci bak keukanda
Di lon areuta gadoh habeh
Bak soe bayeue po meukuta
Tapeuhaba lon deungo beu gleh

Mupakat kali guree raja
Dum ulama lam nanggroe jeh
Aduen bayeue areuta ini
Aneuk gunci nibak gop jeh

Talo aduen peugah kali
Jinoe tabri areuta jih
Jaweueb aduen hana lon bri
Boh mufti meunoe meudeh

Jinoe tatren laen raja
Bak ulama di nanggroe jeh
Raja jahe kali daya
Bit-bit hana ulon pateh

Tan eleumee ube seuma
Akai hana ube pureh
Peue jipeugah nyang kon haba
Narit seunda han lon pateh

Beudoh jak woe bek le haba
Adoe raja tatren keudeh
Bak peunyum lon ade raja
Bak lon kira kon lagee jeh

Ban sare troh keunan lanja
Ngadu haba lagee sideh
Keumah narit tamam haba
Aduen tuha talo sideh

Hingga habeh jeuep-jeuep raja
Tujoh ploh sa han jipateh
Talo aduen dalem tuha
Meunan rata dum ka habeh

Hingga jitren nanggroe Watu
Keunan laju jipeuruleh
Bak Meudeuhak nyan jingadu
Miseue laku bunoe sideh

Seumporna kalam habeh dawa
Meudeuhak bicara nyan neupeugleh
Kheun Meudeuhak peugah haba
Ban lhee gata ulon pateh

Ulon tanyong nyang han patot
Walee mawot nyawong habeh
Insya Allah le jiseuot
Jaroe jibet tanda meujeulih

Takueh tuleueng ayah gata
Keunoe taba tuleueng puteh
Ulon hukom ban lhee gata
Nyankeu haba lon tapateh

Jaweueb dalem aduen tuha
Meung nyan hana ulon pateh
Bahle bek na dilon areuta
Tueng pusaka bandum le jih

Nibak lon kueh tuleueng bapa
Keunoe lon ba tuleueng puteh
Adoe tulet jaweueb kata
Kueh ayahda di lon jadeh

Peue nyang hajat teungku peundita
Keunoe lon ba tuleueng puteh
Jicok lham jikurek jeurat
Akai jeungkat hana gaseh

Jicok tuleueng nyan nyang teupat
Jiba leugat teuma keudeh
Bak Meudeuhak jipeujaroe
Neukheun meunoe nyan bak lhee jih

Ban lhee gata tajak keunoe
Kusie jaroe mangat sareh
Meudeuhak sie teulunyok saboh
Darah tijoh bak tuleueng puteh

Adoe tulet hana jimat
Hana sapat darah di jih
Meung mate du han sapeue na
Meung mate ma na silapeh

Di hadapan rakyat meubulak
Meudeuhak bijak sangat areh
Rakyat teudong kalon galak
Han lot tapak muploh lapeh

Hukompi lھےuh jih neuyue dra
Limong reutoh sa geupeuhabeh
Seubab salah buet ceulaka
Jicue areuta jiba keudeh

Meudeuhak peugah areuta jisom
Meureuka lom aneuk paleh
Akai jeuheut meujeuet tatrom
Got tasumpom laot blah deh

Adoe tulet malee raya
Di nap meulaksa geupeujaeh
Hana patot jicue areuta
Kira laba mangat leubeh

Seuneulheueh bit tan pusaka
Lom keunong dra u ateueh jih
Hana akai ngon bicara
Ban beulaga aneuk paleh

'Oh noe habeh saboh leua
Lon calitra laen ureh
Uroe malam ulon surat
Lon hikayat nyum han habeh

Mata peudeh keunong asap
Jamok le that wahe wareh
Ban atoran lon hareutoe
Hikayat nyoe gohlom habeh

Seureuta lon balek ayat
Ulon surat kon lagee fon
Ladom galak keu bu leukat
Pisang peungat geuboh lam on

Leumak maneh keunan sapat
Ban nyang adat reusam duson
Ulon reusam hana meusigak
Hana galak ureueng nyang kheun

Hikayat lon kureueng sanjak
Hana galak reusam duson
La ilaha illallah
Ulor kisah deelat ampon

XIX. PROE HAI RAJA ADE NGON RAJA LALEM

Poteu raja Wadiharah
Sangat murah raja milon
Jeuep Jum'at le seudeukah
Rakyat barollah seugala don

Barat timu meusyehurah
Meudeuhak indah mat keurukon
Bak siuroe raja tanyong
Takheun beukeunong bak nyata don

Di hadapan nyan neutanyong
Narit keunong akhe ngon fon
Wahe Meudeuhak muda beulia
Pakri raja nyang adelan

Raja lalem pakri rupa
Tapeuhaba aneuk keu lon
Jaweueb Meudeuhak tanyong raja
Neucalitra ato suson

Nyang lalem raja raja
Neubri bala keunan turon
Seubab jeuheut that bicara
Raya bala ban seugala don

Peuet boh bala dalam donya
Buet Rabbana nyan neupeutren
Raseuki kureueng han sapeue na
Deuek seumua seugala don

Boh kayee han jimat bungong
Jeuep-jeuep gampong angen peutren
Keupeue meugah hana guna
Cuba kira narit ulon

Hina meugah dua saban
Ubak Tuhan nyang wahidon
Meudeuhak jaweueb sabda raja
Neudeungo laman teungku ampon

Raja lalem hana guna
Beuthat raya han jeuet bak lon
Tan faidah ube seuma
Gop ceureuca seugala don

Miseue hikayat saboh raja
Syahriban Diwa nama geukheun
Nanggroe luah hana tara
Rakyat that bha dum meuhimpon

Limong blah ribee bak bilangan
Geukheun meunan dilee jameun
Le peukakah ngon angkatan
Seukalian han ek jitheun

Ho nyang jiprang bandum talo
Rakyat tahe bandum hireuen
Beuthat beu na dum seugala
Nanggroepe ka jeuet keu uteuen

Dumnan meugah Syahriban Diwa
Dumna raja han ek jikkeun
Nyang na salah pie raja
Jienaya dalam duson

Jireubot gop dum seumua
Tan bicara jeuep sagoe don
Jikalon droe meugah raya
Lawan hana jeuep-jeuep duson

Wase nanggroe dum jilakee
Jeuep-jeuep watee nyan geunap thon
Siploh tahe di inong balee
Hana malee raja milon

Salah bacut ube lada
Jipeuraya ube duson
Buet nyang ubit jipeuraya
That ceulaka raja milon

Bak siuroe jibeurangkat
Dumna rakyat ka jihimpon
Wadi meuntroe imum rakyat
Dum meusapat jeuep-jeuep duson

Dua blah ribee guda kandran
Jak sulotan dalam duson
Deungon rakyat dum angkatan
Troh beurjalan bak saboh keubon

Meuteumee sinan ureueng tuha
Di rot raya bineh duson
Ureueng leumoh lagee lasa
Seubab tuha badan duyon

Teuma jisipak uleh raja
Di nap meulaksa rakyat meuhimpon
Ka meungule lagee raga
Allah hai ma ka mate lon

Jitrom jipoh hana reuda
Meuhue hila tok 'Ajizon
Bukon sayang datok tuha
Ro ie mata lagee ujeuen

Han ek mumot badan lasa
Ampon raja teuma jikheun
Ka meuseuk-meuseuk sang meurua
Ro ie mata soe ngieng hireuen

Rakyat pandang ban sineuna
Allah hai ma sabe jikheun
Tangah ulanget datok tuha
Bak Rabbana meunoe jikheun

Ya Tuhanku lon saket that
Raja laknat hana hireuen
Neutulong lon Rabbon 'Ibad
Saket lon that han ek lon theun

Tuhan teurimong do'a datok
Neulhom kutok na dum ujeuen
Keunong ulee raja budok
Dum geuantok soe ngo hireuen

Ateueh kandran ka teupeuro
Badan hanco ka teungageueng
Di antara apui ka ro
Lam kawan le keunong ureueng

Guda gajah habeh tokteueng
Ka soh gampong dum meuruweueng
Bala apui sangat tutong
Dalam gampong jeuet keu kareueng

Dumnal bala Tuhan peutren
Beuthat tasyen bandum bulueng
Bek peuhina ureueng tuha
Gata raja nyang po ureueng

Beu taingat asai mula
Dilee hana jeuet keu ureueng
Siklep-siklap han meuho ka
Tandra raja gadoh king-keueng

Nyang na tinggai datok tuha
Geuwoe lanja nyan u gampong
Tuhan balah dalam donya
Buet Rabbana Tuhan tulong

Ban raja deungo kheun Meudeuhak
Hate galak that meuuntong
Syukor keu Allah Ilahon Haq
Rata neuyue jak dalam gampong

Meuseujid rame Meunasah sarat
Ureuing hareukat that meuuntong
Padepi jroh blangpi arat
Neuyue ibadat seugala gampong

Boh kayee le dumpeue mudah
Kaya limpah aneuk gampong
Raja ade meuneukat murah
Insya Allah Tuhan tulong

Ateueh agama geupeuteugoh
Meunasah han soh dalam gampong
Soe han ikot jih geuyue poh
Dalam tanoh kaki geusurung

Hukom ade agama kukoh
Ureuing musoh nyan han datang
Ek jikheun tangoe u jeuh
Geupujoe troh jeuep-jeuep gampong

Nanggroe laen taklok keunan
Han ek lawan dum sagoe don
Meung le rakyat ngon angkatan
Geumasehan Allah tulong

Jroh peurangoe keubaekan
Le that ensan gaseh tulong
Raja ade keuseunangan
Lom ngon aman jeuep-jeuep gampong

Balah ade keubaekan
Keu sitree han Tuhan tulong
Asoe nanggroe seukalian
Keu sulotan jitem tulong

Musoh teuka na soe larang
Na soe sagang jeuep-jeuep ujong
Jitem tanyong beukit gop prang
Keu raja nyan Tuhan tulong

Han ek sitree keunan datang
Le soe sayang dum jitulong
Pumeugah gop peubit droe
Barangasoe Tuhan tulong

Jipeuraya aneuk gampong
Tuhan tulong dum sinaroe
Nyankeu raja nyang meubudoe
Dua nanggroe jeuet geupawang

Meunan Meudeuhak kheun hareutoe
Raja nanggroe that meuuntong
Deelat tuanku saboh raja
Lon calitra saboh gampong

Saboh aneuk sidroe banta
Jroh bicara that meuuntong
Hukom ade hana tara
Mat neuraca peugang gampong

Nanggroe ubit silagoina
Hana raya neumat gampong
Dua reutoh bilangan rakyat
Dumnannan meuh at asoe gampong

Saboh aneuk syah beurdeelat
Banta Peurasat miseue tiong
Rupapi jroh akai sehat
Gaseh keu rakyat asoe gampong

Suara jroh tango mangat
Cut peurasat panyot tanglong
Rakanpi na dua lhee droe
Aneuk nanggroe jitem tulong

Jibeurangkat bak siuroe
Troh bak nanggroe saboh ujong
Meuteumee sian muda seudang
Beulanja alang woe u gampong

Jak geumade jimeulandang
Heundak riwang woe u gampong
Ban banta eu meunan lagee
Gata sampee ulon tulong

Banta meuhei keunan dilee
Jimeulakee jeuep-jeuep ujong
Ban sare troh nibak banta
Sujud sigra seumbah junjong

Banta jibri siribee dina
Nyan beulanja woe u gampong
Ulon adoe banta hiro
Trep-trep sigo tajak bak lon

Banta sueue hai adoe po
Gata sigo meuteumee ngon lon
Ureueng geumade jiwoe leugat
Deungon siat ka troh u gampong

Jimeudo'a keu Peurasat
Rabbon 'Ibad bantu tulong
Nyankeuh raja mubahgia
Ya Rabbana that meuuntong

Beu lanjot umu le areuta
Beu kaya ban saboh gampong
Neubri leupah nibak sitree
Nibak malee jeuep-jeuep gampong

Banta Peurasat leugat gisa
Jiwoe lanja troh u gampong
Tuhan tambah le areuta
Banta kaya peugct geudong

Jigaseh le ureueng lingka
Tuha muda jeuep-jeuep gampong
Saboh jibri siploh teuka
Aneuk raja seugala gampong

Hingga habeh keunan teuka
Banta muda that meuuntong
Bak bilangan sireutoh sa
Jeuet syeedara wali karong

Meutamah meugah hana tara
Dalam kuta muploh geudong
Dum gop intat hana reuda
Sabe teuka dalam gampong

Jeuep Jeumeu'at jikhanduri
Seutot faki dalam gampong
Bri seudeukah dum keu faki
Woe keumbali dum u gampong

Akhe dudoe banta muda
Jeuet keu raja peugot gampong
Raja laen keunan teuka
Sireutoh sa dum ka teudong

Dum jingadap ubak banta
Dumna raja keunan junjong
Balah ade karonya Tuhan
Neubri jalan jeuet keu payong

Subhanallahul wahidan
Malikul Manan nyan neutulong
Meunan haba Meudeuhak peugah
Bak Wadiharah di yup payong

Ban raja ngo Meudeuhak peugah
Maken meutamah Tuhan tulong
Teuduek haba 'oh noe tamat
Ulon surat kakeu langsung

Seureuta lon balek ayat
Ulon surat lagee laen
Bacut sapeue lon peusapat
Keu ibarat dalam dihen

Nyang meukeusud ulon surat
Keu hikayat ulon salen
Le le lagee lon hikayat
Lon boh ayat laen-laen

Meungnyo saban mit soe meunapsu
Untong teungku mit soe salen
Hana galak hate rindu
Han jitem eu lahe baten

Reubah kayee timoh ukheue
Keu bajoe weue krak bak maken
Haba lon nyoe bukon bureue
Sikrak tabeue sikrak.masem

Miseue rupa kureueng leubeh
Ladom rumeh ladom ceuken
Ulon pakhok bahasa Aceh
Kureueng leubeh rasa laen

Maseng pasai maseng padan
Keuajuan hate ngeuren
Lagee napsu hana saban
Ngui pakaian meulaen-laen

Bacut sapeue ulon kaji
Keueueng campli sira masen
Rata jilop dalam bibi
Ulonteu ci lagee laen

Le faidah nibak Rabbi
Balah page jannatun na'im
Karonya Po Rabbon Qader
Raja ade Tuhan salen

Dalam syeureuga balah neubri
Ija kasmi Tuhan salen
Hana sapat saleuek rupa
Haloh sutra istibraken

Nyang ade that raja-raja
Siluweue sutra istibraken
Faidah ade raja nanggroe
Tuhan pujoe dum seunalen

Raseuki mudah dalam nanggroe
Jeuep-jeuep uroe Tuhan peutren
Nibak sitree neupeulara
Wahe raja hana laen

Lom neutulong ateueh raja
Ade bicara leubeh canden
Taat raja Tuhan teurimong
Akai neutueng lahe baten

Nibak azeueb Tuhan tulong
Dua gampong salam amin
Peurbuatan ade Tuhan tulong
Page keusurung ngon salihin

Meunan Meudeuhak nyan neupeugah
Bak Wadiharah raja canden
Leubeh pangkat nibak Allah
Neupeusiblah bak bahaya jen

Raja deungo kheun Meudeuhak
Hate galak sangat ngeuren
Reumbang lagee keunong sigak
Akai Meudeuhak sangat canden

Meudeuhak kali aneuk peundita
Tan ulama lahe baten
Meudeuhak kheun lom ubak raja
Neupeunyata haba laen

Wahe sulotan raja raya
Dum ulama beu tangorin
Leubeh pangkat that ulama
Eleumee na lahe baten

Miseue hadih Nabi kita
Nyang mustafa saidil mursalin
Al-ulamau warisul anbia
Aeunan sabda Muhammadin

Ulama wareh dum anbia
Tueng pusaka lahe baten
Tuntut ulama taat taba
Wahe raja beu na tasyen

Ureueng nyang duek sajan ulama
Ampon deesya dum habeh len
Peutang pagi ampon deesya
Po meukuta beuthat tasyen

Sabda Nabi 'alaihissalam
Le that macam lam jannaten
Tamong syeureuga darussalam
Le that macam teuma laen

Amai hana jih ka leupah
Ureueng meutuah lam jannaten
Sahbat kheun ya Rasulullah
Soe tapeugah le that ngeuren

Sabda Nabi wajhus sabih
Soe nyang gaseh keu ureueng alem
Karonya Allah jeuet keu leubeh
Kareuna gaseh lahe baten

Wajib ateueh dum sulotan
Ulon bayan sinoe nyata
Beu tasuroh keubaekan
Larang Tuhan bek keurija

Ateueh ibadat nyan beu sunggoh
Beu le tasuroh bak agama
Meung han jitem jih tabunoh
Wajib geupoh uleh raja

Nyang han ikot raja nanggroe
Po nyan sidroe darohaka
Miseue firman Po geutanyoe
Neupeugah nyoe le RasulNya

Ya ayyuhallazina amanu
Ati'ullaha wa ati'urrasul
Wal amru ma 'akum
Wahe kawom tafam makna

Ikot Rasul Nabi Muhammad
Leubeh deurajat nibak nyang na
Ikot raja nyang raya that
Peugang syari'at Nabi kita

Raja nyang raya imamon alam
Badai kalam Nabi kita
Di nanggroe Rom Malikon Manan
Nyang ek geunggam alam donya

Keurajeuen raya hana sakri
Badai Nabi saidil ambia
Bak raja Rom wasiet neubri
Hukom syari'i neuyue keurija

Di Meudeuhak hukom ade
Neusuroh le bak agama
Di nanggroe Watu agama kukoh
Han ek musoh keunan teuka

Raja Wadiharah ade han soe
Peutimang nanggroe mat neuraca
Neuyue seumbahyang aneuk nanggroe
Meuseujid meuasoe ban sineuna

Jakeuet pitrah poteu yue bri
Neuek haji soe na kuasa
Puasa peureulee neubri mufeuti
Peuet droe wadi guree raja

Meudeuhak di ateueh katab neubri
Nibak barangri nyan ulama
Nanggroe Watu taklok u Aceh
Meurtabat leubeh Meureuhom Daya

Meukuta alam raja nyang leubeh
Di nanggroe Aceh keurajeuen raja
Poteu Meureuhom meukuta alam
Nyang mat geunggam Aceh beusa

Padum raja keunan curam
Agama Islam that seujahtra
Neupeukong hukom bukon that kreueh
Amar makruh neukeurija

Nahi munkar bukon that kreueh
Raja di ateueh Pulo Sumatra
Pulo Ruja saboh surah
Bandua sah saheh nama

Raja Aceh taklok u Rom
Meunan mufom bak neukira
Nanggroe Paka di nanggroe Rom
Sinan mufom asai mula

Raja Istambul sulotan Rom
Neubri hukom han angkara
Nyankeu raja nyang that yakin
Badai mursalin Nabi mustafa

Turon muron asai bak Nabi
Hana sakri kong agama
Muhammad Syam datu nini
Cuco Nabi Muhammad Amin

Lagi meugah ngon beuran,
Neuprang kafe hana reuda
Kuta luah reumbang peuet sagoe
Lhee buleuen sampoe beukit talingka

Raja ade hana bagoe
Cit geupujoe hana reuda
Padum-padum raja di baroh
Meuretoh ploh laksin laksa

Bak agama geupeukukoh
Hana teudoh siklep mata
Hana raja Rom teuduek siat
Euntreuk meusambat 'oh meugisa

Jinoe laen lon hikayat
Beu sunggoh that bak agama
Wahe raja peutimang nanggroe
Dum sinaroe taseuranta

Ateueh jalan ikot Rasul
Po geutanyoe Tuhan Esa
Aneuk rakyat tayue seumbahyang
Nak bek sumbang nanggroe gata

Nyang tham Allah beu talarang
Bek ban musang akai hana
La ilaha illallah
Ulon peugah laen mula

Bak siuroe Meudeuhak peugah
Wadiharah peugah haba
Deelat tuanku keumala syah
Ulon peugah saboh haba

Bek darohaka lon bak Allah
Nyoe lon peugah bak sripada
Dalam nanggroe hukom neuboh
Beu neusuroh bak agama

Neubri waki troh u jeuoh
Walee neubloh laot raya
Beukit meulinteueng laot apui
Wajib ranggui po meukuta

Meunan Meudeuhak kheun bak doli
Neupeugah kri nyang sibeuna
Miseue calitra Umar Khatabi
Droeneu rawi haba saidina

Akhe jameun teuma dudoe
Dum sinaroe pubuet deesya
Hana soe thampi meung sidroe
Barangasoe tuha muda

'Oh jideungo pada meureubot
Dum jiturot napsu hawa
Seumbahyang han that khaianat
Dum amanat jipeutuka

Ureueng lakoe nyang kon umat
Nabi Muhammad meunan sabda
Meuka taeu buet nyang salah
Han tateugah tatem seureuta

Nyangkeu raja tan meutuah
Nibak Allah jeuet keu deesya
Ladom Meudeuhak kheun hareutoe
Tango kamoe po meukuta

Buet nyang salah bek tapakoe
Barangasoe manusia
Meung han tatem ingat keudroe
Syeksa dudoe lam nuraka

Deelat tuanku meukuta nanggroe
Deungo kamoe po meukuta
Firman Tuhan hadih kudsu
Ubak Nabi neupeuhaba

Ya Muhammad deungo lon kheun kri
Beu tatukri umat dumna
Hana mee kueu ureueng nam droe
Page dudoe jih kusyeksa

Lam nuraka jih kupasoe
Nyang fon paloe seumbahyang hana
Keudua ureueng paleng keu nang mbah
Keulhee mubantah ngon syeedara

Jipeuputoh silah rahim
Bukon lalem that ceulaka
Teuma nyang keupeuet ahlus sakin
Aneuk yatim jitueng areuta

Nyang keulimong ureueng lalem
Peue nyang kayem ribot raya
Teuma nyang keunam ahlul fani
Inong jitaki jienaya

Nyankeu nyang nam ulon beunci
Kalam Rabbi bak mustafa
Ban raja deungo kheun Meudeuhak
Hate galak syukor Rabbana

Neupujoe Po Ilahon Haq
Dum neutulak bahya donya
Kayem-kayem lam ibadat
Han tom siat nyang na lupa

Meunan raja neupeuadat
Barangapat duek dongpi na
Raja geutanyoe hana meunan
Seumbahyang han ngon puasa

Tuha muda seukalian
Rakan-rakan hana puasa
Nyankeu raja seurapa Tuhan
Jisyukor han keu Rabbana

Nabi Muhammad panghulee geutanyoe
Peutimang nanggroe mat neuraca
Lam ibadat hana sunyi
Geunap hari tan keurija

Salang Nabi geunaseh Tuhan
Di tanyoe han hiro dumna
Nyankeu ureueng tipee setan
Page teuma lam nuraka

Meudeuhak kheun lom neuulang
Di nap ureueng muploh laksa
Paleh raja tan seumbahyang
Nanggroe suang pade hana

Pane hukom di jih meunan
Raja setan asoe nuraka
Seumbahyang tan puasa han
Pat ambilan jiboh daya

Wahe ureueng deungo hikayat
Tueng ibarat sinoe gata
Beu tapubuet nyang manfa'at
Page teumpat lam syeureuga

Bek tadeungki ngon khianat
Teugah halarat Tuhan Esa
Tan faidah kueh khianat
Page teumpat lam nuraka

Jinoe laen lon hareutoe
Aduen adoe deungo beurata
Seureuta lon balek ayat
Mangat sehat 'oh tabaca

Ladom galak minyeuk sapi
Kameng gasi ladom makan
Ladom galak ayat ini
Ladorr beunci ayat meunan

Ladom galak bahasa Meulayu
Ladom rindu bahasa Patan
Maseng-maseng lon boh laku
Soe nyang rindu keubaekan

Ladom lon boh bareh fatah
Lon kasrah na meujan-jan
Jeuep-jeuep nanggroe meusyehurah
Meudeuhak meugah jeuep-jeuep sulotan

Meugah alem le eleumee
Hana lagee that budiman
Ngon ceureudek that meuteuntee
Masa dilee tan teuladan

Watee na hukom rakyat barangri
Neulakee syaksi nyang beutoilan
Hana neutueng meung han meukri
Syarat syaksi Meudeuhak tuban

Kadang karong deungon wali
Han jeuet keu syaksi miseue rakan
Miseue namiet bangsa 'abdi
Han jeuet keu syaksi nyang lagee nyan

Ureueng kafe ha jeuet keu syaksi
Ureueng suletpi cit meunan
Miseue namiet ka mukatab
Ngek-ngok narit peuet peukara

Han jeuet tatueng jih keu syaksi
Hana ade ngon rasyidan
Ureueng ku'eh akai deungki
Seul.ali-kali han jeuet seunuban

Ureueng nyang keulhee han jeuet keu syaksi
Pasek 'asi bandum saban
Jeuheuet akai meunan lagi
Han jeuet keu syaksi ngon seunuban

Nyang kon rasyid ngon mukatab
Hadih kitab han jituban
Bukon alem that Meudeuhak
Ek neutulak sitree Tuhan

Nyang syubhat hana layak
Meudeuhak tulak seukalian
Kafe dende Majusiah
Ek neupinah le seunuban

Deungon akai hana payah
Hana syeekeh miseue sulotan
Ban nyang neukheun han soe bantah
Hana muminah baranggajan

Meudeuhak that areh billah
Ureung nyang salah dum neutuban
Eleumee lahe eleumee baten
Habehe rajen seukalian

Jameuen dilee hana laen
Neutueng seunalen bak Rasulan
Jinoe laen ulon rawi
Meurtabat kali teuka peuet ban

Lam nuraka lhee droe kali
Sidroe jadi dalam jannatan
'Oh gop tanyong jipeugah le
That beurani iblih setan

Jituntut han ube seuma
Lam nuraka akhe jaman
Beurkeukailan dalam syeksa
Seulama-lama baranggajan

Kakeu habehe saboh leua
Kali raja wahe teelan
Jinoe laen lon peuhaba
Nyang keudua kali setan

Ureung awam jipeudaya
Kali buta rumoh setan
Habehe jitipee manusia
Dum seugala dumna ensan

Bak meununtut di jih malee
Lagee asee hana iman
Baranggapeue han meununtut
Ube keuteuet eleumeeji tan

Kali Bangka Sakti dilee
Na eleumee mit seunuban
Eleumee jadi hana meuteuntee
Teutapi malee beulajaran

Jihukom gop deungon jahe
Nyankeu pie eleumee tan
Kitab hana jikeutahui
Teutapi jahe eleumee tan

Ban lhee kali asoe nuraka
He syeedara beu taiman
Deungon jahe jipeutua
Lam nuraka keudiaman

Jinoe laen ulon rawi
Nyang peuet kali malem Quran
Tafse hadih dum jitukri
Seubab mahe beulajaran

Eleumee fikih habeh maklum
Nahu mufom arab saban
Eleumee saraf nyanpi maklum
Hadih mufom seukalian

Eleumee laenpi that mudah
Le hidayah nibak gop nyan
Walee teuka masalah
Got nyang mudah gob sukaran

Jimeutanggoh han jipeugah
Kitab Allah jilihatan
Meukon hukom nibak Allah
Han jipeugah beursalahan

Nyankeu kali nyang beurkata
Le that aja ngon seunuban
Meuka jieu lam risalat
Hana adat peurkataan

Meunyo jahe that doseuta
Lam nuraka beurkeukailan
Mudah-mudah tapeutua
Nyan ceulaka bahagia tan

Meudeuhak meunan kheun bak raja
Bak meukuta peurcaya
Syarat kali siploh peukara
Mula-mula nan musliman

Keudua ade keulhee meukai
Keupeuet ihwai nan akheran
Keunam kalon deungon mata
Dum peukara keulaheran

Nyang keutujoh jaga-jaga
Dum peukara peurhukoman
Nyang keulapan jeuet meututo
Deuh teudeungo keulakuan

Han sah kali ureueng nyang klo
He adoe po beu taiman
Meulaku ngon hukom syarak
Kias ijmak bak sipatan

Bicara hukom han akmak
Hana ngek-ngok bak sipatan
Nyankeu nyang sah gop jihukom
Sabe maklum dun, jituban

Rasyut han geutueng hadiah han hajat
Nyan alamat keuadalan
Nyankeu kali nyang kuramat
Mulia that nibak Tuhan

Bacut parak nibak Meudeuhak
Sangat bijak hana padan
Nyang syubhat ek neutulak
Sitree jarak musoh Tuhan

Nyang na sahbat wahe kali
Lon peugah kri keulakuan
Hukom syarak agama Nabi
Tujoh bagi ulon bayan

Peurtama wajib keudua sunat
Buet syari'at hukom Tuhan
Keulhee haleue keupeuet hareuem
Keulimong meukroh hukom Tuhan

Keunam sah keutujoh bateue
Beu tatupeue he budiman
Hukon syarak cit tujoh peue
Beu tageubeue wahe musliman

Makna wajib ngon peureulee
Fahla meuteumee soe keurijakan
Makna sunat neubri fahla
Soe keurija nyang yue Tuhan

Walee tinggai hana syaksi
Nyanpi nyata pateh Tuhan
Makna meukroh tinggai kana
Neubri fahla uléh Tuhan

Hukom adat tulak syari'at
Agama Muhammad rela Tuhan
Hukom ade lhee mupakat
Bantah syari'at sidroe ensan

Jinoe laen ulon rawi
Wahe akhi adoe bangsawan
Teutap Meudeuhak sajan raja
Dalam kuta beurseumayam

Teuduek 'oh noe saboh leua
Lon peugisa raja Hiran
Ban nyang mangat lon jak leugat
Ban hikayat macam-macam

Seureuta lon balek ayat
Wahe sahbat rindu deundam
Ba nyang lagee ulon dapat
Ulon surat peujak kalam

Keureutah keumang daweuët busok
Han got pakhok duson reusam
Eleumee dit akai murok
Kureueng antok sanjak kalam

XX. HAN JEUET TAPATEH HABA SITREE

Bak pasai nyoe lon meututo
Rakyat dum le sajan sulotan
Di Panca Larah teumpat raja
Meugah raya hana macam

Di nanggroe Watu ka neugisa
Deungon tandra inong agam
Neuprang nanggroe raja muda
Talo hana muka masam

Brahman Kayutipi neugisa
Beudoh seureuta woe beurjalan
Raja laen sireutoh sa
Dum seureuta syahi alam

Padum wadi ngon bentara
Ngon panglima laen sajan
Teutap raja di Panca Larah
Hate sosah uroe malam

Dalam hate keuloh keusah
That bit gundah hana macam
Seubab malee that meusyuehu
Nanggroe Watu han ek neuprang

Neuba rakyat ka'a-ka'u
Hana talo gadoh ragam
Padum lawet lam syugolan
Raja sulotan muka masam

Duka cita ngon Brahman
Dua sajan syahi alam
Raja Hiran na aneuk sidroe
Ngon sambinoe hana lawan

Aneuk raja lingka nanggroe
Keu si nyak nyoe rindu deundam
Cahya badan ban meuk uroe
Cahya gigoe ban meuh hupam

Teulangke teuka geunap uroe
Hana padoe keunan datang
Aneuk raja dum sinaroe
Aneuk meuntroe rindu deundam

Han jipeukawan uleh abi
Putroe siti pirak hupam
Putroe Lila Rakna Kubandi
Nan geurasi putroe seudang

Rupa indah han peue tanyong
Si nyak bungong baek ragam
Bak teuladan rupa keunong
Sunteng bungong jroh han macam

Bitpi meugah dum barangri
Ngon si nyak ti han siwadan
Meugah putroe Rakna Diwi
Peurmaisuri di nanggroe Syam

Syam Paridan di nanggroe Meuse
Han cit sabe ngon si nyak ti
Di Tanoh Nata putroe Haloh
Paridoh di Cina neugri

Soe nyang pandang mata laloe
Soe deungo proe hate deundam
Bak meusyae mangat han soe
Bak meunyanyoe han sa ragam

Taeu badan that sambinoe
Paleuet jaroe jroh meukulam
Takue panyang ban geularek
Gigoe leuntek jroh han macam

Ban meuh meuntah muka baek
Putroe cantek pirak hupam
Haba putroe teudeuk siat
Lon riwayat laen macam

Raja hiran lon hikayat
Syah beurdeelat rindu deundam
Deungon Brahman dua sapat
Teungoh pakat jitroh deundam

Saket hate keu Meudeuhak
Dhoe ka pipak luka tajam
Nyankeu seubab keunong timplak
Hate rusak syahi alam

Brahman Kayuti geuboh nama
Deungon raja jimeukalam
Syah beurdeelat po meukuta
Deungo hamba syahi alam

Geutanyoe nyoe dum meuree-ree
Hana malee keulakuan
Hana sapeue nyang na meuteumee
Pakri lagee syahi alam

Bak lon tuanku saboh pakat
Deungon deelat meukuta alam
Meunyo reumbang nibak deelat
Doli halarat meunan macam

Brahman peugah awai akhe
Cit beungeh le syahi alam
Wahe Brahman aneuk Kayuti
Gata baduwi hana macam

Buet di gata seumbah Meudeuhak
Hana layak meunan ragam
Brahman paleh kutok Allah
Hana faidah tameukalam

Seubab gata ulon malee
Jeuep-jeuep watee muka masam
Kuba rakyat muploh ribee
Lon ka malee han got ragam

Buet nyan dilee nibak gata
Prang tapuga uroe malam
Tan faidah ube seuma
Han sapeue na sinan lon fam

Rakyat mate ban sineuna
Aneuk donya muka masam
Inong balee le lagoina
Lakoe hana habeh simpan

Beudoh jak woe bek le haba
Jeuet ube ka tameukalam
Brahman deungo sabda deelat
Beudoh leugat neujak tajam

Ban sare troh nyan u teupat
Hana mangat beursalahan
Padum lawet nyang mumeunan
Lom Brahman beudoh tajam

Ubak deelat raja Hiran
Troh le keunan nyan u dalam
Duek di bale sinan sapat
Deungon deelat syahi alam

Brahman peugah teuma teupat
Nibak deelat meukuta alam
Awai akhe dum meuteuntee
Han meusilee that deuh kalam

Pakat Brahman haba tipee
Miseue dilee nyan neuragam
Meung han puleh han pueh malee
Meung han meuteumee lon beu karam

Ban raja deungo meunan lagee
Bak akai me salah waham
Lheueh meututo Brahman Kayuti
Woe keumbali leugat curam

Singoh beungoh pagi hari
Brahman Kayuti jak u dalam
Brahman seumbah ngadap raja
Po meukuta syahi alam

Bak lon pike po meukuta
Ngon bicara ka lheueh lon fam
Raja Wadiharrah ubit meuneumat
Nyang raya that meukuta alam

Nanggroe luah amat sangat
Le that rakyat dum didalam
Wadiharrah nanggroe Watu
Sosah tuanku syahi alam

Nyang Meudeuhak musoh aku
Ka meusyehuh dalam alam
Jinoe Meudeuhak ulon tipee
Saboh lagee keunong ragam

Ulon peugah meunan lagee
Nak meuteutee tuanku fam
Miseue kisah Nila Banturi
Jak keumbali u Teulok Dalam

Jiboh umpeuen ikan hase
Manyoh hate rindu deundam
Meuna umpeuen ikan hase
Eungkot kawé keunoe curam

Eungkot raya meuteumee le
Meunan mise syahi alam
Aneuk tuanku ureueng binoe
Tuan putroe Keumala Syam

Rupa indah hana bagoe
Dalam nanggroe han sa ragam
Soe nyang kalon that beureuhi
Manyoh hate rindu deundam

Tayue meuen sira puji
Meunan doli nyang ka lon fam
Pileh rakan nyang meubudoe
Ureueng binoe nyang got ragam

Kira-kira na peuet ploh droe
Hate wa-woe rindu deundam
Soe nyang kalon dum sinaroe
Ureueng lakoe laen macam

Tayue meuen jeuep-jeuep nanggroe
Jimeunyanyoe syae nalam
Beu troh sampoe nanggroe Watu
Hate rindu baek ragam

Jimeunyanyoe mangat that su
Soe teumeung eu Allah dawam
Pakatpi lheueh ka seuleusoe
Brahman muwoe ubak makam

Lheueh nibak nyan padum uroe
Lom teugoe-goe syahi alam
Raja pangge ureueng nanggroe
Nyang meunyanyoe syae nalam

Jipujoe raja deungon putroe
Dum sinaroe meunan macam
Kata rawi po calitra
Hate suka syahi alam

Padum peurasan han teukira
Ngon biula lagee macam
Geundrang tambo ngon napiri
Gong ngon bangsi miseue ragam

Jimeunari ngon meunyanyi
Suroh doli syahi alam
Di hadapan Brahman Kayuti
Deungon doli meukuta alam

Ngon peurasan dangdi muri
Lom meundoli deungon gambang
Brahman kalon that meusigak
Hate galak rindu deundam

Rakyat teudong dum meusak-sak
Jikalon bak Keumala Syam
Peuet ploh uroe nyang meunari
Aneuk Kayuti peugot ragam

Ngadap putroe Rakna Kubandi
Hana sakri rindu deundam
Lheueh nibak nyan padum uroe
Raja nanggroe peugah macam

Bungka aneuk gata jinoo
Jeuep-jeuep nanggroe meuen reusam
Beu troh tajak nanggroe Watu
Bak tuanku syahi alam

Takheun hate galak rindu
Deelat tuanku meukuta alam
Teubri beukai ngon beulanja
Keu aneukda Keumala Syam

Jeuep-jeuep nanggroe meuen daya
Dum seugala donya alam
Peuet ploh uroe nyang seureuta
Jimeusafa uroe malam

Padum lawet jimeusafa
Sira bungka pirak hupam
Geutueng keudeh geutueng keunoe
Jeuep-jeuep nanggroe rindu deundam

Hingga meugah si nyak putroe
Ka meubunyoe seugala alam
Nanggroe Watu ka troh si nyak
Jitamong bak syahi alam

Ngon peurasan that meusigak
Soe ngieng galak hate deundam
Teuma meusyehu ubak raja
Pangge sigra nyan u dalam

Neuyue meuen uleh raja
Dalam kuta sinan diam
Ban putroe deungo suroh raja
Meuen sigra rindu deundam

Ureueng kalon teudong lingka
Dum peutua na di dalam
Jimeunari ateueh taloe
Jimeunanyoe syae nalam

Jipujoe raja deungon putroe
Dum sinaroe inong agam
Ban raja eu hate mangat
Mata ladat keunong ragam

Kipah on meuh mat di jaroe
Suara soe hana macam
Geutet beude jareueng-jareueng
Dalam ruweueng peulheueh meuriam

Siulahan geumeuampeueng
Le that ureueng nyan di dalam
Su seurune ka meuti-ti
Ngon su bangsi ka jiragam

Jiyup suleng ngon napiri
Meu'i-'i suara kiam
Jipoh geundrang palee tambo
Ka'a-ka'u uroe malam

Uroe meuhayak malam meuhubo
Ka jimeusu ngon meuriam
Jikasyuk dhap deungon suleng
Maseng-maseng peugot ragam

Jimeunari deungon aneuk Kleng
Ka meupuseng lagee Siam
Tujoh malam tujoh uroe
Rakyat ka doe lua dalam

Lheueh peurasan rakyat jiwoe
Ka troh sampoe ubak makam
Raja bri meuh siploh katoe
Keu tuan putroe pirak hupam

Raja peujamee aneuk nanggroe
Deungon putroe cahya intan
Ban sare lheueh peurjaman
Raja sulotan neumeukalam

Deungon putroe nyang bangsawan
Neukheun nyoe ban peugah macam
Wahe po cut asoe meuligoe
Tuan putroe pirak hupam

Pakon po cut taboh nanggroe
Peue buet keunoe langkah tajam
Gata po cut ureueng meugah
Di Panca Larah sideh diam

Seuot putroe nyang meutuah
Cidah babah bak meukalam
Lon tuanku di Panca Larah
Seutot langkah keunoe curam

Meuna untong nibak Allah
Ngon meutuan syahi alam
Sireutoh sa raja laen
Habeh ka len cahya padam

Buet ayahda lon neupeutren
Nanggroe laen habeh diam
Lheueh nyan neuprang nanggroe Watu
Bak tuanku meukuta alam

Leubeh meugah that tuanku
Han ek talo nanggroe geuprang
Hana talo meung sigeutu
Bak tuanku syahi alam

Nyang laen dum hana beuhe
Habeh talo jeuep-jeuep makam
Padum rakyat habeh mate
Dum meugule nyawong padam

Gajah guda dum hana le
Rakyat mate le that karam
Lheueh tuanku woe ayahda
Ka neugisa woe bak makam

Han ek neuprang po meukuta
Le that tandra macam-macam
Meudeuhak bijak le bicara
Saktipi na macam-macam

Leubeh meugah hana tara
Po meukuta syahi alam
Hajat ulon kuboh tangga
Jeuet lon bungka keunoe curam

Beu jeuet suami po meukuta
Bak lon kira meunan macam
Panca Larah naggroe Watu
Beu sikufu rahmat salam

Bek le musoh ngon tuanku
Bek le karu donya alam
Seumbah wadi bungong meulu
Yoh nyan meusu ureueng agam

Sabet beuna haba itu
Keu tuanku syahi alam
Tuan putroe Rakna Kubandi
Mita suami judo diam

Beu tuanku meukawen ini
Dan lagi bicara tajam
Cit mupatot mita laki
Tuan putri pirak hupam

Nyang meugah that peugang neugri
Judo putri syahi alam
Deungon putroe roh sikufu
Deelat tuanku syahi alam

Ban raja deungo haba mangat
Mata ladat hate deundam
Neungieng putroe mata ladat
Hana sapat di dalam alam

Bitpi meugah Bungsu Indra
Leubeh rupa Keumala Syam
Di laot hijo putroe Rila
Di nagroe Diwa Fatimah Syam

Han cit sabe ngon putroe nyoe
That sambinoe hana mcam
Bulee keuneng buleuen siuroe
Rotdeh rotnoe sang geupatam

Raja galak that keu putroe
Hana bagoe rindu deundam
Nyum bek leukang sinan beu toe
Hate dukhoe syahi alam

Padum lawet sinan putroe
Teuma jiwoe ubak makam
Ubak rakyat neutanyong meunoe
Raja nanggore neumeukalam

Pakri geutueng lon keu meulintee
Takheun lagee lon ngo kalam
Takheun beu jeuet keu asoe jiree
Meunan lagee syahi alam

Ban raja deungo meunan lagee
Hate seudee that di dalam
Leupah putroe ka jigisa
Hate rugha syahi alam

Uroe malam ro ie mata
Duka cita muka masam
Putroe jiwoe ka bak ayah
Ka jiseumbah sahi alam

Habeh narit dum jipeugah
Wadiharah rindu deundam
Ban raja deungo meunan haba
Haté suka syahi alam

Nyokeu beuna Brahman kata
Ato haba macam macam
Teuduek siat haba putroe
Kisah muwoe raja deundam

Meuteuoh rakyat dalam nanggroe
Dum sinaroe inong agam
Meudeuhak han neupeucahya
Nyankeuh haba han got ragam

Beuthat beu le jibri areuta
Akhe masa keunoe jidam
Nanggroe Watu that jibeunci
Wahe doli meukuta alam

Lagi jiwoe deungon keuji
Hana sakri muka masam
Teuma jitueng keu meulintee
Soe nyang seudee patch kalam

Di ulon han wahe sampee
Meunan lagee jimeukalam
Soe nyang pateh haba sitree
Keunong tipee meunan lon fam

Keunong taki meunan lagee
Akhe watee meuhat karam
Nibak akai hana patot
Tuto karot meunan ragam

Di ulon han ulon ikot
Taki lupot syahi alam
Lheueh geukheun nyan Meudeuhak woe
U rumoh droe laju curam

Neucok bayeuen deungon jaroe
Teuma meunoe neukheun kalam
Neuboh ata nibak bulee
Mangat mubee macam-macam

Minyeuk gahru nyang mangat bee
Ateueh bulee nyan neureundam
Wahe bayeuen nyang meutuah
Ka jak le kah jinoo rijang

Keudeh u nanggroe Panca Larah
Kusuroh kah badai kalam
Mita sahbat nyang seutia
Kapareksa syahi alam

Kaeu jalan pakri rupa
Toh bicara beu jeuet kafam
Nyo sibeuna haba putroe
Tipee geutanyoe bangon macam

Bayeuen beudoh jipo lanja
Pantah sigra jiteureubang
U Panca Larah sampoe jih ka
Deungon sigra troh le rijang

Bayeuen meuen kalon daya
Bineh kuta syahi alam
Meuteumee le bayeuen seutia
Nyang beasa jimeukalam

Sabe bayeuen jimeuhaba
Pane gata keunoe curam
Nyang ka han tom lon eu rupa
Legee gata indah ragam

Bayeuen jantan jawueeb sigra
Lon adekda salah waham
'Oh lheueh mate peureumoh hamba
Lon meusafa seugala alam

Bukon sayang mate judo
Ie mata ro hana reu rggang
Hai adek cut bungong kundo
Bek le tuto sangka waham

Watee lon jak tahe gante
Mita judo seugala alam
Dalam hate lon ka pungo
Hai adoe po pakri padan

Hai adoe cut ingat gata
Sang sirupa judo lon tuan
Ngon peurumoh lon ka lama
Rupa sang sa bak pandangan

Jawueeb bayeuen nyang beutina
Taleh haba rindu deundam
Taduek dalem sajen hamba
Tapo teuma seugala alam

Lale hate ngon meuseutia
Jeuet seuntosa akhe kalam
Isnya Allah he adekda
Lon seureuta rindu deundam

Jimeugaseh jih nyan dua
Buka haba jimeukalam
Na tadeungo he adekda
Haba raja syahi alam

Deungon Brahman sajan dua
Akan raja jeuoh makam
Haba lon deungo nibak sulotan
Heundak mubisan syahi alam

U nanggroe Watu deungon jonjongan
Sabet meunan teungo kalam
Bayeuen seuot bukon meunan
Bek taiman tuto kalam

Meudeuhak ngaza Brahman tipee
Meunan lagee akhe kalam
'Oh troh keunoe gadoh lagee
Akhe malee gadoh waham

Dang-dang teuka ajai sampoe
Meunan bagoe lon deungo macam
Meunyo jadeh teuka keunoe
Meuhat sinoe ka teunggeulam

Lheueh nyan teuma jilakee droe
Jiheundak woe ubak makam
Wahe teungku pakri neuwoe
Tinggai sidroe ulon tuan

Bek tagundah wahe adoe
Cit lon woe hate deundam
Hana lambat rijang keunoe
Tujoh uroe troh lon riwang

Bayeuen leupah woe u Watu
Jipo laju hana macam
Bak Meudeuhak bayeuen lalu
Jimeututo peugah kalam

Awai akhe dum jiato
Meudeuhak tahe deungo kalam
Yoh nyan Meudeuhak meungucap syuko
Neupujoe Po Rabbon .alam

Haba Meudeuhak teuduek siat
Lon riwayat laen macam
Raja Hiran lon hikayat
Dalam surat ulon reusam

Preh utosan nanggroe Watu
Bak tuanku syahi alam
Hana saboh ureueng Watu
Bak ri laku hana curam

Hana hajat jimeujudo
Bak ri laku meunan macam
Bahle jinoe nyan kubri su
Kuyue guru Brahman ajam

'Oh lheueh pike ka seuleusoe
Raja nanggroe neumeukalam
Wahe Brahman pakri jinoe
Lambat buet nyoe hana tajam

Jinoe tajak u nanggroe Watu
Bak tuanku syahi alam
Ulon hajat hate rindu
Tueng keu judo Keumala Syam

Akan putroe Rakna Kubandi
Nyang juhari hana macam
Peurbuatan trep kueue lawi
Lama lagi keu sini curam

Brahman pike dalam hate
Lon peureugi jinoe kaman
Bahle ulon sana sini
Pinta hase Brahman fam

Brahman beudoh neujak laju
Nanggroe Watu troh beurjalan
Padum lawet troh u Watu
Tamong laju nyan u dalam

Ureueng laen jak peuseumbah
Jijak peugah bak sulotan
Teuka Brahman Panca Larah
Geupeuindah hana macam

Geubri teupat geupeujamee
Ban nyang lagee meujeulih reusam
Ateuh tahta meunan lagee
Geupeujamee nyan di dalam

Geuleueng tiree lhee peuet lapeh
Geuba keudeh saboh ragam
Teuka rakyat deungon wareh
Bak nanggroe jeh meunan macam

Ban sare lheueh pajoh makanan
Meututo Brahman deungon sulotan
Deungon hadiah Brahman bri
Raja neugri hate deundam

Ampon tuanku laman peugah
Nyang troh langkah keunoe curam
Raja Hiran di Panca Larah
Miseue ayah syahi alam

Tuanku jinoe bak ri rupa
Sang aneukda meunan lon fam
Rindu hate hana tara
Keu meukuta syahi alam

Hajat beu jeuet keu meulintee
Meunan nyang mee lon deungo kalam
Neuyue ulon keunoe dilee
Nyang patot mee syahi alam

Padumna trep meujeujeuneh
Keupeue mameh hana macam
Brahman kheun tuto maneh
Le that jeuneh macam-macam

Padum lawet Brahman sinan
Bak jonjongan syahi alam
Lakee idin teuma lheueh nyan
Woe Brahman leugat curam

Ulon peuk surat kireman
Di dalam nyan meunoe kalam
Narit putoh ka seuleusoe
Brahman woe bak sulotan

Laen nibak nyan meuh ngon pirak
Meureutoh halak dum neubi'eueng
Ija bajee nyang meusigak
Kasap pirak macam-macam

Sare leupah Brahman neuwoe
Raja jinoe rindu deundam
Ban nyang adat Meudeuhak peulara
Raja raja syahi alam

Seubab sayang nyan keu putroe
Hate dukhoe syahi alam
Jinoe lon peugah ke Brahman woe
Nyan u nanggroe leugat curam

Troh bak teumpat seungue han soe
Brahman nyoe neumeukalam
Meutroh Meudeuhak deungon raja
Keudeh lon ba nyan u dalam

Jih kutipee ilah daya
Bahle fana nyawong hilang
Meung kon meunan han pueh hate
Baranggakri jih kuhantam

Yoh nyan Brahman jimeunari
Hana sakri galak han ban
Jibot langkah jicok gaki
Ulah sang ri salah waham

Suka galak hate wa-woe
Brahman woe leugat curam
Ban sare troh woe Brahman
Tamong keunan bak syahi alam

Neupeujaroe uleh Brahman
Bak jonjongan syahi alam
Brahman ngadap bak sulotan
Surat kireman neujok rijang

Ban neueu le raja Hiran
Surat kireuman indah kalam
Neudeungo haba dalam surat
Hate mangat syahi alam

Ngon hadiah na geuintat
Sajan surat rindu deundam
Haba Brahman teuduek siat
Lon riwayat syahi alam

Nanggroe Watu syah beurdeelat
Neumupakat syahi alam
U Panca Larah heundak beurangkat
Neupangge rakyat jitren curam

Ngon Meudeuhak musyawarat
Neutanyong pakat le sulotan
Wahe aneuk toh bicara
Tapeuhaba lon deungo macam

U panca Larah lon meusafa
Muda beulia jawueub kalam
Ampon deelat po meukuta
Bak bicara nyang ka lon fam

Dalam surat bukon haba
Nyang sibeuna meunan kalam
Dalam hate raja keumala
Jikeumeung daya syahi alam

Bak pike lon tajak han mee
Keunong tipee akhe kalam
Putroe tuanku miseue kawé
Eungkot tamse syahi alam

Meunan tuanku bak lon pike
Dalam hate nyang ka lon fam
Ban raja deungo kheun Meudeuhak
Hate rusak syahi alam

Raja beungeh hate pipak
Kon mustahak tameukalam
Raja marah keu samlakoe
Neukheun meunoe syahi alam

Hai Meudeuhak beudoh jak woe
Bek le sinoe tameukalam
Hana patot tuto gata
Nyang kon haba hana reumbang

Ampon deelat po jonjongan
Nibak laman peuringatan
Eak pike lon ngon akai droe
Musoh bek toe baranggajan

Bitpi meunan teungku ampon
Ulon seunon barang hajat
Lon meutanggoh dua buleuen
Lon peugot mideuen deungon teumpat

Meudeuhak pike dua uroe
Buet seuleusoe nibak adat
Neukrah rakyat dalam nanggroe
Dum sinaroe han ek boh had

Meudeuhak yue rakyat geupreh
Muprang jadeh syah beurdeelat
Taloe bineh krueng dum jimeugoe
Tanaman asoe dumpeue sarat

Sarat pade dum sinaroe
Laen bagoe macam-macam
Meunan Meudeuhak bri mufeuti
Beurandang hase dum di dalam

Geupeugot krong dum meuriti
Hana sakri indah ragam
Sare hase dum seuleusoe
Meudeuhak woe leugat curam

Neujak ngadap raja nanggroe
Neupeutoe bak syahi alam
Ban sare troh beungoh uroe
Ampon kamoe di bawah kidam

Mee tuanku nyan neugrak droe
Ka seuleusoe bicara fam
Ban raja deungo kheun Meudeuhak
Hate galak hana macam

Gadoh sosah teuka galak
Seubab Meudeuhak meunan kalam
Teuduek 'oh noe dilee siat
Raja beurangkat ulon kisah

XXI. PRANG PANCA LARAH

Amma Bakdu wohe intan
Nyoe karangan nyang that cidah
Wahe adoe bek tacarot
Hate lupot gadoh ingat

Lagee laen ulon pufon
Seureuta lon balek ayat
Reumbang salah ragam duson
Meuah ampon wahe sahbat

Nam blah bareh saboh banja
Meunan nyang ka lon hikayat
Ulon surat hana keunong
Keureutah keumang daweuét pucat

Lagi malah akai bingong
Ulon tanyongpi hana pat
Bak lon pike ngon akai droe
Karangan nyoe meusigak that

Hana sapat na meubunoe
Hikayat nyoe wahe sahbat
Lon teurjeumah bak Meulayu
Ulon aju keu hikayat

Pueh ulon boh hate karu
Ulon aju dalam surat
Ulon lakee bak Rabbana
Beu seumpurna tamat surat

Deungon mukjizat Nabi kita
Dum seugala deungon sahbat
La ilaha illallah
Tulong Allah jeuet lon surat

Deungon beureukat dumna syiah
Wali Allah nyang keuramat

Subhanallah wal hamdulillah
Wadiharah neukrah rakyat

Habeh jitren dum barollah
Raja meugah doli halarat
Jitren rakyat nanggroe Watu
Keunan laju ubak deelat

Tunong baroh barat timu
Keunan laju jitren leugat
Wadi meuntroe dum barollah
Dalam peunoh mideuen sarat

Bentara blang dum kapilah
Guda gajah rata alat
Raja neuduek ateueh gajah
Wadiharah neubeurangkat

Gajah meurungka duek khalifah
U Panca Larah neujak leugat
Taloe jalan tanoh seunambak
Rotnan neujak raja deelat

Ka lheueh neupeugot le Meudeuhak
Meusigak takalon teumpat
Uroe geujak malam geupioh
Kana rumoh jeuep-jeuep teumpat

Jeuep-jeuep jalan kuta kukoh
Meudeuhak suroh nibak deelat
Makanan le dumpeue mudah
Hana payah tame nyang brat

Rata rumoh Meudeuhak keubah
Hana sosah teuka arat
Padum-padum payong alam
Rakyat curam jak bagah that

Bukon Meudeuhak sangat ajam
Jeuep-jeuep makam neukeubah rakyat
Teuma geutamong dalam kuta
U istana neuk leugat

Raja neuk troh u leupu
Geupajoh bu dumna rakyat
'Oh lheueh makeuen ploh laju
Jieh laju dumna rakyat

Esok hari Meudeuhak suroh
Pangge utoh jeuet meurapat
Kata syekh eumpunya rawi
Lon peugah kri waha sahbat

Meudeuhak krah siribeee pande
Dum ka hase le ngon rakyat
Pande beusoepi siribee
Ri nyang mee geuyue meuhat

Nyang ceumulekpi siribee
Pande meuh mee dumna meuhat
Siribeee panda angkot batee
Lom siribee peugot alat

Nyang siribee peugot pirak
Yue Meudeuhak maseng babat
Ateuh papeuen neuboh pirak
Taeu galak cit jroh that-that

Siribee tokang peugot peuraho
Siribee jalo rot beurangkat
Dua ribee nyang mat jalo
Mirah hijo hitam geucat

Habeh cukop dum sinaroe
Jeumeurang jinoe dumna rakyat
Meurandeh krueng geupeugot jalan
Rakyat sajan han teukimat

Di bineh krueng rakyat datang
Dum jeumeurang suroh deelat
U Panca Larah dum beurjalan
Raja sulotan neubeurangkat

Ngon Meudeuhak nyang analan
Cit budiman bijakpi that
Poteu raja teutap sinan
Meudeuhak yoh nyang neubeurangkat

Lheueh meuteumee ngon sulotan
Neucom tangan idin deelat
Wadiharah keusukaan
Galak han ban keu Meudeuhak

Troh Meudeuhak ulee gampong
Neutren sirong jak bak deelat
Troh bak kuta raja nanggroe
Keunan ka toe ploh siat

Meudeuhak bri ureueng sidroe
Nyang peungaroe jak bak deelat
Ban sare troh nyan u dalam
Bak sulotan raja deelat

'Oh lheuen meuteumee ngon syahi alam
Duek bak makam ateueh teupat
Lheueh nibak nyan geubet jaroe
Neut nyong soe uleh deelat

Di pat gampong pane nanggroe
Tajak keunoe peue na hajat
Ampon tuanku meuribee katoe
Meuah lon nyoe jak bak deelat

Yue Meudeuhak teuka keunoe
Yue peugah droe ubak deelat
Sideh bak bale di lua kuta
Lon jak lanja keunoe leugat

Lon peugah bak po meukuta
Ulun teuka nyan geupakat
Brahman Kayuti deungon kata
Po meukuta cit baek that

Tamse Meudeuhak deungon raja
Lon umpama wahe deelat
Miseue uroe deungon cahya
Meunan rupa lon ibarat

Meuna Meudeuhak nakeuh raja
Meunan nyang ka ulon lihat
Raja Hiran lom meusabda
Jak tagisa dilee siat

Tueng Meudeuhak keunoe taba
U lam kuta keunoe leugat
Utosan jak pantah sigra
Sinoe raja peugot teumplat

Ngon Brahmanpi seureuta
Jarak hana deungon deelat
Raja yue hias saboh bale
Geuboh tiree dum meukasap

Geuleueng hampanan peureumadani
Ngon keurusi nyang indah that
Padum-padum bantai suson
Neuyue peutren uleh deelat

Ban peuet sagoe geuleueng hampanan
Jroh that bangon 'oh talihat
Suklat hijo kasap pirak
Meusigak takalon rupa

Sare hase bale gunjak
Troh Meudeuhak keunan leugat
Raja ampeueng jamee teuka
Ngon mulia leubeh 'izzat

Poteu yue dong rakyat mubanja
Dalam kuta peunoh le that
Lagee jurong meunan rupa
Peutua imum ngon rakyat

Geutet beude meuriam lila
Meubura-bura taeu asap
Geutet meuriam kuceng tido
Su meuo-o tamse bakat

Uroe meuhayak malam meuhubo
Han tatuho gadoh ingat
Lua dalam asap seupot
Hangap-hangeup dumna rakyat

Ngon su beude tadeungo krap-krup
Keutap-keutup ngon seupot that
Teudoh beude han le bunyoe
Geutamong jinoo ngadap deelat

Lheueh meuteumee dum sinaroe
Bak teumpat droe teuduek leugat
Yoh nyan raja kalon Meudeuhak
Meusigak bangon indah that

Raja Hiran hate galak
Meudeuhak neukalon hebat
Raja reukheun bu meutuah
Muda indah rupa jroh that

Nyang ka dilee lon deungo gah
Uroe nyoe sah ulon lihat
Meudeuhak jok peurseumbahan
Keu sulotan raja deelat

Padum meutia pudoe intan
Laen nibak nyan dumpeue le that
Yoh nyan tahe raja Hiran
Deungon Brahman dua sapat

Bak Meudeuhak pandang sulotan
Neukeunai nyan uleh deelat
Poteu raja marit sipatah
Nyan neupeugah haba mangat

Wahe Meudeuhak muda indah
Han tom meulintah ulon lihat
Lambat datang keunoe gata
Trep ka haba lon bri surat

Ubak Brahman ulon yue ba
Keu gata ngon syah beurdeelat
Lheueh nyan geubet ngon hidangan
Peurjamuan dumna rakyat

Dalam hidang dum buahan
Seukalian han teukimat
Boh timon bruek ngon timon phang
Dalam hidang geuboh leugat

Laen nibak nyan tufah mancang
Dum sibirang rasa ladat
'Oh lheuen makeuen dumna jamee
Maseng teuntee ateueh teumpat

Lheueh nyan Meudeuhak peugah haba
Ubak raja meumupakat
Kheun Meudeuhak neupeuhaba
Deungon raja syah beurdeelat

Deungon afuwah po meukuta
Di ulon ka peugot teumpat
Padum istana deungon kuta
Ban seulingka ka troh hajat

Lheueh nyan teuma sabda raja
Bak muda beulia neukheun leugat
Insya Allah he aneukda
Mubahgia bri halarat

Jinoe taeu dalam kuta
Pat nyang hana jroh talihat
Lon yue ubah siklep mata
Hai aneuk patot dapat

Kheun Meudeuhak bacut salah
Neuyue ubah uleh deelat
Meudeuhak peugot le neuubah
Rupa indah bak talihat

Raja pujoe le Meudeuhak
Neukheun bijak uleh deelat
Tan teuladan buet Meudeuhak
Leubeh gunjak hana sapat

Padum uroe Meudeuhak sinan
Bak sulotan raja deelat
Lakee idin teuma lheueh nyan
Bak sulotan neuwoe leugat

U krueng Kangsa woe Meudeuhak
Troh le ubak syah beurdeelat
Meudeuhak kalon hate galak
Neupeugah bak raja deelat

Surat kireman Meudeuhak bawa
Akan raja neujok leugat
Dalam surat sabda raja
Narit haba indah ladat

Wadiharah lom meusabda
Hai aneukda pakri pakat
U Panca Larah mee lon bungka
Peugah sigra nyang beureukat

Jaweueb Meudeuhak sabda raja
Bek neubungka pioh siat
Lon meutanggoh po meukuta
Peugot kuta beu sunggoh that

Yoh nyan Meudeuhak neuseuranta
Dum seugala wadi meugat
Ladom neuyue mat lham beusoe
Dum sinaroe ban nyang babat

Ladom cangkoi mat di jaroe
Siribee droe neupeuadat
Siribee lasyka nyang mat raga
Meunan rupa neupeusapat

Siribee utoh peugot jalo
Siribee peuraho ngon jeumeurang
'Oh takalon jroh that laku
Galak taeu rindu deundam

Geukueh tanoh lagee sungoe
Dalam bumoe tan soe lihat
Papeuen lingka dum sinaroe
Mangat bek doe tanoh rata

Di ateueh nyan papeuen labo
Hijo biro Meudeuhak cat
Mirah hitam puteh hijo
Rakyat tahe soe nyang lihat

Nyang rot ateueh meucat ie meuh
Cahya peungeuh hu meunyal
Geucat peureuda ladom firoh
Meudeuhak utoh akai le that

Tujoh ploh kuta dalam bumoe
Hana sidroe na troh dapat
Meulaenkan nyang na meung rakan droe
Dum sinaroe nyang troh dapat

Limong ribee lapan blah a. oe
Utoh han soe bak jimeucat
Dalam kuta raja Hiran
Reuhung keunan ka troh dapat

Maseng-maseng balatandra
Jeuep-jeuep kuta peunoh rakyat
Geuboh tanoh u laot raya
Meuri hana pueh talihat

Ngon peuraho dum geuankot
Me u laot uleh rakyat
Lam krueng Kangsa geupeuile
Meunan sare jimumat-mat

Kuta cukop dum ka sare
Dum ka hase peurbuatan rakyat
Lheueh nyan Meudeuhak lom beurjalan
Bak raja Hiran neujak leugat

Ban sare troh Meudeuhak keunan
Neubet tangan ka neudeelat
Ampon tuanku po jonjongan
Seumbah laman nyang hina that

Ulon lakee bak sulotan
Peurheuntian saboh teupat
Ulon peugot saboh kuta
Bak duek raja deungon rakyat

Wadiharah watee teuka
Bak meukuta keunoe leugat
Pat neupeuduek po meukuta
Jaweueb raja neukheun le pat

Sinan aneuk tapeugot kuta
Tanoh data bak lon lihat
Bacut parak nibak tandra
Patek hina tanyong pakat

Panca Larah nanggroe Watu
Bek meujampu deungon rakyat
Jeuet adat teuma 'a-'u
Bak tuanku lon kheun teupat

Raja Hiran jawueb Meudeuhak
Neueu rancak uleh deelat
Marit utoh babah cangklak
Nyo Meudeuhak nyang bijak that

Insya Allah hai bentara
Bek meudawa lon peuingat
Yoh nyan Meudeuhak peugot kuta
Hase leungka le ngon siat

Luah dalam peuet ploh deupa
Poteu raja nyankeu teumpat
Watee beudoh di krueng Kangsa
Keunan lanja neubeurangkat

Kuta hase bandum rata
Meudeuhak peuhaba ubak deelat
Ampon seumbah po meukuta
Hase kuta cukop galak

Jinoe pakri po meukuta
Mee ulon ba raja deelat
Ubak teumpat keunoe teuka
Deungon do'a syah beurdeelat

Raja Hiran teuma peugah
Insya Allah taba leugat
Jak tueng keunoe Wadiharah
Raja meugah that geudeelat

Deungon putroe lon peunikah
Insya Allah meunan hajat
Meudeuhak deungo meunan hajat
Beudoh leugat jak tueng deelat

Meudeuhak leupah bak sulotan
Kheun Brahman meunoe pakat
Meung troh keunoe po jonjongan
Na ambilan meunoe bi'at

Lheueh peujamee raja raja
Woe lam kuta duek bak teumpat
Neumuprang le ban seulingka
Ban sineuna turon rakyat

Neupubeude dalam kuta
Meudeuhak ngon raja bak kiamat
Bahle mate jih bandua
Neuboh daya uleh deelat

Nibak Brahman meunan kata
Deungon raja syah beurdeelat
Nibak Tuhan kala kada
Maseng jeumba bri halarat

Brahman peuhase alat puprangan
Dum angkatan maseng babat
Nukaha meuntroepe na sajan
Laen nibak nyan dumna rakyat

Maseng-maseng ngon seunjata
Geupreh raja troh beurangkat
Ureueng kawai mata-mata
Lingka kuta suroh deelat

Padum wadi ngon bentara
Panglima ngon imum rakyat
Pahlawan prang han teukira
Leubeh laksa bak takimat

Rata alat dum sinaroe
Cokma beusoe bandum jimat
Jeuetkeu dumnan lon calitra
Tandra raja wahe sahbat

Troh Meudeuhak di krueng Kangsa
Jak tueng raja syah beurdeelat
Lheueh neudeelat po meukuta
Bandua jaroe neuangkat

Jinoe tuanku mee tagrak droe
Ka seuleusoe peugot teumpat
U Panca Larah neujak jinoe
Pangge keunoe dumna rakyat

Hoka wadi ngon bentara
Jak udehta tabeurangkat
Jeuep-jeuep kuta geuseuranta
Gajah guda geuboh alat

Sungoe Kangsa geujeumeurang
Dum sibarang suroh deelat
Sare leupah rakyat datang
Huleebalang geujak leugat

Geutet beude geunta bumoe
Raja nanggroe neubeurangkat
Sajan rakyat meukeukatoe
Jak u nanggroe nyang jeuoh that

Guree nyang peuet sajan raja
Dum seureuta geubeurangkat
Tujoh blah ribee kandran guda
Jak seureuta deungon deelat

Rakyat laen meuleulaksa
Dum geubungka u Panca Larah
Padum uroe geumeusafa
Troh bak kuta ateueh teumpat

Raja Hiran ampeueng jamee
Beude meuribee geutet leugat
Peulheueh beude kuta batee
Ampeueng jamee syah beurdeelat

Teudoh beude han le bunyoe
Geutamong jinoe ubak deelat
Maseng-maseng bak teumpat droe
Dum sinaroe raja deelat

Lheueh nyan geubet ngon hidangan
Peurjamuan syah beurdeelat
'Oh lheueh makeuen cok hidangan
'Oh lheueh nyan woe u teumpat

Woe lam kuta seukalian
Raja sulotan deungon rakyat
Malam singoh raja Hiran
Ubak Brahman jikheun pakat

Jinoe taprang kuta raja
Ban seulingka taek leugat
Taboh tipee ilah daya
Sabda raja meunan pakat

Ureueng dalam trep ka hase
Ka lheueh pike dilee lambat
Rotdeh rotnoe cukop beude
Bandum sare rata alat

Jiek leugat wadi meuntroe
Dum sinaroe nyang kuat-kuat
Jisurak ngon jihei sare
Jipubeude teuma leugat

Jiteubiet le rotdeh rotnoe
Ka meugumoe le that rakyat
Jimeuangok pahlawan prang
Ka meujantang beusoe tungkat

Rotdeh rotnoe jimeulinggang
Dum sibarang jigrop lumpat
Rakyat mate bak jimeucang
Ban ie kubang nyang mirah that

Boh beude po miseue unoe
Tamse bagoe teuka bakat
Subhanallah prang meuhayak
Mate rusak han teuhisab

Jigrop lambong ngon jisurak
Jitanjak sang teuka barat
Meu'a-'a moe nyang ladom
Meugum-gum sang su nubat

Meugrum-grum sang geundrang tambo
Kasyum-kasye tadeungo nubat
Ureung surak su meuo-o
Tarek keundo mate leugat

Reuloh muka patah baho
Bak jitajo dum jilumpat
Sireutoh sa le sulotan
Taklok keunan geujak deelat

Habeh teuka bandum keunan
Rakyat sajan han teukimat
Padum alat pupeurangan
Cokma sajan beusoe jimat

Laen peudeueng han teukira
Rakyat that bha han teukimat
Guda kandran muploh laksa
Nyang peutua laen rakyat

Bajee Inggreh bandum rata
Peutua ngon aneuk rakyat
Padum raja huleebalang
Panglima prang nyang meugah that

Habeh bandum leugat u blang
Meureuntang jidong sapat
Mat di jaroe dum alat prang
Peudeueng panyang alat tungkat

Ladom jimat sikin geudubang
Ladom linggang grop jilumpat
Ban seulingka kafe jojah
Wadi meugah muka pucat

Di guree peuet muka ubah
Hireuen dasyah gadoh ingat
Di Meudeuhak saboh sagoe
Ka geusom droe saboh teumpat

Meunan peurintah Tuhan sidroe
Dum sinaroe ateueh teumpat
Meudeuhak suroh bayeuen meutia
Jak ba haba u nanggroe Sarah

Bayeuen teureubang teuma lanja
U krueng Kangsa nyang meugah that
Jak peugah bak Jalawali
Juhan Ade nyang meugah that

Padum pahlawan nyang beurani
Meudeuhak bri gantoe surat
Ban sare troh u krueng Kangsa
Ubak raja wadi Furat

Jikheun geuprang raja muda
Ban seulingka gop ka le that
Ban wadi deungo meunan haba
Beungeh raya mata jagat

Padum rakyat muploh laksa
Jak le sigra dum meusapat
Cokma peudeueng dum di tangan
Bajee di badan beusoe kabat

Rakyat le that hana padan
Dum pahlawan hebat-hebat
Tujoh ribee nyang analan
Rata sajan deungon alat

Ladom pusu ladom cakcoe
Ladom beusoe taeu bulat
Ladom ganja mat di jaroe
Ladom keudroe jak meusapat

Saboh kawan jak sabe droe
Saboh sagoé beude nubat
Hase alat dum sinaroe
Han tatupeue le peugah had

Muploh laksa ribee katoe
Peunoh nanggroé deungon rakyat
Ban sare troh dum angkatan
Pahlawan nyang hebat-hebat

Teuma beudoh Ade Juhan
Prang le sajan deungon rakyat
Gajah guda alat puprangan
Bandum sajan bak talihat

Jipubeude na dum ujeuen
Na dum tufeuen nyang raya that
Rotdeh rotnoe hana peue kheun
Tahe hireuen dumna rakyat

Ade juhan beungeh han soe
Jiseudoe u ateueh rakyat
Mate rusak dum sinaroe
Jeuep-jeuep sagoé habeh luka

Rakyat Watu teudong siblah
Di Panca Larah aseng rakyat
Ade Juhan beudoh leugat
U ateueh rakyat laju neusak

Meureu't jigrop meukrum jitak
Habeh pipak bandum lukat
Ureueng Panca Larah kameh-kamoh
'Oh jimupoh hana mupat

Rakyat mate han soe tu'oh
Na siteungoh mate rakyat
Nyang mat peudeueng jitak teuheng
Teujeurangkeng reubah lengat

Reuloh muka ulee sumbeng
Tango tang-ting beusoe bulat
Hana jan jiteumeung ngieng
Leupeung di mieng keunong rakyat

Reuloh muka gigoe teuheng
Ka teupunggeng reubah leugat
Dua lhee ploh dum meujandreg
Keutang-keuting beusoe bulat

Jimeutop cang su meutaga
'A-'u subra timu barat
Ladom poh ladom tampa
Ladom geulawa kayee bulat

Leumbeng tumbak jipo pra-pu
Ka'a-ka'u timu barat
Rakyat mate dum teudu-du
Badan sulu taeu teupat

Brahman Kayuti kalon keunan
Mate rakan han teukimat
Pahlawan prang dum teureuban
Raja Hiran muka pucat

Raja tanyong ubak Brahman
Pakri padan wahe sahbat
Bak ri laku keutiwasan
Le angkatan tandra rakyat

Brahman peugah ubak wadi
Tajak ili jinoo siat
Tajak peugah bak Khawawi
Ngon beurani nyang teuga that

Wadi beudoh jak peureugi
Bak Kharawi nyang meugah that
Saleuem nibak Brahman Kayuti
Geuyue ili keudeh siat

Ban jideungo meunan seumbah
Laju jikrah dumna rakyat
Ban jideungo jitren jojah
That barollah jitren rakyat

Tujoh uroe jitren sabe
Nyum hana le ilah dapat
Kayee reuloh buket reule
Tangoe lam gle jitren leugat

Jak u nanggroe Panca Larah
Han teupeugah jitren rakyat
Pahlawan nyang meugah-meugah
Dum barollah rata alat

Ubak raja jitren sampoe
Brahman nyoe kheun bak deelat
Ampon tuanku keumala nanggroe
Ka troh keunoe dumna rakyat

U padang prang rakyat ka toe
U bineh nanggroe syah beurdeelat
Brahman kheun teuma meunoe
Teubiet jinoe bantu leugat

Bandum gata tajak keunoe
Meugriet han soe that meukarat
Ban jideungo meunan sabda
Kharawi sigra peugah pakat

Jipubeude le u lua
Ribee laksa bareh leugat
Ka meu'u-u hana reuda
Ramtaka ngon beude nubat

Geumpa alam beude lila
'A-u subra tuloe rakyat
Ban geulanteue meunan rupa
Bet ube pha beusoe bulat

Han jeuet cicem po lam hawa
Mate fana ujeuen siat
Dum binatang pungo wa-woe
Hana sidroe jeuet beurangkat

Luroh bulee pijuet asoe
Bumoe nanggroe nyum meutat-tat
Dalam nanggroe tango a-o
Meugo-go sang teuka barat

Ureueng tarek habeh keundo
Ban hantu keunong sakat
Teuka geusuen gadoh beuhe
Meunan nyang le deuh talihat

Tuha muda dum teusungko
Bibi keundo muka pucat
Ureueng nyang le han jeuet pajoh bu
Kiam 'a-'u tuloe rakyat

Rakyat mate dum teudu-du
Nan ban boh u bulat-bulat
Seuu rioh hana laku
Han le kuyu dumna rakyat

Habeh mate dum jitadi
Jalawali nyang beungeh that
Bandua ngon Juhan Ade
Geumeutadi dua sapat

Meurumpok deungon Kharawi
Hana sakri mate rakyat
Jisuet peudeueng dalam sarong
Ngon ujong taeu meutat-tat

Peurise beusoe jimeutudong
Keutupong beusoe seureulat
Jimupoh-poh jigrop lambong
Keutang-keuting beusoe bulat

Tangoe u Kale su meuceung-creung
Cokma peudeueng jimeusahbat
Keunong ulee ka teugageueng
Patah tuleueng hanco leugat

Dalam tandra ka meugule
Yoh nyan mate dumna rakyat
Ureueng tuha rakan Meudeuhak
Ka jisurak siblah rakyat

Nyang le mate deungon rusak
Habe seungkak dumna rakyat
Peureudan Ali beudoh yoh nyan
Nyang kuatan pahlawan jeungkat

Beurani that hana lawan
Jicang teureuban dumna rakyat
Meurumpok ngon Ade Juhan
Di hadapan dum ngon rakyat

Geumeucang le dua gop nyan
Mat di tangan cokma bulat
Bandua ho han tiwasan
Saban timang ngon teuga that

Umu lhee uroe meucang sabe
Reuloh peurise beusoe bulat
Cokma patah ka hana le
Bandua si han le alat

Geutiek peudeueng geumeutajo
Ka meuhubo gadoh ingat
Nyum meuhayak bumoe leungo
Han t̄ tuho sang kiamat

Bandua ho geumeusinthop
Tadeungo srop han peue peugah
Tujoh uroe meureupah sabe
Na nyum reule sang kiamat

Kayee patah buket reule
Tangoe u gle meucron leugat
Mon dum reuloh parek ka doe
'A-'u nanggroe sang kiamat

Ka meucron keudeh meucron keunoe
Bandua droe gadoh ingat
Peureudan Ali kakeu lape
Lom lagee ngon leumohpi that

Ade Juhan mat di gaki
Jicron u gle keudeh leugat
Peureudan Ali sudah mate
Di dalam gle sinan teupat

Ban jikalon uleh wadi
Peureudan Ali han le mupat
Lheueh nyan beungeh Hiram Syuri
Cit jiek le ateueh peureusat

Deungon rakyat meuntroe wadi
Han tatukri hebat-hebat
Rata alat dum di tangan
Bajee badan beusoe bulat

Cokma peudeueng alat puprangan
Tameng sajan leumbeng tumbak
Ateueh gajah mubalohan
Panyang kawan le ngon alat

Huleebalang bandum sajan
Pahlawan nyang kuat-kuat
Beuhe gagah lagi tungang
Mise panyang rupa hebat

Deungon lawan le meutunang
Peudeueng panyang dijih alat
Jime alam ngon pupanji
Jipeunari taeu hebat

Jipalee gong yup napiri
Suleng bangsi suara mangat
Ngon alam prangpi na jime
Ngon peurise beusoe bulat

Taeu jidak meukeukawan
Dum pahlawan hebat-hebat
Taeu jiek jroh meurumpan
Leugat meurang keunan ka rab

Meugucuh prang nibak dilee
Le that padee mate rakyat
Troh meureutoh leubah ribee
Nibak dilee nyoe raya that

Jalawali that guransang
Rakyat jicang gadoh ingat
Meuriam lila hana reunggang
Rakyat lapang mate le that

Rakyat mate meugeugule
Darah ile miseue bakat
Hiram Syuri yoh nyan mate
Hana soe le peugah pakat

Habeh talo sukee Hiran
Seukalian dum jilumpat
Yoh nyan malee meuntroe Brahman
Ka tiwasan dumna rakyat

Raja Hiran yoh nyan malee
Le that sukee nyang ka lukat
Meutamah aeb deungon malee
Habel. padee aneuk rakyat

Siuroe sireutoh nyawong padee
Na lhee ribee nyang ka lukat
Poteu raja moe meuree-ree
Basah bajee syah beurdeelat

Habeh lagee gadoh cakri
Brahman Kayuti neukrah rakyat
Huleebalang meuntroe wadi
Dum sipai neupeusapat

Sireutoh ribee lapan laksa
Dumnand tandra banyak rakyat
Di likot nyan han teukira
Laksin laksa han teukimat

Ka muprang le 'oh ban teuka
That guranta dumna rakyat
Beude sideh boh ban raga
Seun silaksa meusu nubat

Rotdeh rotnoe su meutaga
Jiteureupa dumna rakyat
Tam-tum 'am-'um sare subra
Leubeh laksa mate rakyat

Bunyoe-bunyoe teuka geumpa
Su meutaga beude nubat
Teuma keunong pageue kuta
Le ceulaka aneuk rakyat

Maken mate aneuk rakyat
Meutimpa that lom meukarat
Meuikot-ikot hana reuda
Seun silaksa jipeulheueh nubat

Peudeueng cokma dum meurumpan
Siploh kawan jiek leugat
Le that tandra raja Hiran
Dum angkatan hebat-hebat

Di Meudeuhak hana padan
Neumeulawan sunggoh that-that
Jalawali beungeh han ban
Ade Juhan nyang teuga that

Ureueng laen bandum sajan
Prang uroe nyan bit raya that
Ladom mupoh ngon meuriam
Ladom gulam beusoe bulat

Keutam keutum hana macam
Rasa karam bak jilumpat
Bumoe donya sang meukram-kram
Rasa nyum lham ban kiamat

Nideh ninoe jimeukalam
Boh meuriam deungon nubat
Rakyat mate dum teugageueng
Hanco tuleueng putoh urat

Troh lam rimba su seumeureung
Cokma peudeueng jimeusahbat
Ladom reuloh ulee peudeueng
Rusak ureueng mate le that

Troh le laen teuka ureueng
Sang geuampeueng raja beurangkat
Su meuriam hana bagoe
Hana laloe na dum geusak

Bangon guroh na sang bade
Na ban geuple ujeuen leubat
Bak guda plueng nyang meukalot
Abee jipot sajan asap

Cot uroe trang sang ka seupot
Keulam-kabot deuh talihat
Raja Hiran kalon meunan
Ubak Brahman neubri ingat

Aneuk Kayuti lom beurjalan
Lhee ploh pasukan jiba rakyat
Na lhee ribee nyang analan
Mat di tangan beusoe tungkat

Taeu jiek dum meusaho
Lagee pulo dumna rakyat
Ban seulingka ka meujo-jo
Keunan saho ka meusapat

Boh meuriam hana jihiro
Bandum sigo jiek bulat
Ade Juhan sang ka pungo
Han jituho akai dahsyat

Jicok kayee ka roh batee
Peue meuteumee jisrom leugat
Sang-sang han jeuet leumah ulee
Dumnun lagee meugriet that-that

Kata rawi po calitra
Geuduek lingka bandum sapat
Tinggai Brahman deungon raja
Dum seureuta laen rakyat

Asa uroe kalon kuta
Watee seunja geuduek leugat
Kheun Brahman bek tangaza
Singoh nyata deuh talihat

Bak malam nyoe sinoe tapioh
Singoh beungoh lom talukat
Meudeuhak ngon raja jinoe tapoh
Bah tabunoh mate leugat

Yoh nyan Meudeuhak dalam bumoe
Dum sinaroe deungon rakyat
Sajan raja guree peuet droe
Laen sinaroe aneuk rakyat

Raja Wadiharah dalam kuta
Duek bak data deuh talihat
Meudeuhak di bawah kuta raja
Ro ie mata syah beurdeelat

Di Meudeuhak dalam bumoe
Dum sinaroe deungon rakyat
Huleebalang wadi meuntroe
Imum sagoe dum meusapat

Yoh nyan raja pangge Meudeuhak
Han neutem jak ubak deelat
Poteu raja hate rusak
Seubab Meudeuhak ka jeuoh that

Musoh lingka ban peuet sagoe
Dum geutanyoe mate leugat
Pakri laku peugah jinoo
Hai teungku droe pakri pakat

Meuhat mate bak siseun nyoe
Umu sampoe nibak adat
Teuka narit bak Aja San
Wahe sulotan gadoh ingat

Bak bicara han lon tuban
Bahle kaman mate leugat
Nibak udep bahle mate
Peue tapike pakri pakat

Beuthat jipoh le sulotan
Raja Hiran buet khianat
Buet nyoe tuanku han soe tulak
Meung kon Meudeuhak nyang lisek that

Jroh peurangui that Meudeuhak
Lon kalon bak doli halarat
Kaem khadam kawoh doli
Baek bakti nyan keu deelat

Seutia that ngon beurani
Ceureudek lagi akai le that
Hana ujob ku'eh deungki
Han seukali na khianat

Gaseh putroe Kasmi Diwi
Deungon doli meugaseh that
Lom meusabda Wadiharah
Neupeugah bak guree eumpat

Wahe teungku deungo lon peugah
Toh pakri bah jinoe pakat
Dua lhee go lon pangge Meudeuhak
Han jitem jak keunoe siat

Ka jiem droe hate seungkak
Lon pakat bak wadi rakyat
Yoh di nanggroe han kupateh
Jinoe peudeh akai dahsyat

Kheun Meudeuhak dilee sideh
Kuboh reunteh ngon 'aduwat
Jinoe telah apoh ulee
That paleh kee kucre teumpat

Kheun Meudehak masa dilee
Masa watee rindu sangat
Toh bicara bak siseun nyoe
Mate geutanyoe sinoe sapat

Kheun guree peuet teuma meunoe
Peurintah nyoe hana dapat
Meung kon Meudeuhak teuka keunoe
Bak uree nyoe wahe deelat

Lom raja bri ureueng sidroe
Tueng samlakoe keunoe leugat
Nyanpi hana Meudeuhak teuka
Sosah raja syah beurdeelat

Raja Wadiharah lom meusabda
Neukheun haba nyang muslihat
Yoh di nanggroe masa bungka
Leumah rahsia ulon dapat

Bak malam nyoe lon eu rupa
Buet rahsia lon ibarat
Na nyum meugulong lon lam bumoe
Seupot tuloe lagi arat

Lheueh nyan teuka Meudeuhak sidroe
Bungong jaroe saboh jimat
Rupa indah han sibago
Ubak jaroe Meudeuhak pumat

Nyankeu nyang na ulon lumpoe
Yoh di nanggroe masa beurangkat
Bak peunyum lon sinoe kubu
Kakeu lon eu rab kiamat

Teuka Meudeuhak ie jisibu
Meunan laku bak lon ingat
Yoh neukheun nyan raja neumoe
Meuteutaloe ie mata leugat

Musoh lingka muploh katoe
Hate seungkoeh syah beurdeelat
Wahe tuboh jinoe rusak
Meudeuhak han teuka leugat

Han kupateh haba Meudeuhak
Kupeutulak dum amanat
Guree peuet droe habeh geumoe
Dum sinaroe dumna rakyat

Maseng-maseng timplak keudroe
Raja nanggroe nyang sosah that
Rakyat di lua geuprang kuta
Brahm an sangga bek takarat

Tapreh beungoh uroe keulua
Meuhat kuta nyoe tadapat
Raja Wadiharah teuduek 'oh noe
Lon karang nyoe laen riwayat

Cut Meudeuhak that budiman
Le ambilan ceureudek that
Sireutoh nam ploh dalam bumoe
Dum sinaroe peurdana rakyat

XXII. RAJA SUMBANG HIRAN MEUNYEURAH

Papeuen lingka geugogajoe
Dalam bumoe geupeugot teumpat
Luah jurong limong deupa
Jeuep-jeuep kuta rot beurangkat

Hingga sampoe reuhung rata
Ban sineuna jeuep-jeuep teumpat
Troh u dalam kuta raja
Hiran nama syah beurdeelat

Meudeuhak suroh dum bentara
Dalam kuta tamong leugat
Hingga sampoe lam istana
Teumpat raja Hiran deelat

Meudeuhak yue cok aneuk raja
Nyang jroh rupa nyang indah that
Rakna Kubandi nama putroe
Ngon sambinoe rupa jroh that

Cahya badan ban meuk uroe
Cahya gigoe na ban kilat
Soe nyang pandang mata laloe
Soe deungo bunyoe hate mangat

Mupatam meuh nyan nibak dhoe
Buleuen siuroe cahya jroh that
Calagak Diwi ma nyak putroe
Bandua droe geuba leugat

Aneuek agampi na sidroe
That samlakoe aneuk deelat
Padum namiet hamba teubosan
Geuba sajan uleh rakyat

Ureueng kawai kuta sulotan
Sekalian dum geukat
Limong reutoh bak bilangan
Nyang analan ka dalam had

Geupeuteubiet asoe istana
Seukalian geuba leugat
Hana geucok dum areuta
Ureueng geuba bandum meuhat

Laen tinggai meuh meulaksa
Rukon areuta han teukimat
Ureueng geuba agam dara
Habeh geuba ubak deelat

Nyang na tinggai ureueng tuha
Ngon areuta hana geumat
Kawai kuta dum geurante
Jaroe gaki dum geukat

Meunan Meudeuhak bri mufeuti
Laen barangri bek tamat-mat
Beudoh rakyat dum keumbali
Bandum sare woe u teupat

Ban sare troh keunan sampoe
Leumah putroe rupa jroh that
Aneuk agampi ka sampoe
Maji putroe judo deelat

Meudeuhak ba neupeuseumbah
Bak Wadiharah raja deelat
Banta ngon putroe sangat gundah
Teuka sosah geumoepi that

Geutet panyot dalam bumoe
Dum sinaroe peungeuh sangat
Tinggai rakyat dum sinaroe
Meudeuhak woe ubak deelat

Raja teungoh neuseusai droe
Guree peuet droe sinan sapat
Bandum gobnyan ka meumoe-moe
Beuntara droe deungon deelat

Troh Meudeuhak keunan sampoe
Raja nanggroe deuh neulihat
Beudoh raja neucom bak dhoe
Dum sinaroe hate mangat

Seureuta ngon neukheun meunoe
He aneuk droe lon meukarat
Ampon tuanku meuribee katoe
Deungo kamoe syah beurdeelat

Han neupateh po meukuta
Lon peuhaba dilee arat
Le akai droe bak nyum rupa
Cuba rasa nyan peudeh that

Jinoe mate ban sineuna
Po meukuta cuba ingat
Deungon rakyat dum seureufa
Mate fana sajan deelat

Lonpi han le meuteumee gisa
Ajai teuka sinoe meuhat
Ban raja deungo Meudeuhak peuhaba
Maken rugha neumoe sangat

Meudeuhak eu meunan rupa
Peue bicara neumoe leugat
Hana patot raja raja
Buet meuseunda tan horeumat

Raja sosah hana bagoe
Neukheun meunoe lom le deelat
Na meuteumee aneuk putroe
Nyang sambinoe rupa jroh that

Meudeuhak deungo sabda raja
Khem teurtawa gadoh ingat
Guree peuet droepi seureuta
tuto raja syah beurdeelat

Meudeuhak kheun lom bak raja
Ampon raja lon kheun bi'at
Neuingat putroe nyang jroh rupa
Dumnoe bahya hana ingat

Meung ek leupah hana mate
Bak lon pike meunan jroh that
Keu tuan putroe neumeunapsu
Pakri laku cuba ingat

Lom meusabda juhan doli
Tapeureugi lon eu lambat
Gata bijak hana sakri
Bak leumah ri na tadapat

Ube takheun uleh gata
Dilee nyang ka ulon ingat
Mubacutpi hana meutuka
Tan meuriba ube ulat

Meudeuhak deungo haba meunan
Mat di tangan syah beurdeelat
Meudeuhak ba raja sulotan
Ateueh jalan rot nyang teupat

Dalam bumoe geupeugot jurong
Panyot tanglong hebat-hebat
Cahya peungeuh panyot tanglong
Dalam jurong rot beurangkat

Raja Hiran neuu peurbuetan
Muda bangsawan bit utoh that
Kuta cukop alat sajan
Dum angkatan hebat-hebat

Troh raja bak saboh bale
Jroh meudeune rupa jroh that
Geuleueng di ateuh peureumadani
Han tatukri mata ladat

Ateuh bale neuduek sulotan
Neuduek ateuh nyan nibak teumpat
Yoh nyan Meudeuhak peuleumah intan
Putroe bangsawan nyang indah that

Nyankeu putroe Rakna Kubandi
Jalagak Diwi judo deelät
Nyoe adekda juhan doli
Banta Syuri nyang meugah that

Laen nibak nyan ban sineuna
Asoe istana raja lihat
Meudeuhak peunikah putroe muda
Deungon raja syah beurdeelat

Lheuh meunikah poteu raja
Geubeuet do'a ngon ibarat
Ngon isyarat ka seumporna
Habeh do'a keu beureukat

Meudeuhak yue woe poteu raja
U krueng Kangsa keudeh leugat
Ba ngon putroe dum seureuta
Asoe istana sajan deelät

Mupeurasan geuba putroe
Dum sinaroe deungon rakyat
KheunMeudeuhak tuanku woe
Bek le sinoe syah œurdeelat

U krueng Kangsa blah meurandeh
Neuwoe keudeh wahe deelät
Ba ngon putroe bungong puteh
U nanggroe jeh neuwoe leugat

Meudeuhak tinggai raja neuwoe
Sajan putroe puteh lumat
Sajan rakyat wadi meuntroe
Dum sinaroe geujak leugat

Ban sare troh u krueng Kangsa
Dalam kuta neuk leugat
Raja tamong lam istana
Ngon tuan tha neuwoe leugat

Teutap raja lam meuligoe
Deungon putroe puteh lumat
Deungon rakyat muploh katoe
Bahkeu dumnoe teuduek siat

Meudeuhak duek lam meuligoe
Dum sinaroe deungon rakyat
Musoh lingka disinan toe
Ban peuet sagoe kuta arat

Bak malam nyan that meusigak
Leubeh gunjak lom ngon hebat
Brahman Kayuti carot Meudeuhak
Narit timplak meunan adat

Wahe Meudeuhak gata kupoh
Singoh beungoh deuh kulihat
Raja raja takue kukoh
Bandua boh kuboh lam had

Meudeuhak seuot balah haba
Ubak tandra raja deelat
Meunyo mate Meudeuhak ngon raja
Ka na bila sinoe sapat

Jalagak Diwi judo raja
Teuma banta aneuk deelat
Nyang han kupoh Rakna Kubandi
Judo doli Wadiharrah

Nyankeu judo raja kami
Hana mate nyoe seulamat
Raja Hiran deungo haba
Peue bicara ka paleh that

Kadang peue-peue ka jibawa
Ceulaka gata sabet meuh
Wahe Brahman salah gata
Bak bicara ulon ka arat

Kheun Brahman ho rot jiba
Pakri teukā keunoe leugat
Geutanyoe le taduek lingka
Dum seureuta wadi rakyat

Ho rot jijak keunoe teuka
Ube sutra deuh talihat
Lom Brahman jibeurkata
Miseue mula tuto jahat

Wahe Meudeuhak singoh nyata
Kuculek mata deungon deelat
Rakan Meudeuhak jawueb sigra
Taleh haba Brahman pakat

Sidroe Meudeuhak taculek mata
Bila dua sinoe meuh
Judo sulotan putroe ahli
Banta Syuri aneuk deelat

Nyang han kupoh Rakna Kubandi
Laen barangri kupoh meuh
Raja Hiran deungo haba
Meudeuhak kata bukon ajab

Hai Brahman salah gata
Got tagisa dilee siat
Tajak kalon lam meuligoe
Mantong putroe nibak teupat

Brahman kheun teuma meunoe
Ampon kamoe juhan deelat
Ureueng ka rab nyawong sampoe
Baranggapeue jikheun leugat

Peue nyang teubiet dalam gigoe
Ka jithee droe mate ka rab
Bek tapateh tuanku ampon
Meudeuhak kheun peue nyang hajat

Meuka leupah droe teungku ampon
Bak waham lon meunan kasad
Lom Brahman peugah haba
Jiseuranta di nap rakyat

Singoh uroe taeu nyata
Meudeuhak kudra han seulamat
Kuplah dada kucok hate
Singoh lahe dum talihat

Yoh nyan Meudeuhak neujaweub le
Dalam hate ka teusurat
Sidroe Meudeuhak tacok hate
Dua lagi balah nyoe pat

Jalagak Diwi banta Syuri
Dua hate kupeusapat
Raja Hiran deungo haba
Meudeuhak kata balah jawab

Ubak Brahman sabda raja
Bit ceulaka Lom paleh that
Hate saket dalam dada
Kuyue gisa dilee siat

Mangat katak kee bak muka
Nyum beulaga paleh bulat
Lom Brahman carot Meudeuhak
Hate rusak deungon deelat

Seupot uroe gata kutak
Hai Meudeuhak beu taingat
Beu tapateh ban keeli hak
Jinoe tajak woe beu leugat

Dalam kuta raja nanggroe
Jak leh tawoe dilee siat
Tajak kalon tuan putroe
Lam meuligoe tajak sasat

Raja Hiran deungo meunan
Hai Brahman ka paleh that
Pakri jikheun meukon meunan
Jak woe kaman dilee siat

Meudeuhak bijak le ambilan
Utoh han ban ceureudek that
Brahman beudoh teuma lheueh nyan
Peurjalan woe le leugat

Troh Brahman nyan di kuta
Pinto raya teutop got that
Brahman Kayuti teuma buka
Tamong lanja laju leugat

Ban neukalon lam meuligoe
Han le putroe aneuk deelat
Han le banta nyang samlakoe
Asoe meuligoe dumna rakyat

Han le bit sagai-sagai
Nyang na tinggai ka geuikat
Brahman tanyong toh pakri hai
Hana akai ube ulat

Leupah musoh keunoe teuka
Dumna gata hana ingat
Seuot rakyat lom peuhaba
Gata ceulaka akai laknat

Keunoe hana tatem gisa
Peue bicara meunan jahat
Di likot nyan troh woe raja
Dalam kuta tamong leugat

Neueu han le putroe muda
Deungon banta ka neulihat
Yoh nyan beungeh raja raya
Tumbok dada syah beurdeelat

Raja Hiran keumeung top droe
Mat di jaroe uleh rakyat
Raja pike bak hate droe
Bahle jinoe saba siat

Raja Hiran teubiet u lua
Ngon ie mata ro meurep-rep
Wahe Brahman nyang ceulaka
Paleh raya akai jahat

Kheun Meudeuhak han meutuka
Peue bicara paleh bulat
Nibak udep ateueh donya
Bahle fana kulop lam jeurat

Aeb keuji lon ngon malee
Lom meuteumee rugoe meuhat
Seubab akai gata padee
Nyum hana mee bak lon ingat

Brahman kheun meunoe lagee
Saba dilee doli halarat
Kareuna Meudeuhak le bicara
Bijaksana meunan adat

Sagai hana jeuet binasa
Po meukuta beu taingat
Teutapi meuah dudoe akhe
Wahe doli meunan nyang brat

Bak bicara ulon pike
Han teukeuse wahe deelat
Asoe meuligoe Meudeuhak puwoe
Meunan dudoe han 'adawat

Ban raja deungo haba meuntroe
Brahman sidroe kheun bak deelat
Raja Hiran jak u lua
Dum seureuta wadi rakyat

Duek ateueh gajah meurungka
Jak u lua neubeurangkat
Yoh nyan raja pangge Meudeuhak
Ureueng nyang jak bagahpi that

Jeuh bacut hana jarak
'Oh ban jijak ka troh siat
Jikheun saleuem raja Hiran
Meudeuhak yoh nyan neujak leugat

Ban sare troh bak jonjongan
Jroh analan nyan neudeelat
Lheueh meuteumee jabat tangan
Raja Hiran marit leugat

Wahe aneuk lon salahan
Wahe intan lon that arat
Leumah leumbot ngon suara
Poteu raja neukheun bi'at

Beu rayek meuah hai bentara
Lon bak gata salahpi that
Raja Hiran peugah haba
Ngon suara mangat ladat

Peureundah diri hana tara
Poteu raja meunan hajat
Ampon meuah he aneukda
Kamoe tuha beu taingat

Seubab lon deungo ureueng beubai
Hana akai ube ulat
Nyankeu seubab lon meunyeusai
Lon peugah hai bak gata that

Ureueng jaga hana akai
Kaem jawai gadoh ingat
Lagi jeuheut ateuh akai
Bicara hai kayem sisat

Lon umpama najih raya
Srah le gata jinoe siat
Meunan tamse lon umpama
Hai aneukda beu taingat

Bak akai han jeuet bicara
Meung kon gata nyang bijak that
Meudeuhak deungo meunan haba
Sabda raja syah beurdeelat

Ampon tuanku lon aneukda
Beu le do'a keu lon beu that
Tatem turot nyang seujahtra
Lon peuhaba jinoe meuhat

Beu tapateh lon peuhaba
Po meukuta jeuet seulamat
Fon jinoe kon nanggroe donya
Hingga teuma u dalam jeurat

Insy Allah he aneukda
Lon pateh gata nak seulamat
Meudeuhak peugah bak meukuta
Doli sripada beu taingat

Tatem amai limong peukara
Lon calitra jinoe bak deela:
Peurtama bek saket hate
Baranggari umat Muhammad

Laen nibak nyan bandum ahli
Dum esteuri aneuk jasad
Keudua bek tacok ngon areuta
Dum seugala aneuk rakyat

Ateueh nyang kon buet sibeuna
Bek enaya wadi rakyat
Keulhee areuta bek tabuang
Beuna larang wahe deelat

Buet nyang hareuem bek tapandang
Meung kon deungon na manfa'at
Keupeuet bek tapoh nyang meunyawong
Adat binatang ngon syari'at

Hukom beu kong bak meukuta
Raja raja bek khianat
Nyang keulimong bek doseuta
Lon calitra ubak deelat

Kareuna sulet ulee deesya
Wahe raja beu taingat
Dua krak treuk lon calitra
Wahe raja nak seulamat

Peurtama ade raja raja
That seumporna bek meularat
Keudua murah adat raja
Nyo bicara wahe deelat

Ureueng ade gaseh tuhan
Wahe sulotan lon amanat
Dalam hadih meunan saban
Lam Quran lahe nyata

Haba fitnah bek tapateh
Akhe habeh jeuet keusisat
Bek tadeungo ureueng sangeh
Beu tapateh lon peuingat

Meung tapateh ban lon peugah
Deungon afuwah Nabi Muhammad
Bek tatroh dam dalam hate
Wahe doli lon peuingat

Jeuet keu mudah nyang meuseuke
Gaseh hate aneuk rakyat
Bek syok sangka dalam hate
Ulon pike nyan keu deelat

Keu aneuk nanggroe beu na yakin
Nyang miseukin tulong meuhat
Ulon puwoe asoe istana
Lon peugisa keunoe bak deelat

Meung teutapi putroe muda
Po jroh rupa nyang baek that
Ikrar tuanku neukheun neubri
akan doli Wadiharah

Bek tuanku ubah janji
Nyang ka neubri hukom adat
Ban raja deungo Meudeuhak peugah
Dum geukeubah dalam jasad

Sijuek hate hana gundah
Gadoh sosah raja deelat
Dumna rakyat raja Hiran
Ireng sajan dum mupakat

Sireutoh sa bak bilangan
Habeu keunan dum meusapat
Brahman Kayuti sajan seureuta
Laen teuma aneuk rakyat

Raja Hiran Meudeuhak ba
Dalam kuta jak eu teumpat
Neubri horeumat raja raja
Neupeumulia leubeh 'izzat

Meudeuhak sujud ubak raja
Lheueh nyan neuba syah beurdeelat
Ban sare troh dalam kuta
Hireuen raja kalon teumpat

That meusigak dalam kuta
Dum peukara leungkap alat
Bale bak duek that meudeune
Rakyat rame sinan le that

Di leuen bale jeuet tanari
Geuleueng keurusi nyang indah that
Lingka papeuen dum geuuke
Ulee ili bandum geucat

Rata labo dum meuriti
Maseng keurusi maseng teumpat
Geutet panyot bandum rata
Peungeuh raya sangat hebat

Taloe panyot dum meujintra
Sang-sang rupa bagoe hekeumat
Watee geutarek nibak taloe
Len panyot nyoe wahe sahbat

Laen nibak nyanpi le bagoe
Dum sinaroe leungkap samad
Teumpat bak duek dalam kuta
Le that rupa sangat hebat

Raja Hiran kalon rupa
Dum seugala deungon rakyat
Raja laen sireutoh sa
Meudeuhak ba jeuep-jeuep teumpat

Geutamong u dalam kuta
Seugala raja kalon teumpat
Raja Hiran ulon seubot
Sang teumakot muka pucat

Brahman Kayutipi teumakot
Sang rab mawot deungon rakyat
Ban sare troh u pinto kuta
Patarakna Meudeuhak ikat

Jeuep-jeuep pinto dum teubuka
Hireuen raja pandang ladat
Raja kalon buet Meudeuhak
Jroh meusigak bak geulihat

Hana jeumba meunan layak
Utoh Meudeuhak peugot teumpat
Lheueh nyan neupeuduek raja Hiran
Deungon rakan dumna rakyat

Sireutoh sa raja sajan
Nyang analan hebat-hebat
Maseng-maseng ateueh geuta
Dum seumua raja deelat

Meudeuhak peugah ubak raja
Lon peuhaba ubak deelat
dan lagi seureuta bunda
Lon peuhaba aneuk meukuta teumpat

Lon peukawen tuan putroe
Yoh saboh roe dalam surat
Ka na ikrar nibak kamoe
Judo putroe raja deelat

Meudeuhak meututo deungon raja
Dum seugala wadi rakyat
Leumah leumbot ngon suara
Neupeuhaba ubak deelat

Lheueh nyan Meudeuhak neuba raja
Ubak kuta laen teumpat
Deungon raja sireutoh sa
Brahman seureuta deungon deelat

Ban sare troh dalam kuta
Peudeuk raja ateueh teumpat
Maseng-maseng ateueh geuta
Patarakna buet Meudeuhak

Teutop pinto tingkap kuta
Han le nyata taeu rakyat
Seupot seupeuet glap-gulita
Teumakot raja deungon rakyat

Kheun Meudeuhak ubak raja
Toh bicara jinoe deelat
Ulon sidroe deungon gata
Dalam kuta klam duleumat

Raja Hiran jaweueb haba
Nibak gata dumpeue pakat
Meudeuhak suet peudeueng di jaroe
Neuboh bak takue raja deelat

Neupeutakot raja sidroe
Peudeueng di jaroe Meudeuhak mat
Raja Hiran sang teukeujot
Yo teumakot ka meutat-tat

Bak lakuan ie mata sret
Hate lupot akai dahsyat
Sireutoh sa taprang nanggroe
Talo sampoe deungon siat

Tan soe laen bak jameuen nyoe
Tarek han soe miseue deelat
Hingga taprang raja kamoe
Watu nanggroe raja deelat

Taba rakyat muploh katoe
Wadi meuntroe tapeusapat
Troh tujuh thon taprang nanggroe
Han ek sampoe ban tahajat

Hingga taprang raja kamoe
Teuma tawoe le u teumpat
Hingga datang ka troh keunoe
Bak teumpat nyoe lon jak siat

Han cit hase buet tuanku
Han troh napsu wahe deelat
Hana salah meung sigeutu
Hai tuanku raja deelat

Beureukat mukjizat Rasul Allah
Ngon meutuah doli halarat
Deungon tolong Poteu Allah
Deungon iradah Rabbon 'Ibad

Ulon tanyong bak uroe nyoe
Tuanku droe kheun beu teupat
Panca Larah supo nanggroe
Dum sinaroe raja deelat

Nanggroe laen sireutoh sa
Supo areuta kheuen beu teupat
Raja Hiran jawueeb haba
Neubeurkata ngon nasihat

Panca Larah nanggroe gata
Sireutoh sa laen dapat
Gata Meudeuhak poteu raja
Bukon seunda ube teupat

Cut Meudeuhak lom beurkata
Ubak raja syah beurdeelat
Kadang teumakot po meukuta
Neubri areuta keu lon le that

Jawueeb raja kon teumakot
Ube patot lon boh surat
Ulon ubah hana patot
Jeuet keu karot akhe meuhat

Ulon hana ubah sidroe
Ka bak jaroe ulon tamat
Ho rot ubah nibak kamoe
He aneuk droe lon ka tamat

Ban nyang hajat nibak gata
Lon peucahya nak seulamat
Nanggroe-nanggroe hukom gata
Dum peukara deungon rakyat

Kheun Meudeuhak sabet beuna
Wahe raja lon peuingat
Keu lon neubri nanggroe raya
Dum bicara got talihat

Ateuh ulon nyo seukali
Ngo lon kheun kri wahe deelat
Nyang hak tuanku cit ka mate
Bak lon pike nibak adat

Di tuanku bit teukeuse
Dalam hate han got kasak
Raja kamoe taneupoh mate
Meunan pike nibak deelat

Hana Allah bri seuleusoe
Hana sampoe ban neuhajat
Meunyo meunan hajat doli
Beu troh janji awhe deelat

Jinoe neupoh lon bu mate
Neukoh lihe nak troh hajat
Jaweueb raja hana patot
Buet nyan karot jeuet keu cacat

Poteu raja panyang syawe
Le that pike ngon ibarat
Peurbeutan nyoe han ek hase
Bak lon pike akai singkat

Leubeh Meudeuhak ngon lon sidroe
Akai pindoe ngon bijak that
Dum bicara han sibagoe
Deungon kamoe lagi kuat

Ulon leumoh lagi tuha
Meudeuhak muda sangat hebat
Lagi gagah ngon peurkasa
Meunan kira syah beurdeelat

Raja Hiran lom meusabda
Bak lon hana nyang khianat
Bek ubah niet dalam dada
Bek meutuka keu halarat

Gata aneuk lon seujati
Nak tatukri lon kheun teupat
Hukom gata udep mate
Barangari aneuk rakyat

Nibak ulon hana teukeuse
Bak lon pike meunan nyang brat
Harap keu gata hai boh hate
Walee mate rela lon that

Jaweueb Meudeuhak sabda raja
Neupeunyata lom bak deelat
Harap ulon po meukuta
Keu ayahda donya akhirat

Panca Larah nanggroe kamoe
Lon peujaroe nyan keu deelat
Sireutoh sa raja laen
Ulon saleh akan deelat

Peurseumbahan nibak kamoe
Bungong jaroe lon bri meuhat
Jinoe peue na tuanku droe
Nibak kamoe neumeuhajat

Raja Hiran jawueb sabda
Hai aneukda lon meuhajat
Nanggroe ka lheueh tabri keu hamba
Milek gata raja deelat

Hajat ulon bek le tawoe
Taduek sinoe lon bri teumpat
Nanggroe di droe dumpeue di droe
Bek le tawoe taduek leugat

Ulon balah keubaekan
Aneuk badan nyankeu hajat
Akan teutapi nyang lon harap
Rabbon 'Ibat Tuhan halarat

Jawueb Meudeuhak sabda sulotan
Neukheun nyoe ban ubak deelat
Lom meusabda raja Hiran
Neukheun nyoe ban di nap rakyat

Jeuet keu meunan peurbuatan
Seubab Brahman ceulaka that
Hana akai pike syawe
Dalam hate hana ingat

Peue nyang leumah lon pubuet le
Hana pike musyawarat
Beurayek meuah aneuk boh hate
Lon ka han le akai dahsyat

Raja Hiran neubeudoh le
Muda beulia neucom leugat
Sira neucom sira neumoe
Meuteutaloe ie mata leugat

Wahe aneuk po samlakoe
Beudoh jak woe ubak teumpat
U istana gata ulon ba
Jak lam kuta sajan deelat

Yoh nyan Meudeuhak neukeulua
Dum seugala deungon rakyat
Deungon tandra dum meusak-sak
Rakan Meudeuhak dumna rakyat

Lheueh peujamee geubri salen
Laen-laen dumna rakyat
Meuh ngon pirak got nyang laen
Mata euncien hareuga le that

Gajah guda lom peue laen
Leubeh laen gaseh deelat
Meudeuhak woe leugat neutren
Lheueh neusalen uleh deelat

Limong reutoh geubri peudati
Uleh doli nyang kaya that
Padum laen nyang Brahman bri
Lheueh meujanji deungon deelat

Dua nanggroe beu seumporna
Lam seujahtra nibak adat
Tuhan neubri jroh lagoina
Bandua beu na mupakat

Tulong-meunulong ngon syeedara
Raja raja beu mupakat
Yoh nyan raja neupeunulang
Gaseh sayang nibak deelat

Tuan putroe Rakna Kubandi
Judo doli Wadiharah
Pulang areuta keu si nyak ti
Woe keumbali maseng teumpat

Meudeuhak intat Jalagak Diwi
Akan doli neuwoe leugat
Laen-laen dum barangri
Woe keumbali dumna rakyat

U Panca Larah dum neuyue woe
U meuligoe raja deelat
Yoh nyan Meudeuhakpi ka neuwoe
Ka got nanggroe amanpi that

Ban sare troh u krueng Kangsa
Bandum lasyka surohan deelat
Wadiharah neuwoe lanja
Sajan neuba puteh lumat

Nanggroe Watu ka troh neugisa
Balatandra dumna rakyat
Maseng-maseng woe u nanggroe
Bak teupat droe maseng babat

Deungon Meudeuhak sajan neuwoe
Muploh katoe neuba rakyat
Di krueng Kangsa Meudeuhak ploh
Han neuwoe troh ubak deelat

Teutap sinan neupeukukoh
Meudeuhak utoh akai le that
Haba Meudeuhak teuduek 'oh nan
Lon karangan laen hikayat

Lon boh lagee ngon atoran
Wahe teelan ulon surat
Lon peutammat hikayat Meudeuhak
Ureueng bijak akai le that

Kakeu tamat kisah lon nyoe
Tameurunoe wahe sahbat
Do'a paneuk lon meuhajat
Dony i akhirat beu seulamat

Nyang po surat bah lon ajok
Teungku Akob geuhei nama
Jampang-jampang gop meuhajat
Mangat tatupat po areuta

Nyang seumurat han lon peugah
Malee babah bak syeedara
Bahkeu dumnun wahe sahat
Bek payah that bak neubaca

= T A M A T =



PN BALAI PUSTAKA — JAKARTA



Perpustakaan
Jenderal Kebu

899.223:
HIK